



راسين في الحلال (224) بقلم الكاتبة منال سالم

فيل في التراكب الشعبي (يا بكت من وفتق راسين في الحلال) ،
 وفيل أيضا (امشي في جنازة ، وما تمشي في جوازة) ..
 وهنا مرصد الخرس .. نعمناك من هو دعم اللزجات ،
 ومن يضر ملها كشرار الطريفة من هاندما ..

(راسين في الحلال)

هي كوميديا رومانسية (باللمحة العامية المصرية)
 مستوحاة من قلب المجتمع المصري المعاصر
 حيث الحب الخفي ينفث وسط متاعب الحياة ومشاكلها
 في مزج بين الواقع والخيال ..

www.rewity.com

رواية
 نوره من ودي الاعضاء
 تطعيم كاردينيا 78

كومبيريا
ارومانسريه

راسين في الحلون

تأليف / منال محمد سالم

2016

رواية

راسين في الحلال

بقلم

منال محمد سالم

2016

إهداء

إلى زوجي الحبيب الذي شجعني لكي أكمل ما أحب
بشغف ..

وإلى رفيقتي الغاليات اللاتي قمن بإلهامي بتلك
الفكرة فظهرت إلى النور ..

وإلى روح العزيزة (**جاكلين**) التي رحلت عن عالمنا ،
ولكن لم تغبْ إبتسامتها عنا ..

المقدمة

قيل في التراث الشعبي (يا نخت من وفق راسين في الحلال) ، وقيل أيضاً (امشي في جنازة ، وامتشيش في جوازة) .. وهنا مرط الفرس .. فنناك من هو دائم للمبجات ، ومن يفر منها كفرار الطريدة من صائدبا ...

(راسين في الحلال) هي كوميديا رومانسية مستوحاة من قلب المجتمع المصري المعاصر حيث الحب الذي ينبت وسط متاعب الحياة ومشاكلها في مزج بين الواقع والخيال ...

المخلص

جاء مشتاقاً من أرض الأحلام ، ليحقق بشغفٍ - كما ظن - الأسال
، فتفاجيء بأنها مجرد أوهام ..

فانخرط رغماً عنه في مجتمعٍ محظورٍ على الرجال ، وأصبح لزاماً عليه أن
يتخوض تجربة (راسين في الحلال) ...

ترى هل سينجح في خوض غمار تلك التجربة الشقية؟ أم سيرفع هو
راية الاستسلام؟!

الفصل الأول :

صاح صوت الميكروفون الداخلي في مطار القاهرة الدولي ليعلن عن وصول الطائرة القادمة من الولايات المتحدة الأمريكية..

وقف أحد الشباب من ذوي البشرة الشرقية السمراء يراقب بأعين ثابتة جميع الدالفين إلى الخارج ، و..

-رامي بنبرة قلقة : يا ربي ، ده كله خرج ! أومال هو مش باين ليه ؟؟

راقب رامي خروج بعض السيدات ، وكذلك الأطفال الممسكين بأيدي آبائهم ، وبعض الرجال المهمين ، ولكن لم يظهر ذلك الشخص المنتظر ..

زفر هو في ضيق ، ثم رفع يده لينظر إلى الساعة التي يرتديها في معصمه ، و....

-رامي بنبرة منزعجة : ايه اللي أخره ده كمان

.....

رامي سرحان عليه شاب في منتصف العشرينات من عمره ، يعمل مع والده في التوكيل الخاص بماركة شهيرة لإحدى السيارات .. تخرج رامي من كلية (تجارة انجلىش) بتقدير جيد ، فأرادت والدته السيدة سوزان أن يكمل تعليمه مع ابن اختها في الولايات المتحدة ، ولكنه رفض وأصر على البقاء في القاهرة ، و أصبح ناجحاً في عمله مع والده المهندس سرحان ...

لدى رامي خصال طيبة ، وتبدو جلية على قسماات وجهه ذو البشرة الفاتحة ، ورغم هذا فشخصيته مميزة ، أما عينيه فهما عسليتان ، وشعره قصير يميل للون البني ، لديه قامة طويلة ، وجسد نحيف ولكنه مشدود .. يعشق رامي سباقات السيارات ، ولديه من المعلومات عنها ما سهل عليه تحقيق النجاح مع والده ..

.....

لوى رامي فمه في امتعاض ، ورفع يده عالياً على شعره ليعبث بخصلاته القصيرة ، ثم ..
-رامي بنبرة شبه ضائقة : لولا إنك ابن خالتي كان زمانى سيبتك ومشيت من بدري ...

.....

تحرك شاب ما في اتجاه بوابة الخروج ، كانت ملامح وجهه غربية بشكل واضح ، فبشرته بيضاء ، عينيه زرقاء ، وشعره ناعم يميل للون الكستنائي .. أما جسده فهو رياضي ممشوق ، عضلات ذراعيه تبرز من قميصه السماوي الذي يتناسق مع لون عينيه .. بينما تكاد ترى عضلات وركيه تخترقان بنطاله الجينز الأسود ..

شعر ذلك الشاب بحرارة العاصمة تلفح جسده ، ففتح أزرار قميصه حتى منتصف صدره لتظهر تلك القلادة الفضية التي يرتديها حول عنقه ، وتحمل رمز السلام العالمي .. ثم رفع يده الممسكة بالنظارة القاتمة ليغطي بها عينيه ..

حقاً كان ملفتاً للأنظار .. واعتلى وجهه ابتسامة رضا عن حاله حينما لمح نظرات الإعجاب الممزوجة بالانبهار في أعين الفتيات .. فهو يعشق أن يكون مميزاً بين الآخرين .. وهو واثق من أنه كان كذلك .

سحب حقيبة سفره الكبيرة ذات اللون الأزرق القاتم من مقبضها المعدني ، وسار بخطوات واثقة نحو بوابة المطار ..

جاب ببصره بين الواقفين باحثاً عن رامي ... وظهرت ابتسامة عريضة على وجهه حينما لمح الأخير ..

لوح آياز بيده إلى رامي ، ثم سار بخطوات ثابتة في اتجاهه ، وقام بنزع نظارته القاتمة .. ومن ثم أرخى قبضته عن مقبض الحقيبة ليصافح ابن خالته و...

-آياز بنبرة جادة : Hello dude (مرحباً بك صديقي)

-رامي بنبرة متحمسة ، ونظرات دافئة : حمدلله على السلام يا إيزوو ، كل ده تأخير يا بني ، ده أنا فكرتك بتشتغلني ، ومش جاي ولا حاجة

-آياز بنبرة هادئة : طالما أنا اديتك كلمة يبقى خلاص ، خليك واثق فيا

-رامي بإهتمام وهو ينظر إلى حقيبة السفر : بس الواضح إنك ناوي تطول المرادي

-آياز وهو يطمش شفتيه في جدية : احتمال ، على حسب الوضع

وضع رامي يده على ظهر آياز ، ثم أمسك بحقيبة السفر ..

-رامي مبتسماً ، وبنبرة متشوقة : طب يالا لأحسن خالتك نفخاني اتصالات من الصبح

-آياز بنبرة مهمة : طنط سوزان ، وحشاني أوي ، صحتها عاملة ايه؟؟

-رامي بنبرة شبه ضائقة : يعني ، يوم كده ويوم كده ، ما أنت عارفها عدوة الدكاترة ، والأدوية !

-آياز مبتسماً ابتساماً زائفة : انت هاتقولي ، يالا Let's .. Go

ثم سار كلاهما في اتجاه إحدى السيارات المصفوفة أمام أحد الأرصفة في منطقة الانتظار الملحقة بالمطار .. وضع رامي الحقيبة في صندوق السيارة الأسود – ماركة BMW ، في حين جلس آياز في المقعد الأمامي ، ورمق من حوله بنظرات متفحصة ..

دار رامي حول سيارته الغالية ، ثم ركب إلى جوار ابن خالته ، وأدار المحرك ، ومن ثم انطلق بها نحو منزله ..

.....

آياز كامل الشناوي ، شاب في أواخر العشرينيات من عمره قد وصل توأاً إلى الأراضي المصرية بعد فترة طويلة قضاهها مع أسرته في الولايات المتحدة الأمريكية ، وتحديداً في ولاية أريزونا ، حيث نشأ وتربى في كنف والديه (صوفيا و كامل) اللذين أغدقا عليه بالحب والعاطفة منذ نعومة أظافره .. أنهى آياز تعليمه الجامعي بتفوق مما جعله مؤهلاً لاستكمال دراساته العليا في جامعة مرموقة هناك ، وأيضاً سهّل عليه الحصول على وظيفة مناسبة في مجال

تخصصه ، حيث درس علم (رياض الأطفال) ، فأصبح
من أمهر معلمي تلك المرحلة ..

.....

توقفت سيارة فارهة حمراء - موديل (الفولفو) - أمام
بوابة معدنية خضراء تُحيط بصرح تعليمي شاهق ، ذو مبانٍ
حديثة الطلاء ، ونوافذ زجاجية عاكسة للأضواء ، ثم
ضغطت سيدة وقور - في أواخر الأربعينات من عمرها -
على بوق السيارة ، لينتبه أحد الأشخاص إلى حضورها ،
فنهض مهرولاً من على مقعده المعدني ، وركض في اتجاه
البوابة ، وقام بفتحها على مصراعيها ، لتمر السيارة إلى
الداخل .. ثم أغلق البوابة بعدها وهو يلوح لها و...

-إعتماد بنبرة جادة وأمرة ، وهي ترفع أحد حاجبيها :
ماتسيبش البوابة يا عم سيد ، وإقلها كويس
-سيد بنبرة رسمية : حاضر يا مس اعتماد

ثم قادت السيارة في اتجاه الجراج الملحق بهذا الصرح
التعليمي الضخم ، لتصفها أسفل المظلة التي تحجب أشعة
الشمس الحارقة عن السيارات المصفوفة هناك ..

ترجلت الأستاذة إعتاد من سيارتها بعد أن جمعت أشياءها
وحقيبتها الجلدية الكبيرة من المقعد المجاور لها ،
وسارت بخطوات ثابتة في اتجاه المبنى الذي تديره ..

.....

الأستاذة إعتاد فوزي هي ناظرة مرحلة رياض الأطفال
بمدرسة (اللافانيا) الدولية ، والتي تم افتتاحها مؤخراً
لتدخل المنافسة مع باقي المدارس القريبة منها على طريق
القاهرة – الإسماعيلية الصحراوي .. كانت تعمل لسنوات
رئيسة لقسم الرياضيات بأحد المدارس التجريبية ، إلى أن تم
الإعلان عن وظيفة شاغرة في تلك المدرسة الجديدة ،
فتقدمت إليها على الفور ، ونجحت في الحصول على النظارة

..

الأستاذة إعتاد هي أم لثلاثة أبناء ، شابين ، وفتاة صغيرة
.. تزوج الشابين ، وبقيت الفتاة لتنتهي تعليمها الثانوي ..
توفي زوجها قبل ثلاثة أعوام ، ومنذ وقتها و قد كرست
حياتها لتراعي أبنائها ، ولتكمل عملها الذي صار شاغلها
الأكبر ...

.....

مرت الأستاذة إعتاد بإثنتين من العاملات بمبنى رياض الأطفال ، ورمقتها من خلف نظارتها الطبية بنظرات حادة قبل أن تتوقف عن السير أمامهما لتحدهما بنظرات أكثر حدة و...

-إعتاد بنبرة شبه منزعجة وهي تشير بيدها : الرخام ده يتلمع كويس ، والجاردن تتكنس ، ومدخل المبنى يتمسح ، مش كل يوم هافضل أعيد وأزيد معاكو

-روحية بنبرة مرتعدة : حاضر يا مس إعتاد

-ناصرة بنبرة عادية : يا مس إعتاد أنا نضفت الجاردن ، بس الهوا هو اللي جاب ال آ...

-إعتاد مقاطعة بنبرة غاضبة : ده مايخصنيش ، أنا كل اللي يهمني ال Image (صورة) بتاعة السكول تكون على مستوى .. احنا انترناشونال ، مش حاجة أي كلام

-روحية وهي تمط شفيتها في عدم اقتناع : طيب

-إعتاد بلهجة شبه أمرة ، ونظرات محذرة : ربع ساعة وهاطلع أشوف اللي أنا قولته اتعمل ولا لأ

-ناصرة على مضض : ماشي يا مس

ثم تركتهما وانصرفت ، فرمقتها العاملتين بنظرات استتكار و...

- ناصره بنبره متشنجه : الوليه دي مابتريحش نفسها ، هاتك يا اوامر ، واحنا مش هنرتاح منها أبداً
- روحيه بنبره متعصبه : الله يمسيتها بالخير أبله دولت ، كانت زي النسمة معانا ، لولا بس الظروف اللي حصلتها كنا فضلنا زي ما أحنا عايشين في النعيم
- ناصره بنبره ضائقة : اه والله ، بقالنا سنة في الغلب ده ، ومش بنرتاح !
- روحيه بنبره ساخطة : والبعيده مابتريحش نفسها أصلاً
- ناصره وهي تشير بيدها ، وبنبره عادية : طب يالا خلينا نخلص بدل ما نسمعنا كلمتين في جنبنا منها ، والواحد مش ناقص عكنة
- روحيه وهي توميء برأسها إيماءة خفيفة : على رأيك

ثم إستأنفت كلتاها بقية العمل وهما تتغامزان وتتهامسان بكلمات غير مفهومة ..

.....

في غرفة للمعلمات ملحقة بذات المبنى ،،،

أرجعت رأسها للخلف وهي تفهقه عالياً ، ثم اعتدلت في جلستها لتتنظر إلى رفيقتها بأعين دامعة من كثرة الضحك و...

-ريمان بنبرة بشوشة : مش ممكن ، انتي رهيبه

-عاليا بنبرة دافئة : عشان تعرفي بس

-ليلة بنبرة ضاحكة : يا بنتي ، دي محدش أدها

أخذت ريمان نفساً مطولاً لتسيطر به على نوبة الضحك التي إنتابتها ، و..

-ريمان بهدوء مصطنع : ارحميني شوية ، هاموت من الضحك

-عاليا مبتسمة ، وبنبرة رقيقة : حاضر ، عشان خاطر بس

.....

ريمان قاسم هي فتاة مدللة في أوائل العشرينات من عمرها ، تخرجت حديثاً من كلية التربية بالمملكة المتحدة كمعلمة للغة الإنجليزية ، حيث قضت الخمس سنوات الأخيرة من عمرها بصحبة والدتها هناك لكي تكمل تعليمها الجامعي ، وبعد أن تخرجت التحقت بالعمل في أحد المدارس الخاصة هناك لمدة عام ، ثم عادت للقاهرة مجدداً لتستقر فيها ، ومن ثم بدأت العمل بمدارس (اللافانيا) الدولية ...

تمتلك ريمان بشرة قمحية تميل للبياض قليلاً ، أما عينيها فهما خضراوتان ، وذات أهداب كثيفة .. في حين كان شعرها أسوداً حريراً مع بعض التموجات المنتشرة في أطرافه .. أما قوامها فكان إلى حد ما رشيماً متناسقاً مع طولها المعقول

...

رفيقتها المقربة هي عاليا راشد ، والتي تخرجت من كلية رياض الأطفال لتعمل كمعلمة لمرحلة ما قبل التعليم الأساسي .. برعت عاليا في مهنتها كثيراً ، وأثبتت جدارتها منذ اليوم الأول ..

انتقلت للعمل في مدارس (اللافانيا) الدولية عن طريق ما يسمى بـ (الإعارة الداخلية) ، فهي تعمل في الأساس في مدرسة حكومية ، وفي العام المنصرم أرسلت الإدارة التعليمية طلباً لمدرستها أفادت فيه بحاجة تلك المدارس الدولية لمعلمات رياض اطفال ذات كفاءات مميزة ، فقام مدير المدرسة بترشيح اسمها للعمل ، وبالفعل انضمت إلى فريق العمل الخاص بتلك المدارس لتدرس للأطفال مادة (اللغة العربية) ..

تمتاز عاليا بأن بشرتها خميرية ناعمة ، وعينيها العسلية كالمها ، تُحبذ النظر إليهما .. وكما يُقال هي تجيد لغة العيون بهما .. أما جسدها فهو رشيقي ، ورغم هذا فهي لا تبرز

مفاتها منه لأنها فتاة محجبة تراعي عند انتقاء ثيابها أن
تختار الأنسب لها ..

.....

ثم دلفت إلى داخل الغرفة فتاة ثالثة ، وعلى وجهها نظرات
مرتبكة و..

-سارة بنبرة قلقة : بنات ، مس اعتماد جت ، خدوا بالكم

-ريمان وهي تلوي فمها في امتعاض : اووف ، هي مش
بتغيب خالص

-ليلة بتأفف : لأ طبعاً

-عاليا بنبرة استهجان : دي بتنزلنا في أجازة العيد ، يعني
استحالة تغيب لو الدنيا اتشقلبت حتى

-سارة على مضض : طيب خلاص ، وطوا صوتكم لأحسن
نبص نلاقيها فوق دماغنا

-ريمان بهدوء مصطنع : كل واحدة تشوف وراها ايه
لأحسن تيجي تعملنا فيلم على الفاضي

.....

سارة عصام الفتاة المحبوبة التي تأسر القلوب ببساطتها
مع الجميع ، هي خريجة كلية التربية ، قسم اللغة الانجليزية

، وقد التحقت بمدارس (اللافانيا) بعد تخرجها مباشرة ،
واستطاعت أن تضع اللمسة الخاصة بها من خلال عملها مع
الأطفال ..

هي فتاة محجبة ، وذات ملامح وجه طفولية بريئة ، ولكنها
ناضجة في تفكيرها ، عينيها بنيتان ، وبشرتها بيضاء للغاية
... وجسدها إلى حد ما متناسق مع طولها ..

.....

أدارت سارة رأسها في كل الإتجاهات بحثاً عن بقية
زميلاتها ، ثم ..

-سارة متسائلة في حيرة : أومال بقية البنات فين ؟

-ليلة بنبرة عادية وهي تشير بيدها : في الكانتين ، بيشتروا
أكل

-سارة وهي تزم شفيتها في تعجب : مميمم.. طب هاتجيبوا
أكل عشان الفطار ولا آآ...

-ريمان مقاطعة بجدية : أنا لأ ... عندي انتفاخ ومحتاجة
أخس شوية

-سارة بتهكم : هو انتي فيكي حاجة عشان تخسي !!!

-ريمان بنبرة اكثر جدية ، وهي تضع يدها على معدتها :
برضوه ، أنا محتاجة أنزل كرشي شوية ، مش معقول يبقى
جسمي حلو ، وطالعلي كرش

-عاليا بنبرة مازحة : ده عز يا بنتي ، أي حد يسألك فلوسك
بتروح فين ، تردي بكل ثقة في كرشي طبعاً
-ليلة بنبرة ساخرة : وكله يهون عشان الكرش

.....

ليلة الأيوبي – خريجة كلية الآداب ، قسم لغة إنجليزية –
هي فتاة متواضعة ، تعشق الكماليات ، وتحبذ انتقاء كل ما
هو غريب .. ملامح وجهها بسيطة ، ولكنها رغم هذا تمتلك
شخصية قوية ومتفردة .. عينيها عسلتان مليئتان بالدفء
والحنان .. ورغم قصر قامتها إلا أنها تهتم برشاقة جسدها ،
ودائماً ترتدي الأحذية ذات الكعوب العالية ..

ارتدت ليلة الحجاب مؤخراً ، وحاولت قدر الإمكان أن تجعل
ذوقها الراقى في انتقاء الملابس يتناسب مع مظهرها الجديد
..

.....

ضحكت الفتيات على دعابة عاليا الأخيرة ، ثم بدأن بالتحرك
عن مقاعدهن ، و انتشروا في أرجاء الغرفة ليستأنفن
عملهن المعتاد ...

ثم دلفت إلى داخل الغرفة فتاة رقيقة تحمل في يدها مفكرة
ورقية صغيرة ، ومدت يدها لتعدل من وضعية الحجاب
المتدلي من رأسها و...

-أية بنبرة هادئة : هاي يا بنات

التفت إليها الجميع ، وبادلناها التحية و...

-سارة بهدوء : يويو ، منورة الـ Staff Room (حجرة
المعلمين)

-ريمان بنبرة رقيقة : هاي عليكي

-عالي بنبرة مزحة وهي تلوح بيدها : يا هلا فيكي ، إشلونك
، شو أحوالك ، شو تسوي

ابتسمت لهم أية ابتسامة مصطنعة ، ثم ..

-أية متسائلة بحيرة : أومال بقية البنات فين ؟

-ليلة بصوت هاديء : في الكانتين

مطت أية شفيتها ، ثم هزت رأسها قليلاً ، و....
-أية بنبرة طبيعية : بقولكم كمان 10 دقائق مس اعتماد
هاتعمل اجتماع في أوضة الملتيميا ، محدش يتأخر ، أوكي
-ليلة وهي تعقد حاجبها في استغراب : ليه ؟
-عاليا بنبرة محتجة : هي مش بتزهق ، ما كانت لسه عاملة
اجتماع من كام يوم
-أية وهي تتهد في ارهاق : بصوا أنا ماليش دعوة ، أنا
ببلغكم باللي هي قالته

وضعت ريمان كف يدها على كتف ليلة ، ثم رمقت أية
بنظرات جادة ، و...

-ريمان بهدوء : اوكي يا أية ، احنا شوية وهنحسك
-أية بنبرة شبه جادة : طيب ماتسوش تبلغوا الباقي ..
-سارة على مضض : طيب .. أنا هاتصل بيهم ، واخليهم
يجولنا على هناك
-أيه بإيجاز : تمام ...

.....

في فيلا سرحان عليه ،،،

مرت السيارة عبر البوابة الحديدية بعد أن قام الحارس بفتحها ، وإلقاء التحية على رامي ، ثم قادها بحذر في اتجاه الجراج الخلفي الملحق بتلك الفيلا ذات اللون البيج الذي يسر الأنظار ..

ترجل آياز أولاً من السيارة ، واتجه ناحية صندوقها ، ثم قام بسحب حقيبته للخارج ، ومن ثم أغلق الصندوق ..

أوقف رامي المحرك ، وترجل هو الآخر منها ، و..

-رامي بنبرة متشوقة ، ونظرات ممعنة : ايه رأيك في الفيلا بتاعتنا

-آياز بنبرة مرحة : أنا لحد الوقتي ماشوفتش غير الجراج ، أديني فرصة أدخل جوا ، واقول رأيي

-رامي مبتسماً وهو يغمز : اه صح .. قولي أخبار مزز بره ايه ؟

-آياز وهو يلوي فمه في امتعاض : هما دول بنات

اتسعت عيني رامي في ذهول ، وعقد حاجبيه في اندهاش واضح ، و..

-رامي وهو فاغر فمه في تعجب : يا شيخ !! أما اللي عندك مش بنات ، أومال تقول ايه على اللي عندنا؟؟ دول غفر ولاد عساكر يا إيزوو !!

-آياز بنبرة محتجة ، ونظرات ضيقة : مش للدرجادي يعني
-رامي بتهكم : واضح إن أمريكا غيرتك أوي .. بكرة تشوف
أشباه البنات ، وتعرف إن أنا عندي حق
-آياز بنبرة غير مهتمة : مش هاتفرق ، أنا جاي عشان
أشتغل ، مش فاضي للهري ده
-رامي بعدم اقتناع : هنشوف ..
-آياز بجدية وهو ينظر حوله : خرينا ندخل ، مش هانقضيه
هنا

.....

قرع رامي الباب ، وظل ملتفتاً إلى آياز يحدثه في بعض
الأمور العامة إلى أن فتحت الخادمة الباب ، وجحظت
عينها حينما رأت ذلك الشاب الوسيم الواقف إلى جوار ابن
رب عملها ، فاعتدلت في وقفها ، وظلت ملسطة عينها
عليه و..

-آياز بنبرة هادئة : Sure ..

-رامي بصوت أجش : اوكي !

ثم استدار رامي برأسه ليجد وردة الخادمة تسد الباب
بجسدها الممتليء ، فحدها بنظرات جادة و..

-رامي بنبرة جادة : وردة ، انتي معايا ، ولا !!!
-وردة بنبرة متحمسة : هه ، رامي بيه ، اتفضل

ظلت الخادمة وردة متسمة في مكانها ، ومحدقة في آياز
بنظرات شرهة ، فرمقها رامي بنظرات شبه منزعة ، في
حين أشاح آياز بوجهه بعيداً عنها ، فاعتلت ابتسامة
عريضة وجهها ..

-رامي بنبرة شبه ضائقة : طب وسعي شوية يا وردة ، ولا
هنخترقك عشان نعدي

-وردة وهي تتنح في حرج : احم .. لا مؤاخذة يا رامي بيه
، أصل عقلي مش فيا

-رامي بتأفف : ليه يعني

-وردة بابتسامة بلهاء : مش كل يوم بنشوف الحلويات دي ،
ده تقفيل برا يا رامي بيه

-رامي باستغراب شديد : نعم ياختي ؟

-وردة بأريحية وهي تغمز بعينها : الشاب الـ (الأفرانكة)
اللي معاك ده

استدار آياز برأسه في اتجاه الخادمة وردة ، ورمقها
بنظرات حادة قبل أن يقاطع بـ ...

-آياز بنبرة شبه متشنجة : على فكرة أنا مصري ، دي مين
دي يا رامي ؟؟؟!!

-وردة بنبرة متلهفة وهي تضع يدها على صدرها :
محسوبتك وردة ، أنا الهاوس بيكر

-رامي مصححاً بنبرة شبه ساخطة : هاوس كبير (House
Keeper) يا وردة ، اتعلميها بقى ، خدي الشنطة ووديها
أوضة الضيوف

ثم مد يده إليها بالحقيبة ، فتناولتها منه ، وتهدت في
حرارة ، ثم سارت في اتجاه الدرج ..

زفر آياز في انزعاج ، ثم وضع يده على كتف رامي ، و...

-آياز هامساً وهو يشير بعينيه : ودي اتلمتوا عليها منين ؟

-رامي بضجر : الحاج سرحان جابها من البلد عشان تخدم
هنا

-آياز بعدم فهم : بلد ايه؟؟ أنا مش فاهم حاجة

-رامي بنبرة عادية تحمل التهكم في طياتها : انت عارف إن
المهندس سرحان غاوي يعمل الخير ويرميه للبحر ، الدور
ده بقى قال يجبيننا قنديل البحر عشان يرازي فينا

-آياز بنبرة حائرة : برضوه مافهمتمش

-رامي بنبرة متأففة : يعني هو حب يساعد بنت واحد من
الفلاحين الغلابة اللي من بلده عشان تصرف على عيلتها ،

فشغلها خدامة هنا ، ومن وقتها تقريباً إحنا اللي بقينا
شغالين عندها مش هي .. النصيبة إنها عابجة أبويا ،
وبيقولك لهلوبة ، ومالهش زي !
-آياز بنبرة مدهوشة : غريبة

-رامي بنظرات منزعة ، ونبرة استنكار : أنا لو عليا كنت (
كـرشتها) من زمان

-آياز بنظرات ضيقة ، ونبرة استغراب : ايه؟؟

-رامي بضيق : أقصد كنت طردتها ، الله يحرقها ، أثرت عليا
بلكنتها بنت الـ دي !!!

ثم سمع كلاهما صوتاً أنثوياً مألوفاً يأتي من الأعلى ، فرفع
الاثنين رأسيهما عالياً و..

-سوزان بنبرة دافئة : إيزووو .. حبيبي ، حمدلله علي
سلامتك يا قلب خالتك

-آياز بنظرات حانية ، ونبرة ناعمة : طنط سوزان ، ازي
حضرتك

نزلت السيدة سوزان من على الدرج بخطوات متريئة ، في
حين سار آياز في اتجاهها ، ثم توقفت أمامه ، ونظرت إليه
بحنو بالغ ، وقامت بفتح ذراعيه لتحضنه بشدة ، ثم ابتعدت
عنه و...

-سوزان بنبرة معاتبة : كل ده غياب ، أنا زعلانة منك ، ومن مامتك ، خلاص نستونا

-آياز بنبرة عميقة : سوري يا طنط ، انتي عارفة المشاغل هناك ، وانا مكونتش فاضي وآآ...

-سوزان مقاطعة بعتاب : عاوز تفهمني ان معندكوش أجازات ، لأ أنا مش مصدقة

-آياز مبتسماً ، وبنبرة دبلوماسية : على العموم يا طنط أنا رجعت خلاص ، وناوي استقر هنا

-سوزان بنبرة متحمسة : بجد ؟ ده خبر حلو أوي ، أيوه كده فرحني

-آياز بنبرة متفائلة : اطمني ، أنا كمان ناوي أدور على شقة وآآ..

-سوزان مقاطعة بجدية : شقة ايه ، انت هاتقعد معنا هنا يا إيزوو

-آياز بإعتراض : لأ مش هاينفع ، أنا مش باحب أفرض نفسي على حد أو آآ..

رفعت سوزان يدها في وجه آياز لتجعله يكف عن الكلام ، ثم ..

-سوزان بصرامة : الكلام ده مش عاوزة أسمعها ، انت هاتقعد معنا خلاص ، وبعدين عمك سرحان هيفرح أوي لما يشوفك ، ولا انت الغربية غيرتك علينا
-آياز نافياً : أبداً .. أنا زي ما أنا

-سوزان بابتسامة دافئة : يبقى متفقين ، ده بيتك ، واتصرف فيه على راحتك

-رامي غامزاً : أيوه يا عم ، مين أدك ..

-آياز بنبرة مغترة : طبعاً ، أنا ماليش زي

-سوزان بنبرة صافية : روح ارتاح انت يا إيزووو ، وشوية وهتلاقي الفطار جاهز ..

-آياز مبتسماً في امتنان : شكراً ..

ثم تركتهما وانصرفت في اتجاه المطبخ ... فمال آياز برأسه على رامي و...

-آياز بنبرة إعجاب : مامتك لسه زي ماهي ، حنية وطيبة .. ماتغيرتش !!

-رامي وهو يوميء برأسه : أيوه .. شبه سِتِك (جدتك) الله يرحمها

-آياز مبتسماً : الله يرحم الجميع

حضرت الخادمة وردة إلى الردهة ، ولم تكف عن التحديق في آياز بنظرات عاشقة ، في حين لوى هو فمه في انزعاج ، و..

-وردة بنبرة متلهفة : أني جهزت الأوضة لسي آآآ... ألا انت اسمك ايه يا حليوة

-آياز بنبرة تحمل السخرية : آياز يا (فلور)

-وردة ببلاهة : إزاز

-آياز بضيق : نعم؟؟

-رامي بنبرة شبه غاضبة : إزاز مين يا هبله انتي ، بقولك اسمه آياز ، آياز..!!!!!!

فتحت الخادمة وردة فمها وكأنها فهمت ما قاله ، ثم ..

-وردة ببراءة : ياختي حيلوة ، وده معناتوه ايه؟؟

-رامي بسخط : باردة

-وردة وهي تعقد حاجبها في عدم فهم : لأ أني سُخنة ، وحرانة ، وعاوزة آآآ...

-آياز مقاطعاً بضيق : ششش .. تعرفي تسكتي شوية يا فلور انتي

-رامي بتهكم : هي فاهمة معنى اسمك لما هتتاديها بفلاور

-وردة مبتسمة في سعادة : إنت بتدلعني يا أبيضاني ...
والنبي طالعة من بؤك اشطا يا أزاز بيه

-رامي بسخط : هي لزقتك في دماغها ، مش هانعرف نغيرها
ولو عملنا ايه ، أنا من الأول قايل دي مخها متركب شمال ،
تعالى يا أزاز .. قصدي يا آياز معايا

.....

في مبنى رياض الأطفال بمدارس اللافتايا الدولية ،،،

جلست المعلمات متأهبات في غرفة الاجتماعات ، وبدأت
الهمهمات الجانبية بينهن إلى أن ساد الصمت فجأة في
أرجاء المكان حيث دلفت الأستاذة إعتاماد بوجهها - دائم
التجهم- إلى داخل الغرفة و...

-اعتاماد بنبرة رسمية ، ونظرات حادة وضيقة : صباح
الخير

-الجميع بهدوء : صباح النور مس إعتاماد

سحبت الأستاذة إعتاماد المقعد الجلدي ، وجلست على رأس
طاولة الاجتماعات ، و...

-اعتماد بنبرة جادة : فاضل اسبوعين يا بنات على الدراسة ، وأنا عاوزة مقترحاتكم لـ (اليوم الأول) ، عاوزين نستقبل الأطفال بشكل جديد

-ريمان بنبرة عادية : احنا ممكن نعمل ألعاب ترفيهية ليهم

-ليلة مقترحة بهدوء : ممكن نجيب العرايس الكبيرة زي (بين تن ، ودورا ، ومينيون) والشخصيات المشهورة ، بيتهياي هيحبوها

-سارة وهي توميء برأسها : صح يا مس اعتماد ، الأطفال فعلاً بيحبوا يلعبوا معاهم ، وكمان ممكن نجيب هدايا

-عاليا بنبرة متحمسة : كمان ممكن نعمل يوم رياضي ، هاتبقى حاجة خفيفة أوي

مطت الأستاذة اعتماد شفيتها في اقتناع ، ثم هزت رأسها قليلاً ، ورفعت أحد حاجبيها في جدية ..

-اعتماد بنبرة جادة : تمام يا بنات .. مس أية ، اكتبني ده كله في ورقة الاجتماعات ، وأنا هاعمل تصويت على المقترحات كلها ، ونشوف الأفضل ايه ويتنفذ فوراً

-أية وهي توميء برأسها ايجابياً : اوكي

ثم تتحنط السيدة اعتماد ، واعتدلت في جلستها أكثر و...

-اعتماد بجدية : طبعاً كلكم عارفين إن زميلتنا مس ريهام
اتجوزت ، وقدمت استقالتها ، ومكانها بقي فاضي هنا في الـ
(كي جي) ، فمتوقع إن ينضم لنا زميلة جديدة على آخر
الاسبوع

-ليلة متسائلة بنبرة عادية : هو حضرتك هاتعملي انترفيو)
مقابلة) ؟

-اعتماد بنبرة رسمية : شور

-ريمان بنبرة طبيعية : ينفع أقول لكام حد أعرفه يجي يقدم

-اعتماد بجدية : مافيش مانع مس ريمان ، بس لازم تتأكدي
إن مستواه يليق بينا

-ريمان مبتسمة في حماسة : Of course مس اعتماد

ثم استدارت برأسها قليلاً في اتجاه أية (سكرتيرة مكتبها) ،
و..

-اعتماد بنبرة ثابتة : مس أية أتأكدي إن اعلان الـ New
Teacher (المعلمة الجديدة) نزل على موقع المدرسة ..
مش عاوزين غلطة

-أية بخفوت : اوكي ..

-عاليا بنبرة هادئة: أنا أعرف بنت كويسة يا مس اعتماد ،
ينفع أخليها تيجي الانترفيو ؟

-اعتماد بجدية: مستواها ايه يا مس عاليا ؟

-عاليا وهي تمط شفيتها في حيرة: ممم.. يعني كويسة ..
زينا تقريباً

-اعتماد بصرامة ، ونظرات ضيقة : مافيش حاجة اسمها
يعني عندنا ، في ممتاز يليق بينا ، أو لأ ماينف عش ، احنا
مدارس دولية مش مدرسة حكومي على الطريق ، أظن
كلامي واضح ... !!!

لوت عاليا شفيتها في انزعاج ، وأطرقت رأسها للأسفل في
حرج ، بينما أكملت الأستاذة اعتماد باقي جدول اجتماع
اليوم..

.....

في غرفة آياز بالفيلا ،،،،

تمدد آياز على الفراش ، وعقد ساعديه خلف رأسه ، ثم ..
-آياز متسائلاً بنبرة جادة : ها قولت ايه ؟

حدجه رامي بنظرات استغراب ، ثم جلس على طرف الفراش
، وقام بثني ركبته أسفل منه ، و...
-رامي بنبرة معترضة : لأ طبعاً ، انت مجنون

-آياز بهدوء : لأ أنا بتكلم جد

-رامي بتأفف : يا عم بطل الهبل ده ، محدش هايقبل باللي انت بتقوله ، أصلاً مافيش راجل فيكي يا مصر عمل كده

اعتدل آياز في جلسته ، ثم رمق رامي بنظرات متحدية و..

-آياز بنبرة مهمة : ليه يعني؟؟ دي حاجة عادية عندنا على فكرة ، ورجالة كتير بيشتغلوها ، أنا كمان عامل الماستر بتاعي فيها وآ...

-رامي بجدية : معلىش برا حاجة ، وهنا حاجة تانية خالص

-آياز بتحدي : وأنا عاوز أثبت نفسي هنا

-رامي على مضض : صدقني محدش هايقبل باللي انت بتقوله ده ، أصلاً مش هتلاقي مدرسة تشغلك ، انت عارف لو كنت مدرس أي حاجة تانية هتتخطف خطف ، وخصوصاً إن انت معاك جنسية ولغة .. يعني فرصة لأي حد

-آياز بإصرار : أنا هادور ، وأكيد هلاقي المناسب ليا

-رامي مقترحاً بهدوء : طب ما تشتغل مدرس Science (علوم) ولا ماث للعيال الكبيرة ، أو حتى بتاع ألعاب ، وش هتشتغل

-آياز بغرور : أنا مدرس كي جي ، مش أي حاجة تانية ، وكمان أنا مرضهاش لنفسي

-رامي باعتراض ، ونظرات ضيقة : ولا أنا أرضهالك ..

ثم اقترب رامي منه ، ووضع يده على فخذه ، وربت عليه في جدية و..

-رامي بنبرة محذرة : يا بني انت وظيفتك هاتبقى عاملة زي الدادة بالظبط

ضيق آياز عينيه في استغراب شديد ، ثم ...

-آياز بتأفف : افندم؟؟ دادة !

-رامي بتهكم : أيوه ، اومال انت مفكر ايه ، معروف في مصر إن مدرسات الحضانة دادات للعيال ، لا شغلة ولا مشغلة ، أخرتهم يشطفوا وينضفوا ريالة العيال

-آياز باعتراض شديد : انت غلطان ، دي أهم وظيفة عندنا في الـ US ، ومش أي حد بيشتغلها ، بالعكس لازم يكون teacher المرحلة دي متخصص أوي ، وعامل دراسات عليا وآآ....

-رامي مقاطعاً باستخفاف : كل اللي انت بتقوله ده حلو بس عندكم ، لكن هنا لأ .. محدش بيشتغل في الحضانات غير المدرسات السكة والتعبانين ، لكن ماعمر يش الصراحة شوفت راجل شغال مدرس كي جي ...!!!

-آياز بحزم : أنا خدت قراري خلاص ، ومن بكرة هاشوف الموضوع ده

-رامي بنبرة إحباط : صدقتي مش هتلاقي ، أنا واثق من
اللي بقولهوك ، بلاش تتعب نفسك على الفاضي

-آياز بضيق : سييني أخذ فرصتي

-رامي بجدية : مش هتلاقي فرصة ، طب أنا عندي اقتراح
حلو ، ما تفكك من جو المدرسة والمدرسين الفقرد ه ،
وتعالى اشتغل معانا في معرض العربيات ، والله مافيش
أحلى من كده ، روقان بال ، وحاجة آخر جمال

-آياز باعتراض : مش هايحصل !!!

ثم نهض عن الفراش ، وسار في اتجاه الشرفة ، ووضع
يده في جيبه بنطاله ، وحقق أمامه في الفراغ ، و..

-آياز بنبرة عازمة : أنا مش هاكون غير مدرس كي جي
وبس!!!!

.....

الفصل الثاني :

بعد مرور يومين ، تزاحمت عشرات الفتيات أمام بوابة مدارس اللافانيا الدولية من أجل ملء طلب الالتحاق بالمدرسة ، فقد انتشر الخبر سريعاً عبر صفحات التواصل الإجتماعية عن وجود وظيفة شاغرة لمعلمة رياض أطفال ، وبالفعل توافدت الكثيرات من أجل المنافسة والفوز بتلك الوظيفة ذات الراتب المجزي ..

شعرت عاليا بالضجر نتيجة الضوضاء العالية والمتسببة من ثرثرة المتقدمات بطلب الالتحاق بتلك الوظيفة ، فقد كانت غرفة المعلمين قريبة من الاستقبال ، ونتيجة التزاحم اضطرت بعض الفتيات أن تقف في الحديقة الملاصقة للغرفة ، فبدى الصوت أكثر إزعاجاً و..

-عاليا بتذمر : اوووف ، مش هانخلص ، كل يوم دوشة

-ريمان بهدوء : ما انتي عارفة لازم مس اعتماد تجيب حد جديد قبل ما الدراسة تبدأ

-عاليا بضيق : أنا قولتلها اجيب حد أعرفه من دفعتي بس هي مرضتش ، عاوزة يكون متخصص في اللغة

-ريمان بجدية : هي عندها حق ، احنا مدرسة دولية ، ولازم يكون ال- staff على قدر من الكفاءة

-عاليا بانزعاج وهي ترفع أحد حاجبيها : طب ما أنا البنيت اللي هاتقدم شاطرة جداً وآآ...

-ساره مقاطعة بنبرة متأنفة : يخربيت كده ، شوية متخلفين واقفين برا

-ريمان متسائلة بحيرة : في ايه يا سارسوورة؟؟ مالك مضايقة من ايه ؟

-ساره بزمجرة ، ونظرات حادة : يا ريموو البهايم اللي واقفين برا عمالين يتنططوا عليا وأنا بفهمهم ازاي يكتبوا استثمارة التقديم ، كل واحدة عماللي انها سفيرة ولا وزيرة وفاهمة ، وهي مخها مايفرقش عن الـ shoes اللي هي لبسها

-عاليا بنبرة يائسة : بس ياختي عاجبين أبلتك ، وطالعة بيهم السنة

-ساره بتهكم : بكرة نشوف هايعملوا ايه في الديمو .. وساعتها هتعرف انهم ريش على مافيش !!

ضحكت الفتيات على دعابتها الأخيرة ، و...

-ريمان بنبرة مازحة : انتي فظيعة ، بتجيبني مثل لكل حاجة ، يا الله عليك

-ساره بضيق : سبيني أفك عن نفسي شوية

-عاليا بجدية : بقولكم ايه أنا هاروح أقعد شوية في الكانتين ، ماتيجوا بدل الدوشة اللي هنا دي

-سارة وهي توميء برأسها ، وبنظرات مشرقة : اشطا أنا معاكي

ثم استدارت برأسها ناحية ريمان ، وأشارت لها بيدها و..

-سارة بنبرة متحمسة : يالا يا ريموو ، مالهاش لازمة الأعدة هنا

-ريمان معترضة : بس أنا لسه مخلصتش تحضير وآآ...

أمسكت سارة بذراع ريمان ، ثم قامت بجذبها عنوة من على المقعد و..

-سارة مقاطعة بإصرار : نبقى نكملة بعدين ، لسه اليوم عندنا طويل

-ريمان مبتسمة ابتسامة خفيفة : اوكي .. ماشي

.....

عند منطقة الاستراحة الملحقة بالمدارس ،،،

دلفت فتاة ما نحيفة خارج المقصف المخصص لشراء الأطعمة المغلفة والحلوى وهي ممسكة بحقيبة بلاستيكة

ممتلئة عن آخرها بالحلوى والعصائر ، ثم تهادت في خطواتها إلى أن اقتربت من طاولة بيضاء مثبت بها مقاعد خشبية على الجانبين ، وانضمت إلى باقي رفيقاتها ، ثم ناولتهن الحلوى و...

-رانيا بنبرة رقيقة : كل واحد يشوف كان طالب ايه ، أنا جبلكم كل حاجة من عند أحمد

-نشوى بنبرة عادية : أنا كنت طالبة شيكولاته ، وعصير

-سحر متسائلة بجدية : مافيش شيبسي ؟

-رانيا وهي تهز رأسها بالنفي : لأ

-سحر وهي تلوي شفيتها في ضيق زائف : اووف ، اوامال أحمد عنده ايه بالظبط

-فريال بمزاح : معندوش إلا بسكويت ماري للأطفال

ضحكت الفتيات عالياً على طرفتها ، في حين لمحت رانيا من زاوية عينها بعض المعلمين الذكور وهم يقتربون منهن ، فانتصبت في جلستها ، وبدأت تعبت بخصلات شعرها وكأنها لا تكثرث .. ولكنهم مروا بهن دون أن يلقوا التحية ، فامتعض وجهها ، ولوت فمها في استنكار ، ثم استدارت برأسها لتراقبهم وهم يذفون إلى داخل المقصف ، ثم عاودت النظر في اتجاه رفيقاتها و..

-رانيا متسائلة بنزق : أومال مافيش رجالة شغالة عندنا
في الكي جي ليه ؟؟

-نشوي معترضة بشدة : انتي هبله !! مافيش الكلام ده
عندنا

-رانيا بعدم اقتناع وهي تقطب جبينها : ليه يعني !!؟؟

-فريال بنبرة شبه ساخرة : لأن الكي جي عندنا عامل زي الـ
(حرمك) بتاع السلطان ، مُحرم علينا وجود أي راجل هناك

-رانيا بنظرات مصدومة ، ونبرة متشنجة : نعم !! أومال
بس مدرسة دولية ، ومدرسين ، وهانتجوز ، وفي الآخر
أشتغل مع بنات زيي ، أل وأنا اللي كنت معشمة نفسي
هاطلع بعريس من هنا

-نشوي وهي تلوي فمها في استخفاف : يبقى تنسي

-سحر بنبرة جادة : الكي جي عندنا معروف عنه إنه فقر
وبيجيب النحس لأي حد ، فعشان تتجوزي لازم تطلعي الـ
grades (المراحل الأعلى)

اتسعت عيني رانيا في صدمة أكبر ، وفغرت شفيتها في
ذهول ممزوج بالضيق و...

-رانيا بإحباط : لأ بجد كده كتير ، يعني لا جواز ، ولا
رجالة !!!

.....

في فيلا سرحان عليه ،،، ،
في غرفة آياز بالطابق العلوي ،،

ألقي آياز بجسده المرهق على الفراش بعد أن قضى يومين
في البحث عن وظيفة معلم رياض أطفال ، ولكنه لم يوفق
على الإطلاق ...

تنهد هو في تعب ، ثم أغمض عينيه ليتذكر كيف جرت
المقابلات مع مدراء المدارس التي تقدم لها ، فبالرغم من
كونه معلم كفاء ، وذو خبرة عالية في مجاله ، إلا أن الرد
كان واحداً له (حضرتك معدناش وظيفة مدرس كي جي ،
الوظيفة دي للسيدات وبس)

اعتدل هو في نومته ، ثم ضرب الفراش بقبضة يده و...
-آياز بحنق ، ونظرات مشتعلة : ايه التخلف ده ، هما
مفكرين إني مش هاقدر أشتغل ، ده أنا عامل ماستر فيها ،
أوووف !!!

ثم سمع صوت طرقات على باب غرفته ، فنهض من على الفراش ، وسار في اتجاه الباب ، وقام بفتحه ، فوجد الخادمة وردة تقف أمامه وعلى وجهها ابتسامة سخيقة و...
-وردة بنبرة متشوقة ، ونظرات حاملة : هيبيح ، أعملك وكل يا أزاز بيه

-آياز بعدم فهم بعد أن لفظت اسمه بطريقة خاطئة : نعم ؟
-وردة وهي تضع يدها بالقرب من فمها ، وبنبرة مهتمة :
يعني مام ، هام ، تاكل يا بيه

-آياز وهو يعيد رأسه للخلف، وبحزم : أها ... لأ
-وردة بضيق زائف : لبييه بس ، ده أنا عليا نفس في الوكل ، بنات البندر كيلاتهم بيحسدوني عليه ، دوق انت بس وهتصدق

-آياز بتذمر : فلاور ، بليز ، أنا تعبان ومش ناقص وجع دماغ

-وردة بإصرار ، ونظرات فضولية : طب ما تقولي ، مش يمكن أريحك

-آياز وهو يزفر في ضيق : يووووه ، واضح انك Stupid) غبية (ومش بتفهمي

-وردة فاخرة شفيتها في بلاهة : هاه

ثم وضعت أصابع يدها على مقدمة رأسها تحكها في عدم فهم ، واطرقت رأسها قليلاً للأسفل ، فلمحت (شيشباً) مقلوباً ، فشهقت فزعاً ، ولطمت على صدرها و...
-وردة بنبرة مرتعدة ، ونظرات مذعورة : يا نصيبي

استدار آياز برأسه إلى حيث حدثت وردة بعينيها ، ثم عاود النظر إليها وعلى وجهه علامات الترقب الممزوجة بالحيرة و...

-آياز بقلق ، ونظرات متوجسة : What ???

-وردة بنبرة منزعة : الشيشب مقلوب ، حرام يتساب كده ، ده فال وحش

-آياز بنظرات ضيقة ، وصوت خشن : افندم

-وردة وهي تزم شفيتها في قلق : أصلي يا سي أزاز لما حد مننا يشوف شيشب مقلوب لازم يعدله لأحسن يجيله النحس والفقر والغلب والـ.. آآ....

لم ينتظر آياز طويلاً لكي تكمل وردة تخاريفها الغير مقبولة بالمرّة ، حيث صفق الباب في وجهها بعد أن رمقها بنظرات ساخطة ، ثم عاد لفراشه وألقى بنفسه مجدداً عليه ، وظل يتهد في انزعاج ..

لمح بطرف عينه جهاز الحاسوب النقال الخاص به موضوعاً
على الكومود ، فمد يده ليمسك به ، ثم فتحه ، واخذ
يتنقل بين صفحات التواصل الاجتماعية المختلفة متفقداً
الرسائل الإلكترونية ، وأخر الأخبار ..

.....

في معرض عليوه للسيارات ،،،،

تراجع رامي بمقعده الجلدي للخلف بعد أن أداره ليواجه ذلك
الحائط الزجاجي الذي يكشف الطريق من خلفه ، وعدل من
هاتفه المحمول الموضوع على أذنه ، ثم اطلق ضحكة عالية
من فمه قبل أن يتشدد بـ ...

-رامي هاتفياً بنبرة متحمسة : يا رودي أنا وعدتك ، يبقى
وش Trust me

-رودينا هاتفياً بنبرة محببة : لأ .. انت always (دايماً)
بتشتغلني ، وأنا معنتش هصدقك

-رامي بإصرار : يا بيبي ، انتي اللي في القلب ، وأنا مستعد
أصلح غلطي ، وأعزمك في المكان اللي انتي تختاريه
النهاردة

-رودينا وهي تمط شفيتها في دلال : مممم .. اوكي .. بس
بشرط تجيبي كمان هدية

-رامي بثقة ، ونظرات مغتررة : شوور (طبعاً)

ثم أنهى المكالمة الهاتفية معها ، وقام بإطلاق سببة ، و...

-رامي بامتعاض ، ونظرات متوعدة : بنت الـ.....

هاتشتغلني ، مفكراني عيل سوكو بوكو هاييف مش فاهم
حاجة ، ده أنا شائطها من الواد حازم ، بالليل هاعمل معاها
الصح ، وأفضحها قصاد الكل .. ماهو اللي زيها لازم يتربى
كويس ... !!

ثم دلف إلى مكتبه والده المهندس سرحان ، ذاك الرجل
المنمق في ملابسه ، وأيضاً في أسلوبه في التعامل مع
الأخرين ..

عدل المهندس سرحان من وضعية نظارته الطبية الفاخرة
، وجلس على المقعد المقابل لمكتب ابنه ، و...

-سرحان بصوت أجش: رامي ، عاوزك تسافر اسكندرية
للمعرض الثاني تتابع العمال هناك

-رامي بإستغراب : طب ما تبعت يا بابا أي حد ، أنا مش
فاضي

-سرحان بجدية ، ونظرات حادة : ده معرضنا يا بني ، مالنا
ولازم نخاف عليه ، انت معندكش دم ، إزاي اسيبه كده من
غير ما أسأل

-رامي بعدم اكرات : أنا مش فاضي ، ورايا مشاغل
-سرحان بحنق : وانت من أمتى بتفضى غير للسبق
والمنظرة

-رامي وهو يزفر في انزعاج : يعني حضرتك عارف إني
مش بتسرمح ولا بقضيها ، أنا بحب السباق أوي ، وعندى
رالى عاوز أشترك فيه ، فمش هاضيع وقتى فى انى اتابع
شوية عمال ببيلطوا ولا بيمحروا

نهض سرحان عن المقعد ، ثم ضرب سطح المكتب
الزجاجى بقبضة يده بقوة ، وحدث ابنه بنظرات شرسة قبل
أن يردف بـ ...

-سرحان بنبرة غاضبة : هاتروح غصب عنك ، أنا مش
بهزر فى الشغل

نهض رامي عن مقعده الجلدي ، وقبل أن يفتح فمه للرد
على والده ، سمع كلاهما طرقات خفيفة على باب المكتب ،
أعقبها دخول سكرتيرة حناء المظهر ، فاكتفى الاثنى
بالصمت ، ثم جلس سرحان على مقعده ، بينما ظل ابنه واقفاً
ومحدقاً فى السكرتيرة ..

-علا بنبرة رقيقة وهادئة : مستر رامي ، ممكن أخذ اذن
ساعتين وأرجع

-رامي متسائلاً باقتضاب : ليه ؟

-علا وهي تتنحج في خجل : احم .. اصل أختي رايحة تقدم على شغل في مدرسة لافانيا الدولية ، وهي كانت أعدة بالبيبي بتاعي ، بس مش هاينفع تسببه لوحدته وتنزل ، فلو أمكن أروح مكانها لحد ماهي تقدم الـ application (طلب التوظيف) !

لوي رامي فمه ، ثم أدار رأسه قليلاً للجانب ، ولم يجب عليها ، فشعرت علا بالخرج من تكرار طلبها مجدداً ، فاستدارت برأسها ناحية والده لعله يمنحها الإذن .. وأصابته الاختيار حيث بادر بـ...

-سرحان متسائلاً بجديّة : وهي اختك شغالة مدرسة ؟

-علا بنبرة مهتمة : اه يا مستر سرحان ، هي خريجة كلية البنات

-سرحان متسائلاً باهتمام : وهي مدرسة ايه ؟

-علا بنبرة متلهفة : انجليش لطلبة اعدادي ، بس هي مش فارق معاها تشتغل أي حاجة إن شاء الله مدرسة كي جي

أثارت عبارة علا الأخيرة انتباه جميع حواس رامي ، فرمقها بنظرات متفرسة و...

-رامي متسائلاً بجديّة : هما عاوزين مدرسين في المدرسة
اللي انتي قولتي عليها ؟؟؟

-علا بايجاز وهي توميء برأسها : ايوه

-رامي متسائلاً بفضول أكثر : تخصص انجليش ولا كي جي
؟

-علا بنبرة هادئة وناعمة : الاتنين

-رامي بحيرة : يعني هما عاوزين مدرسين للمرحلتين

هزت علا رأسها بالنفي ، ثم رمقت رامي بنظرات ثابتة قبل
أن تتشدد ب..

-علا بحماس : لأ يا مستر رامي ، هما عاوزين مدرسة كي
جي تكون تخصص انجليش ، وبمرتب عالي ، واختي شايفة
انها فرصة بالنسبائها عشان تقدم يمكن تقبل

استغرب سرحان من اهتمام ابنه المفاجيء بالسؤال عن
طبيعة تلك الوظيفة الشاغرة ، ولكنه لم يعقب .. استمر رامي
في تقصي بعض المعلومات عن طبيعة تلك الوظيفة
والمدرسة ، ثم في النهاية وافق على إعطائها الإذن ..

دلفت السكرتيرة علا خارج المكتب وهي تنظر بإمتنان لرب
عملها ، في حين رمق سرحان ابنه بنظرات حادة و..

-سرحان بجديّة : ممكن أفهم انت بتسأل علا كل الأسئلة دي ليه

-رامي مبتسماً في لؤم : عشان آياز

-سرحان بعدم فهم : آياز !!

-رامي بنبرة واثقة : لأنه أكثر واحد هيفرح أوي لما يعرف إن وظيفة أحلامه موجودة

-سرحان بنظرات مصدومة ، ونبرة متعجبة : هو آياز عاوز يشتغل مدرس حضانة ؟

-رامي بإيجاز : ايوه

-سرحان بامتعاض ، ونظرات استخفاف : اتهيل ده ولا ايه ! مايشغل اي حاجة تانية ، ولا هي الوظائف خلصت عشان يشتغل بتاع حضانات

-رامي وهو يلوي فمه في تأفف : عاجباه يا بابا ، متمسك إنه يكون مدرس كي جي ، أل ايه ده حلم حياته انه يبقى كده

-سرحان بإستنكار : الكلام ده عنده في أمريكا ، مافيش الكلام ده في مصر ، الظاهر إنه مفكرها مسألة سهلة وعادية

-رامي بصوت خشن : والله قولتله الكلام ده ، وهو راكب دماغه ، وبقاله يومين أخذها كعب داير بيدور على شغلانة مدرس في حضانة ، ومحدث موافق

-سرحان بهدوء : عندهم حق ، هو في راجل يستحمل قرف
العيال ، عقله انتبس وخليه يجي يشتغل معانا في المعرض
بدل التخاريف الفاضية اللي في دماغه

-رامي بنبرة إحباط : والله أنا غلب حماري معاه ، ان قدرت
تكلمه يا بابا تبقى عملت فيه وفيا أكبر معروف

-سرحان بنبرة عازمة : انا هاكلمه وهاخليه يرجع عن الفكر
الغبي ده

-رامي مبتسماً في مزاح : تبقى معلم بصحيح يا بشمهندس
لو عملت كده فعلاً

-سرحان بنبرة ساخطة : اتلم يا وُلْد

-رامي بحماس ، ونظرات متفائلة : حاضر ، المهم هاسيبك
أنا وألحق أروح لآياز أبلغه بالخبر ده ، يمكن تضرب معاه

-سرحان بعدم اقتناع : والله انت أهبل أكثر منه ، ده بدل ما
تشوف مصالحنا

-رامي بإيجاز : بعدين يا بابا عن اذنك

ثم أخذ رامي سلسلة مفاتيحه ، ودلف إلى خارج المكتب
بخطوات سريعة ..

.....

في غرفة المعلمات بمدارس اللافانيا ،،،

توقفت معلمتين أمام الغرفة وهما ممسكتان ببعض الكتب
الدراسية ، و...

-ميادة بجدية وهي تنظر إلى محتوى الكتاب : شوفي ده ،
بيتهياي هيبقى مناسب

-هنا بنظرات حائرة ، ونبرة شله جادة : مش عارفة
بصراحة ، بس هو مختلف عن بتاع السنين اللي فاتوا

-ميادة بنبرة متحمسة : ده الإصدار الجديد للمنهج ، أنا
شايفة انه هايكون مفيد أوي

-هنا بتوجس : بس تفتكري مس إعتاد هتوافق على إننا
نبدل المنهج وهو لسه مافتش عليه كتير

-ميادة بنبرة عازمة : والله لو أصرينا على ده ممكن توافق

-هنا وهي تمط شفيتها في امتعاض : معتقدش إنها هتوافق
، دي دماغها صعب أوي

.....

ميادة عبد العزيز هي معلمة كفؤ ، ومن أمهر من تولى مهنة
التدريس في مبنى رياض الأطفال ، ورغم إصرار الإدارة

على نقلها للمراحل العليا ، إلا أنها رفضت ، وفضلت البقاء في مبنى رياض الأطفال كمعلمة أولى للغة الإنجليزية ..

لم يحالف ميادة الحظ في الزواج رغم تقدم الكثيرين لخطبتها ، ولكنها كانت تبحث عن الشريك المثالي الذي يضيف إليها ، وليس ذلك الزوج العادي الذي يصبح - لاحقاً - عبئاً عليها ..

بينما زميلتها المقربة هي هناء حافظ .. فتاة متخرجة حديثاً ، وتعمل بكل جهد لتطوير نفسها ، تم خطبتها مرة واحدة ، ولكن للأسف لم يكتمل مشروع الزواج بسبب ظروف العريس المادية المتعسرة ..

.....

ثم وجدت كلتاهما من تقاطع حديثهما الجانبي ، فالتفتا بفرع على إثر صوتها الصارخ بـ...

-إعتماد بغضب عارم ، ونظرات مستشاة : ده اسمه إهمال ، والكل هيتحاسب على ده

-ميادة بقلق ، ونظرات ضيقة : في ايه يا مس اعتماد ؟

-هناء بتوجس : ايه اللي حصل يا مس اعتماد ؟

-إعتماد بإنفعال شديد : علبه المناديل الخشب الجديدة مش موجودة في مكانها

- ميادة بنظرات جاحظة ،ونبرة مندهشة : نعم !
- هناء بنبرة مدهوشة ، ونظرات متسعة : هاه
- إعتماد بعصبية تحمل التهديد : لو العلبة مظهرتش خلال ساعة واحدة ، الكل هيتحول للتحقيق!
- ميادة متسائلة بدهشة : طيب نفهم بس يا مس اعتماد إيه الموضوع عشان نتصرف
- إعتماد بإنفعال شديد : هافضل أعيد في كلامي عشان تفهموا !!
- هناء فاغرة شفيتها في ذهول : الله !

ثم تركتهما وانصرفت وعلى وجهها علامات الغضب
الممزوجة بالعصبية ..

حدقت كلتاهما في بعضهما البعض في استغراب ، و...

-هناء متسائلة بتعجب : مالها دي

-ميادة بجدية ، ونظرات ضيقة : الظاهر إن الموضوع فيه سرقة

-هناء بدهشة : سرقة !! دي مناديل

-ميادة بنبرة متمهلة : مش عارفة ، بس طالما هايتعمل تحقيق يبقى فيه اشتباه في سرقة

-هناء مازحة : طب يا شارلوك هولمز مين بقى اللي سرقها

-ميادة بايجاز : هييان .. بس لازم نبليغ البنات باللي حصل
-هناء بتهيذة : اوكي

.....

انتشر خبر فقدان علبة المناشف الورقية – والمصنوعة
من الخشب – في مبنى رياض الأطفال بالمدارس كسرعة
البرق ، واجتمعت جميع المعلمات في الغرفة الخاصة بهن
للترتيب من أجل عملية البحث عنها ، وأصبحت أصواتهن
عالية وتداخلت بسبب المناقشات والهمهمات الجانبية ،
فنهضت ريمان عن المقعد ، ورفعت يديها عالياً في الهواء
لتلوح بهما ..

-ريمان بنبرة عالية : يا بنات ، اسمعوني !

انتبه الجميع لها ، وبدأت أصواتهن تنخفض تدريجياً ،
فتابعت هي بـ ...

-ريمان بجدية : واضح كده إن محدش فينا شاف العلبة دي
وآآ...

-عاليا مقاطعة بنبرة جادة : على فكرة ممكن يكون حد من
اللي جه يقدم في المدرسة أخذها

-هناء بنبرة عادية : ده وارد برضوه

-ريمان بنبرة مستفسرة : طب واللي هايخدها هايعمل بيها ايه ؟

-ميادة بامتعاظ : مش عارفة ، بس الواضح إن الموضوع ده مهم أوي عند مس اعتماد

-عاليا باستنكار واضح : يعني سابت كل حاجة بتحصل ، ومركزة في اللي سرق شوية مناديل ، ولا علبة فاضية

-رانيا وهي تلوي شفيتها في استهجان : أنا عارفة ، بس أهو جالبنا الكلام مع اللي ما تتسمى

-نشوى بانزعاج : ايوه ، على رأيك .. بوز الإخص دي ما بتصدق تلاقي بلوى وتلبسها لأي حد

تتحنحت سارة بصوت عالي ، ثم قامت بتقليد نبرة صوت الأستاذة اعتماد و...

-سارة بنبرة مقلدة : إنتي مقصرة يا مس نشوى ، إزاي تسيبي العلبة تضيع ، لافت نظر بسرعة ، نقول خصم من المرتب ، نخليها رقد أحسن

ضحكت الفتيات على طريقة سارة في تقليدها ، في حين تابعت ليلة ب...

-ليلة بمزاح : أه لو شافتك يا سارة ، هتلبسي وش في الحيط

تعالت قهقات الفتيات عالياً ، وتحول الأمر إلى مزاح هزلي ،
ثم لمحت إحداهن الأستاذة اعتماد وهي تأتي من بعيد ،
فأشارت لهن بالهدوء ، فإدعين جميعاً أنهن يبحثن عن
طريقة لإيجاد العلبة ..

وقفت الأستاذة اعتماد أمام باب الغرفة ، ثم رمقت الجميع
بنظرات متفحصة ، في حين ساد الصمت أرجاء الغرفة
و...

-إعتماد بنبرة متصلبة ، ونظرات جادة : سوري يا بنات ، أنا
لاقيت العلبة ، كانت واقعة ورا الاستاند اللي في الريسبشن ،
معلش انتو عارفني مش بحب حاجة تضيع ... يالا أسيبكم
تكمّلوا شغلكم بلاش عطلة ، وضياح وقت على الفاضي
!!!...

ثم تركتهم وانصرفت ببرود مستفز ، فتحوّلت نظراتهن
جميعاً إلى سخط ممزوج بالحنق و...

-فريال بضيق : الست دي مش طبيعية

-ريمان بغیظ : دي باردة

-رانيا بنبرة محتقنة : والله العظيم دي بتستهبل ، بقالها
ساعتين ماعدنا على أعصابنا ، وفي الآخر تقولك لاقيتها

-عاليا بسخط : ده احنا لسه هانشوف من ده كثير

-سارة بانزعاج : ربنا يصبرنا على ما بلانا

-نشوى بنبرة متشنجة : لأ وجاية تقول كملوا شغلكم ،
تقولش إحنا كنا بنلعب

-ميادة بضيق واضح : ماهو عتاب السفية اجتنابه

-عاليا بنبرة ساخرة : وعلى رأي المثل خنفسة شافت بنتها
على الحيط ، قالت دي لوليا بخيط

ضحكت الفتيات مجدداً ، وبدأوا في تقليد الأستاذة إعتماذ في
عدد من المواقف التافهة ، وتحول الأمر برمته إلى مزاح
ساخر ..

طرقت سحر بقبضة يدها على الطاولة الخشبية في انزعاج ،
ثم مالت على رانيا بجسدها ، و...

-سحر مضيعة بنبرة ضائقة : اوووف ، ضيعت علينا أداة
الكانتين ، وشباب الكانتين

-رانيا وهي توميء برأسها موافقة : على رأيك ، كان زمانا
طلعنا بمصلحة

حدجتهما ريمان بنظرات متفرسة ، ثم ...

-ريمان متسائلة بإستغراب : مصلحة ايه ؟

-سحر وهي تتحنج بحج : احم .. آآ.. ماتخديش في بالك ،
أهو أي كلام بيتقال وخلص
-ريمان بعدم اقتناع : أها

.....

في فيلا سرحان عليه ،،،،

صعد رامي إلى غرفة آياز ، وأخبره عن الوظيفة الشاغرة
في مدارس اللافانيا ، فتملك الأخير الحماس بدرجة كبيرة ،
وسار مبتعداً عن رامي ، وأخذ يرسم بخياله الواسع
أحلامه وطموحاته عن تلك الوظيفة وكيفية تطويرها .. في
حين تابع رامي بهدوء ردة فعله ، ثم جلس على الفراش ،
وأمسك بهاتفه المحمول وظل يتابع بعض الرسائل القادمة
إليه عبر برنامج (الواتس أب) ..

توقف آياز فجأة عن التفكير ، و التفت برأسه ناحية رامي
وحدجه بنظرات جادة و...

-آياز بنبرة شبه معاتبة : مش كنت تقولي من بدري

-رامي بنبرة استغراب وهو ينظر لشاشة هاتفه : ليه ؟

-آياز بضيق زائف : يعني كنت روحت و عملت الـ

application (طلب التوظيف) بالمرّة

-رامي بعدم اكترات : يوم من يوم قريب يا ايزوو

-اياز بنبرة متحمسة : أنا مش هايجيلي نوم لحد بكرة

ترك رامي هاتفه المحمول على الفراش ، ثم انتصب في
جلسته ، ورمق آياز بنظرات ضيقة و..

-رامي بنبرة ساخرة : ليه يعني ! ده انت لو عريس وفرحك
بكرة مش هايكون شكلك عامل كده

-اياز بنبرة متشوقة : أصل انت مش عارف أنا بحب شغلي
أد ايه ، ومستني أثبت نفسي هنا في بلدي ، واطبق كل اللي
اتعلمته برا على الأطفال هنا

-رامي وهو يطم شفتيه في جدية زائفة : أحب أبشرك إن ده
مش هايحصل هنا

-اياز بإصرار : لالا لا .. You don't know me (انت
مش عارفي)

-رامي بإستهجان : والله انت اللي مش عارف البلد دي ، ولا
عيال البلد دي ، ولا مدرسين البلد دي ، بكرة تشوف بنفسك
إنك هاتروح ومش هتلاقي فرصة في المدرسة دي

-اياز بنبرة متحمسة للغاية ، ونظرات واثقة : شوف يا رامي
الوظيفة هاتكون ليا ، ولازم تبقى واثق إن أنا جاي وناوي
أعمل انقلاب في التعليم

-رامي مبتسماً في تحدي : انقلاب مرة واحدة ، ماشي هانشوف ، والمياه تكذب الغطاس

-آياز بنظرات متفائلة ، ونبرة جادة : بكرة هاتعرف مين هو آياز كامل الشناوي ، أول مدرس كي جي في مصر
!!!

.....

الفصل الثالث :

في مبنى رياض الأطفال بمدارس اللافانيا الدولية ،،

استمر توافد المتقدمات لملء طلب الإلتحاق بالوظيفة الشاغرة لليوم الثالث على التوالي مع بدء مواعيد العمل ..

أصر رامي على اصطحاب آياز إلى مقر تلك المدرسة ، فسعد الأخير بمساعدة ابن خالته له ..

تأنيق آياز على غير عاداته ، فتلك الوظيفة بالنسبة له هي حلم حياته المنتظر ، وبالتالي عليه أن يثبت أنه يستحقها منذ أول يوم له .. لذا ارتدى بدلة ضيقة من اللون الرصاصي فأبرزت عضلاته المشدودة ، ومن أسفلها ارتدى قميصاً أسود اللون ، وفتح أزراره حتى بداية صدره .. ووضع حذائه الأسود اللامع في قدميه ، كما مشط شعره بطريقة جذابة ، ولم ينس أن يضع بعضاً من عطره المميز .. فبدى أكثر وجاهة ، وأكثر وسامة ..

صف رامي السيارة أمام بوابة المدرسة الجانبية ، ثم استدار برأسه في اتجاه آياز ، و..

-رامي بهدوء ، ونظرات إعجاب : Good Luck يا إيزوو

أخذ آياز نفساً عميقاً ، ثم أغمض عينيه في قلق ، وزفره بقوة ، ومن ثم فتح عينيه و...

-آياز بنبرة شبه متوترة : ثانكس مان

-رامي بنبرة مشجعة وهو يربت على فخذه : أنا هستناك هنا ، ومش هوصيك .. عاوزك تشلهم من الإنبهار

ابتسم له ابتسامة خفيفة ، ثم هز رأسه موافقاً ، و...

-آياز بنبرة متعشمة : I hope so (أتمنى)

ثم أمسك آياز بالمقبض ، وفتحه ، وترجل من السيارة ،
وسار في اتجاه البوابة الحديدية ، وهو يحمل في يده ملفاً
مغلفاً ..

تابعه رامي بعينين متفرستين إلى أن توارى تماماً عن
الأنظار ، فوضع هو نظارته الشمسية القاتمة ، وظل ينظر
من مرآة السيارة الجانبية على المارة تارة ، وعلى
الوافدين للمدرسة تارة أخرى ..

.....

تطاير عطر آياز في الجو بطريقة رهيبة ، فاستنشق كل
من يمر بجواره أو حتى على مقربة منه ذلك العطر وبحث
عن مصدره .. فكانت النتيجة أن يروا ذلك الوسيم وهو
يقترّب من المبنى ..

لمحته العاملة روحية وهي جالسة على مقربة من مدخل
المبنى ، فاتسعت عينيها في دهشة ، واعتلى ثغرها ابتسامة
راضية و...

-روحية بنظرات منبهرة ، ونبرة متحمسة : بت يا ناصرة
بصي كده

-ناصره بنفاد صبر : في ايه ؟

-روحيه باصرار وهي تشير بعينيها : الشاب اللي جاي علينا
ده

استدارت العاملة ناصره برأسها إلى حيث أشارت زميلتها ،
فجحظت عينيها و...

-ناصره بذهول : ايه ده .. هو في حد كده

-روحيه بخفوت وهي تميل برأسها عليها : باين عليه ولي
أمر جاي يقدم لابنه هنا

-ناصره بحماس : يا ريت

-روحيه بنظرات متفحصة ، ونبرة شبه عازمة : وشه بيقول
إنه من بلاد برا

-ناصره وهي تلوي فمها في امتعاض : وانتي عرفتيها
لوحذك يا أم العريفة ، ما يمكن يكون من هنا

-روحيه باصرار : يا بت مافيش راجل عندنا شكله حلو أوي
كده ، احنا رجاتنا عدم اللامواخذة مايتبصش في وشهم

-ناصره بنبرة أقرب للهمس ، ونظرات مترقبة : طب اسكتي
بقي لأحسن باينه جاي علينا

-روحيه بخفوت شديد وهي توميء برأسها : طيب .. طيب

توقف آياز في مكانه حائراً لا يعرف إلى أين يتجه ، ثم التفت برأسه على الجانبين ليبحث عن يدله على مكتب المدير ، فرأى العاملتين ، فقرر أن يسير ناحيتهما .. وما إن توقف أمامهما حتى نزع نظارته عن عينيه ، ورمقهما بنظرات ثابتة ..

-آياز بنبرة رخيمة وعميقة : **Good morning !**

ابتسمت روحية له ابتسامة عريضة ، وظلت محدقة بعينيه الزرقاوتين ، ، ثم مالت برأسها على زميلتها ، وهمست بـ ...

-روحية بثقة : مش قولتلك انه مش من هنا

-ناصره بخفوت : الظاهر طلع عندك حق

انتبه آياز لحديثهما الخافت عنه ، فابتسم لهما ابتسامة مصطنعة ، وقرر أن يبدو أمامهما كما ظنا (رجل أجنبي لا يعرف كيفية التحدث باللغة العربية)

-آياز بجدية : **I wanna meet the principle** (عاوز أقابل مدير المكان)

فغرت كلتاهما شفتيهما في عدم فهم ، ونظرتا إلى بعضهما البعض ببلاهة و...

-روحية بحيرة : ده بيقول ايه ده ؟

-ناصره بنبرة عادية : مش عارفة ياختي ، ده بيرطن (بيتكلم) بالإنجليزي

-روحية بصوت طبيعي : طب ما نشوف أبله من الأبلوات يفهمونا بيقول ايه

-ناصره بإعتراض : وهو أنا لسه هأقوم وأدور على حد !

-روحية بنبرة ممتعضة ، ونظرات ضيقة : هو انتي ما بتعمليش حاجة لله أبداً

-ناصره بنبرة شبه منفعة : ليه ياختي ما أنا طول اليوم واقفة على حيلي وآآ...

تابع آياز شجارهما الطريف – من وجهة نظره – إلى أن شعر بالضجر فحدهما بنظرات ضيقة ، لذا قاطعهما بـ ...

-آياز بنبرة جادة : Please .. tell me where can I go (من فضلكم ، أين يمكنني الذهاب ؟)

فغرت كلتاهاما شفتيهما في عدم فهم ، ونظرا إلى بعضهما البعض ببلاهة و...

-روحية وهي تزم شفتيها : آآ.. أنا مش عارفة أرد أقول ايه

-ناصره بوجه متجههم الملامح ، ونبرة عادية : بصي أنا
هاوديه عند مس أية وهي تتصرف معاه ..!

تنهد آياز في ارتياح ، وأشاح بوجهه للناحية الأخرى ،
و..

-آياز لنفسه بخفوت شديد : اووف ، اخيرا فهمت !

وبالفعل نهضت العاملة ناصرة عن مقعدها ، وأشارت له
بيدها لكي يتبعها ، وسارت في اتجاه مكتب السكرتارية ...

.....

خارج مبنى رياض الأطفال ،،،

أرجع رامي ظهره للخلف على مقعد السيارة ، وأغمض
عينيه المرهقتين ليرتاح قليلاً ، فهو عادة لا يستيقظ في
مثل ذلك التوقيت المبكر ...

في نفس الوقت توقفت سيارة أجرة أمام بوابة المدرسة
لتترجل منها عاليا وهي تحمل حقيبة يدها وكذلك حقيبة

حاسوبها النقال ، ثم أسندت الأخيرة على الأرضية الأسفلتية ، وانحنت بجسدها قليلاً للأمام لكي تدفع ثمن الأجرة للسائق من نافذة السيارة الأمامية بعد أن نزعت نظارتها البنية لتكشف عن عينيها العسلية اللامعة ، و..
-عاليا بهدوء ، ونظرات ثابتة : اتفضل يا اسطى حسابك

مد سائق سيارة الأجرة يده ليأخذ النقود منها ، ثم قام بعدهم وهو عابس الوجه ، ومن ثم حدجها بنظرات غير راضية قبل أن يتشدد بـ ...

-السائق بخشونة : الحساب ناقص يا أبله

-عاليا باعتراض ، ونظرات غريبة : نعم !! ناقص ؟ ليه إن شاء الله !؟

-السائق بتشنج : ايه يا أبله ، انتي مش شايفة المشوار عامل إزاي

-عاليا محتجة : لأ معلش ، أنا كل يوم بأركب من هناك لحد هنا وبدفع نفس الأجرة ، انت اللي بتستعبط !

-السائق بنظرات مغتاظة ، وبنبرة حادة : باستعبط ايه يا أبله ، هي السكة كده

-عاليا بإصرار ، ونظرات قوية : لأ معلش .. أنا مش هادفع إلا كده

-السائق وهو يلوي فمه في استهجان : نعم ياختي !..

- ثم ترجل هو الآخر من سيارته الأجرة ، ووقف أمام الباب ، ولوح بيده في الهواء و...
- السائق بصوت فج ، ونظرات مشتتة : أنا عاوز فلوسي يا أبله
- عاليا بنبرة مرتفعة ، ونظرات متحدية : ملكش عندي إلا اللي خدته وبس !!!..
- السائق بحشجة قوية : لأ بقى ، وأنا مش سايبك إلا لما أخذ حقي
- عاليا بنبرة أكثر تحدياً وهي تشير بيدها : خلاص تعالى خدهم في القسم

انتبه رامي لتلك الأصوات العالية التي تصدر على مقربة منه ، ففتح عينيه ، واعتدل في جلسته ، وتابع الشجار الدائر بين ذلك السائق الفظ وبين تلك الفتاة بسيطة الملامح والتي كانت ترتدي بنطالاً من الجينز الأزرق ، ومن الأعلى قميصاً طويلاً يصل إلى ما بعد ركبتيها من اللون النبيذي ، وفي منتصف خصرها حزاماً جلدياً رفيعاً من اللون الذهبي ، وتلف رأسها بحجاب يجمع بين اللونين ...

تعجب هو مما يحدث ، وانزعج كثيراً من طريقة السائق الفجة في التعامل مع الفتاة ، ثم لاحظ احتدام المشاجرة ،

وتوجس خيفة من أن يتناول ذلك الوقح على الفتاة سواء باللفظ أو بالإعتداء البدني .. لذا ترجل من السيارة ، وسار في اتجاههما ...

ضرب السائق بقبضة يده على سطح السيارة المعدني عدة مرات ، و..

-السائق بفضاظة ، ونظرات محتقنة : بقولك ايه ماتجنيش، أنا عاوز فلوسي ، ومش ماشي غير لما أخذها
-عاليا بنزق ، ونظرات غير مهتمة : انت حر

ثم انحنت للأسفل قليلاً بجسدها لتمسك بحقيبة حاسوبها النقال ، ولكنها تفاجئت بالسائق يجذب الحقيبة عنوة منها ، فانتفضت فرعاً ، واتسعت عينيها في ذهول ، وفغرت شفتيها في صدمة رهيبة و...

-السائق بصوت غليظ : لأ مش هاتمشي يا أبله ، فلوسي الأول

-عاليا بنبرة مصدومة ومتلعثمة : انت .. آآ.. انت بتعمل ايه ، س .. سيب اللاب بتاعي

وحاولت هي الأخرى جذب الحقيبة منه ..

تدخل رامي سريعاً ، ووقف في مواجهة السائق وجذب الحقيبة منه ، فأخذتها عاليا ، وعلقتها على كتفها ، ثم حدجه بنظرات شرسة قبل أن يتشدد بـ ...

-رامي بنبرة قوية ومتشنجة : في ايه يا اسطى ، انت هتمد ايدك على المدام ولا ايه ؟

تمعن السائق في هيئة رامي بنظرات قلقة ، وتوجس – إلى حد ما – خيفة منه ، خاصة وأن ملامحه توحى بأنه رجل عسكري ، أو ذو سلطة ما ، و..

-السائق بنبرة أقل حدة : أنا عاوز حقي يا أستاذ ، يعني يرضيك أجيبها من آخر الدنيا لحد هنا وتديني دول بس

-عاليا بنبرة محتجة ، ونظرات مغتاظة : انت عاوز تسرقني وأسكتك ، انت خدت حقك

استدار رامي برأسه للخلف لينظر إليها بنظرات عادية قبل أن يشير لها بيده و..

-رامي بهدوء : ثواني بس يا مدام

-عاليا بضيق ، ونظرات ثابتة : أنسة من فضلك

-رامي مبتسماً ابتساماً خفيفة : سوري

-السائق بنبرة متهكمة : ده انتو لسه هتتعرفوا على بعض ، أنا عاوز فلوسي خلوني أمشي وأشوف مصالحي

-عاليا بنبرة معاندة : وأنا مش هاديك إلا دول وبس ، واللي عندك اعمله

-السائق بصوت عالي وهو يلوح بيده : والله ماهسيبك

كاد السائق أن يتهور ويمد يده ناحية عاليا ليعتدي عليها ، فتراجعت هي سريعاً للخلف في توتر ، ولكن منعه رامي من الوصول إليها ، وسد عليه الطريق بجسده ، و..

-رامي بنبرة متصلبة ، ونظرات حادة : جرى ايه يا اسطى ! هو أنا مش مالي عينك ، ناوي تمد ايدك عليها وأنا واقف

-السائق بتوجس وهو يلوح بيده : لأ يا باشا ، بس آآ..

-عاليا مقاطعة بتذمر شديد ، ونظرات شبه خائفة : ده اللي ناقص ، طب يجرب بس ، وأنا هاكسرله إيده وهاجيبه الأمان يبهدله

استدار رامي مجدداً برأسه ناحيتها ، ورمقها بنظرات استغراب ، وسرح لوهلة في ملامحها التي توحى بالبساطة الممزوجة بالبراءة ، ورغم هذا فهي تحاول أن تبدو قوية ، كما تعجب من شجاعتها المفرطة على الرغم من وقاحة السائق وتهوره ، ولكنه عاد سريعاً إلى أرض الواقع ، وتحنح في خشونة و..

-رامي بصوت آجش : استتي يا أنسة لحظة ، أنا بتكلم معاه

ثم أشار لها بعينه كي تصمت ، فلوت شفتيها في
اعتراض ، ثم أشاحت بوجهها بعيداً عنه وزفرت في انزعاج

..

استدار هو برأسه ليووجه السائق ، وحدجه بنظرات قوية

و...

-رامي بنبرة جادة : خلاص هي معهاش إلا دول

-السائق بنبرة احتجاج : با باشا والله ما ينفع ، ده ظلم !!

حدجه رامي مجدداً بنظرات أكثر سخطاً ، ثم وضع يده في
جيب بنطاله الجينز ، وأخرج منه بعض النقود ، وأمسك
بكف السائق وفتحه ، ثم وضع النقود به ، وأغلق قبضة يده
بعنف ، و...

-رامي بضيق جلي : خد دول ، واتفضل بقى

فغرت عاليا شفتيها في صدمة ، واتسعت عينيها في ذهول
بعدما رأت ما الذي فعله هذا الغريب مع السائق ، ثم إزدادت
ملامح وجهها عبوساً ، وعقدت ما بين حاجبيها و...

-عاليا باعتراض شديد ، ونظرات مشدوهة : انت بتعمل ايه

؟

-رامي باقتضاب : خلاص يا أنسة

رمقهما السائق بنظرات راضية قبل أن يتركهما ويتجه نحو
سيارته الأجرة ..

-السائق بنبرة سعيدة تحمل الوقاحة : متشكرين أباشا ،
وانتي يا أبلة ابعي اركبي مكرو باز أحسن طالما انتي مش أد
التاكسيات !!!..

اتسعت مقلتي عينيها أكثر ، وحدجت السائق بنظرات شرسة
، ثم صرت على أسنانها في غضب ، و...
-عاليا بنبرة متشنجة : انت .. انت آآ...

مد رامي يديه للأمام لكي يوقفها عن الكلام ، و..

-رامي بهدوء حذر : خلاص يا أنسة حصل خير
-عاليا بنبرة متعصبة ، ونظرات حادة : لأ طبعاً ، انت ازاي
تعمل كده ، ازاي تدفعله أكثر من حقه

ابتسم لها رامي ابتسامة خفيفة ، ورفع أحد حاجبيه و...

-رامي بعدم اكتر اثار : يا ستي مش مشكلة

زفرت هي مجدداً في ضيق ، ثم أطرقت رأسها للأسفل ،
ووضعت يدها في حقيبتها لتخرج منها النقود ، و...

-عاليا متسائلة بضيق واضح : لأ مشكلة ، حضرتك دفعت
بقي كام !!!???

-رامي مبتسماً في هدوء، وبنظرات متفحصة : خليها عليا
المرادي

رفعت هي وجهها لترمقه بنظرات ضيقة ، و..
-عاليا باستنكار : نعم ؟

-رامي بنبرة رخيمة : الموضوع مش مستاهل
-عاليا بحنق ، ونظرات أكثر ضيقاً : لأ مستاهل ، انت
تعرفني ؟ أنا أعرفك ؟ في سابق معرفة بينا ؟؟ لأ طبعاً ، يبقى
مش من حقك تدفعلي حاجة ، ولا من حقي أقبل منك حاجة ،
اتفضل قول دفعت كام

أشار هو لها بقبضتي يده لكي تهدأ قليلاً ، واستغرب أكثر
لردة فعلها القوية و...

-رامي بنبرة متمهلة : خلاص . اهدي .. مافيش داعي
للانفعال

-عاليا بنفاز صبر : يا مهون يا رب ، مش كفاية إني متأخرة
أصلاً ، كمان كنت ناقصة عظة ، قول عاوز كام ؟

- رامي مبتسماً وبنبرة هادئة : بكرة أقولك
- عالياً بنظرات مصدومة ، ونبرة مذهولة : نعم ؟
- رامي بثقة ، ونظرات مغتررة : يالا عشان متتأخرش

ثم تركها وانصرف في اتجاه سيارته ، في حين تسمرت هي في مكانها غير مستوعبة لما حدث للتو ..
هزت عاليا رأسها في تعجب شديد ، ثم أدركت أنها قد تأخرت بالفعل عن موعد حضورها ، فسارت بخطوات راكضة في اتجاه بوابة المدرسة ، لتدلف سريعاً إلى الداخل ..

.....

في داخل مبنى رياض الأطفال بمدرسة اللافانيا ،،،،

أوصلت العاملة ناصرة آياز إلى مكتب السكرتارية ، وحاولت أن توضح له أن السكرتيرة هي المسئولة عن أمور أولياء الأمور و...

-ناصره بنبرة متلعثمة ، ونظرات حائرة وهي تشير بيديها :
بص .. this ، آآ.. ده .. مس أية .. آآ.. go .. هي .. تعرف
انجليشا

حاول آياز أن يسيطر على نفسه حتى لا ينهار ضاحكاً
أمامها بسبب طريقتها الظريفة في جعله يفهم ما الذي
تقصده ..

ثم أومىء لها برأسه ، و..

-آياز بهدوء : thanks (شكراً)

دلف آياز إلى داخل مكتب السكرتارية ، ثم تتحنح في خشونة
، فانتبهت له السكرتيرة أية ونظرت إليه بنظرات شبه
مصدومة ، ثم اعتدلت في جلستها ، وسلطت عينيها عليه ،
واستشنت بأنفها الصغير رائحة عطره المميزة ، و..
-أية بابتسامة عريضة ، ونظرات لامعة : ايوه حضرتك

-آياز بنبرة رخيمة ، ونظرات ثابتة : Can I meet the
manager, please (ممكن أقابل المديرية من فضلك)

للحظة سرحت أية فيه ، وأغضت عينيها لتستمع بعبير
عطره ، ثم أدركت لاحقاً أنها كانت محدقة بذلك الوسيم لفترة
، ولم تنتبه إلى أنه قد انتهى من الكلام إلا حينما أعاد هو
تكرار جملته الأخيرة ، و..

-أية وهي تتحنح في خجل : احم .. آآ.. شور

ثم نهضت عن مقعدها الجلدي ، وأشارت له بيدها لكي ينتظر في الخارج ، وتوجهت هي ناحية مكتب الأستاذة اعتماد ، ثم دلفت إلى الداخل بعد أن طرقت الباب ، و...

-أية بهدوء : مس اعتماد في واحد أجنبي برا عاوز يقابلك

-إعتماد بنبرة رسمية ، ونظرات ثابتة : مين ؟

-أية وهي تمط شفيتها في حيرة : مش عارفة ، بس جايز يكون ولي أمر طفل عندنا

-إعتماد بنبرة شبه منزعة : مش أية مش أي حد يقولك عاوز أقابل المديرية تدخله على طول حتى لو كان أجنبي ، ده مش سوق ، دي مدرسة دولية ليها قواعد وأصول

شعرت أية بالحرج من توبيخ الأستاذة اعتماد اللاذع لها ، ولوت شفيتها في استنكار .. ثم ..

-أية متسائلة بنبرة خافتة : طب يعني أخليه يمشي ؟

-إعتماد بجدية : لأ .. دخليه ، بس تاخدي بالك بعد كده

-أية بإقتصاب : طيب

ثم سارت مبتعدة عن مكتب المديرية ، وتوجهت إلى الخارج حيث يقف آياز ، و..

-أية بنبرة عادية وهي تشير بكف يدها : come please)
تعالى من فضلك)

ابتسم لها آياز بعدوبة خطفت أنفاسها ، وشعرت بالحرارة
تتبعث من وجنتيها ، وخاصة حينما مر من جوارها ...
-أية لنفسها بعدم تصديق : اوووف ، هو في كده ، مز مز
يعني .. !

ظلت هي مسلطة عينيها عليه إلى أن دلف إلى داخل مكتب
الأستاذة اعتماد ، وفجأة لمعت عينيها و..
-أية بنبرة متحمسة : انا لازم أقول للبنات عليه ، لازم
يشوفوه !!..

ثم سارت بخطوات أقرب للركض في اتجاه غرفة المعلمات
...

.....

رحبت الأستاذة اعتماد بآياز وطلبت منه الجلوس على
المقعد المواجه لها ، و...

-اعتماد بجدية : Yes , how can I help you (أيوه ،
إزاي أقدر أساعدك) ؟

-آياز مبتسماً بهدوء : أنا بعرف أتكلم عربي

رفعت هي حاجبيها في تعجب ، ثم رمقته بنظرات أكثر
تفحصاً و...

-اعتماد بنبرة رسمية : مممم .. تمام ، مين حضرتك ؟

مد آياز يده بذلك الملف الذي كان يحمله ويحتوي على
سيرته الذاتية ، ثم أعطاه لها ، و...

-آياز بنبرة متريئة : أنا آياز كامل الشناوي ، مدرس رياض
أطفال في ولاية أريزونا بالـ US ، وعرفت إن في مكان
فاضي لمعلم انجليش هنا ، فكنت عاوز أقدم فيها

أطرقت اعتماد رأسها للأسفل لتطالع الملف ، ثم أمسكت
بقلمها الحبر ، وبدأت في تدوين بعض الملحوظات عنه ،
وقامت برفع رأسها مجدداً للأعلى لتحقق فيه بنظرات جادة
قبل أن تردف ب....

-اعتماد بنبرة جافة : عندك امتيازات حلوة مستر آياز ، بس
للأسف الوظيفة دي لمدرسات إناث مش للذكور ، احنا
معندناش هنا مدرسين رجالة في الكي جي ، حضرتك تقدر

تقدم على وظيفة في المراحل الأعلى مع سن أكبر للأطفال ،
وأنا واثقة إنك ستتقبل على طول

-آياز بهدوء حذر : أنا عارف الكلام ده كويس ، بس أنا
حابب أشتغل هنا ، وشايف نفسي هاقدر أعمل حاجة كويسة
للأطفال اللي في السن ده

-اعتماد بنبرة أكثر جدية : مع كل احترامي ليك ، وظيف
رياض الأطفال غير مناسبة للذكور ، مافيش أي مدرسة هنا
بتقبل تشغل مدرس راجل

-آياز بنبرة متريثة : كل ده أنا فاهمه ، وعارف أسبابه ،
بس عندي في أريزونا الموضوع مختلف تماماً ، مدرسين
رياض الأطفال ممكن يكونوا ذكور طالما هما كفؤ ومناسبين
، مافيش أي مشاكل بالنسبة للـ Gender (النوع)

-إعتماد بنبرة معترضة : ده في أمريكا ، لكن في مصر
الوضع مختلف ، وبصراحة أنا مقدرش اجازف وأعمل حاجة
زي كده

أخذ آياز نفساً مطولاً ، ثم زفره بهدوء ، واستدار بجسده
قليلاً ناحيتها ، و..

-آياز بنبرة رخيمة : حضرتك دي مش مجازفة لأنني مش
جاي أتعلم لسه ، بالعكس أنا عامل دراسات عليا في مجال
تخصصي ، وخذت الماستر بإمتياز ، والـ scores (درجات
) بتاعي موجود قصاد حضرتك تقدرني تشوفيه

-اعتماد وهي تمط شفيتها في حيرة : أنا شايقة الـ CV)
السيرة الذاتية (بتاعك ، وفعلاً في حاجات مبهرة ، بس
النظام والروتين ، وآ...

-آياز مقترحاً بخفوت : حضرتك تقدرني تحطيني في فترة
اختبار وتشوفي إن كنت هانجح ولا لأ

-اعتماد بعدم اقتناع : ماينفعلش أعمل كده ، لأن أنا عندي
التزامات ومسؤوليات قصاد الأطفال وأولياء الأمور ، مقدرش
أجازف بحاجة مش عارفة نتيجتها ، ده غير إن الـ Staff
كله من الأنسات يعني هايكون فيها نوع من الحرج أخط
راجل وسطهم

صمت آياز لبرهة لكي يفكر في طريقة ما لإقناعها بأنه
مؤهل لتلك الوظيفة ، ووضع يده على طرف ذقنه ، وظل
يحرك أصابعه بطريقة ثابتة ، ثم انتصب في جلسته ، و...
-آياز بنبرة هادئة ، ونظرات متفائلة : طب أنا عندي اقتراح
لحضرتك

-اعتماد بإيجاز : خير

-آياز بصوت متحمس : مش في Demo (عرض تجريبي)
بيتعمل قبل اختيار أي مدرس

أومات اعتماد برأسها إيماءة خفيفة لتؤيده ، ثم أمعنت النظر فيه لتعرف ما الذي يرمي إليه ، في حين تابع هو ردة فعلها ..

-أياز مكماً بنبرة أكثر حماساً : أنا عاوز اشترك في الديمو ده مع المتقدمين للوظيفة ، وحضرتك وباقي الزميلات اللي هنا تقدرنا تقيموني وتحكموا عليا إن كنت أصلح ولا لأ

صممت هي لتفكر في الإقتراح الذي قاله قبل لحظات ، بينما راقب هو قسامات وجهها محاولاً سبر أغوار عقلها لمعرفة ما الذي تفكر فيه ..

تنهدت هي في حيرة ، ثم اعتدلت في جلستها ، وأسندت قلمها الحبر على المدونة التي تكتب فيها ، ونظرت إليه بنظرات ثابتة ، ..

-اعتماد بنبرة جادة : أنا موافقة

تفاجيء هو بقرارها ، وارتسمت علامات الإندهاش على ملامح وجهه ، بينما أكملت هي حديثها ب....

-إعتماد بنبرة رسمية ، ونظرات هادئة : حضرتك تقدر تيجي بكرة مع بقية المتقدمات للوظيفة الساعة عشرة الصبح ،

وتشارك معاهم وتورينا مهاراتك ، لكن مقدرش اوعدك
بحاجة أكثر من كده

-آياز بتلهف ، ونظرات ممتة : Thank you so much
(شكراً جزيلاً) ، وأنا هاثبت لحضرتك إني المناسب للوظيفة
دي

-اعتماد بإقتضاب : إن شاء الله ، شرفت

-آياز بجدية : Thanks again (شكراً مجدداً)

ثم نهض عن المقعد وعلى وجهه ابتسامة عريضة ، ومد
يده ليصافحها ، ومن ثم دلف إلى خارج المكتب وهو
يتعهد لنفسه بـ ...

-آياز بنبرة واثقة لنفسه : بكرة هاكون ضمن ال- staff ، I
promise (وعد مني)!!!!

.....

الفصل الرابع :

في غرفة المعلمات بمبنى رياض الأطفال بمدرسة اللافانيا
“،

جلست الفتيات يتحدثن سوياً ويثرثرن كالعادة عما حدث
بالأمس لهن سواء في منازلهن أو مع أفراد عائلتهن ..
في نفس الوقت شعرت ريمان بصداع خفيف في رأسها ،
فنهضت عن مقعدها ، و...

-ريمان بنبرة هادئة وهي تحقق بالجميع : أنا هاروح أعمل
كوفي ميكس لنفسي ، حد عاوز معايا ؟
-ليلة بعدم اكتر اث : أنا مش عاوزة
-فريال بنبرة عادية : ماشي يا ريموو ، أعمليلي بليز معاكي

نهضت سارة هي الأخرى عن مقعدها ، ونظرت في
اتجاه ريمان و...

-سارة مبتسمة في هدوء : بصي اسبقينا انتي على البوفية
سخني المياه ، وأنا هاشوف البنات وأحصلك
-ريمان بجدية : بس أوعي تتأخري عليا
-سارة بنبرة متحمسة : لأ دقيقتين بالكثير وأجيلك
-ريمان مبتسمة ابتسامة خفيفة : أوكي

خرجت ريمان من الغرفة وهي تحمل في يدها كيس (القهوة
السريعة) واتجهت ناحية المطبخ الصغير الملحق بالمبنى

...

بعد لحظات دلفت السكرتيرة أية إلى داخل الغرفة وهي تلهث
بصعوبة ، ثم انحنت قليلاً بجسدها للأمام ، ووضعت يدها
على صدرها لتلتقط أنفاسها ، بينما تعجبت الملمات
الموجودات بالغرفة من حالتها ، و...

-فريال متسائلة باستغراب : مالك يا أية ؟

-سارة بإندهاش : خدي نفسك يا بنتي

-رانيا بتوتر : اوعى يكون في اجتماع تاني ، احنا مش
بنخلص أبداً

-نشوى بجدية : يا بنات اسكتوا شوية ، سيبوها تاخذ نفسها
الأول

رفعت أية يدها في الهواء لتطلب منهم الهدوء قليلاً ، و...

-أية بنبرة لاهثة : اس... اسمعوني بس

-رانيا متسائلة بحيرة : في ايه ؟

أخذت أية نفساً عميقاً ، ثم زفرته مرة واحدة ، واعتدلت في وقفها ، ورمقت الجميع بنظرات ثابتة و..
-أية بنبرة شبه عالية : في واحد مز موجود عندنا في الكي جي

-الجميع باندهاش : ايببييه !!!

تعالت بعض الهمهمات والثرثرات الجانبية ، فلم تفهم أية ما الذي يتحدث عن ، لذا رفعت صوتها أكثر و...

-أية بنبرة شبه هادرة : بصوا هو أنا معرفش هو مين ، لكن هو موجود عند مس إعتما

-رانيا بتلهف : انتي بتهزري صح ؟

-أية وهي تهز رأسها بالنفي : لأ طبعاً

-نشوى بنبرة متشوقة ، ونظرات جاحظة : أوبا مز في الكي جي ، دي من عجائب الدنيا السبع

-سحر بهدوء : احنا واخدين على كده

-رانيا بنبرة شبه جادة وتحمل الحماسة في طياتها : طب أنا عاوزة أشوف المز ده

-سارة باستغراب : طب مش احنا المفروض نشوف الأول مين عاوز يشرب آآآ...

-ليلة مقاطعة بمزاح : وده وقت أكل ولا شرب
-نشوى بتلهف : على رأيك ، ده وقت المز
-أية بجدية ، ونظرات ثابتة : بقولكم ايه أنا هارجع المكتب
قبل ما يخرج من عند مس اعتماد ، ولو عاوزين تشوفوه
تعالوا ، اوكي ..

ثم تركت الفتيات في حيرتهن ، وسارت مسرعة في اتجاه
غرفة مكتبها ...

في نفس التوقيت دلفت عاليًا إلى داخل الغرفة ووجهها
عابس نوعاً ما ، وهي تتمم بكلمات غير مفهومة ، وأسندت
حقيبتها على الطاولة المستديرة .. ثم سحبت أقرب مقعد
لتلقي بجسدها عليه .. واقتربت منها سارة و...
-سارة متسائلة بحيرة : مالك يا عاليًا ؟ ايه اللي أخرك كده

زفرت هي في ضيق بعد أن أخذت نفساً مطولاً ، ثم
استدارت برأسها في اتجاهها و...

-عاليًا بحنق ، ونظرات ضيقة : الزفت السواق اللي
بيوصلني لهن الأجرة مش عاجباه ، وكان بيتخانق معايا
وخلى واحد غريب يتدخل ويدفعلي الأجرة

-سارة بنبرة متشوقة : انتي هاتكروتى الحكاية ولا ايه ،
قوليلي كل حاجة بالتفصيل

زفرت عاليا مجدداً في ضيق ، وحاولت أن تتهرب من
حصار رفيقتها سارة لها ، ولكن أصرت الأخيرة على
معرفة كل شيء ..

مالت رانيا على نشوى وهمست لها بـ ...

-رانيا بخفوت شديد ، ونظرات ثاقبة كالصقر : بقولك ايه
عاوزين نشوف المز اللي أية بتقول عليه

-نشوى بامتعاض وهي تلوي شفيتها : يا بت اهدي على
نفسك شوية ، هو أي حاجة أية تقولها هانجري وراها ،
مش عاوزاكي تباني مدلوقة كده

-رانيا وهي تعقد حاجبها في جدية : مش يمكن يكون كلامها
جد

-نشوى بنبرة أقرب للهمس : وافرضي مقلب عملاه عشان
تشوف مين فينا اللي هاتريل على الراجل ، محدش هنا سهل
، خدي بالك يا رروني

-رانيا بضيق واضح : اوووف ، يعني احنا مش هانروح
نطل عليه

-نشوى بجدية وهي تهز رأسها بالنفي : لأطبعاً ، على الأقل
في الآخر مش الوقتي
-رانيا على مضض : طيب

.....

زفرت ريمان في انزعاج بسبب تأخر سارة في
الحضور إليها ، وخاصة انها قد انتهت من غلي المياه ،
فوقفت في مكانها حائرة ، ثم حسمت أمرها بإعداد كوب
القهوة السريعة لها فقط ، وبالفعل صبت محتويات الكيس
وقلته مع المياه ، وأمسكت بكوبها الزجاجي ، ودلفت إلى
خارج المطبخ وهي تحاول جاهدة ألا تسكب محتوياته
بسبب حرارته العالية ..

في نفس التوقيت كان آياز قد انتهى من مقابلة المديرية ،
وسار في الاتجاه الذي أتى منه وهو متحمس للفوز بتلك
الوظيفة الجديدة ..

استدار هو برأسه ناحية اليسار ليتفحص أعمال الأطفال
اليدوية المعلقة على الحوائط ، واعتلى ثغره ابتسامة اعجاب
، ولم ينتبه إلى ريمان القادمة في اتجاهه

شهقت ريمان في فزع حينما رأت ذلك الشاب على وشك
الاصطدام بها فتوقفت فجأة عن السير لتتحاشاه ، ولكن
اندفعت محتويات الكوب الساخن في اتجاهه ، وبللت سترته
، فتسمر هو في مكانه ، وأطرق رأسه للأسفل ليتفحص
ملابسه ..

اتسعت عينيها في رعب ممزوج بالإحراج ، واندفعت (لا
إرادياً) في اتجاه تلك الطاولة الصغيرة الموضوعة في
منتصف الردهة لتحضر من عليها بعض المناشف الورقية
لتجفف بها ملابسها .. وسارت عائدة ناحيته ، ثم مدت يدها
المرتعشة ناحية السترة لتمسحها و...

ريمان بنبرة متلعثمة وهي مجفلة لعينيها : I am so
sorry, I didn't mean it (أنا أسفة جداً ، لم أقصد هذا
(

لم ينظر آياز إليها ، بل ظل مسلطاً بصره على السترة التي
تلطخت بفعل القهوة ، وأشار لها بيده لكي لا تقترب و...

-آياز بنبرة شبه منزعجة : It's okay (حصل خير)

ريمان بتوتر شديد : والله I didn't see you .. بليز
accept my apology (أنا ماشوفتكش ، من فضلك تقبل
إعتذاري)

اكتفى آياز بإبتسامة باردة لا معنى لها ، ثم تركها ،
وانصرف .. بينما ظلت هي واقفة في مكانها والذهول
الممزوج بالقلق مسيطر عليها ، وحاولت أن تتحدث معه
ولكنه كان قد تلاشى من أمام ناظريها كالشبح ..

لمحت العاملة ناصرة آياز وهو يسير غاضباً في اتجاه
مدخل المبنى ، فركضت خلفه و...
-ناصره بنبرة عالية : يا .. يا .. أستاذ ، م.. اسمها ايه ،
أيوه مستر ، يا مستر

توقف آياز عن السير ، والتفت برأسه في اتجاه العاملة ،
ورمقها بنظرات جادة ، بينما لمحت هي تلك البقعة الكبيرة
التي لطخت حلته وأفسدت هيئته ، فاعتلى ثغرها ابتسامة
عريضة ، وظنت أنه لن يفهمها و...

-ناصره مبتسمة في بلاهة وهي تمزح : انت ريلت على
نفسك ، ههههههههههههههههه .. شكك يضحك يا مستر

حدجها هو بنظرات ساخطة ، وعبت ملامح وجهه أكثر ،
و...

-آياز بحدة : It's not your business (هذا ليس من شانك)

-ناصره بعدم مبالاة : أنا مش فاهمة أيتها حاجة من اللي بترطنه ده ، بس الجاكيته بتاعتك لامواخذه في دي الكلمة (وسخه) ومش آآ...

صر آياز على أسنانه في حنق ، وانزعج أكثر من طريقة العاملة الساخرة على هيئته ، فأطلق سبة باللغة الانجليزية ، وتركها وانصرف إلى خارج المبنى تماماً ..

تعجبت ناصره من حالته وضربت كفها بالآخر و...

-ناصره وهي تزم شفيتها في تأفف : فعلاً .. أخرت خدمة الغز علقه ...!!!

.....

عادت أية إلى غرفة مكتبها ، وقبل أن تدخل إليه ، رأت ريمان متسمره في مكانها ، وعلى وجهها علامات عبوس غريبة ، فرفعت حاجبها في اندهاش ، وقطبت جبينها في استغراب ، و...

-أية لنفسها بخفوت : هي مالها دي !؟

كانت على وشك الذهاب ناحيتها ، ولكنها سمعت صوت
رنين الهاتف من داخل الغرفة ، فركضت سريعاً لكي تجيب
عليه ، و...

-أية هاتفياً بنبرة لاهثة : أيوه يا مس اعتماد

ثم صمتت للحظة لكي تستمع إلى ما تطلبه منها ، و...

-أية بهدوء وهي ترمش بعينيها : طيب .. تمام ممم...
اوكي ... ممم.. حاضر هابلغ الجميع مافيش غياب بكرة ،
اوكي ..

أنهت هي المكالمة معها ، ومن ثم تنهدت في ارهاق و...
-أية لنفسها بتعب : اوووف ، قلبي كان هايقف ، الحمدلله
إني لحقت أرد عليها وإلا كان زمني خدت كلمتين في جنابي
منها

ثم صمتت للحظة لتذكر نفسها بذلك الشاب الوسيم الذي
كان متواجداً قبل قليل في مكتب المدير ، فضربت جبينها
بقبضة يدها في ندم و...

-أية بضيق : اوووف ، طالما اتصلت بيا يبقى المز مشى من
عندها ، يا خسارة البنات مش لحقوا يشوفوه ..!!!!!!

-آياز بضيق واضح : رامي ، (come back quickly)
ارجع بسرعة

-رامي بايجاز : تمام

.....

في غرفة المعلمات بمبنى رياض الأطفال ،،،،

عادت ريمان للغرفة وهي تغمغم بخفوت غير مستوعبة ما فعلته للتو مع ذاك الغريب الذي لم تتبين ملامح وجهه ، فرأتها سارة على تلك الحالة ، فضيقت عينيها ، وسلطت أنظارها عليها و...

-سارة باستغراب : مالك انتي كمان ؟

-ريمان بخفوت ، ونظرات زائغة : أنا عملت كارثة

اعتدلت عاليا هي الأخرى في جلستها ، ووضعت ساقاً فوق الأخرى ، و...

-عاليا بجدية : هو يوم قفيل باين عليه

-سارة متسائلة بفضول : عملتي ايه انتي الثانية ؟

-ريمان بقلق : أنا وقعت الكوفي ميكس على واحد

-سارة بنبرة أقرب للجدية : واحد مين ؟
-ريمان بإقتضاب : معرفش ، بس هو اتضايق أوي
-عاليا وهي تلوي شفيتها في تهكم : يعني بعد ما سلختيه
عاوزاه يضحكك مثلاً

رفعت سارة كفي يدها في الهواء ، و...
-سارة بلهجة أمره ، ونظرات دقيقة : أنا عاوزه أسمع
انتي عملتي ايه ، قولي يالا وبالتفصيل الممل
قربت ليلة مقعدها من الثلاث فتيات ، وجلست ملاصقة إلى
ريمان ، و...
-ليلة متسائلة بتوجس : اوعي يكون الواد المز اللي أية
قالتلنا عليه هو اللي اتسلق؟
-ريمان بانزعاج : معرفش
-سارة بجدية : ششش .. اسكتوا كلكم خلينا نعرف كل اللي
حصل

وبدا صوت الهمهمات والهمسات الجانبية في الانتشار
بينهن .. تابعت رانيا ما يحدث بين مجموعة الفتيات بنظرات
حادة و...

-رانيا بخفوت : نووشة ، بيتهياي الكل مشغول ، تعالي احنا
نبص على المز

-نشوى مبتسمة في لؤم : اوكي ، بس يا رب مايكونش
مشى

ثم نهضت كلتاهما عن مقعديهما ، فالتفتت سحر لهما و...

-سحر متسائلة بنبرة عادية : رايعين فين يا بنات

-رانيا بتلثم : آآآ.. ه.. هانعمل حاجة تتشرب

مطت فريال ذراعيها في الهواء لكي تتمتع قليلاً ، ثم أرخت
جسدها المرهق ، و..

-فريال بنبرة متعشمة : طب بليز يا رووني اعمليلي نسكافيه
معاكي

-رانيا بايجاز : طيب ..

ثم أشارت لرفيقتها نشوى بعينيها لكي تسير معها إلى
الخارج ، وبالفعل اتجهت كلتاهما إلى مكتب السكرتيرة أية
، ووقفنا في الخارج وقبل أن يحدقا في باب غرفة الأستاذة
اعتماد تفاجئا بها تفتح الباب ، فتراجعتا للخلف وتملكهما
التوتر ..

حدجتها الأستاذة إعتماذ بنظرات متفحصة ، و...
-اعتماد متسائلة بنبرة رسمية : عاوزين حاجة يا بنات

استدارت نشوى برأسها في اتجاه رانيا ، وتبادلت كلتاها
النظرات الحائرة ، و...

-نشوى بارتباك : آآ... لأ

-رانيا بتلثم : أنا .. قصدي .. آآ.. احنا بنعمل مشروبات
وآآ..

-اعتماد بنبرة جادة وهي تشير بيدها : من فضلكم خلصوا
اللي وراكم ، مافيش وقت نضيعه ، اتفضلوا يالا

-نشوى وهي تتنحج في حرج : احم .. حاضر

-رانيا وهي تلوي فمها في انزعاج : طيب

ثم تأبطت كلتاها في ذراع الأخرى ، وسارتا عائدتين إلى
غرفة المعلمات

.....

في سيارة رامي ،،،،،

قاد رامي سيارته عائداً إلى الفيلا التي يقطن بها مع عائلته ، وكان بين الحين والآخر يلتفت برأسه في اتجاه آياز ليرمقه بنظرات متفحصة لهيئته ، ولأكثر من مرة حاول أن يسيطر على نفسه كي لا يضحك على هيئة آياز ، في حين بدأ الإنزعاج جلياً على الأخير ، و...

-آياز بحلق : بص قدامك ، مش كل شوية هاتبص كده

-رامي بنبرة مرحة : بصراحة ومن غير زعل ، شكك مسخرة على الآخر

-آياز بوجه ممتع ، ونبرة منفعلة : خلاص بقى

-رامي متابعاً بسخرية : يعني ده بس اللي حصلك من أول مقابلة ، أومال لو شغلوك عندهم ، هترجعنا بهدومك مقطعة

-آياز بنبرة شبه حادة : رامي ، خلاص كفاية ، ده حصل بدون قصد ، فمافيش داعي تشتغلني كل شوية

-رامي مبتسماً في مرح : ماشي .. ماشي ، مش هاتكلم تاني !...

استدار آياز برأسه في اتجاه النافذة ، وسلط بصره على الطريق ، وزفر لأكثر من مرة بتأفف وهو يتذكر ما حدث ، ثم ...

-آياز لنفسه بجدية : مش لازم أسمح لأي حد مهما كان يهزاني ولا يقلل من قيمتي!!

.....

الفصل الخامس :

اجتمعت الفتيات عقب انتهاء اليوم الدراسي في أحد الكافيات العامة ، وبدأن ثرثرتهن المعتادة حول طبيعة العمل مع الأستاذة إعتماذ وتحكماتها الغير مبررة، و....
-أية بنبرة ساخطة : والله انتو ربنا بيحبكم إنكم مش أعيدين معاها في مكتب واحد

-ميادة بلهجة شبه جادة : يا بنتي دي أصلاً مش تطاق ، أسلوبها وحش أوي

-هناء بحنق : هو في حد أصلاً بيحبها ، بجد أنا مش متخيلة إن في مديرة بالشكل البشع ده

-ليلة بهدوء : على فكرة في أسوأ منها

-رانيا وهي تزرم شفيتها في تأفف : معتقدش

- عاليا بنبرة شبه حادة : دي مش بني آدمة ، مافيش حد
اتعامل معاها إلا وشتمها وقال كلام زبالة عنها
- ميادة بجدية : ده طبع فيها
- هناء بتهيدة : فين أيام مس دولت ، بجد كانت سكرة
ولذيذة وبتحترم الكل
- ميادة وهي توميء برأسها إيماة خفيفة : اه فعلاً .. كانت
بتقدر ظروف أي واحدة
- سارة بنبرة متذمرة تحمل في طياتها التهكم : جربي انتي
بس تقولي لأبلك اعتماد عاوزة أخذ اذن ، يمكن تقيم عليكي
الحد
- هناء بضجر : أعودو بالله
- عاليا بنفاد صبر : ربنا يهونها علينا ، ونخلص بقي
- أية بنبرة ناعمة : انتو عارفين لو كلنا عملنا ربطاية عليها
ممکن تمشي
- ريمان وهي تعقد حاجبيها في عدم اقتناع : معتقدش
- نشوى بعدم اكتر اثار : هي أصلاً متقدرش تعملنا حاجة
- رانيا بانزعاج : ماتفكم من السيرة دي ، وخلصنا نشوف
حاجة تانية أحسن
- أية مبتسمة في رقة : حد شاف المز بتاع النهاردة
- رانيا بتذمر : لأ ملحقش

.....
في فيلا سرحان عليه ،،،،،

عاد كلاً من رامي وآياز إلى الفيلا ، ولم يسلم الأخير
من تعليقات رامي الساخرة ، وما زاد الطين بلة هو انضمام
الخدمة وردة إليه في مزاحه و...

-وردة ببلاهة : عيني عليك يا سي آاز ، كده تبقى موحوح
من أول يوم ليك في أبصر ايه ده

-آياز بنبرة مغتظة ، ونظرات حادة : فلاور ، بليز
Enough (كفاية)

وضعت وردة إصبعيها على طرف ذقتها ، وظلت تحكها في
حيرة ، و...

-وردة بعدم فهم ، ونظرات حائرة : عاوز تتف ؟ يعني
أجيبك منديل ؟ بس يا خويا مش هو اتكب على رجلك ولا
مراخيرك (مناخيرك / أنف) ، فهمني !!!

-آياز بضجر : يا ربي ، أنا مش هاخلص ، فلاور ابعدني عن
نافوخي ، حلو كده .. مفهوم !

-رامي مبتسماً ابتساماً خفيفة : خفي عليه يا وردة ، هو
مش ناقص

-وردة بنبرة متحمسة : أنا عاوزة بس أطمئن انك كان هاتسيب علامة ولا آآ...

-آياز مقاطعاً بضجر : أنا ماشي

ثم سار مبتعداً عنهما ، فأسرع رامي في خلفه ، وأمسك به من ذراعه ، و...

-رامي بجدية : استنى يا إيذووو ، ما أنت عارف وردة ، وانا قايلك قبل كده إنها هبله وآآ...

-آياز بحنق : رامي ، أنا محتاج أركز ، مش فايق لا لهزار ولا لتريقة ، مستقبلي كله متوقف على مقابلة بكرة

-رامي بنبرة عادية ، ونظرات ثابتة : أنا مش عاوزك تتعشم كثير ، معتقدش إن المديره دي هترضى تشغلك

-آياز بإصرار : أنا عاوز أوريها هي أو غيرها إني KG Teacher مؤهل ، مش بس كلام

تتهد رامي في ارهاق ، ثم أجفل عينيه قليلاً ، ووضع إصبعيه فيهما بعد أن أغمضهما ليفركهما ، و...

-رامي بنبرة هادئة : بقولك ايه ، تعالى نخرج نغير جو

-آياز بإيجاز : ماليش مزاج ، وبعدين انا عاوز أستعد للانترفيو (مقابلة)

-رامي بإصرار : طب تعالى أحكيك على حاجة حصلت
النهاردة قدام المدرسة بتاعتك دي

ضيق آياز عيينه ، ورمقه بنظرات جادة و..

-آياز متسائلاً بفضول : حاجة ايه دي

ابتسم رامي لأنه قد استطاع أن يصرف تفكير ابن خالته عما
حدث له ، وبدأ في سرد ذلك الموقف الغريب الذي حدث
مع إحدى الفتيات أمام بوابة المدرسة ، فأعجب آياز بتصرف
رامي الرجولي ، ثم تركه بعد ذلك واتجه ناحية الدرج ليصعد
إلى غرفته الموجودة في الطابق العلوي ليبدل ثيابه ويستعد
لتلك المقابلة التي ستحدد مصيره المستقبلي ...

.....

في صباح اليوم التالي ،،،

في مبنى رياض الأطفال الملحق بمدارس اللافانيا الدولية
،،،

تجمعت بعض المعلمات المتقدمات بطلب الإلتحاق بتلك
الوظيفة - وممن تنطبق عليهن الشروط - في الاستقبال

الملحق بالمبني من أجل حضور العرض التقديمي الخاص
بكل واحدة منهن على حدا ...

.....

أوقفت عاليا سيارة الأجرة أمام بوابة المدرسة – كالعادة –
وترجلت منها بعد أن دفعت الأجرة للسائق ، ثم استدارت
برأسها في كل الاتجاهات لكي تبحث عن ذلك الغريب الذي
وعدها بالقدوم اليوم من أجل أخذ ذلك المبلغ المالي الذي
دفعه لها بالأمس ، ولكنها للأسف لم تجده .. فزمت شفيتها
في ضيق و...

- عاليا بتذمر : يعني مجاش زي ما قالي ! طب أنا هاعمل ايه
الوقتي ، مش معقول هافضل واقفة كده في الشارع أستناه ..

وقفت هي حائرة للحظة في مكانها محاولة التفكير في حل ما
، ورفعت يدها الممسكة بهاتفها المحمول لتنظر في شاشته ،
فوجدت أن الوقت الخاص بالتوقيع بالحضور قد قارب على
الإنهاء لذا تشدقت بـ ...

- عاليا بضيق : خلاص بقى أنا مش ناقصة أكتب تأخير تاني

ثم عدلت من وضعية حجابها الأزرق النيلي ، وقامت بجذب
كنزتها البيضاء الطويلة للأسفل قليلاً ، وسارت ناحية
البوابة ...

.....

وصلت أيضاً المعلمات اللاتي يعملن بالمدرسة إلى المبنى
، وجلست في الغرفة الخاصة بهن ، وبدأن الاستعداد
لحضور تلك المقابلات التقييمية للمعلمات الجدد .. كذلك
أكمل حضور باقي المعلمات الغائبات بعد عودتهن من
حضور تلك الدورة التدريبية الخاصة بطريق التقييم الحديثة
، وأيضاً العائدات من رحلة المدرسة الترفيهية إلى مدينة
رأس سدر .. ثم تسألن عن آخر المستجدات في المدرسة
عامة وفي قسم رياض الأطفال خاصة ، و...

-نشوى مبتسمة ابتسامة خفيفة : حمدلله على السلامة يا
مس جانيت

اعتدلت جانيت حنا - معلمة الموسيقى ومسئولة النشاط
الطلابي في قسم رياض الأطفال - في جلستها على المقعد
الجلدي ، و...

-جانيت بنبرة سعيدة : الله يسلمك يا نووشا

-رانيا متسائلة بفضول : اتبسطي يا مس جانيت في الرحلة
-جانيت بنبرة متحمسة : اه أوي .. بصراحة كانوا عاملين
بروجرام هایل

-فريال وهي تمط شفيتها في إعجاب : كويس والله ، أول حد
أسمعه

-جانيت بنبرة رقيقة : بصي هو طبعاً في حاجات كانت مش
أد كده ، بس at least (على الأقل) معظم الحاجة كانت
معقولة

أسندت نادية – معلمة اللغة الانجليزية ومسئولة تنسيق
الأنشطة ذات الصفات الهادئة ، وملامح الوجه الطفولية –
حقيبتها الصغيرة على الطاولة ، ثم جلست على المقعد
الشاعر و...

-نادية بخفوت وهي تشير بيدها : الحق يتقال هما هنا
بيهتموا بالنشاط الترفيهي للمدرسين

-جانيت بإيماءة خفيفة : أه جدا ، أنا سامعة انهم ناويين
يعملوا رحلة تانية لبورتو السخنة

-فريال بجدية : بس أكيد مش دلوقتي

-جانيت بنبرة عادية : لالالا .. قدام شوية

-نادية وهي تمط شفيتها : ممممم...

ثم دلفت إلى داخل الغرفة معلمة أخرى تمتاز بالشخصية
المرحة والمحبة للحياة ، وقامت بنزع شالها الصيفي عن
عنقها ، ثم ثبتت الدبوس المتواجد أعلى حجابها ، و...
-هبة بنبرة عالية : صباح الخير عليكم

بادلتها معظم الموجودات التحية ، في حين إلتفتت لها
سارة و...
-سارة بإبتسامة عريضة : ناموسيتك كحلي يا هاتم ، كل ده
تأخير

-هبة بتهيدة إرهاق : هاعمل ايه بس ، كان ورايا حاجات
أد كده امبارح ، ونمت على الفجر ومكونتش بصراحة قادرة
أقوم ولا حتى أجي النهاردة

-سارة وهي تزم شفيتها : الحمد لله إننا قولنا للأبونية
ميعديش عليكي كان زمانا كلنا اتأخرنا

-هبة بنبرة شبه جادة : طالما مردتيش عليكم ، يبقى
تعرفوا إني في غيبوبة ومصحتش لسه

-سارة وهي تعيد رأسها للخلف : أها

.....

فتحت منة رشوان – معلمة اللغة الانجليزية ، وخريجة كلية
الأسن – حقيبتها الفاخرة لتخرج منها أحمر الشفاه
والمرآة الصغيرة لتضع منه القليل على شفتيها المكتنزتين ،
ثم رمقت رفيقتها سالي ياسر – معلمة اللغة الانجليزية ،
ومسئولة الترجمة في القسم - بنظرات جادة قبل أن تردف
بـ ...

-منة بنبرة ضجرة ، ونظرات منزعة : دورة ولا ليها أي
لازمة ، ما نابنا بس إلا دماغنا اتصدعت ، ومخنا ورم من
كتر الرغي اللي على الفاضية والمليانة

-سالي بنبرة مازحة : هو انتي بيعجبك حاجة يا سنوفة

-منة وهي تلوي شفتيها في ضيق : وليه أصلاً تعجبني ،
طالما مش اد كده يبقى لازم أقول رأيي بصراحة ..

-سارة مقاطعة بنبرة متشوقة : بس على الأقل شوفتوا
وجوه جديدة بدل وش البومة اللي معانا دي

-منة على مضض : أبدأ والله ، ده كله يقرف ، مافيش حد
عدل

تتحنت الأستاذة حنان – رئيسة قسم اللغة الانجليزية
الخاص بمرحلة الرياض – في هدوء ، ثم حدقت في
زميلاتها و....

-حنان بهدوء ورزانة : بس استفدنا من الكتب الموجودة في
الدورة ، بجد هيفرق معنا أوي لو جنبناهم هنا
-سارة بعدم اكترات : يا أبلة حنان كبري دماغك !

مدت سالي يدها داخل حقيبتها الجلدية الصغيرة ، ثم
أخرجت منها كيس (قهوة سريعة) ولوحت به في الهواء ،
و...

-سالي بنبرة مرحة : مين فيكم بقي يا حلوين هاي عملي
النسكافيه بتاعي

-ريمان بإعتراض : اكيد مش أنا ، توبة من بعد اللي حصل

-سارة غامزة ، وبخفوت : صح ، ده انتي سلختي الجدع

-سالي متسائلة بعدم فهم : سلخت مين ؟

-سارة بهدوء: بعدين هاقولك

نهضت ميادة عن المقعد ، ومدت يدها في اتجاه رفيقتها
سالي وأخذت منها كيس القهوة السريعة و...

-ميادة بنبرة هادئة : أنا هاروح أعمل النسكافيه ، هاتيه يا

سالوكة ، حد عاوز تاني معايا ؟

وبدأت المعلمات في تناول الإفطار سريعاً ، وكذلك إعداد المشروبات الساخنة ، ولم تكف أي منهن عن الثثرة الروتينية ..

.....

أمسكت السكرتيرة أية بسماعة الهاتف ، وقامت بالاتصال بمكتب مديرتها و..

-أية هاتفياً بنبرة رقيقة : مس اعتماد الكل موجود وجاهز ، هنبداً امتى ؟

-اعتماد هاتفياً بنبرة جادة : خمس دقائق مس أية وهاكون موجودة في أوضة (المالتميديا) ، خلي كل ال teachers (المعلمات) يروحوا هناك

-أية هاتفياً بهدوء : اوكي يا مس اعتماد

ثم أنهت المكالمة معها ، ووضعت السماعة في مكانها ، وانصرفت خارج مكتبها لتبلغ المتقدّمات للوظيفة بالذهاب إلى مكان عقد المقابلة ..

.....

أصر رامي على إيصال آياز إلى المدرسة رغم اعتراض الأخير على هذا ، ولكنه كان يأمل أن يرى تلك الفتاة غريبة الشأن مجدداً ، خاصة وأنها ربما تأتي في نفس توقيت أمس ..

ترجل آياز من السيارة – وكذلك فعل رامي – فاستغرب الأول مما يفعله ابن خالته وخاصة أنه كان يتلفت حوله بطريقة مريبة ، بالإضافة إلى لحاقه به لذا ...

-آياز متسائلاً بنبرة متعجبة : انت رايح فين ؟

-رامي وهو يتحنح بخشونة ، وبنظرات مرتبكة : احم .. آآ..
لأ عادي ، أنا بس بفك رجلي

-آياز وهو يلوي فمه في عدم اقتناع : نعم ؟ تفك رجلك ؟ ليه
يعني

-رامي مبتسماً ابتسامة سخيفة : عادي متخدش في بالك ،
المهم انت وريهم شطارتك ، و.. و Good Luck (حظ سعيد)

-آياز وهو يتهد في قلق : Oh, yeah (يا ريت)

قام رامي بمصافحة آياز ، ثم استند بظهره على مقدمة سيارته وتابع ابن خالته إلى أن اختفى من أمام ناظريه ،

فاستدار برأسه في كافة الاتجاهات ، وظل يراقب الطريق
والمارة بنظرات مترقبة لعله يجد الفتاة المنشودة قادمة ..

.....

في غرفة الوسائط المتعددة (المالتيميديا) ،،،،

احتشدت المعلمات بداخل تلك الغرفة ، وانضمت بعد ذلك
إليهن الأستاذة إعتاد – ناظرة الرياض ، وكذلك المديرية
سهى ، والمديرة رحاب ، ومدير المدارس الأستاذ أسامة ،
ورؤوساء أقسام اللغة الانجليزية بكافة المراحل ...

عم الهدوء المكان ، وبدأت كل معلمة متقدمة للوظيفة في
عرض مهاراتها أمام الموجودين ..

حقاً كان الموقف مهيباً للجميع ، فالأعين المتربصة بك
تجعلك في قمة ارتباكك بالإضافة إلى عدم قدرتك على
التركيز ..

فشلت بعض المتقدمات في تقديم عرضهن رغم بساطة
الفكرة المطروحة و تفوقهن الأكاديمي ..

.....

سأل آياز عن مكان غرفة الوسائط المتعددة من حارس البوابة ، فأرشده إليها ، فشكره بإمتنان ، ثم سار بخطوات ثابتة في اتجاه الغرفة ..

وطوال الطريق إليها لم يكف آياز عن تنظيم أنفاسه المضطربة ، وتهدئة توتره حتى يبدو واثقاً من نفسه أمام المديرة وغيرها من المتواجدين بالغرفة ...

.....

توقف آياز في الرواق المؤدي إلى الغرفة وقام بإغلاق زرار سترته الكحلية الداكنة ، وعدل من وضعية التي شيرت الأبيض الذي يرتديه من الأسفل ، ثم رمق بنطاله الجينز الأسود بنظرات متفحصة ليتأكد من عدم وجود أي شيء عالق به ، ثم وضع حقيبة حاسوبه المحمول على كتفه ، وأمسك بالحقيبة الأخرى في يده ، واستمر في السير للأمام حتى رأى بعض المعلمات اللاتي ينتظرن دورهن في الدخول .. فاقترب من إحداهن ..

-آياز بنبرة رخيمة وهادئة : Excuse me, did they
start (من فضلك ، هل بدأوا ؟)

استدارت تلك الفتاة الشاببة برأسها للخلف لتجد ذلك الوسيم
محدقاً بها ، ففغرت شفيتها في إعجاب ، وتحنحت في خجل
، و...

-الفتاة بتلعثم : آآ.. آآ.. اه .. قصدي yes, they started)
أيوه هما بدأوا)

-آياز مبتسماً ابتساماً خفيفة : ثانكس (شكراً)

ثم أسند ظهره للخلف ، وتفقد حقيبة حاسوبه الخاص ،
وكذلك الحقيبة الأخرى التي معه ليتأكد من وجود ما يريد
استخدامه أثناء العرض التقديمي الخاص به ..

سمع آياز صوت همهمات جانبية استطاع أن يستشف عما
تدور ، وكما خمن إنها حوله ، وعن سبب وجوده .. ورغم
نظرات الاستغراب الممزوجة بالإعجاب إلا أنه تحاشى النظر
إلى تلك الفتيات ، وحاول ألا يعيرهن الانتباه ، فوضع نظارته
الشمسية على وجهه ، وأشاح بوجهه للناحية الأخرى ،
وظل يحتسب الدقائق المتبقية له لكي يذلف إلى الداخل ...

.....

بداخل غرفة المالتميديا ،،،

شعرت معظم المتواجبات بالغرفة بالملل والضجر من طرق
المعلمات حديثات التخرج (التقليدية) في شرح جزئيات
محددة من المنهج ، فتلك السن الصغيرة تحتاج إلى وسائل
أكثر تشويقاً ، ولكن ما يُقدم إلى الآن مجرد شرح رتيب يبعث
النعاس على النفس ..

أعلنت الأستاذة إعتقاد عن تبقي مرشح واحد فقط لكي يقدم
عرضه التقديمي ، فزفرت معظم الموجودات بالغرفة في
تأفف وضيق ، وصدرت همهمات جانبية ، ثم ...
-إعتقاد بنبرة رسمية : هانت يا بنات ، معدتش إلا هو !!

مالت نشوى على رفيقتها رانيا ، وهمست لها بـ ...
-نشوى وهي تعقد حاجبها بإستغراب : هو !!.. انتي
سمعتي زي ما أنا سمعت
-رانيا بنظرات جاحظة ، ونبرة خافتة : أه ..
-نشوى متسائلة بحيرة : هو في راجل جاي يقدم هنا
-رانيا بعدم اقتناع : لأ معتقدش

ثم أشارت الأستاذة إعتماذ للسكرتيرة أية بيدها لكي تدلف إلى الخارج وتحضر المعلم الأخير والمتقدم لتلك الوظيفة

ترقبت جميع المعلمات دخول هذا الرجل إلى الغرفة ..
وأثار فضولهن جميعاً سبب موافقة الأستاذة إعتماذ على حضوره للمقابلة الخاصة بالمعلمات ...

حدقت جميعهن في مدخل الباب ، وانتظرن بتلهف رؤيته يدلف للداخل ..

في حين أخذ آياز نفساً عميقاً ، وزفره على عجلة قبل أن يدلف للغرفة ليتغلب على ذلك التوتر الرهيب الذي سيطر عليه ..

ارتسمت المفاجأة على وجوههن جميعاً حينما رأين ذلك الوسيم يقتحم الغرفة بعطره المميز ، وبملامح وجهه الغربية والجميلة ..

راقب آياز نظرات تلك الفتيات له ، وكذلك المدرء والأستاذة إعتماذ ، فأخذ نفساً آخرأ عميقاً ، و...

-آياز بنبرة رخيمة : Good Morning ladies , I am Ayaz (صباح الخير سيداتي .. أنا آياز)

ثم قام بإسناد حقيبتيه على الطاولة الصغيرة ، وأفرغ محتوياتهما ، وبدأ في تنظيم أوراقه ، ثم رفع رأسه وابتسم لهن ابتسامة خفيفة ساحرة ، و..

-آياز بهدوء أسر : Few seconds and I will Start (ثواني قليلة وهبدأ على طول)

وكان على رؤوسهن الطير ، لم تتحرك أي منهن قيد أنملة من مكانها أو تحيد بأبصارهن عنه، بل ظلن محددات به ، غير عابئات بنظراته الغريبة لهن ، فقد كان شكله حقاً مميزاً ، وملفتاً للأنظار ..

انتهى آياز من تقديم نفسه في عدة أسطر قليلة ، ثم بدأ في شرح ذلك الدرس المبسط بطريقة شيقة جعلت جميعهن متحمسات للمشاركة ..

وعلى ما يبدو أن نسبة الأدرينالين قد اعتلت فجأة في الأجواء ، فتغير المناخ من رتيب إلى حماسي ، ومن ممل كئيب إلى انفعالي تفاعلي ..

استطاع آياز بمهارة أن يجذب جميع الأنظار إليه ، وبفراسته تمكن أن يرى في أعين المدراء ورؤوساء

الأقسام نظرات الإعجاب الممزوجة بالإنبهار مما قدمه ..
فاكتسب المزيد من الثقة واستمر في تقديم عرضه بشغف ..

لم تصدق المعلمات أن هناك رجلاً قادراً على القيام بتلك
المهنة التي احتكروها لسنوات طوال في مصر ، و...

-عاليا بإعجاب : بجد رهيب

-سارة بنبرة متحمسة : أنا ماشوفتش واحد زيه كده

-عاليا وهي توميء برأسها : فعلاً ، رغم إني درست رياض
أطفال لمدة 4 سنين وبدأت في الدراسات العليا إلا إني
مقابلتش راجل عنده الطاقة دي كلها

حدقت ريمان في آياز بنظرات متفحصة ، وارتسمت
علامات الارتباك على وجهها حينما أيقنت من لهجته
وطريقته أنه ذاك الذي لطخته بقهوتها السريعة ، لذا
أخفضت رأسها قليلاً للأسفل ، و...

-ريمان بتوتر وهي بتلع ريقتها : بنات

-سارة بنظرات ضيقة ، وبنبرة عادية : أيوه يا ريمو

-عاليا بهدوء : في ايه يا ريمان ؟

-ريمان بتلغثم : ده .. ده الشاب اللي انا دلقت عليه الكوفي
ميكس

رفعت سارة رأسها فجأة للأعلى ، ورمقت ريمان
بنظرات حادة ، و....

-سارة بنبرة عالية قليلاً : نعم ، هو ده اللي سلختيه ؟؟؟!!

ساد الصمت فجأة في أرجاء غرفة المالتيميديا ،
وانتبه آياز لذلك الصوت الأنثوي ، واستدار بعينه في
اتجاهه ليجد اثنتين من المتواجديات بالغرفة يتحدثان عنه ،
وإحدهما مرسوم على وجهها علامات الارتباك ، ونظرات
التوتر ..

ضيق آياز عينيه ، وحدثهما بنظرات قوية ، فشعرت ريمان
بالحرج الشديد من نظراته المسلطة عليها وعلى سارة
خاصة وأنها قد رأت ملامح الجدية الممزوجة بالإنزعاج قد
ارتسمت على وجهه وبدت واضحة للجميع ، لذا أيقنت أنه
قد استمع إلى حوارهما ، فأجفلت عينيها من الخجل ، و...
-ريمان بخفوت شديد : أنا .. انا ماشية

-سارة بإندهاش : ريمان انتي رايحة فين ؟!!

ابتلعت ريمان ريقها مجدداً ثم سحبت حقيبة يدها ، ونهضت عن المقعد ، وسارت بخطوات مرتبكة في اتجاه آياز لكي تدلف إلى الخارج من باب الغرفة المجاور له

حدق آياز في تلك الفتاة التي مرت من أمامه بنظرات ثابتة دون أن يرمش ، وتابعها بعينيه إلى أن خرجت تماماً من الغرفة و...

-آياز لنفسه بضيق : يبقى أكيد هي !!!..

ثم انتبه إلى صوت الأستاذة إعتاد الصادح ب...
-اعتماد بلهجة رسمية : مستر آياز ، حضرتك معنا

تتحنح آياز في خشونة ، ثم اعتدل في وقفته ، و..
-آياز مبتسماً بهدوء : sure (طبعاً)

ثم استأنف باقي شرح الدرس إلى أن انتهى تماماً من إيضاح كل شيء ، فشكرته الأستاذة إعتاد ، وكذلك باقي المدرء وروؤساء الأقسام على حضوره ومشاركته ، ثم أشارت لجميع المعلمات المتواجدات بالغرفة بالانصراف ، ورغم نظرات الامتعاض والتذمر التي سادت فجأة في الأجواء إلا أن جميعهن امتثلن لأوامر ناظرتهن ، ودلفن

خارج الغرفة ، ولم يبق إلا آياز والأستاذة إعتماذ ، وباقي
المدراء و...

-اعتماذ بنبرة جادة : شكراً مستر آياز على الدرس الشيق ده
، وانتظر الرد على الانترفيو الرائع ده

-آياز بابتسامة خفيفة : أتمنى إني أكون أثبت نفسي قصاد
حضراتكم

-اعتماذ مبتسمة بثقة : انت أبهرتنا مستر آياز ، وأنا متوقعة
ليك مستقبل باهر

-آياز بنبرة متفائلة : I hope so (أتمنى ده)

-اعتماذ بنبرة جادة : ان شاء الله خير

ثم مدت يدها لتصافحه ، فنظر لها هو بإمتنان ، ومن ثم قام
بجمع متعلقاته الخاصة وانصرف من غرفة المالتيميديا ...

جلست الأستاذة إعتماذ بصحبة المدراء وبدأت المناقشة
الجادة لإختيار الأنسب لتلك الوظيفة الهامة ..

لم يكن الخيار سهلاً على الإطلاق ، فهناك عدة معايير
موضوعة لانتقاء من سيتعامل مع تلك السن الصغيرة
والحرجة ، ولكن الأخطر هو أن يكون الاختيار هو ...

-اعتماذ بجدية : آياز كامل الشناوي هو المناسب يا مستر
أسامة

- أسامة بنظرات جدية ، ولهجة رسمية : بس يا مس إعتما
حضرتك محتاجة مدرسة كي جي ، مش مدرس
- إعتما بإصرار : هو كان أفضل المتقدمين ، بالعكس كان
أحسنهم
- سهى بنبرة هادئة : بصراحة هو أبهرني ، عنده استايل في
الشرح والتقديم
- رحاب بنبرة رسمية : الأهم عندها مصلحة الطفل وسلامته ،
وتوفير مناخ ملائم للعملية التعليمية
- إعتما بنبرة متحمسة : أنا شايفة إنه هايكون أكثر حد
حريص على ده
- سهى بقلق : بس هو راجل ، وانتي يا مس إعتما كل اللي
عندك بنات ، وآآ...
- إعتما مقاطعة بجدية : ده مش مشكلة بالنسبالي ، طالما
عنده رؤية ماشية مع فكر المدرسة يبقى ليه لأ ، ليه
مايخدش فرصة ويثبت نفسه
- أسامة بلهجة جادة للغاية : أظن إن لو وافقنا على تعيينه
هنلاقي إعتراض كبير من أولياء الأمور اللي متعودين على
إن ال-Teacher في الكي جي واحدة مش واحد
- إعتما بحماس : ولي الأمر بيعترض على أي حاجة جديدة
طالما معندوش فكرة عنها، لكن لو هو جرب وشاف بنفسه
إن اختيارنا موفق ساعتها هيشكرنا على اللي عملناه

-أسامة بعدم اقتناع : بصراحة أنا مش مرحب بالفكرة دي ،
هو ممتاز ، بس غير مناسب للمرحلة العمرية دي
-إعتماد بنبرة جادة تحمل الإصرار : مستر أسامة ، إحنا
متعودين من حضرتك على تشجيع أي فكر جديد ، ودايما
حضرتك بتطلب منا إننا Think out of the box (ن فكر
برا الصندوق / نخرج عن المألوف) ، وده اللي أنا بأعمله ،
وصدقتي وجود مستر آياز هايعمل فارق كبير معانا

لم تكف الأستاذة إعتماد عن إقناع الجميع بآياز ، وبعد نقاش
حاد وجاد استمر لما يقرب الساعة ، تم حسم القرار بـ ...

-أسامة وهو يتهد في إرهاق : على مسؤوليتك يا مس
إعتماد ، هيتم تعيين مستر آياز الشناوي مدرس كي جي ،
بلغيه بقبولنا ليه

ارتسمت ابتسامة واسعة على ثغرها ، وشعرت أن الدموية
عادت إليها بعد ذلك الجدل المرهق و..

-إعتماد بنبرة متحمسة : شكراً ليك يا مستر أسامة ، وإن
شاء الله تتأكد من رؤيتي

-أسامة بنبرة هادئة : إن شاء الله ..

.....

في معرض عليوه للسيارات ،،،،،

ظل آياز يجوب غرفة مكتب ابن خالته رامي في توتر شديد إلى أن ضجر الأخير من حركته الزائدة فتشدد ب..
-رامي بانزعاج ، ونظرات قوية : ارحم خالتي العيانة ،
كفاية برم ، حولتني

-آياز بقلق بالغ : اوووف ، الله يا رامي ، هاموت وأعرف
إيه النتيجة

-رامي بعد اكتر اث : باينة زي الشمس ، أكيد مش هتاخدها
يعني

-آياز بحدة : يا عم متقولش كده ، أنا واثق إني آآآ...

قطع حوارهما صوت رنين هاتف آياز المحمول الذي تسمر
في مكانه لثانية ، ثم ركض في اتجاه المكتب ، ومد يده
ليمسك به ، ثم ضغط سريعاً على زر الإيجاب بعد أن رأى
رقم مدارس اللافانيا على شاشته و...

-آياز هاتفياً بتلهف : الووو .. أيوه .. ها

حدق رامي في وجه آياز بعد أن نهض عن مقعده محاولاً أن يستشف من تعبيراته ما الذي يدور ، ولكن كان آياز جامد التعبيرات ، ثابت الإنفعالات ..
لحظات وانتهى آياز من المكالمة ، فدار رامي حول المكتب ، ووقف قبالتة و...

-رامي بفضول شديد : ها إيه الأخبار ؟

أطرق آياز رأسه للأسف في حزن ، ثم أخفض عينيه في ضيق زائف ، فشعر رامي بانقباضه في صدره و..
-رامي وهو يلوي فمه في تهكم : أنا كنت متوقع ده ، و على رأي سعد زغول مافيش فائدة

ارتسمت إبتسامة عريضة على وجه آياز ، ورفع رأسه للأعلى ، وحدق مباشرة في وجه رامي ، وأمسك به من ذراعيه و...

-آياز بنبرة عالية مليئة بالسعادة : أنا اتقبلت يا رامي

-رامي ببلاهة : هاه

-آياز بنبرة متحمسة للغاية : خلاص بقيت مدرس كي جي

!!!

الفصل السادس :

أصر رامي على الاحتفال مع ابن خالته آياز في أحد المقاهي الذي تم افتتاحه مؤخراً ، ورغم عدم اقتناع الأول بتلك الوظيفة - الدنيوية من وجهة نظره - إلا أنه لم يرد أن يظهر هذا له ، وفضل أن يستمتعا بوقتتهما معاً ..

في نفس التوقيت اتفقت آنسات مدرسة اللافانيا الدولية على قضاء الأمسية في نفس ذلك المقهى الحديث بعد أن اقترحت منة عليهن هذا قبل انصرافهن من المدرسة ..

في فيلا سرحان عليه ،،،،

وقف آياز أمام المرأة يتأمل هيئته بعد أن انتهى من ارتداء كامل ثيابه ، حيث فضل أن يرتدي بنطالاً من الجينز ذي اللون الأزرق الداكن ، ومن الأعلى تي شيرتاً من اللون الأبيض ذو ياقة مثلثة أظهرت جزءاً من قلادته التي يرتديها حول عنقه .. رفع هو يده على رأسه ليمرر أصابعه في شعره الناعم ، ثم مد يده الأخرى ليمسك بقنينة العطر ومن ثم نثرها على ملابسه ..

سمع هو صوت طرقات على باب غرفته ، فاستدار برأسه ناحيته ، ثم تحدث بهدوء بـ ...

-آياز بهدوء رخيم : ادخل

أطأت وردة برأسها أولاً من باب الغرفة ، ثم دفعته بقدمها لتدلف إلى الداخل وهي تحمل في يديها صينية مليئة بالطعام الغريب ..

رمقها آياز بنظرات استغراب ، بينما حدقت هي به بنظراتها الوالهة قبل أن تتشدد بـ ...

-وردة بحماس : عملتك أكلة معتبرة يا سي آاز ، حاجة ترم بها عضمك

أخذ هو يستنشق بأنفه تلك الرائحة الغريبة والنفاذة والتي
أثارت حفيظته بدرجة كبيرة و...

-آياز وهو يلوي فمه في تأفف : What is this ؟ (ما هذا
(

أسندت هي الصينية على المكتب الموجود بالغرفة ، ثم
كشفت الغطاء عنها ، و...

-وردة بنبرة متلهفة : ده فضلت خيرك شوربة كوارع
بالبهاريز إنما إبييه حكاية ، وربنا لهتاكل صوابك وراه

-آياز وهو يلوي فمه في عدم فهم : ايه؟؟ يعني ايه ده ؟

-وردة بإبتسامة بلهاء : دي رجلين العجل النبي حارسك
وصاينك

-آياز بنبرة تحمل التأفف : بيع ، رجلين ...!! يعني سايبة
العجل كله وجاية تجيبلي رجلية أكلها

-وردة غامزة وبنبرة واثقة : دول اللي فيهم الخلاصة يا سي
أزاز

-آياز بانزعاج وهو يشير بإصبعه : فلاور ، لمي القرف ده
كله ، وخديه برا ، أنا مش ناقص قلبان معدة

-وردة بضيق زائف : ليه بس يا سي آزاز ، ده أني عملهوك
مخصوص ...

ثم صمتت لثانية قبل أن تردف بـ

-وردة بنبرة متشوقة ، ونظرات متسعة : ده أني حتى
وصيت الجزار يجيبك كوارع طازة عشان تاخذ فايدتها كده
وآآ.. وآآ... هههههههه ما أنت فاهم بقي

-آياز بحيرة ، ونظرات ضيقة : فاهم ايه بالظبط ، فلاور ..
بقولك ايه ، أنا موذي حلو ومش ناقص حد يعكنني ، فبليز
ابعدي عني ، ولا أقولك ، I will leave (أنا ماشي)

ثم تركها آياز وانصرف إلى خارج غرفته ، في حين
تسمرت هي في مكانها ، وأطرقت رأسها للأسفل لتتظر إلى
الصينية بنظرات حزينة ، و...

-وردة وهي تلوي شفيتها في ضيق واضح : يا خسارة تعبي
وشقايا ، ووقفتي على رجلي عشان أعمله ده كله .. مالوش
نصيب ، أشربها أنا

ثم مدت كلتا يديها ، وأمسكت بالصحن المليء بحساء
الكوارع ، وتجرعته على قم واحد و....

-وردة بتهيدة إرتياح : يا سلام ، شوربة متينة .. خسارة
إنه مشربهاش !!..

.....

بالقرب من أحد المقاهي الشهيرة ، وقفت عاليا على قارعة الطريق وهي تضع هاتفها المحمول على أذنها ، و...

-عاليا هاتفياً بنبرة شبه متعصبة : انتو فين ؟

-ريمان هاتفياً بهدوء : جاين على طول

-عاليا بنبرة متشنجة : وده ينفع ، مش احنا متفقين نتقابل على الساعة 7 ، أنا جاية من آخر الدنيا ، وانتو لسه في الطريق

-ريمان هاتفياً بنبرة عادية : الدنيا زحمة موت ، وأنا على أد ما بقدر بحاول أدور على شوارع فاضية عشان أجيك

-عاليا وهي تزفر في ضيق : والبنات فين ؟

-ريمان بنبرة طبيعية : أنا معايا سارة وليلة ، وهناء ، وسالي ، ومنة

-عاليا متسائلة بجدية : طب وبقية المجموعة ؟

-ريمان بنبرة متريثة : نشوى وراينا مش جاين ، وهبة هتخلص الكورس اللي عندها وتحصلنا ، وناديا مردتش عليا ، وفريال اعتذرت

-عاليا بنبرة جادة : طيب وميادة وسحر وجانيت وأية

-ريمان بصوت هادي ء : ميادة هاتجيب باقي البنات وتحصلنا

-عاليا باقتضاب وهي ترفع أحد حاجبيها : طب انجزوا يالا

-ريمان مبتسمة ابتسامة سخيفة : طيب .. باي عشان أعرف
أركز

-عاليا بايجاز : ماشي ، وأنا هادخل استناكو جوا

-ريمان بنبرة خافتة : اوكي .. باي

أنهت عاليا المكالمة ، ثم التفتت برأسها للجانب لتضع
الهاتف في حقيبتها وهي تعبر الطريق ، فلم تنتبه إلى تلك
السيارة القادمة في اتجاهها ، وفجأة سمعت صوت مكابح
السيارة ينطلق عالياً ، فتوقفت في مكانها فزعة ، وحدثت
أمامها في رعب ..

.....

في نفس التوقيت كان رامي يتحدث مع آياز حول سباق
السيارات المنعقد في مطلع الأسبوع المقبل ، وانتبه لتلك
الفتاة التي تقطع الطريق عليه وهي غير منتبهة لحركة
المرور ، فضغط بكل قوة على مكابح السيارة ، وأمسك
بالمقود بكلتا يديه ونجح في إيقاف سيارته ، و...

-رامي بضيق شديد : يخربيت الغباء ، اتعمت دي عشان
تمشي بظهرها من غير ما تبص

-آياز بقلق : كويس انك لحقت تفرمل

سمع كلاهما صوت الفتاة تصرخ بنبرة عالية فيهما ، وتطلق بعض السباب فانهج رامي من طريقها الفظة ، لذا صر على أسنانه من الحنق ، و....

-رامي بنبرة متوعدة : أنا نازل أديها كلمتين يفوقها

-أياز بهدوء : خلاص مافيش داعي

-رامي بتذمر : أبداً ، والله ما هيحصل

ترجل هو منها واتجه ناحية الفتاة الواقعة أمام مقدمة السيارة ، ولكن اعترته الدهشة حينما وجد أنها نفس الفتاة التي إلتقاها أمام المدرسة ، فاعتلى ثغره ابتسامة عريضة ، وتأمل هيئتها الرقيقة ، وجاب سريعاً ببصره كنزتها الوردية الواسعة التي تصل إلى ما بعد خصرها ، وبنطالها الأزرق السماوي الذي يتناسق مع لون حجابها و...

-رامي مبتسماً وبنبرة متشوقة : انتي ، مش معقول

جحظت عيني عاليا في زهول حينما رأيت ذلك الغريب أمامها ، وظلت فاخرة شفيتها لبرهة غير مستوعبة ما تراه ، في حين استمر هو في رسم تلك الابتسامة المستفزة على وجهه ، و...

-رامي بنبرة واثقة : شوفتي الصدف الحلوة

- تحنحت عاليا في حرج ، واعتدلت في وقفها ، وضيق
عينها لترمقه بنظرات حادة ، و...
- عاليا بغیظ : مش تفتح وانت سايق ، ولا خلاص مافيش حد
ماشي في الشارع إلا أنت
- رامي بهدوء حذر : طب ليه الغلط بس
- عاليا بتشنج : عشان انت اللي سايق مش أنا ، المفروض
تحترم الشارع اللي انت ماشي عليه ، أرواح الناس مش
لعبة وآآ...
- رامي مقاطعاً بجدية وهو يشيح بكلتا يديه في وجهها :
اييه في ايه لكل ده ، يا شيخة أنا غلطان إني مخلتش وش
العربية ياخذك بالحضن
- عاليا بحنق ، ونظرات مشتعلة : نعم...!!!!
- رامي بضيق : اوعي كده من قدام العربية خليني أغور من
وشك ده
- كورت هي قبضة يدها في غيظ جلي ، وحدجته بنظرات
نارية ، ثم ..
- عاليا بنبرة صارمة : خد عندك هنا ، انت ازاي تمشي قبل
ما أخلص كلامي
- رامي باستغراب : افندم !! هو لسه في كلام تاني بايخ
عاوزه تقوليه

-عاليا بنبرة واثقة وجادة : أه فيه ..

فتحت هي حقيبة يدها ، ثم أخرجت حافظة نقودها ، وفتحتها ، وأخرجت منها مبلغاً مالياً ، ثم طوته في قبضة يدها ، وقامت بوضح الحافظة مجدداً بداخل حقيبتها ، ثم مدت يدها في اتجاه كف يده و...

-عاليا وهي تلوي شفيتها في امتعاض : خد فلوسك يا أخ ، أنا مابحبش حد يبقشش عليا

رمقها هو بنظرات حادة منزعة ، فنظرت هي إليه شزراً ، ثم أسندت النقود على مقدمة سيارته ، وتركته ، وأنصرفت بخطوات سريعة بعيداً عنه ، في حين ظل هو متسماً في مكانه للحظة غير مستوعباً للذي جرى توأ ..

تابع آياز الموقف من داخل السيارة ، وتملكته الدهشة من ردة فعل تلك الفتاة التي بدت إلى حد كبير مألوفة بالنسبة له ..

أفاق رامي من شروده على صوت بوق السيارة ، فاستدار هو برأسه ليجد ابن خالته يشير له بيده من داخل السيارة لكي يعود ..

أومىء هو برأسه ، وركب السيارة ، و...
-آياز متسائلاً باستغراب : ده طبيعي اللي حصل
-رامي بإندهاش أكبر : أنا مذهول بصراحة ، انا مشوفتش
كده في حياتي
-آياز مبتسماً ابتساماً هادئة : أديك شوفت ، بس لعلمك شكل
البنيت دي مش غريب عليا
-رامي بامتعاض : وهي واحدة زي دي تتنسى
-آياز بجدية وهو يشير بيده : طب يالا ، شوفلنا مكان نركن
فيه عشان نلحق نقعد ، ماتنساش أنا عاوز أرجع بدري ،
انت عارف أنا ورايا شغل وآآ..
-رامي مقاطعاً بتهكم : آآآه .. بدأنا جو الموظفين ، ماشي يا
سيدي
ثم أدار رامي محرك السيارة ، وانطلق بها باحثاً عن مكان
ليصفها فيه ..

.....

دلفت عاليا إلى داخل المقهى وهي تسب وتزفر في انزعاج واضح مع نفسها ، ثم نظرت حولها لتبحث عن طاولة شاغرة لتجلس عليها ريثما تأتي باقي صديقاتها ..
وقف النادل على مقربة منها ، و...

-النادل بنبرة رسمية : أوَمري يا هانم

-عاليا بتردد : آآ.. أنا .. أنا جاية مع أصحابي

-النادل بجدية وهو ينظر إليها : طب في حجز يا هانم ؟

-عاليا متسائلة باستغراب : هو المفروض نحجز قبل ما نيجي ؟

-النادل بهدوء : أيوه يا فندم ، ده النظام هنا

-عاليا وهي تلوي شفيتها في اندهاش : بس احنا منعرفش إن النظام هنا بالحجز

-النادل بنبرة شبه جادة : والله يا فندم الـ System (النظام (هنا كده

عضت عاليا على شفيتها السفلى في توتر ، ثم أمسكت بطرف حجابها ذي اللون السماوي بطرف إصبعيها ، وعبثت به ، و..

-عاليا بنبرة حائرة : طب والعمل ايه دلوقتي ؟

-النادل بنبرة رسمية : حضرتك شوفي هاتعملي ايه ، لأن الموضوع مش بإيدي

جابت عاليا المكان ببصرها ، فوجدت معظم الطاولات شاغرة ، فإنزعت أكثر ، ثم استدارت برأسها في اتجاه النادل ، وحدجته بنظرات قوية قبل أن تتابع بـ

-عاليا بضيق وهي تشير بيدها : أو مال بإيد مين فهمني لو سمحت ؟

-النادل بإقتصاب : معرفش

-عاليا بنبرة محتجة : متعرفش ، لا والله ، طب فهمني بالعقل إزاي أجي مكان فاضي زي ما انت شايف ، ويتقالي أصله مافيش تربيذة فاضية وآآ...

-النادل مقاطعاً بجدية : يا هاتم كله محجوز

-عاليا بتهكم صريح : خلاص الناس كلها بقت حاجزة هنا
!!!!

في نفس التوقيت دلف رامي ومن خلفه آياز وهما يتحدثان سوياً ، فلقت انتباههما صوت عاليا المحتقن مع النادل ، فتوقف رامي عن الحركة فجأة ، واستدار برأسه ناحيتها ، وحدق فيها بنظرات قوية ، في حين تابع آياز ردة فعله باستغراب ، و...

- آياز متسائلاً بفضول : انت هتتخاتق معاها تاني ؟
- رامي بانزعاج : لأ ، بس عاوز أعرف بتعمل ايه هنا ؟
- آياز بعدم اكتر اث : سيبك منها ، وتعالى نقعد
- رامي بإصرار : لأ استنى
- آياز بنفاد صبر : انت فظيع
- رامي بنبرة مهتمة : ثواني بس ، أنا هاشوف فيه ايه

ثم تركه وانصرف ، في حين أكمل آياز طريقه في اتجاه الطاولة المحجوزة بإسميهما ...

وقف رامي قبالة كلاً من النادل وعليا ، فحدقت فيه الأخيرة بنظرات مصدومة ، واعترت الدهشة جميع ملامحها .. بينما سلط هو عينيه على النادل و...

- رامي بصوت آجش : الأنسة عاوزة ايه ؟
- النادل بنبرة جادة : كانت عاوزة تحجز تربيذة وآآ...
- رامي مقاطعاً بجدية : هاتلها اللي هي عاوزاه من غير نقاش

فغرت عليا شفتيها في صدمة ، ونظرت إليه بإندهاش شديد ، وكانت على وشك التحدث ورفض ما قاله ، ولكنه كان قد

شق طريقه بعيداً عنها ، وانصرف في اتجاه طاولته وظلت هي متابعة إياها بعينيها ، والدهشة لم تخلو بعد من ملامحها ، في حين أشار لها النادل بيده لكي تفيق من شرودها وتتبعه إلى الطاولة الخاصة بها ..

جلست عالياً على مسافة ليست بالبعيدة عن طاولة رامي وآياز ، ولكنها انتقت لنفسها مقعداً يجعلهما أمامها على مرمى البصر ...

وقف النادل أمام طاولتها ، وأمسك بقلمه الحبر و..

-النادل بهدوء : تؤمري بإيه حضرتك

-عالياً بجدية : لما يجي بقية أصحابي

-النادل مبتسماً ابتساماً سخيفة : تمام يا فندم

ثم تركها وانصرف ، بينما اختلست هي النظرات إلى رامي الذي لم يكف هو الآخر عن النظر إليها حينما تسنح له الفرصة ..

.....

دلقت الآنسات إلى داخل المقهى ، وبحثت عن عاليًا ،
فوجدن إياها جالسة على الطاولة ، فتوجهن إليها ، و...
-ريمان بنبرة متحمسة : لولو ، معلىش يا قمر ، اتأخرنا
عليكي

-عاليًا وهي تتنحج بخشونة : احم .. كويس انكم عارفين ده
-سالي بنبرة مازحة : برضوه احنا قولنا نسيبك فرصة كده
تاخدي راحتك ، يمكن تظبطي مع حد كده ولا كده
-عاليًا بضيق : سالي انتي عارفة إني مش بتاعة كده ، أنا
بادخل شمال في أي حد يجي عليا

-سالي بنبرة مراوغة : انتي هاتقوليلي ، ده انتي مش
محتاجة وصاية

-سارة مبتسمة بمرح : يا لولو الدنيا زحمة آخر حاجة ،
وريمان كانت هتلبس في عريبة كذا حد ، بس ربنا ستر
-ريمان بانزعاج زائف : لا والله محصلش كده ، أنا بسوق
كويس

أسندت سارة يدها على كتف ريمان ، ورمقتها بنظرات
دافئة قبل أن تردف ب..

-سارة بنبرة رقيقة : اوعي تزعلي يا ريمووو ، أنا بهزر
معاكي

- ليلة مقاطعة باهتمام وهي تمسك بهاتفها المحمول : أنا
باتصل بميادة ومش بترد
- منة بجدية : أكيد هي بتركن ، وبعدين ما انتو عارفين ميادة
، هي أصلاً في الطبيعي بتتأخر علينا
- هناء بنبرة عادية وهي تبتسم : على رأيك ، من امتي هي
بتيجي في ميعاد
- عاليا بصوت جاد : طب اقعديوا بقى عشان نشوف
هانطلب ايه
- سالي بصوت ناعم : أنا عاوزة أكل حاجة لأحسن ماتغدتش
كويس
- ريمان متسائلة في حيرة : هو احنا هناكل ولا نشرب
- منة بجدية : والله على حسب ، ممكن ناكل بس ، وممكن
نشرب ، مش عارفة نشوف الكل عاوز ايه
- عاليا بنفاد صبر : طب انجزوا بقى عشان أنا قربت أتخفق
- سالي متسائلة باستغراب : ليه ؟
- هناء متسائلة بفضول : هو في حاجة حصلت واحنا مش
موجودين ؟
- عاليا وهي تلوي فمها في امتعاض : يعني .. حاجة زي كده
- منة بنبرة جادة : طب قولني على اللي حصل ، مش هناخد
الكلام بالعافية منك

-عاليا بانزعاج وهي ترمش بعينيها في توتر : بعدين ،
بعدين ، يالا عشان نطلب الأوردر

أسند النادل الطلبات الخاصة برامي وآياز على طاولتهما
، وقبل أن ينصرف ، بادر رامي بـ ...

-رامي بجدية وهو يشير بعينه : عاوزك تجيلي حساب
التريضة اللي هناك دي ، ماتخدش منهم فلوس ، أنا اللي
هحاسب على كل طلباتهم

!!!!

الفصل السابع :

تعجب آياز مما فعله رامي ، وأمسك بقدر الشاي وقربه
من فمه ليرتشف منه بضع قطرات قبل أن يتشوق بـ ...

-آياز متسائلاً بفضول : عملت كده ليه ؟

- رامي مبتسماً ابتساماً زائفة : عادي يعني
- آياز بنبرة شبه جادة : عادي ازاي ؟ في حد يدفع حساب واحدة مايعرفهاش ، ومعاهها أصحابها كمان ، ويقول ده عادي ، إلا إن كان الموضوع فيه حاجة
- رامي بهدوء مصطنع : ماتحطش في بالك يا إيزوو
- آياز بعدم اقتناع : أووكي ..

- أسند آياز قذح الشاي أمامه ، واستدار برأسه للجانب ليلمح تلك التي قابلها في المدرسة ، فقطب جبينه ، و...
- آياز لنفسه متسائلاً بجدية : مش دي البنت إياها
- استمع رامي لصوت غمغمة غير مفهومة تصدر عن آياز ، فحدجه بنظرات دقيقة ، و...
- رامي بهدوء : انت بتقول حاجة ؟
- آياز بنبرة غير مبالية : لأ عادي
- رامي مبتسماً ابتساماً مجاملة وهو يغمز له : برضوه
- آياز مبتسماً ابتساماً عريضة : بالظبط ، محدش أحسن من حد
- رامي بنبرة متريثة : لو خلصت يا ريت نقوم
- آياز بهدوء : اووكي ، I am done (أنا خلصت) ، يالا

أشار رامي للنادل بإصبعيه لكي يحضر إليه ، ثم همس له بكلمات غير واضحة ، فأوميء النادل له موافقاً ، ومن ثم نهض الاثنان عن الطاولة بعد أن وضع المبلغ المطلوب لفاتورة الحساب بداخل الحافظة المخصصة لهذا ...

تابعتها عاليًا بنظرات ضيقة ، وتنهدت في ارتياح حينما رأت رامي يبتعد .. و...

-عاليًا وهي تتمتع لنفسها بنبرة شبه فرحة : كده أحسن

قطبت سارة جبينها في حيرة حينما رأت تبدل ملامح عاليًا للانفراج ، و...

-سارة متسائلة بفضول : في ايه يا بنتي ؟ انتي بتكلمي نفسك ولا ايه ؟

انتبهت لها عاليًا ، وحاولت أن تبدو طبيعية في انفعالاتها ، و...

-عاليًا بهدوء مصطنع : لألأ .. أنا بس بافكر بصوت عالي

-سارة بعدم اقتناع : بتفكري !! في ايه يعني ؟

- عاليا بنبرة شبه متلعثمة : في آآ... في الشغل ، واللي ..
آآ... والحاجة يعني المطلوبة مني
- سارة وهي توميء برأسها إيماة خفيفة : أها ...
- عاليا بجدية وهي تشير بعينيها : البنات جوم ..
- سارة بابتسامة عريضة : طب كويس
- ليلة بنبرة متحمسة : عاوزين بعد ما نطلب أورد الأكل
نجيب تارت الشيكولاته ، بيقلوا تحفة
- هنا بتلهف : لأآ .. التشيز كيك طعمها تحفة
- منة بجدية : أنا عاوزة وافل
- سارة بنبرة شبه عالية : بقولكم ايه نشوف الأول هناكل ايه
وبعد كده نحلي .. ماشي

وافقت غالبية الفتيات المتواجديات على اقتراح سارة ،
وبدأن بالإطلاع على قائمة الطعام لاختيار ما هو مناسب ..

.....

تناولت الفتيات الطعام بعد إن اكتمل حضورهن ، وطلبن
مشروبات متنوعة ما بين باردة وساخنة ، ثم ...

-عاليا بنبرة جادة وهي تشير بيدها للنادل : لو سمحت الحساب

-النادل بهدوء : الحساب ادفع يا فندم

-ريمان باندهاش : ايه ؟

-ميادة متسائلة بجدية شديدة : ده مين إن شاء الله اللي دفعلنا الحساب ده

-هناء بنبرة فرحة ، وبنظرات مشرقة : الله ! في حد دفعلنا

-منة بجدية واضحة : انتي فرحانة على ايه ؟ استتي أما نشوف مين ده

-هناء بعدم اكتر اثار : مش مهم مين ، المهم إن الحساب اندفع وخلص ، والفلوس بقت في جيبنا

-سارة بتهكم : انسانة مادية

-ريمان بابتسامة هادئة : كلنا هذا الشخص

-ميادة بنبرة عادية : يا بنات استنوا شوية ، احنا برضوه معرفناش مين اللي دفع

أسندت عاليا ذقنها على مرفقها ، وضيق عينيها قليلاً ،
و...

-عاليا بحيرة زائدة وهي قاطبة لجبينها : يا ترى مين ؟

وكان عقلها أضاء فجأة ، واتسعت عينيها في صدمة ،
و...

-عاليا وهي تتمم بذهول لنفسها : مش معقول يكون هو !!
لألاً .. استحالة بعد اللي عملته فيه ، يا ربي ..!

ثم تنهدت في إنزعاج بعد أن أخذت نفساً عميقاً .. وتجهم
وجهها قليلاً

تابعت ليلة التغيرات البادية عليها ، و...

-ليلة متسائلة باستغراب : مالك يا عاليا ؟ وشك قلب كده ليه
!؟

-عاليا بإقتضاب : مافيش

-ليلة بعدم اقتناع : ازاي مافيش ؟ الأكل مش عاجبك ؟

-عاليا بنبرة شبه منزعة : لأ مش كده

-ليلة بحيرة : او مال ؟

نهضت عاليا فجأة عن مقعدها ، وعلقت حقيبتها على
كتفها ، و...

-عاليا بضيق : خلاص يا ليلة ، أنا أصلي تعبانة ، وعاوزه
أروح بقى ، وزى ما انتي شايفة لسه السكة قدامنا طويلة ،
وعندنا شغل بكرة أد كده وآ..

-ليلة مقاطعة بهدوء : طيب خلاص .. اهدي ، احنا كده كده
كلنا هانقوم بعد شوية ، اصبري شوية

ثم قامت بجذبها للأسفل لتجلس مجدداً ريثما تنتهي بقية
رفيقاتها من تناول الطعام

.....

جمعت الفتيات متعلقتهن الشخصية قبل أن ينصرفن ، وظل
معظم الحديث الجانبي بينهن جميعاً يدور حول هوية ذلك
المجهول الذي دفع لهن حساب الطعام ..

-ميادة بنبرة جادة : ممكن يكون ولي أمر ولا حاجة
-هناء بعدم اقتناع : بيتهياي لأ ، كان على الأقل جه وسلم
علينا

-منة بنبرة واثقة : بالظبط ، عشان يفهمنا كمان إنه عمل
واجب محترم معانا ، وخصوصاً إن الحساب مش قليل

أصغت عاليا لكل ما يُقال دون أن تتبس بكلمة ، في حين
أردفت سالي بـ ..

-سالي بنبرة عادية : انتو مش اكلتو وخلاص ، كبروا بقى

-ريمان بنبرة أكثر جدية : مش هاينفع نكبر دماغنا ، أكيد في حد عارفنا ، أو على الأقل عارف حد فينا

ارتبكت عاليا بعد عبارة ريمان الأخيرة ، وحاولت أن تبدو طبيعية كي لا يلاحظ أي أحد اضطرابها ، و....

-عاليا بنفاد صبر : خلاص بقى ، أنا دماغي صدعت ، يالا بينا

ثم سارت مبتعدة عنهن ، فنظروا إليها باستغراب ، ومن ثم لحقن بها دون تعقيب ...

.....

في فيلا سرحان عليه ،،،،،

قضى رامي معظم ليلته وهو مستيقظ على فراشه يطالع سقفية غرفته وهو مسند لكفي يده خلف رأسه ، ويتذكر كل ما مر به منذ أن التقى تلك الفتاة المتمردة التي تناكفه دائماً ، و...

-رامي لنفسه بنبرة متمهلة : والله مجنونة البت دي ، الله
يكون في عون أهلها .. بس.. بس هي برضوه عندها حق ،
واحدة غيرها كانت آآآ...

توقف رامي عن الكلام ، واعتدل في نومته ، و..

-رامي بنبرة معاتبة تحمل الصرامة لنفسه : أنا عمال أفكر
في البت دي ليه ؟ مالي بيها ، ما تعمل اللي هي عاوزاه ،
يووووه ، أنا عاوز أنام ، أحسن حاجة أعملها أقوم أخذ دش

ثم نهض عن الفراش ، وأمسك بمنشفته بعد أن أخرجها من
خزانة الملابس ، واتجه ناحية المرحاض الملحق بغرفته ،
و...

-رامي بجدية شديدة : لازم أنسى البت دي خالص وأشيئها
من دماغي ، وأركز في اللي ورايا

.....

في غرفة جانبية بجوار المطبخ ،،،

-عاليا بنبرة منزعة : لأ بجد ده كثير ، أنا مش عارفة هو
بيعمل كده ليه معايا !؟

ثم زفرت في حيرة ، ووضعت كلتا يديها على رأسها ،
وخللت أصابعها في فروة شعرها ، و...

-عاليا بجدية : أنا مش هارتاح إلا لما أعرف هو ليه دفع
الحساب بعد اللي عملته فيه ، طب وأنا أصلاً هاشوف تاني
فين ؟؟ يووووه ، حاجة بجد تزهق ..

جلست هي على طرف الفراش ، وظلت تركل الأرض
بقدميها ، ثم أرجعت ظهرها للخلف لتمدد على الفراش ،
و...

-عاليا وهي تتنهد في إرهاق : دماغي صدعت من كثر
التفكير ، أنا هاقوم أعملي ليمون وأشربه وأنام !..

.....

في منزل ليلة الأيوبي ،،،،،

أمسكت ليلة بهاتفها المحمول ، وظلت تضغط على أزراره
لتكتب رسالة نصية لرفيقتها سارة على تطبيق (الواتس
) ، و...

-ليلة : ((أنا متأكدة إن في حاجة))

-سارة : ((معتقدش ، كان زمانها قالت))

-ليلة : ((يا بنتي انتي مش شايفاه متغيرة من ساعة ما
روحنا المطعم))

-سارة : ((طب ليه مش سألتها ؟))

-ليلة : ((سألتها ، وقالت مافيش ، بس أنا مش مصدقاها))

-سارة : ((بصي بكرة هيبان ، يمكن هي مش حابة تحكي
الوقتي))

-ليلة : ((اووكي ، أنا هاستنى وأشوف))

-سارة : ((تمام ، المهم أنا هانام بقى لأحسن دماغي مش
متظبطة))

-ليلة : ((أنا أعدة شوية))

-سارة : ((انتي بتقدري تسهري ، لكن أنا على أدي ، يدوب
باكتبك وأنا مش شايفة الحروف))

-ليلة : ((طب خلاص ، قومي نامي ، ونتكلم بكرة في
المدرسة))

-سارة : ((اووكي ، باي))

أنهت كلتاهما تلك المحادثة المكتوبة ، ثم ضغطت ليلة على أيقونة صفحة التواصل الاجتماعي (فيس بوك) لتشاهد أحدث الصور الخاصة بمصوري الفوتغرافي المحترفين .. وأبدت إعجابها بالوضعيات الغير تقليدية الخاصة بالمتزوجين والمرتبطين حديثاً ، و...
-ليلة بنبرة خافتة : واو .. الصور تحفة ، الواحد كان نفسه يتعلم التصوير زيهم .. أكيد لما هاتخطب لحد هاخليه يعمل صور زي دول ..

مطت ليلة شفيتها في انبهار وهي تتابع بعض الصور ، و...
-ليلة بنبرة شغوفة : ممم.. بس المصور ده ممتاز أوي ، عليه حبة مناظر جامدة جدا ...

ثم نظرت إلى التوقيت بهاتفها ، فأدركت أن الوقت قد أصبح متأخراً ، و...
-ليلة بتوتر : أووبا ، ده أنا سرحت مع نفسي ، يدوب الحق أنام الساعتين دول ...!

وأغلقت بعد ذلك هاتفها ، ثم تمددت على فراشها ، وتدثرت جيداً قبل أن تغفو في سبات عميق

.....

في صباح اليوم التالي ،،،
في مبنى الرياض الملحق بمدارس الالفانيا الدولية ،،

كان الكل يعمل على قدم وساق لإنهاء التجهيزات الخاصة
بالاستعداد للعام الدراسي الجديد ..

كانت معظم المعلمات متواجداً في الفصول الخاصة بهن
ليراجعن ما هو مطلوب وما ينقص من أجل شرائه ..

جلست رانيا على أحد المقاعد الموجودة بغرفة المعلمات ،
وأرجعته قليلاً للخلف وهي مستندة عليه ، و...

-رانيا بنبرة ضجرة : أووف ، بجد حاجة تخنق ، الواحد مش
لاقي حاجة يعملها

-نشوى بنبرة عادية : يا بت قومي اعمليك حاجة ، هو انتي
مش وراكي شغل أد كده ، هاتفضلي مطنشة كده كتير

-رانيا بعدم اكترات وهي تشيح بيدها : بقولك ايه ، فكك من
الكلام ده ، أنا عاوزة أفضل كده مانتخة

-نشوى بجدية : يا بنتي بدل ما أبلتلك إعتماـد تطب علينا
وتسمعك كلمتين بايخين

-رانيا بنبرة غير مبالية : كبري منها

وفجأة اتسعت عيني نشوى في زهول ، وتسمرت للحظة
في مكانها ، فتعجبت رانيا مما أصاب رفيقتها ، و...

-رانيا وهي ترفع أحد حاجبيها في اندهاش : مالك يا نوشا ؟
انتي تتحتي كده ليه

-آياز بنبرة رجولية رخيمة : Good morning ، دي الـ
staff room صح ؟

استدارت رانيا برأسها وهي جالسة بوضعيتها المتأرجحة
على المقعد ، فرأت ذلك الوسيم يطل بجسده الرياضي من
باب الغرفة ، فغرت شفيتها في صدمة ممزوجة بالذهول ،
و...

-رانيا بنبرة متلعثمة : آآ.. هاه

ظن آياز أن تلك الفتاة لم تعي ما يقوله ، ففكر في ترجمة
عبارته حتى يسهل عليها فهمه ، لذا بادر بـ...

-آياز متسائلاً بنبرة هادئة وعلى ثغره ابتسامة عذبة : دي
أوضة الـ .. آآ.. احم المعلمين صح ولا أنا غلطان ؟

تراجعت رانيا بمقعدها أكثر للخلف وهي تهز رأسها موافقة ،
ولكن للأسف فقدت السيطرة على المقعد الذي تأرجح بدرجة
كبيرة ، وسقط على الأرضية الصلبة وهي عليه ...

حاول آياز أن يخفي ضحكته ، فأشاح بوجهه للناحية
الأخرى بعد أن وضع إصبعيه على طرف فمه

أسرعت رانيا بالنهوض من على الأرضية ، حاولت أن تعدل
من هيئتها المحرجة أمامه ، بينما تشدقت نشوى بـ ...

-نشوى بنبرة مرتبكة : آآ... احم .. آآ.. ماتخدش في بالك ،
هي .. هي رانيا متعودة على كده

-آياز متسائلاً بهدوء : طب انتي تمام ؟

-رانيا بنبرة محرجة : أنا كويسة على فكرة

-آياز بخفوت : أووكي

-نشوى متسائلة بفضول : اومال حضرتك عاوز مين ؟

-آياز بنبرة طبيعية : مش عاوز حد

تبادلت كلاً من رانيا ونشوى النظرات الحائرة ، و...

-رانيا متسائلة بحيرة : طب جاي هنا ليه ؟ أصل دي أوضة
ال- teachers ، لو عاوز مكتب السكرتارية هتلاقيه هناك ،
لكن آآ...

-آياز مقاطعاً بنبرة رزينة : أنا teacher (معلم) هنا
معاكو

-رانيا فاغرة شفتيها في صدمة : نعم ؟

-نشوى بذهول : بتقول ايه ؟؟؟

.....

في معرض عليوه للسيارات ،،،،،

جلس المهندس سرحان واضعاً ساقاً فوق الأخرى وهو
ينظر إلى ابنه رامي بنظرات متفحصة قبل أن يردف بـ...

-سرحان بنبرة شبه منزعة : يعني برضوه خليته يروح
يهزأ نفسه في شغلانة زي دي

-رامي بنبرة عادية وهو يمرر أصابعه في شعره : والله هو
اللي عاوز كده

-سرحان بنبرة شبه ضائقة : كان المفروض تمنعه

-رامي بنبرة أقرب للجدية : ولا عمره كان هايسمعلي كلمة ،
لازم يجرب بنفسه عشان يقتنع ويصدق إن الوظيفة دي مش
مناسبة

-سرحان وهو يزوم شفتيه في ضيق : ربنا يهديه ، ويهديك

-رامي وهو يلوي فمه في استهجان : ايه يا بشمهندس ، هو
انت هاتقلب عليا ولا ايه ؟

-سرحان بنزق : بصراحة مخنوق من تصرفاتك ، امتي
هاتعقل وتتحمل المسؤولية معايا

-رامي باندهاش شديد : اعقل ؟ أومال انا باعمل ايه هنا
طول اليوم في المعرض ؟ والتوكيلات والبيع وآآ...

-سرحان مقاطعاً بجدية : لأ يا حبيبي ، أنا مش باتكلم عن
المعرض ده ، أنا باتكلم على الجديد

-رامي وهو يزفر في تعب : بابا ، أنا قولت لحضرتك أنا مش
فاضي أروح هناك ، ويدوب وقتي مكفي اللي هنا بالعافية

-سرحان بضيق : يعني عاوزني أنا أفضل رايح جاي وأنا في
السن ده عشان سيادتك مش فاضي

-رامي بنبرة ممتعة : الله يخليك يا بابا ، بلاش نفتح الكلام
في الموضوع ده كل شوية

-سرحان بحدة : يا بني ده مالنا ، وانت عارف كويس إن
المال السايب بيعلم السرقة

-رامي وهو يتتهد في إرهاب : خلاص يا بابا ، أما يخلص
المعرض نبقي نشوف هانعمل فيه ايه
-سرحان بعدم اقتناع : أما نشوف ..

ثم صمت للحظة قبل أن يكمل حديثه بـ ...

-سرحان بنبرة شبه ماكرة : أو مال أمك ما فتحتش معاك
سيرة حاجة كده ولا كده

-رامي متسائلاً وهو يقطب جبينه في عدم فهم : حاجة ايه
دي ؟

-سرحان مبتسماً في سعادة : عروسة يا بني

-رامي وهو يزم شفتيه في انزعاج : يا دين النبي ، هي لسه
برضوه مصممة على اللي في دماغها

-سرحان بنبرة واثقة : أمك مش هترتاح إلا لما تجوزك
وبعدك ابن اختها

-رامي بعدم اكتراث : الكلام ده كله قضى يا بابا ، أنا وقت ما
هلاقي البنيت المناسبة هاتجوزها على طول ، فمافيش داعي
للحوارات اللي عفا عليها الزمن دي

-سرحان بنبرة عادية : خلاص قولها ده .. عشان هي مش
هتريح نفسها إلا لما تعمل اللي في دماغها

-رامي بتوجس : ربنا يستر بقى

.....

في مبنى الرياض بمدارس اللافانيا ،،،

اتسعت عيني كلاً من نشوى و رانيا في صدمة بعد أن ألقى
آياز على مسامعهما عبارته الأخيرة ، و

-آياز بنبرة رخيمة : في حاجة غريبة في كلامي ؟

-نشوى متسائلة بفضول كبير : ازاي انت مدرس هنا معنا ؟

-رانيا بنزق : أكيد انت غلطان ، دي أوضة المدرسات ، بنات
يعني ، بتوع الكي جي

-نشوى بنبرة متلهفة : ممكن تكون تايه ، المدرسين في
المبنى الثاني بتاع أقسام ال آآآ...

-آياز مقاطعاً بنبرة واثقة : لأ أنا مكاني هنا معاكو ، أنا ال
Teacher New KG (معلم رياض الأطفال الجديد) ..!

-رانيا فاغرة شفيتها في صدمة : نعم ؟ طب إزاي !!

-نشوى بعدم تصديق : اكيد انت بتهزر صح ؟

-آياز بهدوء حكيم : لأ .. ده تخصصي يا مس ، وأنا من أول
النهاردة زميل معاكو

-رانيا لنفسها بتلهف ممزوج بالتشوق ، وبنظرات ضيقة

تحمل التوعد : انت هاتكون عريس مش بس زميل ..!

-نشوى بنبرة متحمسة : منورنا يا مستر آآآ... اسمك ايه ؟

-آياز بصوت هاديء : آياز الشناوي

-نشوي وهي تمط شفيتها في إعجاب : الله ، اسمك حلو أوي

ومميز

-آياز بنبرة إطراء : ثانكس ، وانتي ؟

-نشوى بتحمس : أنا نشوى

ثم استدارت برأسها ناحية رانيا ، وأشارت بيدها لها ، و...

-نشوى متابعة بنفس الحماسة : ودي صاحبتي رانيا

ظلت رانيا محدقة في آياز ، وبدأت تتفرس في ملامحه

الوسيمة لتحفرها في ذاكرتها ..

ابتسم آياز لكلتاهما ابتسامة مجاملة ، و....

-آياز مبتسماً في هدوء : Nice to meet you (أنا

فرحان إني قابلتكم)

-نشوى بنبرة ناعمة : ده احنا اللي فرحانين اننا شوفناك ،

إن شاء الله هاتتبسط معانا أوي

-آياز بنبرة متمهلة : I hope so (أتمنى)
-رانيا مبتسمة بلوّم وهي تحدّجه بنظراتها الحادة : أهلا بيك
في الحرمك يا .. يا شهريار !!

الفصل الثامن :

في مبنى الرياض بمدارس اللافانيا الدولية ،،،

كانت غالبية المعلمات مندمجات في تجهيز الفصول وتزيينها
من أجل العام الدراسي الجديد ..

لم تتأخر أي واحدة عن تلبية نداء المساعدة لرفيقاتها
خاصة فيما يتعلق بأعمال القص واللصق ..

وقفت ميادة على إحدى المقاعد الخشبية لكي تقوم بتثبيت
إحدى اللوحات التعليمية ، وعاونتها في ذلك منة ، و...

-منة بتذمر : عاوزين دبابيس تانية ، دول مش نافعين

-ميادة بجدية : ثبتها زي ما يكون لحد ما نروح الـ store ،
ونطلب منهم

-منة بضيق وهي ترفع أحد حاجبيها : مافيش حاجة بتتعمل
بالساهر أبدأ

-ميادة بهدوء : معلىش بقى ، ما انتي عارفة في كل حاجة
لازم يطلعنا فيها اللي يعطلنا

-منة بنفاد صبر : أوووف ، يا رب تنجز بقى

دلفت ريمان ومعها ليلة إلى داخل الفصل الدراسي وهما
تحملان بعض اللوحات والأدوات الدراسية ، و...

-ريمان بنبرة شبه عالية : ميدووو .. دول الحاجات اللي
انتى طلبتها ، أنا استلمتها مكانك

استدارت ميادة برأسها للخلف وارتسم على شفيتها ابتسامة
مجاملة ، و...

-ميادة بنبرة إطراء : تسلمي يا ريموو ، مش عارفة أقولك
ايه ؟

-ريمان بنبرة عادية : ماتقوليش حاجة ، كلنا أصحاب هنا

-ليلة بجدية وهي تشير بعينيها : بصوا احنا هنسند الحاجة
هناك جنب الـ locker (الدولاب) عشان لسه هنودي
للباقي حاجاتهم

-ميادة بنبرة طبيعية : أوكي ، وكتر خيركم يا بنات

وضعت ريمان الأدوات وبعض اللوحات بجوار الخزانة ، ثم
انصرفت ، وأعقتها ليلة ...

.....

في غرفة المعلمات بمبنى الرياض ،،،،

جلس آياز على أحد المقاعد الشاغرة ، ثم فتح حقيبته
الجلدية ذات الماركة الشهيرة ، وأخرج مفكرة للملاحظات ،
وقام بتدوين بعض الكلمات بها ، فحاولت رانيا أن تقرأ ما
كتبه من على بعد ، ولكنها لم تفهم تلك الرموز ، و..
-رانيا متسائلة بفضول وهي تعقد حاجبيها : احم .. آآ.. هو
انت بتكتب ايه ؟

رفع آياز رأسه في اتجاهها ، ورمقها بنظرات حادة ، و...

-آياز باستغراب : what ؟

-رانيا بحرج : اقصد يعني ، عاوز مساعدة ولا حاجة ؟

-آياز باقتضاب : لأ

-رانيا متسائلة بفضول أكثر يحمل اللوم : على كده خطيبتك موافقة انك تشتغل هنا ؟

-آياز بجدية : أظن إن دي مسائل شخصية مش هاتفرق معاكي في حاجة

احمرت وجنتي رانيا من شدة الإحراج ، وأطرقت رأسها في خجل ، فحاولت نشوى أن تطف الأجواء قليلاً ، و...

-نشوى بنبرة محرجة : آآ.. تب.. تعالي معايا يا رانيا ، مس إعتماذ كانت عاوزة آآ..

-رانيا مقاطعة بحدة : ماشي جاية ، يالا بينا

زفرت رانيا وهي عابسة الوجه ، وأسرعت في خطاها إلى خارج الغرفة ، ولحقت بها نشوى وهي تحاول أن تبدو طبيعية في تصرفاتها ..

رمقهما آياز بنظرات منزعة ، و...

-آياز لنفسه باستغراب : ايه البنات دول ؟! أنا مشوفتش كده

بعد لحظات عرجت السكرتيرة آية على الغرفة ، و...

-آية بنبرة رقيقة : مستر آياز

انتبه لها آياز ، ونهض عن مقعده ، و..

-آياز بهدوء : Yes (نعم)

-آية بنبرة هادئة : مس إعتماذ عاوزة تقابلك في المكتب
بتاعها شوية ، فيا ريت حضرتك تسيب اللي في ايديك
وتروحها

-آياز وهو يوميء برأسه موافقاً : أوكي ..

وبالفعل أغلق آياز مفكرته، ووضعها بداخل حقيبته ، ثم
تبع السكرتيرة آية إلى خارج الغرفة ..

.....

في مكتب الناظرة إعتماذ ،،،

جلس آياز على المقعد المواجه لمكتب الأستاذة اعتماذ ،
وظل محدقاً بها لبرهة قبل أن تردف هي بـ ...

-اعتماذ بنبرة رسمية وهي تمد يدها بورقة ما : مستر آياز
دي قائمة بالمطلوب من حضرتك تجهيزه

أمسك آياز بالورقة ، ثم نظر إليها نظرة خاطفة محاولاً فهم ما دون بها ، ثم رفع بصره في اتجاه الأستاذة إعتماذ ، و...
-آياز متسائلاً بحيرة : في حاجات أنا عارفها ، بس هل ينفع أستعين بحد من برا يساعدي ؟

-اعتماذ بعدم فهم : حد مين يعني ؟

-آياز بهدوء : حد من قرابيبي ، يعني أنا لسه جاي من الخارج ، ومعرفش الأماكن اللي بتبيع آآ...

-اعتماذ مقاطعة بجدية : لأ يا مستر آياز ، انت مش مطلوب منك تشتري الحاجات دي ، غالبيتها موجود عندنا في ال-
store .. انت تقدر تروح تستلمهم من هناك

-آياز وهو يرفع حاجبيه في اندهاش : Wow ..

-اعتماذ مكلمة بنفس الثبات الانفعالي : ولو حابب مساعدة خارجية مافيش مانع بما إن حضرتك لسه جديد ، وأكد لو طلبت من الزميلات هنا مش هايمنعوا أكيد

-آياز وهو يتحنح في خشونة : احم .. يعني خليها حالياً قريبي ده لحد ما أعرف بقية ال- staff .. كمان أنا مش حابب يكون في نوع من الحرج وأنا آآ....

-اعتماذ مقاطعة بنبرة رسمية : مافيش حاجة اسمها حرج في الشغل ، كلنا هنا فريق واحد ، والهدف الأول عندنا هو مصلحة الطفل والمدرسة

-آياز بهدوء : done

نهض آياز عن المقعد ، ثم طوى الورقة ، ومد يده لمصافحة الأستاذة اعتماد وهو يرمقها بنظرات ممتنة ، و...

-آياز بابتسامة مجاملة : تمام .. Thanks a lot for your help (شكراً جزيلاً على مساعدتك)

-اعتماد بإيجاز : You are welcome (على الراح والسعة)

ثم انصرف إلى خارج المكتب ، وأغلق الباب من خلفه ، ووضع يده في جيب بنطاله ، وأخرج هاتفه المحمول ، ثم ضغط على عدة أزرار ، ومن ثم وضعه على أذنه ، و...

-آياز هاتفياً بهدوء : يا أهلاً .. انت لسه صاحي ؟ ممم... تمام ، طيب بص أنا علوز منك خدمة ، أوكي dude (صاحبي)

.....

في غرفة المعلمات ،،،

أحضرت سارة عاصم بعد المشروبات الباردة ، وكذلك الحلوى المغلفة ، وأسندتهم على الطاولة بجوار حقيبة آياز الجلدية ، و...

- سارة بنبرة حماسية : يالا يا بنات عشان نفطر
- ليلة بنبرة عادية : أوكي ، بس هاغسل ايدي الأول لأحسن
مش نضيفه خالص
- هبة بجدية : طب خديني معاكي لأحسن التراب مبهداني
- ليلة بنبرة غير مكترثة : تعالي براحتك
- ريمان متسائلة بحيرة : أومال فين عاليا ؟
- ليلة وهي تتنهد في إرهاق : لسه عندها شغل بتخلصه
- ريمان وهي تمط شفيتها : الله يعينها
- سالي متسائلة بنبرة هادئة : حد يعملني النسكافيه بتاعي يا
بنات !

ضيقت سالي عينيها أكثر ، ثم استدارت في اتجاه سارة ،
و...

- سالي بنبرة حانية : سارسوورة حبيبي
- سارة بهدوء مصطنع : عاوزة ايه يا سالوكة
- سالي بنبرة رقيقة : انتي اللي بتعرفي تظبطي النسكافيه ،
خليكي جدعة واعلميه
- سارة بتذمر : طب ما تخلي ميادة تعمله

-سالي بنبرة هادئة تحمل المزاح : والله لو كانت هنا كنت
قولتها ، بس انتي عارفها ، مش هاتطلع من الكلاس
بتاعها إلا على أول الدراسة

-سارة ضاحكة : هههههههههه .. على رأيك .. دي ميادة !

-سالي بنبرة لئيمة : طب يالا بقي

-سارة بنبرة عادية ونظرات جادة : ماشي ، بس فين السكر
؟

-سالي بضيق : اووبس ، ده في الكلاس عندي ، يعني لازم
أقوم أجيبه من الدولاب

-سارة مبتسمة ابتسامة عريضة : أحسن .. عشان تيجي
معايا

-سالي بنبرة محتجة : أل كنت ناقصة

-سارة بإصرار : يالا بقي ، تعالي هاتيه وارجعي تاني

-سالي على مضض وهي تزم شفيتها : طيب

-ريمان بنبرة عادية : أنا هاطلع الحاجة من الأكياس عقبال
ما تيجوا

-سارة بنبرة طبيعية : ماشي

-ريمان بنبرة عالية تقريباً : ونادوا على باقي البنات في
سكتكم

-سالي وهي تهز رأسها موافقة : ربنا يسهل ، أنا هرن على
نادية ، وعلى سحر وهناء وآآ...

-سارة مقاطعة بجدية : هناء غايبة النهاردة

-سالي متسائلة بحيرة : ليه ؟

-سارة مبتسمة : عندها عارضة بتخلصها

-سالي بنبرة مازحة : يا بنت المحظوظة ، هي لسه
مخلصتهاش

-سارة وهي تهز رأسها نافية : تؤ

-سالي بجدية : طب يالا بدل ما أتشل ..

وبالفعل إنصرفت المعلمات من الغرفة وبقيت ريمان بمفردها
في الغرفة ، وقامت بفض محتويات الأكياس البلاستيكية ، ثم
ضربت مقدمة رأسها بكف يدها ، و..

-ريمان لنفسها بقلق : أوبس ، نسيت المناديل ، أما أروح
أجيب علبة من الكلاس عندي

ثم سارت ريمان هي الأخرى إلى خارج الغرفة واتجهت
ناحية الفصل الخاص بها ..

في نفس التوقيت عادت رانيا إلى داخل الغرفة ، و...

-رانيا لنفسها بزمجرة : مابقاش إلا حته البتاع ده يهزاني
بالشكل ده ، طب والله لأوريه !!

وضعت رانيا كلتا يديها في وسط خصرها ، وظلت تتأمل
الغرفة بنظرات ماكرة ، ثم لمحت عبوات المشروبات الباردة
، فاعتلى وجهها ابتسامة شيطانية ، و...

-رانيا بتوعد : أنا بقى هاعرفك مين هي رانيا !!

اقتربت رانيا من الطاولة ، ثم قامت بفتح إحدى عبوات
المشروبات الباردة ، وقامت بإفراغ محتواها على حقيبة
آياز ، وبداخلها ، فابتلت مفكرته .. ثم أسندت العبوة إلى
جوار الحقيبة ، وتنهدت في إرتياح و...

-رانيا بنبرة متشفية وهي ترفع أحد حاجبيها : أحسن ..
وعقبال كل مرة ..

تتحنحت رانيا ، ثم التفتت حولها بريبة ، و...

-رانيا لنفسها بتوجس : أما أمشي أنا بقى قبل ما حد
يشوفني ويعرف إن أنا اللي عملت كده ..

ثم سارت بخطوات راکضة إلى خارج الغرفة ، ولكنها اصطدمت بريمان التي أمسكتها من ذراعيها ، ورمقتها بنظرات حائرة ، و...

-ريمان باندھاش : ايه يا رانيا ؟ بتجري كده ليه ؟

-رانيا بتعلم : آآ.. هآ.. آآ.. أصل .. لأ .. مافيش ، أنا بس .. آآ ، بطني ، عاوزة أروح التويلت

ثم ركضت مبتعدة عن ريمان التي ظلت محدقة بها وعلى وجهها علامات حيرة جلية ..

-ريمان باستغراب شديد : مالها دي ؟ مش طبيعية ليه ؟؟

هزت ريمان كتفيها في عدم اكتر ، ثم دلفت إلى داخل الغرفة ، فتفاجئت بما حدث على الطاولة ، فالتسع عينها في ذهول ، ووضعت كفي يدها على فمها و...

-ريمان بنبرة مصدومة : أووبس ، ايه اللي حصل هنا !!!

سارت ريمان في اتجاه الطاولة ، وأخرجت عدداً من المناشف الورقية من علبة (المناديل) التي كانت بحوزتها ، وقامت بتجفيف بقايا المشروب من على الطاولة ومن على الحقيبة الجلدية ...

في نفس التوقيت دلف آياز هو الآخر إلى الغرفة ،
وتفاجيء بريمان وهي ممسكة بحقيبته ، فتجهم وجهه ،
و...

-آياز متسائلاً بنبرة غليظة : بتعملي ايه ؟

رفعت ريمان رأسها لتتظر إلى آياز بأعينها الخضراوتين
المصدومتين ، و..

-ريمان بتعلمت جلي : أنا .. آآ.. أنا

-آياز بحددة وهو يقترب منها : انتي ماسكة الـ suitcase)
حقيبة جلدية (بتاعتي ليه

ثم قام آياز بجذب الحقيبة من يدها ليصدم بها مبتلة وشبه
متسخة ، فاكفهرت ملامح وجهه أكثر ، وقطب جبينه بشدة
و...

-آياز بنبرة حادة : ايه اللي انتي عملتيه ده ؟؟

ابتلعت ريمان ريقها في قلق ، وظلت تنظر إليها بنظرات
زائغة ، و...

-ريمان بتوتر شديد : أنا .. م.. آآ..

تفحص آياز الحقيية ، وتملكه الانزعاج أكثر حينما رأى
مفكرته وقد أفسدها المشروب

-آياز بضيق جلي : محدش قالك إن دي اسمها قلة ذوق لما
تبوظي حاجة مش بتاعتك

-ريمان بنبرة معترضة : بس آآ..

-آياز مقاطعاً بنبرة متشنجة : أنا مش عارف إنتي ليه
بتعملي معايا كده بالذات ، بجد إنتي واحدة معندكيش أي
احترام لخصوصيات غيرك

-ريمان بنبرة محتجة : بس مش أنا اللي آآ...

-آياز مقاطعة بنبرة هادرة : Enough (كفاية) !

-ريمان بنبرة متشنجة : لأ انت لازم تسمعي ، مين قالك إنني
أنا اللي عملت كده ، كل الحكاية إنني آآ..

-آياز مقاطعاً بنبرة جادة : مش عاوز أسمع تبرير ، أنا واخذ
بالي من حركاتك دي

-ريمان باندهاش شديد : افندم ؟ حركاتي !!

ثم قام بجذب علبة المناشف الورقية من يدها عنوة ، و..

-آياز بحنق : أيوه ..

-ريمان وهي تمط شفيتها في زهول : مش معقول ، بجد أنا
مش مصدقة اللي بسمعه ، حركات ، هو انت شايفني تافهة
للدرجادي عشان أتصرف بالطريقة دي ؟

-أياز بتهكم وهو يحدجها بنظرات حادة : انتي أدري بنفسك
، بس على الأقل لو غلطتي اعتذري مش تبقي rude)
وقحة) !!

احتقن وجه ريمان بدماء الغضب ، وكانت على وشك
الصياح به ، ولكنه تركها وانصرف إلى خارج الغرفة ،
فظلت هي تغمغم بكلمات غاضبة ..

.....

في معرض عليوه للسيارات ،،،،

طرقت السكرتيرة علا باب غرفة مكتب رامي قبل أن تدلف
إلى الداخل وهي تحمل صندوق خشبي صغير به عدد من
الأدوات المدرسية ..

نهض رامي عن مقعده ، ودار حول المكتب ، ثم اقترب من
السكرتيرة ومد يده وأمسك بالصندوق ، و...

-رامي متسائلاً بفضول : دي الحاجات كلها ؟

- علا وهي توميء برأسها إيجابياً : أيوه يا رامي بيه
- رامي متسائلاً بفضول : مافيش حاجة ناقصة يعني ؟
- علا وهي تهز رأسها بالنفي : لأ اظمن ، أنا بعت الساعي
وجاب كل حاجة من المكتبة
- رامي بإيجاز وهو يتفحص المحتويات بعينه : تمام
- اتجه رامي إلى مكتبه ، ثم أسند الصندوق على سطحه ،
وأمسك بيده ما بداخله ..
- تابعته السكرتيرة بإهتمام ، ووقفت خلفه ، و..
- علا متسائلة بحيرة : بس حضرتك يا فندم مقولتش انت
عاوز الحاجات دي ليه ؟
- رامي بنبرة عادية : مش أنا اللي عاوزهم ده آآ...
- ثم انتبه رامي إلى أنه يتحدث بإسهاب مع سكرتيرته في
أمور لا تعنيها ، فعبس بوجهه ، و..
- رامي بنبرة صارمة : انتي مش عندك شغل يا آنسة ؟
- انتفضت علا فزعة ، وتراجعت خطوة للخلف ، و..
- علا وهي تتنحج في حرج : احم .. آآ.. اه .. سوري

تجهم رامي بلامحه أكثر ، وأشار لها بعينيه ، و..
-رامي بجديه وهو يزم شفتيه : طب روجي شوفي اللي
وراعي ، وخدي الباب في ايدك ..
-علا بخفوت : حاضر

ثم تركته وانصرفت ، وأغلقت الباب من خلفها .. فتابع هو
تفحص باقي محتويات الصندوق ، و...

-رامي بتهكم : على آخر الزمن رامي سرحان يشتري
كراريس وأقلام رصاص وبرايات ، ده أنا معملتهاش وأنا في
المدرسة ، منك لله يا إيزووو ، هاتفضني على آخر الزمن
!!!!..

ثم أمسك رامي بهاتفه المحمول ، و...
-رامي بتهيدة إرهاق : أما أكلم الباشا وأقوله إن الحاجة
معايا ، وأشوف إن كان هاخذها هنا ، ولا أوديها له فين !

.....

في داخل أحد المساكن الشعبية بحي ما نائي قديم ،،،،

راقبت وردة تلك السيدات ذوات الأعمار المختلفة بنظرات جادة قبل أن تنتبه لصوت تلك المرأة الخشن ، و..

-سيدة ما بصوت آجش : دورك يا بتي

-وردة بتوتر وهي تبتلع ريقها : ماشي

نهضت وردة عن الأريكة القديمة ثم سارت خلف تلك المرأة العجوز إلى داخل غرفة ما شبه مظلمة ، ومحاطة بأشياء غريبة ..

انتبهت وردة إلى صوت ذلك الكهل ذو اللحية البيضاء ، و...

-الشيخ مبروك بصوت رخيم : اقدي يا وردة هنا

جحظت وردة بعينيها في صدمة ، وأمسكت بطرف حجابها وعضت عليه بأسنانها ، ثم ..

-وردة بإندهاش شديد : وكمان عارف اسمي يا سيدنا

-الشيخ مبروك بهدوء : عارفك وعارف اسم أمك واسم ستك وآ..

-وردة مقاطعة بحماس : بركاتك يا سيدنا الشيخ

ألقي مبروك بحفنة من مادة ما تشبه التراب في المبخرة الموضوعه أمامه ، فإزداد تصاعد الأدخنة منها ، و...

-الشيخ مبروك متسائلاً بنبرة جادة : جاية ليه يا وردة ؟
-وردة بنبرة متلهفة : بحبه يا سيدنا ، وعاوزاه يكون ليا
-الشيخ مبروك وهو يطم شفتيه : مميم .. بس هو آآ...
-وردة بنبرة حزن زائفة : هو لسه مش شايفني ، وأني
عاوزه أملى عينيه ، ومايشوفش إلا أنا بس ويتجاوزني
-الشيخ مبروك بنبرة هادئة : يعني انتي عاوزة حجاب
المحبة

-وردة بتحمس : حجاب محبة ، حجاب جواز ، المهم نكون
سوا قريب يا شيخنا

ثم اقتربت برأسها منه ، وغمزت له بزاوية عينها ، و...
-وردة بخفوت : وأني هادفع المعلوم كله يا سيدنا

أشار لها مبروك بيده ، فتراجعت هي للخلف ، و...
-الشيخ مبروك بحدة زائفة : أنا مش باخد حاجة ليا ، كله
لأسيادنا .. حووش يا رب حوووش
-وردة بقلق : إيوه أومال ، المهم رضا أسيادنا

استدار مبروك بجسده للخلف ، ثم مد يده ليمسك بمقبض
أحد الأدراج ، ومن ثم قام بفتحه ، وأخرج منه لفافة ما

مطوية بالية ، واعتدل بجسده مرة أخرى ، وألقى بتلك اللقافة في حجر وردة التي انتفضت في مكانها خائفة ، و...

-وردة متسائلة بتوجس : ايه دي يا سيدنا

-الشيخ مبروك بنبرة قوية : امسكها متخافيش

أمسكت وردة بيدها المرتعشة بتلك اللقافة ، وقربتها من عينيها لتفحصها ، و..

-الشيخ مبروك بنبرة جادة للغاية ، ونظرات ثابتة : فضي اللي جوا الورقة دي في أي حاجة تتشرب ، وخلي اللي عليه العين يشرب منها ، ويومين بالظبط وتجيلي ، وأقولك على اللي هاتعمله بعد كده

-وردة بقلق بالغ : هو ده سم يا سيدنا ؟

-الشيخ مبروك بضيق : سم إيه يا بت إنتي !! دي خلطة مخصوصة للعشاق

-وردة وقد سال لعابها : هاه .. عشاق

-الشيخ مبروك بنبرة خافتة : في ظرف اسبوع اللي عليه العين هايكون تحت إيدك

-وردة بنظرات متلهفة ، ونبرة متشوقة : يا ريت يا سيدنا ، وأني والله لهمرمغك في الخير كله

!!

الفصل التاسع :

في مبنى الرياض بمدارس اللافانيا ،،،

جلس آياز على أحد المقاعد الشاغرة في الحديقة الصغيرة
الملحقة بالمبنى وهو يزفر في ضيق ، و...

-آياز بنبرة متشنجة : قلة ذوق فعلاً ، بجد الواحد ماشفش
في حياته بنات زي كده ، واحدة عاوزة تعرف أموري
الخاصة ، والتانية بتتعمد تبوظ كل اللي يخصني .. أنا لازم
أخذ بالي بعد كده ، مش هادي الفرصة لأي واحدة إنها آآ...

قطع تفكيره - ذو الصوت العالي - رنين هاتفه المحمول ،
فأخرجه من جيب سترته ، ونظر إلى شاشته ، و...

-آياز بتهيدة إرهاق : ده رامي ، كويس ، أما أرد عليه

ضغط آياز على زر الإيجاب ، ووضع الهاتف على أذنه ،
و...

-آياز هاتفياً بنبرة جادة : ألوو .. أيوه يا رامي ، انت فين ؟
-رامي هاتفياً بنبرة عادية : يا عم أنا موجود ، إنت اللي فين ؟

-آياز بصوت منهك : أنا لسه في السكول

-رامي بنبرة مهمة : حلو أوي ، أنا جبتك كل اللي انت
عاوزه ، تحب أوديه على الفيلا ، ولا أجيبهولك في محراب
العلم

-آياز بنبرة شبه حانقة : انت .. انت بتتريق ؟

-رامي ساخراً : بصراحة مش قادر أمنع نفسي من التريقة ،
ماهو على آخر الزمن بقيت شايل كراريس وكتب ورايح
المدرسة ، ده أنا معملتهاش وأنا لسه طالب ، بأعملها
الوقتي ، لأ وعلى إيد مين ، إيدك انت !!

-آياز بصوت جاد : مش وقت تريقة يا رامي ، أنا عاوزك
تجيبلي الحاجة الوقتي خليني أخلص

-رامي متسائلاً باستغراب : في ايه مالك ؟ هو في حاجة
حصلت ؟

-آياز بإقتضاب : لأ مافيش

-رامي متسائلاً بفضول أكبر : إزاي مافيش ، ده باين من صوتك إن في حد ضايقتك ، أنا متوقع ده من الأول ، مش هاتسلم من الغفر اللي حواليك

-آياز متسائلاً بعدم فهم : غفر مين ؟

-رامي بتهكم : المدرسات اللي معاك ، اللي مفكرين نفسهم حاجة وهما شبه الغفر

-آياز بتهيدة إرهاب : كفاية يا رامي ، حاول بس تجيلي على المبني ، انت عارفه صح ؟

-رامي وهو يوميء برأسه موافقاً : أها

-آياز بجدية : طيب أنا هاسيب خبر على البوابة إنك انت جاي ، فهدخل على طول ، هتسأل على أوضة اسمها Staff Room (حجرة المعلمين) ، هتلاقيني هناك

-رامي مازحاً : أهم حاجة ماتهوش جوا

-آياز وهو يلوي فمه في تهكم : اطمن ، هتلاقي ألف مين يدلك

-رامي غامزاً : من الغفر صح ، مش المزز !

-آياز بخفوت : أها .. مستتيك ، يالا باي

-رامي بتحمس : مسافة السكة يا باشا ، سلام !..

أنهى آياز المكالمة مع ابن خالته ، ثم أعاد الهاتف في مكانه ، وبدأ في استكمال تنظيف حقيبته الجلدية ومفكرته ..

.....

في غرفة المعلمات ،،،،

كانت ريمان على وشك البكاء بسبب ما فعله آياز بها وإتهامه الباطل لها بإفساد أشياءه ..

احمر وجهها من الغضب ، وبدأت الدموع في التجمع في مقلتيها ، و...

-ريمان بصوت مختنق : والله ده حرام !!-

عادت سارة ومعها سالي إلى الغرفة فتفاجئت كلتاهما بحالة ريمان ، و...

-سارة متسائلة بقلق : ريمو ! في ايه يا بنتي ؟

-سالي باستغراب : انت يا بت ، مش احنا سايبني الضحكة من هنا لهننا ، في ايه اللي حصل وخلاكي تتقلبي كده

-ريمان بنبرة مختنقة : أنا كنت آآ...

لم تكمل ريمان عبارتها الأخيرة بسبب دخول نشوى إلى
الغرفة ، و...

-نشوى مقاطعة بصوت عالي : أومال محدش شاف رانيا يا
بنات ؟

-سارة بإيجاز : تو

-سالي بنبرة غير مهتمة : تلاقيا في أي نيلة ، ما انتي
عارفة صاحبك زي الزئبق محدش بيعرف يتلم عليها

-نشوى وهي تحك رأسها بأصابعها في حيرة : هاتكون
راحت فين بس ، أنا آخر مرة كنت شايفاها جاية على هنا ،
بس اتلخت في كام حاجة ، وآآ...

أصغت ريمان لما قالتة نشوى بإهتمام ، وبدأت تساورها
الشكوك حول رانيا .. خاصة أنها كانت آخر من تواجد
بالغرفة ، و...

-نشوى متابعة وهي تمط شففتيها : أنا هاروح أشوفها في
أوضة الـ Art (الرسم) ، أو الجيم

احتقتت الدماء في عروق ريمان ، وبدأت عينيها تشتعلان
من الغضب ، و..

-ريمان بحنق : إستني أنا جاية معاك

-سارة باندھاش : في ايه يا ريموو ، هو انتي هاتتحولي ولا ايه ؟

-سالي وهي ترفع حاجبها في استغراب : انتي يا بت مش طبيعية ، انتي مش كنتي لسه ضاربة بوز وحواجبك 88 وآآ..

-ريمان مقاطعة بصرامة : هاتعرفوا الوقتي ، يالا بس نشوف رانيا الأول ..!

ثم أسرع الفتيات بالخروج خلف ريمان من الغرفة في اتجاه الغرفة المخصصة للرسم ...

.....

بداخل غرفة الناظرة اعتماد ،،،،،

وقفت حنان بجوار الناظرة تعرض عليها الخطة المقترحة للعام الدراسي المقبل ، و...

-إعتماد بنبرة رسمية : تمام كده يا مس حنان

-حنان بخفوت : وطبعاً أنا خدت موافقة كل ال teachers)
المعلمات (على التعديلات دي ، وخلال يومين هاتكون كل حاجة متظبطة في ال plans (الخطط)

-إعتماڊ مبتسمة في رضا: عظيم يا مس حنان ، تسلمي
على المجهود بتاعك

-حنان بنبرة هادئة : على إيه بس يا مس إعتماڊ ، ده واجبنا

-إعتماڊ بنبرة راجية : يا ريت كل المعلمات يبقوا زيك كده
حريصين على العمل .. بالمناسبة قابلتي المدرس الجديد
مستر آياز

-حنان باستغراب : مستر آياز ! هو ده معنا هنا ؟

-إعتماڊ بهدوء : ايوه ، ده متعين معاكوا جديد في الكي جي

-حنان باندهاش شديد : مدرس راجل في الكي جي ! غريبة
الصراحة !!

-إعتماڊ بصوت متفائل : هي فعلاً حاجة غريبة ، بس أنا

واثقة إن مستر آياز هايعمل طفرة هنا في الكي جي

-حنان بنبرة رقيقة : ربنا يوفقه ويوفقنا

-إعتماڊ بصوت هاديء : يا رب

.....

أمام البوابة الرئيسية لمبنى الرياض ،،،

أوقف رامي سيارته أمام بوابة المبنى ، ثم ترجل منها وتوجه ناحية صندوق السيارة ، وقام بفتحه ، وأخرج منه صندوق كرتوني مليء ببعض الأشياء الدراسية ، ثم أسنده على الأرض ، وأغلق سيارته ، وحمل الصندوق واتجه ناحية حارس البوابة ..

-رامي مبتسماً : سلامو عليكم

-سيد بهدوء وهو يلوح بيده : وعليك السلام يا فندم ،
اتفضل

رفع رامي الصندوق الكرتوني للأعلى قليلاً ، و...

-رامي وهو يتحنح في خشونة : إحم .. آآ.. أنا جايب
الحاجات دي عشان خاطر الأستاذ آياز

-سيد مبتسماً ابتسامة عريضة : ايوه يا فندم ، حضرتك
الأستاذ رامي

-رامي وهو يوميء برأسه موافقاً : ايوه بشحمي ولحمي

-سيد بنبرة مهتمة وهو يشير بيده : هو فعلاً مبلغني إن
حضرتك جاي ، اتفضل

ثم قام بفتح البوابة له قليلاً ، فدخل رامي للداخل، و...

-رامي متسائلاً بجدية : معلىش بقى قولي أروح فين لأوضة
المدرسين بدل ما ألف كده مع نفسي وأتوه

-سيد مبتسماً ابتساماً عريضة : حاضر يا باشا ، أنا هدل
حضرتك على أوضة المدرسات مش المدرسين
-رامي وهو يطم شفتيه في عدم اكترات : لا مؤاخذة
-سيد بهدوء : ولا يهمك .. اتفضل معايا

وبالفعل أعطى الحارس سيد الإرشادات لرامي لكي يصل
إلى غرفة المعلمات دون الحاجة إلى الالتفاف حول مبنى
الرياض ..

فلم يستغرق وصوله إلى هناك سوى بضعة دقائق ..
دلف رامي إلى داخل العرفة فلم يجد بها أي أحد ، لذا أسند
الصندوق الكرتوني على الطاولة الموضوع عليها الطعام ،
و..

-رامي لنفسه بتعجب : هو مافيش حد يعني هنا ، لا مزز ولا
غفر ، ولا أي حاجة

مد رامي يده ، وأمسك بعلبة مشروب باردة و..
-رامي لنفسه بإرهاق : الجو حر بدرجة صعب أوي ، أنا
أشرب البتاع ده وأبقى أخلي الواد إيزوو يشتري مكانه ،
أوووف على الحر ، جهنم ..!!!!

في المكتبة الصغيرة للأطفال ،،،

كانت عاليا قد انتهت لتوها من ترتيب المكتبة الصغيرة التي تم إلحاقها بالمبنى حيث قامت برص الكتب بطريقة مبسطة وسهلة حتى يتمكن الطفل من الإطلاع على الكتب المصورة والمفيدة ، والاستفادة منها ..

لم تتوقع هي أن تكون الغرفة متسخة للغاية ، حيث كسا التراب كنزتها الوردية ، ولطخ بنطالها الأبيض ، مما أزعجها للغاية ، و...

-عاليا لنفسها بتذمر : ده جزاء اللي يعمل خير في البلد دي يتمرمط المرمطة دي ، يعني هدومي كلها بقت تراب وعفرة ، والطرحه اتبهذلت ، وحاجة تقرف ، استغفر الله العظيم يا رب ، أنا محتاجة أظبط كل حاجة من الأول ، ماهو مش معقول هافضل طول اليوم كده ، أيوه ، أنا هاروح الأوضة بتاعتنا أحط الكتب دي هناك ، وأعدل هدومي ، وأروح بعدها التويلت أغسل وشي ، وأنتعش كده

خرجت عاليا من الغرفة ، وأغلقت الباب خلفها ، وقررت أن تتجه إلى غرفة المعلمات ...

.....

في غرفة المعلمات ،،،،،

جلس رامي على أحد المقاعد ، وتوارى خلف الصندوق
الكرتوني المسنود على الطاولة ، وبدأ في إرتشاف محتوى
علبة المشروب البارد ..

وفي نفس التوقيت دلفت عاليًا إلى داخل الغرفة وهي تسب
وتزفر في إنزعاج جلي ، و..

-عاليا بضجر : أعوذو بالله ، إيه القرف ده ، ده أنا مناخيري
اتملى تراب ، أوووف ، أومال لو مكانتش الدادة بتتضف
كل يوم ، كنا هنلاقي إيه جوا

انتبه رامي إلى ذلك الصوت الأنثوي الذي يألفه جيداً ،
وارتسم على ثغره ابتسامة عريضة ، ثم مال برأسه
للجانب ليتأكد من صدق حدسه ، وبالفعل رأها تلك الفتاة
دائمة الشجار حتى مع نفسها ..

-رامي لنفسه بسعادة وخفوت : ده أنا نسيت خالص إنك
شغالة هنا !!

لم تنتبه عاليا إلى وجود رامي بالغرفة ، حيث كان شاغلها الأكبر هو تنظيف ملابسها وحجابها من التراب العالق بهم ، وبحركة عفوية منها قامت بنزع حجابها لتنضفه ، فكشف عن شعرها الأسود الطويل شبه الناعم ، و..

-عاليا لنفسها بنبرة منزعجة : يا رب بس مايكونش لزق التراب في شعري ، أنا مش فاضية أغسله خالص النهاردة

-رامي بصوت آجش من الخلف : لأ هو نضيف على فكرة
!!!

.....

الفصل العاشر:

في غرفة المعلمات بمبنى الرياض ،،،،

جحظت عاليا بعينيها حينما استدارت للخلف ووجدت رامي يبتسم لها إبتسامة عريضة ، فارتبكت على الفور ، وحاولت أن تغطي شعرها وهي تصيح فيه ب..

-إنت .. إنت بتعمل ايه هنا ؟ ومين سامحك تيجي الأوضة دي ؟ إنت أصلاً إيه اللي دخلك المدرسة هنا ؟

لم تحيد عالياً بعينها عنه ، بينما بادلها هو تلك النظرات المتفحصة لها ولهيئتها الغير مهندمة ، ثم لوى زاوية فمه في تهكم ، و..

-كل دي أسئلة ، ما بالراحة شوية عشان أعرف أجوبك

ثم نهض عن المقعد ، وبدأ يتحرك في اتجاهها ..

حاولت عالياً أن تعدل من وضعية حجابها ، لكنه بدى لو كان يتعمد عدم الإنصياع لها ، فارتبكت أكثر ، وتراجعت خطوة للخلف متحاشية النظر إليه ، فخشيت أن تبدو أمامه كالبهاء ، لذا نهزته وهي تشير بإصبعها ب.....

-لو سمحت خليك في مكانك ، وإلا والله العظيم آآ...

توقفت هي عن إكمال عبارتها حينما أشار هو لها بكفي يديه في الهواء لكي يطمئنها ، و..

-طيب .. طيب ، بس إهدي

تراجعت عاليا في اتجاه المرآة الصغيرة المعلقة عند مدخل
الغرفة ، وبنبرة تحمل النرفزة تشدقت بـ...
-ثواني خليني أظبط الطرحة دي

ثم سريعاً وضعت هي (دبابيس) الحجاب في فمها لكي
تتمكن من ربطها جيداً ..

في حين عقد رامي ساعديه أمام صدره ، وإستند بظهره
على الطاولة ، وظل يتابع عاليا بنظرات متمهلة ومتعجبة في
آن واحد ، وبنبرة رخيمة تحدث بـ...
-خدي راحتك يا أبله !

لوت هي شفيتها في استنكار جلي ، ورمقته بنظرة حادة من
طرف عينها اليسرى ، و..
-نعم ؟ أبله !!!!

ابتسم هو لها بغرور ، وبكل تعجرف تابع حديثه معها بـ...
-أه أبله .. ولا تحبي أقولك عاليا ، أنا شايف إن ده أفضل !!

صرت هي على أسنانها في حنق غير مبرر ، ثم كورت
قبضة يدها وكأنها تريد لكمه فوراً على فكه :

-إنت .. إنت !

حل هو ساعديه ، ومد يده في اتجاهها ليصافحها وهو
يبتسم لها :

-أنا رامي ، تشرفت بيكي

رمقته عاليا بنظرات ساخطة ، ثم هزت ساقها في عصبية
بعد أن عقدت ساعديها أمام صدرها ، وأردفت بـ :
-جاي هنا ليه ؟

مط رامي فمه للأمام في برود ، ثم ابتسم لها إبتسامة
هادئة وهو ينظر لها بنظرات شبه ضيقة ، و..
-هو المكان محظور عليا ولا حاجة يا .. يا عاليا ؟

تشنج وجهها ، وبرزت عروق جبينها ، ورفعت حاجبيها
الاثنين في غيظ ، و..

-أه طبعا محظور عليك وعلى أي حد غريب يجي هنا من
غير إذن

ابتسم رامي بثقة أكبر .. ثم وضع يديه في جيبي بنطاله الخلفي ، ونظر لها بغرور ، وتتنفس بهدوء ثم تابع بـ :
-أنا مافيش حاجة تقف في وشي ، ده أنا رامي عليه

حدجته هي بنظرات مغتظة ، ثم وضعت يدها في منتصف خصرها ، وبنبرة متوعدة أردفت بـ ... :
-والله ، طيب ! أنا هابلغ الأمن عنك وهاخليهم يطلعوك برا يا رامي قشوع (اسم بطل فيلم مصري) ...!

ضيق رامي عينيه أكثر في حيرة ، ثم تسائل في فضول بـ...
-مين رامي قشوع ده ؟؟؟

وضعت هي إصبعيها على طرف ذقنها وكأنها تتوعده بالانتقام ، و..

-اصبر بس عليا ...!!!

-على فكرة أنا اسمي رامي سرحان عليه ، مش قشوع ده !
-هه !

كانت عاليا على وشك الخروج من الغرفة حينما أسرع
رامي في خطواته لكي يسبقها ، ثم اعترض طريقها ووقف
أمامها ، بنبرة شبه راجية تحدث قائلاً :
-استني بس يا عاليا

صرت هي على أسنانها في ضيق ، وأشارت بإصبعها ، و..
-كمان عاليا كده حاف ؟!!!!

ابتسم رامي لها إبتسامة عريضة ، ثم غمز لها وهو يتحدث
بنبرة هامسة بـ...

-بلاش حاف ، خليها بالزبدة بالعسل بالمكسرات حتى ،
المهم بأي حاجة مسكرة زيك كده ! ها مرضية يا عاليا ؟
-والله ، إنت قاصد تفور دمي

-ليه بس سوء الظن ده ! ده أنا نيبي صافية

-مممم ، طب وسع أحسنك

-لالالا ، أنا مش هاوسع إلا لما آآ...

قاطعته عاليا بصوتها الحاد وهي تهدر بـ ... :

-والله العظيم إنت مش هترتاح إلا لما أعملك فضيحة هنا

-يا بنتي هو انتي بتدوري على المشاكل بمغناطيس؟ أنا جاي هنا في شغل ، إصبري شوية واسمعي

هدأت نبرتها إلى حد ما ، ورمقته بنظراتها الجادة :

-والله ! وده من امتي ان شاء الله!؟

- احم .. آآ.. من زمان ..

-تصدق انت باين عليك إنسان تافه وفاضي ، وجاي تضيع وقت ، وحظك وقعك معايا وآآ..

وضع رامي كف يده أمام وجهها ليجبرها على الصمت ، ثم زم شفثيه في غضب ، وأردف بـ .. :

-ششششششششششش .. بس ، خلاص ، بلاعة واتفتحت

-اييبيه؟

وضع هو إصبعه على طرف فمه ، وحركه بعصبية ، و..

-هوس خلاص ، أنا أصلاً مش جايلك ، أنا جاي لابن خالتي

فتحت هي ثغرها في تهكم ، ونظرت إليه بعدم إقتناع :

-ابن خالتك؟

-أيوه ، ماهو متعين معاكم مدرس هنا

تابعت عاليا حديثها بنفس النبرة المتهكمة ، وهي تنظر إليه
بنظرات شبه ساخطة ، ثم تابعت بـ.. :

-يبقى حضرتك غلطان في العنوان ، هنا مبني الكي جي
للبنات وبس ، ولو جاي فعلاً لابن خالتك زي ما بتقول يبقى
شور هتلاقيه في المبني الرئيسي مش هنا ، فاتفضل بقى
هويانا

أصر رامي على كلامه ، ونفخ في إرهاق ، ثم نظر لها
مباشرة :

-لأ معلىش ، أنا متأكد من اللي بأقوله ، وآآ..

قاطعته عالياً مجدداً بصوتها العالي وهي تصرخ فيه بـ....
-واضح كده إن الكذب هواية عندك

لوى هو فمه في عدم تصديق ، ورفع حاجبه للأعلى :
-نعم ؟

نظرت إليه عاليا بنظرات أكثر سخطاً ، وأشارت له بإصبعها وهي تحدثه بنبرة تحمل نوعاً من الإهانة بـ...

-زي ما سمعتني ، انت من النوع لما مش بتلاقي واحدة تديك ريق حلو ، تعمل أي حجة فارغة والسلام عشان بس تزهقها وتقرفها في عيشتها يمكن تترمي عليك ، وتعتبرك فارس احلامها الأول

رفع رامي حاجبيه في اعتراض :
- الكلام ده ليا أنا ؟

أومات هي برأسها موافقة قبل أن تكمل بـ .. :
- أه ليك طبعاً ، وإن كنت بقي مفكرني مش عارفة إنت عملت ايه في المطعم تبقى غلطان ، لأ أنا واعية لكل حاجة بتعملها كويس أوي ...!!!!
-وربنا أنا فعلا غلطان إنني بأعمل معروف مع اللي زيك

وضعت كلتا يديها في منتصف خصرها ، وضيق عينيها بشدة وهي تنظر إليه في حنق :
-ايبيه ؟ اللي زيي ؟

هز رامي رأسه بإصرار ، ثم تابع بسخرية واضحة بـ ... :
-أيوه .. أصل انتو اللي يعملكم قيمة في الزمن ده ويعبركم ،
بتتمردوا عليه
-والله !

ثم نظر إليها بنظرات متحدية ، وبنبرة واثقة أكمل بـ ... :
-أيوه .. جنس نمرو ، وروحي إشتيكني ، وأنا مستيكي
هنا ، بس متأخريش!!!!

فغرت هي شفيتها في عدم استيعاب لما قاله للتو ، في حين
أشار هو لها بكف يده ، ولم ينظر لها ، وبكل فظاظة تحدث
بـ .. :

-وسعي بقى ، عشان عاوز هوا ، وابقوا ركبوا تكييف هنا
لأحسن الجو خانقة ، ها .. خانقة !!!

لم تصدق عاليا تصرف رامي الوقح معها ، وتسمرت في
مكانها لوهلة حتى أفاقت من شرودها ، وكانت على وشك
الإنفجار ثائرة ، لكنها نظرت حولها فلم تجده ، فمطت
شفيتها في إحتجاج :

-ماشي يا رامي ، ماشي ..!!!!

.....
في غرفة الرسم ،،،

ركضت ريمان ومعها سارة وسالي ومن قبلهن نشوى في اتجاه غرفة الرسم حيث من المفترض أن تكون رانيا متواجدة هناك ، ولكن للأسف لم تجدها أيأ منهن ..
نفخت ريمان في غضب ، وصرت على أسنانها في ضيق وهي تتحدث بنبرة منفعلة بـ...
-راحت فين ؟

هزت نشوى كتفيها في عدم فهم ، ومطت ثغرها للأمام :
-معرفش

رمقتها ريمان بنظراتها المشتعلة :
-مش إنتي صاحبته ؟

أجابت عليها نشوى بتهكم واضح بـ ..:
-ماشى .. بس ده مش معناه إن أنا معايا خط سيرها يعني !..

-بس إنتو الاتنين ودينكم في بعض ليل نهار
-بقولك ايه يا ريمان ، أنا مش فاضية للكلام ده ، خلي كل
واحدة تخلص اللي وراها

وقفت سارة إلى جوار ريمان ، وأسندت كف يدها على
كتفها ، ونظرت لها بنظرات هادئة :
-اهدي يا ريموو ، كل مشكلة وليها حل

التفتت لها ريمان ورمقتها بنظرات محتقنة قبل أن تنطق
بنبرة متشنجة بـ .. :

-يا سارة إنتي مش متخيلة رانيا عملت فيا ايه ، ولا حتى
المصيبة اللي لابستهاني
-خلاص ، كل حاجة هاتتحل
-لأ مش هاتتحل لأنه كده مفكر إنني أنا اللي بوظت حاجته

رفعت سالي حاجبها في تساؤل :
-مين ده ؟

استدارت ريمان ناحيتها ، ونظرت لها بنظرات عادية وهي
تشير بيدها :

-المدرس الجديد

-مدرس ...!!!!

قالتها سارة باستغراب قبل أن تتوقف جميع الآنسات عن الحديث حينما سمعن ذلك الصوت الصارم والمعروف للناظرة إعتاد :

-في ايه اللي بيحصل هنا يا بنات ؟ انتو مش متواجدين في أماكنكم ليه ؟

تتحنحت نشوى في حرج ، ونظرت لها بتوجس :

-أنا .. أنا ماشية

تنفست سالي بهدوء ، وبخطوات متمهلة تأبطت في ذراع سارة ، ثم سارت في اتجاه الناظرة ، ورمقتها بنظرات عادية :

-احنا خلصنا اللي ورانا يا مس إعتاد ، وكنا بنشوف إن كان في حد من زمايلنا محتاج مساعدة ولا حاجة

مطت الناظرة إعتاد شفيتها في إعجاب ، وبنبرة مديح تحدثت بـ.. :

-برافو يا مس سالي .. بأحب فيكي روح الحماسة الزائدة دي

-العفو يا مس إعتماذ.. احنا بنتعلم من حضرتك
-ماشى يا مس سالى ، ربنا معاكو

ثم تركتهن وإنصرفت في اتجاه مكتبها ، في حين أرخت
سارة ذراعها قليلاً وهي تنظر إلى سالى و...:
-دراعى خذل ، ماتريحيش أوي عليه
-يا بت ده إنتى ليكى الشرف إنى ماسكة فيكى

ظل وجه ريمان متجهماً ، وعقدت ساعديها أمام صدرها ،
وبدأت في هز ساقها بعصبية ، وغمغمت مع نفسها بكلمات
مبهمة تشير إلى حنقها .. تبادلت كلاً من سارة وسالى
النظرات ذات المغزى ، ثم أشارت سالى لسارة بعينيها لكي
تتحدث مع ريمان .. فإمتثلت الأخيرة لطلبها ، وبالفعل وقفت
قبالة ريمان ثم وضعت يدها على ذراعها ومسحت عليه
بنعومة ، ونظرت لها بنظرات عادية وبصوتها المتحمس
نطقت بـ ...:

-خلاص بقى يا ريموو ، انسى اللي حصل

هزت ريمان رأسها معترضة قبل أن تجيبها بـ :
-لأ

-مش يمكن تكوني ظلماها !

بدى الانفعال واضحا في صوت ريمان حينما أجابته بـ ...
-والله أبداً ، ده أنا متأكدة إنها السبب في اللي حصل

خشيت سارة إن تمادت في الضغط على ريمان أن تزداد
غضباً ، لذا أخذت نفساً عميقاً ، وزفرته على مهل ،
وبصوتها الرقيق تابعت حديثها بـ ..:

-بصي ، فوتي المرة دي ، وأوعدك بعد كده لو هي ليها يد
في حاجة احنا مش هانسيبها

-بالظبط كده

قالتها سالي حينما وقفت إلى جوار ريمان ، ووضعت هي
الأخرى يدها على كتفها

تراجعت ريمان خطوة للخلف ، ونظرت إلى كلتاها بأعين
مشتعلة ، ثم ردت عليهما بتذمر بـ :

-لأ ، إنتو مش فاهمين هي أخرجتني ازاي ، وهو كده هاي فكر
إن أنا اللي عملت ده في حاجته

قطبت سارة جبينها ، وبنبرة فضولية تسألت بـ ..:
-حاجة مين ده ؟

نفخت ريمان مجدداً من الضيق الجلي ، ووضعت كفي يدها
على وجهها لتخفيه ، و..
-يووووه

أشارت سالي لسارة بطرف عينها لكي تتوقف عن الحديث
، ثم بادرت هي بـ ..:
-بقولكم ايه انتو الاتنين ، تعالوا نتكلم في مكان ثاني بدل ما
نلاقي عفريت العلبة فوق دماغنا

ابتسمت سارة ببلاهة ، ثم نظرت حولها في قلق ، و..
-على رأيك

أحاطت سالي ريمان بذراعها ، ثم دفعتها لتسير معها وهي
تتحدث بصوت هاديء بـ ..:
-ياللا يا ريموو ، ياللا يا حبيبتي ، وربنا يهديكي

.....

تجول رامي في الحديقة الملحقة بمبنى الرياض باحثاً عن آياز ، وبالفعل وجده جالساً على أحد المقاعد الخشبية المثبتة في الأرضية ، فاتجه نحوه وهو يصيح بـ:..
-إيزوووو ... باشا !

انتبه له آياز ، ونظر في اتجاهه ، ولوح له بيده ثم نهض عن مكانه ، وبنبرة منزعجة أردف بـ ..
-تعالى يا رامي

جلس رامي إلى جوار آياز ، فتهد الأخير في إستياء ، فنظر إليه رامي باستغراب :
-مالك أخذ جمب كده ليه ؟

نفخ آياز مجدداً في ضيق جلي ، ثم حدق مباشرة أمامه في الفراغ :
-اتخنقت

رفع رامي حاجبه في اندهاش ، ثم مال برأسه للجانب
ليتمكن من التمعن في وجه ابن خالته ، وتحدث بـ.. :

-بالسرعة دي

-هاعمل ايه ، ماهو ربنا مسلط عليا واحدة كل ما تشوف
حاجة تبغي تبوظها

ضيق رامي عينيه ، وبنبرة فضولية تسائل بـ.. :

-مين دي ؟

هز آياز كتفيه في حيرة ، ثم لوح بذراعه في الهواء وهو
يتحدث بـ:

-مش عارف ، أهي بنت من البنات اللي شغالين هنا

لكزه رامي في ذراعه بخفة ، ثم غمز له بطرف عينه ،
وبنبرة شبه ماكرة سأله :

-شبه الغفر ، ولا مزة تستاهل !؟

لوى آياز فمه في استنكار قبل أن يجيبه بـ.. :

-يا عم انت فايق للكلام ده

-يا سيدي بأحاول أخليك تفك كده وتفرفش بدل ما أنت مقفل كده

-طب جبت الحاجة ؟

ابتسم رامي نصف ابتسامة شبه ساخرة ، ثم بنبرة مازحة أجابه بـ ..:

-أكيد طبعا ، أومال يعني جاي أشكيلك همي وتشكيلي همك

ربت آياز على فخذ رامي لكي يحثه على النهوض ، ثم بنبرة جادة تحدث بـ :

-طب تعالى نشوفها

نهض رامي من جوار ابن خالته ، ثم نظر في ساعة هاتفه المحمول قبل أن يوجه بصره نحو آياز :

-لأ شوفها انت براحتك ، أنا يدوب ألحق أرجع المعرض

-انت مش ناوي تساعدني ؟

عبس رامي بوجهه قليلاً ، ومط فمه في ضيق :

-المساعد ربنا ، وبعدين كفاية اللي حصل لحد كده ، أنا مش ناقص أتخانى تاني

أثارت العبارة الأخيرة فضول آياز كثيراً ، فسأله بإستغراب بـ
:..

-تتخاقق ؟ هو في حد كلمك على البوابة ؟

لم تتغير تعابير وجه رامي كثيراً ، ولكنه تحدث بنبرة أقل
إنزعاجاً :

-لأ .. ماتخدش في بالك .. سلام بقى يا إيزوو ، والله يعينك
على الوحوش اللي هنا

ابتسم له آياز مجاملاً ، ثم بنبرة رخيمة أردف بـ :..
-ايوه ادعيلي

-سلام يا كوتش ، أشوفك آخر النهار

-أوكي .. See ya (أراك لاحقاً)

.....

بداخل غرفة الموسيقى ،،،

نظرت جانبيت إلى رانيا باستغراب شديد ، خاصة وأن الأخيرة قد لجأت لتلك الغرفة لتختبيء فيها ، وإدعت بالكذب أنها قادمة لتساعدها في إنجاز عملها في وقت قصير ..

شردت رانيا بعقلها وأثارها الفضول لمعرفة توابع فعلتها مع ريمان وآياز ، فهي متيقنة أن الأمر لن يمر مرور الكرام ، خاصة وأن آياز ليس من النوع الذي يقبل الإهانة بسهولة ، وكذلك ريمان ..

تسأللت هي في نفسها بفضول زائد بـ ..:

-طب هايكونوا اتخنقوا مع بعض ولا قطعوا هدوم بعض ولا عملوا ايه بالظبط؟؟ هاموت و أعرف اللي حصل بينهم ، يووووه ، ماهو الاتنين دماغهم جزم ، بس .. بس أنا ماليش دعوة بالموضوع ، أنا هاعمل نفسي من بنها ، وكأن مافيش حاجة حصلت .. أيوه ، دي أسلم طريقة عشان محدش يشك فيا .. ربنا يعديها على خير

مطت جانبيت شفيتها لأكثر من مرة ، ثم تسأللت بجدية بـ .. :
-انتي هاتفضلي أعدة كده كتير ؟

نظرت لها رانيا ببرود ، ثم بكل فظاظة سألتها :
-ليه في حاجة ؟

-أنا عاوزة أرتب الأوضة ، وانتي معطلاني ، وواضح كده إنك هاتفضلي مبلطة في الخط كتير

لوت رانيا ثغرها في استهزاء ، ثم زمت فمها وهي تجيبها بـ :

-طيب شوية وهاقوم

اغتاظت جانبيت من ردها المستفز ، فتشدقت بـ ... :

-انتي مش قولتي هتساعديني

ارتبكت هي ولم تعرف بماذا تجيبها ، فحاولت البحث عن كذبة مقنعة ، فخرج صوتها متلعثماً حينما ردت عليها بـ :

-أها .. بس آآ.. أنا .. انا عندي حساسية من التراب

-بجد ؟

قالتها جانبيت وهي تحدجها بنظرات حادة غير مقنعة بما تقوله

تتحنحت رانيا في حرج زائف، وتجنبت النظر في عينيها وهي تجيبها بخفوت بـ :

-إحم .. آآ.. أيوه

-طب بما إنك تعبانة ، فيا ريت تاخدي سكة بقى عشان
أخلص شغلي ، أنا مش عاوزة أتأخر بعد مواعيد الدراسة
-طيب

لم تجد رانيا أي بد من المكوث في الغرفة بعد أن تلاشت كل
الحجج ، لذاغ عضت على شفتها السفلى ونهضت عن
المقعد ، ثم سارت في اتجاه باب الغرفة ولكن أوقفها عن
متابعة السير صوت جانبيت الأمر بـ ..:

-رجعي الكرسي اللي كنتي أعدة عليه مكانه ، معلىش أنا مش
بأحب أوضتي تبقى مفركشة

زفرت رانيا في حنق بعد أن ضيقت عينيها اللئيمتين قليلاً ،
وردت على مضض بـ ..:

-أووف ، ماشي

أعادت هي ترتيب المقعد في مكانه ، ثم خرجت من الغرفة
وهي تتمم بكلمات ساخطة ، ولكن لم تعبأ بها جانبيت ، بل
إبتسمت في رضا وهي تحدث نفسها بـ ..

-بنت باردة ، مش ينفع معاها إلا الاسلوب المستفز ده ...!

.....

في غرفة المعلمات بمبنى الرياض ،،،،،

تزامت الغرفة بالمعلمات اللاتي كن يتحدثن عن طبيعة يومهن ، ولم تلاحظ إحداهن حالة الضيق أو الشرود البادية على وجه عاليا ..

إكتفت عاليا بتصنع الابتسام حتى تتجنب محاصرتها بالأسئلة ..

وفجأة ساد الصمت الرهيب الغرفة حينما ولج إليها آياز .. حيث حدقن به وتسألن بتهامس بينهن عن هويته ..

ابتسم آياز إبتسامة مجاملة للجميع ، وبنبرة هادئة بدأ حديثه بـ:..

Good afternoon Ladies- (مساء الخير سيداتي) ،
أنا آياز الشناوي .. زميلكم الجديد في الكي جي

تابع آياز ردود الفعل الصادمة على تعابير أوجههن ،
فبادرت حنان بـ :

-أهلا وسهلا بيك معانا ، وإن شاء الله تكون سنة دراسية
مثمرة

ابتسمت له ميادة ابتسامة مجاملة قبل أن تنطق بـ ..

-إن شاء الله يعجبك الشغل في الكي جي

-ايوه ، هو في زي الكي جي وجماله

قالتها هبة وهي تنظر في اتجاه آياز بنظرات مطولة

نظرت له ليلة بعينين متفحصتين قبل أن ترد عليه بـ ..:

-أهلا بيك معانا

تحمست سارة كثيراً حينما أردفت جملتها بـ ..:

-بص إحنا كلنا هنا اخواتك ، ولو عوزت أي حاجة إن شاء

الله مش هنتأخر عليك

هز آياز رأسه موافقاً على ردودهن ، ولم يعقب وبحث

بعينه عن ريمان فوجدها تتحاشى النظر إليه ، فلوى فمه

في سخط ، ونظر لها شزراً ، ثم اتجه صوب الصندوق

الكرتوني وجمع أشياءه ، وبكل برود تحدث بـ ..

-شكراً على كلامكم ده ، وأتمنى إن يكون في حدود للتعامل
بيننا ، لأن أنا مجرد زميل هنا وبس

!

.....

الفصل الحادي عشر:

لم يتوقف برنامج (الواتس آب) عن تلقي إشعارات بوجود
محادثة كثيرة ، وتعابير رمزية بلا حصر ، فما قاله آياز
اليوم في المدرسة كان محور الإهتمام ..

تباينت ردود الأفعال حول رده الصادم والصارم في آن واحد
...

-هناء : ((أنا ماشوفتش اللي حصل))

-جانيت : ((ما إنتي مكونتيش موجودة))

-سارة : ((المشكلة أنا اللي كنت بكلمه ، والاحراج كله ليا
((

-عاليا : ((أحسن حاجة نخليها في حالنا ، ونبعد عنه وعن
اللي زيه))

-هنا : ((اكيد هحتاج لواحدة مننا ، وإحنا هنوريه الوش
الخشب))

-ميادة : ((فعلا ، ده هو وقع في إيد من لا يرحم))

-منة : ((هو متنطط على إيه ، ده في زيه أد كده))

-ميادة : ((بالظبط))

-سارة : ((أومال فين بقية البنات ؟ محدش فيهم قال رأيه
((

-جانيت : ((ممكن يكونوا مش موجودين))

-هنا : ((أما هيدخلوا على الواتس أكيد هيقروا الشات))

-أية : ((أنا ماينفعلش ماتعملش معاه ، هو هيبقى في وشي
كل يوم))

-منة : ((صدري بس الوش الجبس وهو هيعرف إن الله
حق))

-أية : ((إن شاء الله))

ظل الوضع هكذا في المحادثة الجماعية بين الفتيات لبعض
الوقت ، وانتقلوا لمواضيع أخرى للحديث عنها ..

وعلى الجانب الآخر ، إتصلت ليلة بـ (ريمان) لتطمئن
على أحوالها ..

-بجد بنت مستفزة ، أنا مش طابقها خالص

قالتها ريمان بنبرة منزعة ، وهي تحاول وضع الطلاء على
أظافر قدمها ..

زمت ليلة شفتيها قليلاً ، وقالت بحماس :
-كبري دماغك منها ، وخلينا نشوف هنعمل ايه مع فلانتينو
الكي جي
-ده بني آدم قليل الذوق ، مفكر إن أنا اللي بوظتله حاجته
-معلش ، أي حد كان في مكانه هيفكر كده

تركت ريمان فرشاة الطلاء ، وضيق عينيها ، ثم قالت
بإنفعال :

-إنتي معايا ولا معاه
-لا معاكي ولا معاه ، بس هو الموقف بيقول إن آآ...
-خلاص خلاص قفلي على السيرة دي ، وخلينا نشوف
هانلبس ايه بكرة

زفرت ليلة في ضيق ، ثم تشدقت بـ :
-أووف ، شوفتي أبلتك إعتاد هاتعمل فينا ايه ؟

لوت هي شفيتها في امتعاض ، وتساءلت بإحباط ب :
-إيه تاني؟

أخذت ليلة نفساً مطولاً ، وزفرته على مهل ، ثم أردفت ب :
-هي عاوزانا نلبس شبه بتوع مصر سرفيس (شركة
المنظافة)

ضيقتم ريمان عينيها ، وعقدت ما بين حاجبيها في استغراب
، وقالت بدهشة :
-نعم ، أنا مش فاهمة!

-يعني هي عاوزانا نلبس تي شيرت أورانج خامته رديئة جداً
، ومعاها كاب كحلي باين

أخرجت ريمان لسانها في تأفف ، وإكفهر وجهها بإشمئزاز
واضح ، وتحدثت على مضض ب:
-إيه القرف ده

لوت ليلة فمها للجانب ، ثم قالت متهكمة :
-بتقولك نيو لوك

-ده نيو زفت على دماغها

قالتها ريمان بضيق جلي ، ثم نهضت عن الفراش ، وإتجهت ناحية خزانة ملابسها لتنتقي ما سترتيديه في الغد ..

في حين ضحكت ليلة لبعض الوقت ، ثم تابعت بثقة ب :

-أنا مش هالبس اللي هي بتقول عليه ده

-ولا أنا كمان

-أوكي ، هانشوف باقي البنات هايقولوا ايه

أسندت ريمان الفستان الأصفر ذي الحملات العريضة ،
والتنورة المطبوع عليها رسومات طفولية على المقعد
المواجه لمكتبها ، وأومات برأسها وهي تجيبها ب :

-تمام .. بس احنا مش هنخليها هتهزقنا عل آخر الزمن
وتخلي منظرنا مش حلو قصاد الأهالي ولا الأطفال

-متفقين

.....

في فيلا سرحان عليه ،،،

في غرفة آياز ،،،

إستند رامي بظهره على طرف الفراش ، وأمسك بهاتفه
المحمول بين يديه ، وظل يمارس أحد تطبيقات الألعاب ..
في حين إستغرق آياز وقتاً طويلاً في الانتهاء من إعداد خطة
الدراسة ، وتحضير بعض الدروس الخاصة بمنهجه
الدراسي ...

شعر رامي بعد برهة بالملل ، فأغلق هاتفه ، وألقاه إلى
جواره ، ونظر في اتجاه ابن خالته بإستغراب ..

كان الأخير يحاول تصميم برنامجاً ما لتسهيل شرح بعض
المفردات اللغوية بطريقة مصورة ، وتناسى تماماً وجود
رامي .. فأمسك هو بالوسادة وألقاها على رأس آياز ،
فإنتبه له بعد ان تأوه من الألم ، وقال بإندهاش :

-أوتش .. ايه يا بني ، في ايه ؟

ثم وضع يده على رأسه ليحكها ، في حين نظر له رامي
شزراً ، وقال بإمتعاض :

-هاتنجز اللي بتعمله ده امتي ، أنا زهقت !

-شوية

أشار له بيده ، ثم قال متهكماً وهو ينظر له :
-ده انت بقالك ساعة أعد على البتاع ده ، إيه يا عم ،
تكونش بتخترع الذرة وأنا معرفش

ابتسم آياز له إبتسامة مجاملة ، وأجابه بهدوء :
-لا ده شغلي
-طب يالا ، بدل ما أقوم وأسيبك

ضغط آياز على عدة أزرار ، ونهض عن المقعد ، ثم تسائل
وهو مسلط أنظاره على شاشة حاسوبه المحمول بـ :
-إنت رايح فين أصلاً ؟

-كان عندي (Race) ريس النهاردة ، وكنت عاوزك معايا

قطب آياز ما بين حاجبيه ، ونظر إليه بإندهاش وهو يسأله
بـ :

-انت لسه بتشارك في السباقات ؟

ابتسم له رامي بغرور ، ونفخ صدره في ثقة ، ثم قال بكل
فخر :

-هو أنا بطلت أصلاً

ثم أخفض نبرة صوته قليلاً ، وتابع بـ :

-بس محدش يعرف أي حاجة عن الموضوع ده ، ده سر بيني وبينك

مط آياز شفتيه ، وعقد ساعديه أمام صدره ، ثم تحدث بـ :

-ممممم ، اوكي

-إنت عارف خالتك مش هاتسييني لو عرفت باللي بأعمله ، ده غير أبويا ، الاسطوانة بتاعة كل يوم ، وأنا مش ناقص وجع دماغ لو حد عرف بده

-أها .. Don't worry

-المهم ، إنت جاي معايا ولا لا ؟

-جاي ..

ظهرت إبتسامة عريضة من بين أسنانه ، ثم قال بحماس جلي :

-اشطا عليك يا برنس ، أيوه بقى ، ده أنا هابهرك

.....

أبعدت وردة أذنها عن الباب ، وعضت على شفتها السفلى
الغليظة ، وهزت رأسها عدة مرات ، ثم قالت بمكر :
يا وجعة سودة ، بيعمل حاجة اسمها أبصر ايه (رست)
(بست) والنبي ما أنا فاكرة ، يا حظك الحلو يا وردة ، كده أنا
أقدر أذله بيها لو موجفش معايا وخلي سي إزاز يتعلج بيا ..

ثم برزت في عينيها لمحة شيطانية ، وتابعت بتلهف بـ :
بركاتك يا شيخ مبروووك ، البشائر هلت أهى ..!!!!

.....

في منزل عاليًا راشد ،،،،

إنتهت عاليًا من إرتداء فستان السواريه الأسود – ذي الرقبة
العالية ، والأكمام الواسعة ، والذيل الطويل – ونظرت إلى
هيئتها في المرآة، وقامت بتثبيت حجابها بدبابيس فضية
لامعة ، وإنحنى بجسدها للأمام قليلاً لترتدي حذاءها ذي
الكعب العالي .. وقامت بوضع ملمع الشفاه ، وعضت على
شفتيها لتتأكد من إنتشاره عليهما ...

رن هاتفها المحمول ، فأسرعت ناحية الفراش ، وإلتقطته بأصابعها ، ووضعتة على أذنها ، وابتعلت ريقها ، وأجابت بتلهف بـ :

-أيوه يا طنط ، أنا لبت خلاص

ثم حاولت أن تجمع أشياءها المتناثرة في أرجاء غرفتها ، وتابعت بـ :

-أوكي ، هاخذ تاكسي وأحصلكم على هناك ، بس متأخروش عليا المشوار بعيد وكده ..

ثم زمت شفيتها للأمام بعد أنعلقت حقيبة يدها الصغيرة على كتفها ، وأكملت بجدية بـ :

-مممم.. تمام ، يعني هي الكوافيرة خلصت معاها ، خلاص ماشي .. أنا على العموم نازلة أهوو ، أوكي .. باي !

إنهت هي المكالمة معها ، ووضعت الهاتف في حقيبتها بعد أن نظرت إلى شاشته ، ثم قالت بتذمر :

-أوف نسيت أشحن موبايلي ، ربنا يستر ومايفصلش مني

وإتجهت بعدها ناحية باب غرفتها ، وولجت للخارج ...

.....

في كافيه ما بأحد المولات ،،،،

أمسكت رانيا بقائمة المشروبات لتنتقي ما تريده منها ،
فنظرت لها نشوى الجالسة إلى جوارها باندھاش ، وأسندت
ذقتها على مرفقها ، وتشدقت بـ :

-بجد إنتي جايبة البرود ده كله منين ، ده أنا لو مكانك بعد
اللي حصل ماوريش وشي لحد

-عادي ، إنتي عارفة إنه مش بيفرق معايا

-ده أنا كنت هاموت في جلدي لما لاقيت ريمان وشلتها
جايين عليا وبيدوروا عليكي

مطت رانيا شفيتها في عدم إكترات ، وقالت بفتور :
-سيبك منهم ، دول شلة بايخة أصلاً ، وأنا مش بأطيقهم

ضيقنت نشوى عينيها ، وأردفت محذرة بـ :

-بس لو هما حطوكي في دماغهم مش هتخلصي منهم

-أووف بقى ، أنا زهقت

-يا روني أنا خايفة عليكي

-إنسيهم ، وخلينا نشوف هانشرب ايه

لوت نشوى شفتيها في عدم إقتناع ، ونظرت إلى قائمة
المشروبات وقالت بفتور :

-ماشى

.....

بداخل إحدى سيارات الأجرة ،،،

نظرت عاليا إلى صورتها المنعكسة على الكاميرا لتتأكد من
هيئتها المرتبة ، ثم حولت بصرها ناحية السائق وطلبت منه
بتلهف :

-بسرعة يا أسطى الله يكرمك ، لأحسن أنا متأخرة أوي

نظر لها السائق من طرف عينه عبر المرآة الأمامية ،
وأجابها بصوت أجش بـ :

-ما إنتي شايفة يا مدام السكة عاملة إزاي

رمقته هي بنظرات محتقنة قبل أن تتابع بغیظ ب :

-مدام !!!!!

تجاهلها السائق عن عمد وسلط بصره على الطريق ،
فغمغت هي بخفوت لنفسها ب :

-سواقين آخر زمن ، أَل مدام أَل...!

.....

بداخل سيارة رامي عليه ،،،،،

أمسك رامي بالمقود بيد واحدة ، وباليد الأخرى حاول
تشغيل المسجل الموجود على (تابلوه) السيارة
في حين كان آياز مشغول بإرسال رسائل نصية إلى والدته
بالخارج ، ثم نطق ب :

-رامي حبيبي ، معلى نزلني عند بنك (.....) عاوز
أسحب فلوس بالفيزا

-ماشي ، بس حاول تتجز عشان أنا كده هتأخر على الـ (Race) ، وإنت عارفني مواعيدي (شارب) Sharp

ابتسم له آياز نصف إبتسامة ، وأضاف مازحاً :
-ماشي يا عم شارب ، أوقف هنا ، في ركنة أهي
-أوكي

وبالفعل صف رامي سيارته بالقرب من أحد البنوك ،
وترجل آياز منها ، وإتجه لماكينة الصراف الآلي ...

ظل رامي يطرق بأصابعه على المقود وهو يوزع بصره ما
بين الطريق وبين ابن خالته ..

عاد آياز بعد لحظات ووجهه شبه منزعج ، وأطل برأسه
من نافذة السيارة وأردف بـ :

-رامي معلش روح إنت السباق بتاعك لأن الظاهر في مشكلة
في كارت الفيزا ، وأنا كده هأخرك معايا

نظر له رامي بإستغراب وهو يرفع أحد حاجبيه ، وتساءل
بجدية بـ :

-مشكلة إيه دي ؟

زفر آياز في ضيق ، ثم أجابه بـ :

-بيقولي العملية لا تصلح ، error ، وكلام من النوع ده
-ممممم

-فأنا داخل خدمة العملاء جوا ، هاشوف هأعمل ايه معاهم

إزداد إنعقاد ما بين حاجبيه ، وأضاف بثقة :

-بس اللي أعرفه إن البنك مش شغال بالليل

-لأ شغال ، موظف الـ Security قالي إن موظفين خدمة
العملاء موجودين

-ماشي براحتك

زم آياز شفتيه للأمام ، وقال بنبرة آسفة :

-سوري رامي ، كنت حابب أبقى معاك

-ولا يهملك يا معلم ، تتعوض إن شاء الله

-لو خلصت بدري هاجيلك

-ماتشغلش بالك إنت بيا ، خلص اللي وراك وطمني

ابتسم له آياز بامتنان ، ولوح له بيده قائلاً :

-تمام .. باي يا رامي

-سلام يا برنس

قالها رامي وهو يدير محرك السيارة ليبدأ التحرك بعيداً عن
ابن خالته ...

كان الزحام شديداً ، فلجأ هو إلى طريق جانبي مختصر
ليصل إلى وجهته دون أي تأخير ...

.....

بداخل سيارة الأجرة،،،،

قاد السائق بسرعة عالية على أحد الطرق الفرعية
والخالية كي يتمكن من إيصال زبونه إلى وجهتها في
الميعاد المناسب ...

ولكنه أثناء قيادته لها شعر بأن محركها به خطب ما ، فهو
يصدر زمجرة غريبة ، ولمح بودار دخان أبيض ينبعث من
أسفل الغطاء الأمامي ، فأوقف السيارة بجوار أحد الأرصفة
، فانتبهت عالياً لما يحدث ، وضيق عينيها في حيرة ، ثم
تسائلت باستغراب بـ :

-إنت وقفت ليه يا أسطى ؟

-ثواني كده يا مُدام ، العربية باين فيها حاجة

-يعني هتتأخر ؟

-أشوف بس الكابوت الأول ، وبعدين نتكلم

زمت هي شفتيها ، وقالت على مضض :

-ماشي .. أديني مستتية

ترجل السائق من السيارة ، وإتجه ناحية غطاءها ليكشف
عن المحرك ، بينما أخرجت عاليا المرأة الصغيرة من
حقيبتها ، وأخذت تعدل من وضعية الكحل بعينيها الواسعتين

..

تمتم السائق بكلمات غاضبة ، ووضع يده على رأسه وحكها
بقوة ، وظل ينظر حوله بريية ، ثم سار في اتجاه الباب
الخلفي ، ومال للأمام بجذعه ، وأسند كف يده على النافذة
الخلفية ، وأردف بنبرة منزعجة بـ :

-معلش بقى يا مدام ، حاولي تشوفي تاكسي تاني لأحسن
العربية خربت

لوت عاليا ثغرها ، ونظرت إليه بإندهاش وهي تتسائل
بضيق بـ :

-ايه ؟ تاكسي تاني ؟ ليه ؟؟ في ايه اللي حصل ؟؟؟

هرش السائق في رأسه ، ونظر إلى الجانب ، وتذمر قائلاً :
-الماتور سخن وباين عليها ليلة غبرة

لوحث عاليا بيدها ثم أضافت بإصرار :
-طب وأنا ذنبي ايه ، وصلني الأول وبعدين شوف اللي حصل
لعربيتك

حدجها السائق بنظرات مغلظة قبل أن يصيح منفعلًا :
-يا مدام بأقولك الماتور متتيل على عينه ، والعربية مش
هاتدور في سنتها ، وإنتي تقوليلي أوصلك
-الله مش أنا دفعالك فلوس ، ولا راكبة ببلاش

إكفهر وجه السائق أكثر ، ورمقها بنظرات شرسة قبل أن
ينفعل وهو يشير بيده بـ :
-يا ستي خدي فلوسك ، العربية بركت قدامك أهي

أخفضت عاليا رأسها ، وحدثت نفسها بخفوت وهي تضع
حقيبتها على كتفها بـ :

-يادي القرف ، هو أنا ناقصة عطلة

ثم فتحت باب السيارة ، وترجلت هي الأخرى منها ، ورفعت
ذيل فستانها الذي إلتف حول كعب حذاءها ، وسارت بضعة
خطوات على جانب الطريق باحثة عن سيارة أجرة

ولكن كان الطريق أمامها شبه خالي من السيارات - سواء
الملاكي أو الأجرة - فجابت ببصرها المكان ، وقالت متبرمة
:

-ده الشارع (خرمز) ((مظلم)) على الآخر ، هلاقي مين
بس اللي هايبرني السعادي

.....

في نفس التوقيت مر رامي بسيارته في ذلك الطريق
الفرعي ، ولمح إحدى الفتيات من على بعد - وذلك
بسبب إنعكاس الإضاءة على فصوص فستانها اللامع - وهي
تحاول الإشارة بذراعها لسيارة أجرة ، ولكن ما من مجيب
لها ..

فلم يكثرث بها ، وحدث نفسه بـ :

-ده مين الأهبل اللي هايقف لواحدة في الشارع المقطوع ده

ثم مر على مقربة منها ، وتعمد تشغيل إضاءة مصابيح
السيارة الأمامية في وجهها ، فغطت عينيها كي تتجنب
الإضاءة الشديدة ، وهدرت هي بصوت مرتفع ب :
-خلاص يا عم إنت ، أنا إتعميت ، كانت نقصاك إنت كمان

ساورت الشكوك رامي حول ماهية ذلك الصوت المألوف
بالنسبة له ، فأمعن النظر في ملامحها من المرآة الأمامية ،
وصاح مشدوهاً ب :

-مش معقول ، إنتي برضوه

!!

.....

الفصل الثاني عشر:

لم يصدق رامي عينيه حينما رأى تلك الشابة – الدائم الصدام
معها – تقف على جانب الطريق وتشير لسيارة الأجرة ..

أوقف هو سيارته ، وإلتفت برأسه للخلف ليتأكد من صحة ما
راه ، وبالفعل كانت هي بعنجهيتها وكبريائها الزائد تقف
مستقيمة الجسد ، وتهز إحدى ساقيها بعصبية ، وعاقدة
لساعديها أمام صدرها .. ويتدلى من كتفها حقيبتها الصغيرة
.. وعلى بعد عدة أمتار منها ، كانت هناك سيارة أجرة ،
مفتوحة الغطاء الأمامي ، ومنحني عليها سائقها ..

أدار هو محرك السيارة ، ثم عاود أدراجه بها للخلف إلى أن
وقف بجوار عاليا ، ورسم على وجهه إبتسامة بلهاء ، ثم
أنزل زجاج النافذة الأمامية ، ونظر لها متفحصاً إياها ،
وأردف ب :

-إمتى ربنا يتوب علينا من لسانك ده

إرتسمت علامات الدهشة على قسماات وجهها ، وضيق
عينيها لتتنظر إلى ذاك الغريب الذي يحدثها بوقاحة ، وفغرت
ثغرها في ذهول حينما عرفته على الفور ..

استمر رامي في الإبتسام لها ، وتابع بسخرية ب :

-إبقي قابليني لو حد عبرك

إحتقن وجهها سريعاً بالدماء الغاضبة ، وإزدادت حمرة
وجنيها ، وصرت على أسنانها وهي ترد عليه بإنفعال ب :

-وانت مالك إنت ؟ حد طلب منك حاجة

ثم أشاحت بيدها في الهواء وهي تنذره بعصبية بـ :

-واتفضل بقى من هنا بدل ما أطول لساني أكثر عليك

-يعني أنا غلطان إني وقفنك أشوف مالك !؟

حدجته هي بنظراتها الحادة ، وهي تجيبه بصرامة بـ :

-ميخصكش

-تصدقني بالله ، أحسن حاجة إن الواحد يسيبك في الشارع

المقطوع ده لوحدك ، سلام

لوت هي شفتيها في عدم إكتراث ، وأجابته بنزق بـ :

-يالاً بالسلامة

إغتاظ رامي من ردها الفظ عليه ، فأدار محرك سيارته ،

وتحرك بها مبتعداً عدة أمتار للأمام ، ولكنه شعر بتأنيب

الضمير ، وبالحيرة في أمره ، فهو عادة لا يتصرف بمثل

تلك الطريقة مع أي فتاة ، ولكن الحال مع تلك الشابة

مختلف تماماً ...

زفر هو في ضيق ، وحدث نفسه بعتاب بـ :

-حتى لو هي متتيلة على عين اللي جابوها ، مايصحش
برضوه أسيبها في الحتة دي ، افرض حد طلع عليها ولا
حصلها حاجة ، اشيل أنا ذنبها

.....

كانت عاليا عابسة الوجه وهي تتابع إبتعاد رامي عنها ،
فزمت شفيتها في ضيق ، وحدثت نفسها بنرفزة بـ :
-إنسان بارد معندوش دم ، جاي بس عشان يتريق عليا
ويخرجني عن شعوري .. اليوم قفل بوشه الصراحة !!!

أدارت رأسها للجانبين من أجل متابعة حركة سير السيارات
، ولكن كان الطريق شبه خالي من المارة وكذلك من
سيارات الأجرة .. فتنهدت في إرهاق ، وتابعت بحنق بـ :
-أعودو بالله ، مافيش بني آدم يوحد ربنا هنا

.....

تراجع رامي بالسيارة للخلف ، وأوقفها على مقربة من عاليا
، ثم حدثها بصوت جاف بـ :
-تعالى إركبي

زفرت هي بصوت مرتفع ، وأشاحت بوجهها بعيداً عنه ،
فضرب هو على بوق السيارة لتنتبه له ، وأعاد تكرار
جملته الأخيرة بصرامة ، فرمقته هي بنظرات جادة قبل أن
تصيح بحزم :

-في ايه ؟ ما تمشي بقى ، هو إنت إبييييه لازقة ...!
-يا ستي لا لازقة ولا غيره ، أنا بس هاطلعك على أول
الشارع وبعد كده إنزلي

زمت شفتيها أكثر ، وقطبت جبينها ، وإستدارت برأسها
لجانب الطريق ، ونطقت بجدية بـ :
-متشكرة ، مش عاوزة منك حاجة

تتهدت رامي في إنهاك ، وأخفض رأسه في يأس ، ثم حدث
نفسه بخفوت بـ :

-باين عليها مش هاتجيبها لبر ، دماغها ناشفة طحن

أخذ هو نفساً مطولاً ، وزفره على مهل ، وقال بهدوء حذر
:

-ماينفمش تقفي في الحتة المقطوعة دي لوحدك

-والله ده شيء يخصني

قالتها عاليا بحدة وهي تسير مبتعدة للخلف ، ولكنها تعثرت
في ذيل فستانها ، فالتفت ساقها على بعضها البعض ،
وسقطت على وجهها وهي تحاول السير ..

-آآآآه

إندفع رامي خارج سيارته حينما رآها تسقط ، وركض في
اتجاهها ..

كانت هي مستندة بكفيها على الأرضية الإسفلتية ، وتحاول
حل ذيل الفستان من كعب الحذاء ، فمد يده ناحيتها
ليساعدها ، ولكنها إنتفضت فزعة منه ، وأشارت بكفها في
وجهه ، ونهرته بحدة وهي تنظر له بحنق بـ :

-إياك تلمسني ، هاصوت وألم عليك الناس

-ألمسك ايه بس ، ده أنا جاي أساعدك بس ، مافيش في
غرضي حاجة

لم تهتم هي بما قاله ، بل أضافت بنفس النبرة الحانقة :

-كلكم ما بتصدقوا ، فرصة وتستغلوها

إستشاط هو غيظاً ، ولوح بذراعيه في الهواء أمامها ،
وأردف بنبرة منزعة بـ :

-يا شيخة حرام عليكى ، أنا كل ما أنوي خير معاكى تقلى
على طول

تمكنت عاليا من النهوض ، وضربت كفيها ببعضهما البعض
لتنظفهما ، ثم إنحنى للأمام بجسدها لتنفذ عن فستانها
الغبار العالق به ، وقالت له بإندفاع :

-عشان الرجالة اللي زيك كدابين

-استغفر الله العظيم ، برضوه بتغلطى فىا ، وأنا ساكتك أهوو

نظرت هي له بنظرات غير مبالية ، وقالت بتحدي :

-ولا تقدر تعمل حاجة

أخذ هو نفساً عميقاً ، ونفخه بضيق جلى ، ثم صر على
أسنانه وهو يخبرها بسخط بـ :

-لا هاعمل ولا أنيل ، تعالى أوصلك على أول الشارع وبعد
كده انتى من سكة وأنا من سكة

وضعت هي يدها في منتصف خصرها ، ونظرت له شزراً
وهي تلوي فمها ثم هتفت بغلظة :

-ليه إن شاء الله ؟؟؟

حدثها رامي بإستياء وهو يضرب كفيه ببعضهما البعض بـ :

-طب قوليلي أتصرف إزاي بالطريقة اللي ترضيكي ، أنا
جالي إحباط من أسلوبك ده

زفرت هي لأكثر من مرة ، ووضعت إصبعيها على طرف
ذقنها لتفكر فيما قاله لها..

بينما راقبها هو بنظرات متفرسة دراسة كل تفصييلة فيها ..
وحدث نفسه بخفوت شديد بـ :

-معرفةش إيه اللي فيكي غريب عن بقية البنات العدلة !!

أدارت عاليا رأسها في اتجاهه ، ولاحظت تلك النظرات
الغريبة التي رمقها بها ، ففتححت بصوت قوي ، وحدثته
بنظرات محذرة ، ثم قالت بصوت جاد وهي تشير بيدها
أمام وجهه :

-إيبييه ، عينك !

إبتسم هو لها إبتسامة سخيقة ، وأخفض عينيه عنها ، وقال
بصوت خشن :

-إحم ، سوري .. ها قولتي إيه ؟

نفخت هي في ضيق ، ثم قالت بإستسلام :
-ماشي ، أنا موافقة

تتهد هو بصوت مسموع في إرتياح ، ثم أردف متحمساً بـ
:

-أخيراً .. الحمد لله يا رب

أشارت هي بإصبعها محذرة قبل أن تتحرك في اتجاه
السيارة بـ:

-بس تقعد محترم ، مش عاوزة قلة أدب

رمقها هو بنظرات مستغربة ، وقال مازحاً وهو يضع كفيه
على بطنه :

-يا ستي هاربط الحزام وأشده أوي على بطني ..!

لوت هي ثغرها للجانب في إستهزاء منه ، ثم أردفت ساخرة
وهي ترمقه بنظرات جامدة ب :

-هه .. خفة !!!

تحرك كلاهما في إتجاه السيارة ، وأسرع رامي بالإمساك
بالمقبض ليفتح لها الباب ، فنظرت هي له بنظرات مستفزة ،
فبادلها هو النظرات الدافئة ، وأشار لها بعينه وهو يتابع ب :

-اتفضلي يا ست الكل !!

-طب بص على أدك !

قالتها عاليا محذرة بشراسة وهي تركب السيارة وتجمع ذيل
فستانها للداخل ..

أغلق رامي الباب خلفها ، ثم نطق متهكماً بخفوت ب :
-أبص على أدي .. لا إله إلا الله ، أنا ماشوفتش كده في
حياتي ... !

.....

بالقرب من الكافيه ،،،

خرجت رانيا وبصحبته نشوى من الكافيه بعد أن إنتهيتا من تناول المشروبات بداخله ، ولكن تسمرت الأولى في مكانها ، وأسرعت بأمسأك نشوى من مرفقها، وأردفت بتلهف ب :

-إستني يا نوشا ...!

إرتسمت علامات الحيرة على وجه نشوى ، ونظرت إليها بتعجب ، ورفعت حاجبيها في استغراب ، ثم تسألت بجدية مفرطة ب :

-في ايه يا رانيا ؟ خضتيني

أشارت رانيا بعينيها إلى مكان ما وهي تقول بحماس جلي :

-بصي هناك كده ، شايفة اللي أنا شايفاه

-أنا مش شايفة حاجة

عضت رانيا على شفتيها من الغيظ ، ونظرت إلى رفيقتها بسخط ، وأردفت بصوت شبه منفعل ب :

-يا بنتي إنتي اتعميتي ، مش ده آياز

جابت نشوى ببصرها المكان ، وحاولت أن تبحث عنه
وهي تنطق بجموح ب :
-آياز !! فينه ؟

أشارت لها رانيا برأسها حيث يتواجد ، وتشدقت ب :
-هناك أهوو

نظرت نشوى حولها بحيرة ، وأردفت يائسة ب :
-أنا مش شايفة حاجة

أمسكت رانيا برأس رفيقتها ، ووجهتها حيث تنظر ، ثم قالت
بحسم :
-يا بت قدامك أهوو ، قاعد جوا البنك

حدقت نشوى في آياز الذي كان ممسكاً بمجلة ما بيده ، ثم
هتفت بنبرة والهة ب :
-آآه صحيح

صمتت كلتاهما للحظات لتراقبا إياه ، ثم إلتفتت نشوى برأسها نحو رانيا ، ونظرت إليها بتمعن ، وقالت بنبرة ماكرة :
-يخربيتك عينيكي ، انتي عرفتي تشوفيه إزاي ؟

حدجتها رانيا بنظرات محتقنة ، ثم سلطت عينيها على آياز ، وقالت بسخط :
-الله أكبر عليك

ثم ضيقت عينيها أكثر لتتبعث منهما نظرات لئيمة ،
وأضافت بمكر ووعد :
-هو أنا هاسيبه يفلت من إيدي ، ده أنا وراه والزمن طويل
!!!

.....

الفصل الثالث عشر:

هبّت نسمة صيف هادئة لتلفح وجنتي رانيا التي سريعاً ما
إتهبتا لتحمسها لرؤية آياز .. وتبدلت ملامح وجهها
للإشراق والتفاؤل ، وبدأت خيالات وردية تراودها عن حفل
خطبة قريب ، وإرتداء خاتم مميز في إصبع يدها الأيمن ،
فأطلقت تنهيدات حارة و خافته ...

في حين نظرت نشوى إليها بإستغراب شديد ، ورفعت
حاجبها للأعلى ، واستمرت في رمقها بتلك النظرات
المطولة والمتعجبة ، ثم زمت شفيتها للأمام وهتفت بجدية
:-

-طب يالا بينا لأحسن الوقت إتاخر

نظرت رانيا إليها خافضة بصرها قليلاً ، ثم إرتسم على
وجهها تعابير مغترة وواثقة قبل أن تجيبها ببرود مصطنع بـ
:

-مش قبل ما أسلم عليه واعرفه إن أنا شوفته

هزت نشوى رأسها رافضة ما قالتة رفيقتها ، ثم إندفعت
قائلة بتخوف :

-يا بنتي إنتي مش ناوية تجيبها لبر

لوت شفيتها في كبرياء ، وأردفت بجموح :

-لأيا نوشا... مع المزه لأ طبعاً

ثم تحركت بكل ثقة في اتجاه البنك القابع على الطريق المقابل ، وحاولت نشوى أن تلحق بها وهي تهتف عالياً ب :
-يا مجنونة استني ، يالهوي عليكى ، هتودينا في داهية

لم تهتم رانيا بهاتفات نشوى لها ، فعقلها قد أملى عليها ما ستفعله ، وبالفعل أخذت نفساً طويلاً ، وزفرته في غرور زائد ، ثم حدثت نفسها بنبرة واثقة للغاية ب :

-ولو حتى مليون داهية ، مش هاسيبه يفلت من إيدي ، ده لقطه

نظرت إلى جانبي الطريق وهي تعبره بخطواتها الراكضة ، ولم تعبأ بأبواق السيارات ولا بصيحات قائديها المتذمرين ، ولا حتى بنعتها بالغباء والحمق .. بل إستمرت في إختراق الشارع بإصرار .. ثم توقفت لتلتقط أنفاسها على مقربة من بوابة البنك ..

لحقت بها نشوى التي بدت علامات الذعر جلية على وجهها ، ثم توقفت هي الأخرى إلى جوارها ، وأسندت كف يدها على ظهرها ، وقالت بصوت متقطع :

-منك لله يا شيخه ، قطعتي نفسي ، وخليتنا ملطشة لكل
السواقين

اعتدلت رانيا في وقفها بعد أن كانت منحنية للأمام ، ثم
أردفت بعزم واضح ب :
-أوووف .. مش مهم !

راقبت هي إيماءاتها ، وحاولت أن تستشف ما الذي تريد
فعله ، ولكن لم يزد هذا إلا من حيرتها ، فقد كانت نظرات
رانيا تشير إلى عقدها النية على فعل أمر ما ، فابتلعت نشوى
ريقها في توتر ، وتساءلت بتوجس ب :
-ناوية تعملي فينا إيه بعد كده ؟

ظهر شبح إبتسامة مراوغة من بين أسنان رانيا ، وأردفت
بهدهوء يسبق العاصفة ب :
-إصبري بس أما المز يخرج من جوا ، وبعد كده هاشوف
هاعمل إيه

هنا أدركت نشوى خطورة الموقف الذي سيتوجب عليها
مواجهته ، فنظرت حولها بنظرات زائغة ، ثم أضافت بخفوت
حرج :

-ربنا يستر وماتفضحيناش

.....

بداخل سيارة رامي ،،،

أمسك رامي بالمقود بيد واحدة ، وباليد الأخرى ظل يعبث في مشغل الموسيقى محاولاً إنتقاء (أغنية) مناسبة ، وفي نفس الوقت كان يختلس النظرات إلى عاليا المنكمشة في مقعدها المجاور له ..

ظهر طيف إبتسامة عذبة ومغتررة من بين أسنانه ، ثم أخذ يصفر بخفوت بلحن شهير ، ويدندن بكلمات غير واضحة ..

كانت عاليا تحاول النظر إليه من طرف عينها – بالرغم من تسليطها النظر لجانب الطريق البارز من نافذتها المجاورة – فالفضول يقتلها لمعرفة ما الذي يفعله ..

ظلت تفرك أصابع يدها المتشعبة بحقيبتها في توتر واضح .. وكانت بين الحين والآخر تتنحج بصوت خافض محاولاً بل حلقها الذي جف تماماً من الإرتباك ..

لقد خالفت عالياً أحد أهم مبادئها ، وهي الوثوق بشخص لا تعرفه جيداً ، وإستقلالها لسيارته دون وعي كاف لمدى خطورة هذا ..

حاولت أن تجد لنفسها المبررات الكافية لتتقنع نفسها بأن ما فعلته كان بدافع الضرورة وليس تنازلاً عن مبادئها ..

لاحظت رامي حالة الشرود المصحوبة بالجمود الظاهرة عليها ، فقرر أن يذيب حاجز الثلج بينهما ، وتحدث بحماس زائد بـ :

-شككك إندمجتي مع الـ View (المنظر)

لم تلفت هي إليه ، فرمقها بنظرات إستغراب من عينيه العسليتين ، ثم وضع إصبعيه على طرف ذقنه ، وسأل نفسه بخفوت يحمل التعجب بـ:

-هي طارشة ولا إيه ؟ أعلي صوتي شوية يمكن تسمع

وبالفعل تتحنح بصوت خشن ، ثم قال بنبرة مرتفعة :

-إندمجتي مع الفيو

إلتفتت هي برأسها ناحيته ، وحدجته بنظرات قوية ، ثم هتفت بعصبية وهي تلوح بيدها :
-إيييييه ، في ايه ، بتزقق كده ليه ؟

نظر هو لها بذهول قبل أن يجيبها بحرج بـ :

-إحم .. آآ... افكرتك مش سمعاني

عقدت هي ساعديها أمام صدرها ، وظلت تنظر إليه تلك النظرات القوية ، ثم تابعت بنبرة جادة بـ :

-لأ أنا بأسمع كويس

ثم صمتت للحظة قبل أن تكمل بنبرة تحمل السخط الواضح :

-ومش طارشة على فكرة

تتحنج رامي في حرج ، ثم رسم إبتسامة بلهاء على ثغره ،

وغمز لها وهو يحدثها بتحمس بـ :

-الله ! ما إنتي حلوة أهوو ومركزة !

أشارت هي له بإصبعها محذرة وهي تنطق بصرامة بـ :

-يا ريت تركز إنت كمان في السكة اللي قدامك لأحسن أنا
جبت أخري وعاوزه أنزل

مط هو شفتيه في إنزعاج ، وحاد ببصره بعيداً عنها
ليتنجب تلك النظرات البراقة التي تصيبه بشيء لا يفهمه ،
ثم حدث نفسه بنبرة خافتة للغاية بـ :
لو مكنش خُلقك ضيق بس ، كان زمان ربنا عدلهاك

رمقته عاليا بنظرات حادة ، فكلماته الهامسة تلك تثير حنقها
، فهي واثقة بأنه يتعمد السخرية منها كعادته ، لذا سألته
بوجه عابس بـ :

-بتقول ايه سمعني كده ؟

-لا مافيش !

قالها رامي بصرامة زائفة وهو يبتسم لها إبتسامة سخيفة ،
فإزداد غيظها ، ونفخت أمامه .. ولكنه ظل صامت ، يرمقها
تلك النظرات المتفحصة لإيماءاتها وحركاتها العجيبة..

ثم رن هاتفه المحمول ، فمد يده ليلتقطه من على التابلوه ،
ومن ثم ضغط على زر الإيجاب ووضع الهاتف على أذنه ،
وتحدث بهدوء بـ :

-باشا ! إزيك .. ممم .. أها .. كله تمام

ثم تابع حديثه على الهاتف بكلمات موجزة إلى أن أكمل بـ :
-تمام ، تمام ، والله ما إتأخرت ، دي بس ظروف كده

هز هو رأسه عدة مرات ، ثم هتف بجدية بـ :
-ماشي .. ماشي ، أنا جاي على طول

في نفس التوقيت كانت عاليا تنظر إليه – وهي مقطبة
الجبين – بحيرة ، وإزداد توترها المشحون حينما أدركت
نيته بالذهاب إلى مكان ما ، فتوجست خيفة ، وأثير في
نفسها عدة تساؤلات ، وكان عاصفة هوجاء قد هبت في
رأسها تواءً :

-هو في ايه ؟ جاي فين أصلاً ؟ يكونش بيعمل نمرة عليا ؟
أووف ! ده أنا كده أبقى وقعت في مصيبة ومحدثش سمي
عليا ، طب أتصرف إزاي لو كان ناوي آآآ.. للألأ .. مش
معقول ، يا ربي ، إيه الهبل اللي أنا عملته ده !!!

أفاقت عاليا من شرودها على صوته وهو يهتف بـ :
-خلاص ماشي .. استتوني أنا جاي أهوو ، يالا سلام

أنهى رامي المكالمة ، ثم أسند هاتفه إلى جوار ناقل الحركة الخاص بالسيارة ، في حين إرجعت عاليًا ظهرها للخلف بعد أن جلست للجانب قليلاً ، وحدثت فيه بنظرات ضيقة ، وسألته بجدية بالغة بـ :

-مش إنت قولت هتوصلني لأول الشارع ؟

أدار هو رأسه للجانب قليلاً لينظر لها بنظرات عادية ، ثم أردف بدبلوماسية واضحة بـ :

-أيوه ، وأنا عند كلامي ، بس أنا اتأخرت على أصحابي و...

قاطعته هي بنبرة محتدة ومرتفعة وهي تشير بكف يدها أمام وجهه بـ :

-يعني انت كنت بتستغفني ؟

بالرغم من شكوكها حول نوايه إلا أنها صرحت بما يجيش في صدرها دون تردد

لوى رامي فمه في إستنكار صريح ، ثم أجابها بصوت شبه مصدوم بـ :

-اييه ، أستغفك؟؟

وظل يوزع أنظاره المنزعجة بينها وبين الطريق محاولاً فهم الدافع الذي جعلها تتفوه بمثل تلك الحماقات ..

لم تهتم هي بنظراته المتسائلة لها ، بل أومات برأسها بقوة ، وهتفت بقسوة جلية ب :

-أيوه ، كون إنك تقول لأصحابك إنك جاي قبل ما توديني الحتة اللي عاوزاها يبقى انت كداب وبتشتغلني

اتسعت عيناه في إندهاش غير مسبوق ، ثم سريعاً ما رمقها بنظرات إستهجان ، وحاول أن يسيطر على إنفعالاته ، فكور قبضتيه على مقود السيارة ، وصر على أسنانه وهو يهتف بنبرة حانقة :

-قولتلك أنا مش كداب ولا بأشتغلك

لم تمهله الفرصة لتبرير موقفه ، بل إندفعت صارخة فيه بجنون غير معهود ب :

-لأ كداب ، ومليون كداب ، طول عمر صنف الرجالة كده ، اللي تديهم بالجزمة يحفوا وراها ويريلوا عليها ، واللي تعبرهم ما يصدقوا يتمردوا عليها ، ويشتغلوها

نظر هو إليها مشدوهاً بكلماتها اللاذعة ، ثم رد بانفعال غير مسبق له :

-اييييه يا بنتي الكلام ده كله ، ده إنتي تخلي الواحد يندم فعلاً إنه يعمل معروف معاكي !

رمقته بنظرات إزدراء جعلته يستشاط غضباً من أسلوبها الفظ معه ، ثم تابعت بوقاحة ب :
-محدث جبرك على ده

ضرب هو بكف يده على المقود فألمه ، ورغم هذا هتف بشراسة وهو يحدجها بنظرات متوعدة ب:
-تصدقي ، أنا كنت ناوي أكمل معروف معاكي للأخر ، بس الصراحة بقى أنا ناوي أعمل معاكي السليمة

مع آخر كلمة نطقها ، تسالت قشعيرة إلى خلايا جسدها ، فأصابتها بارتجافة خفيفة ، وضغطت على حقيبتها المسنودة على حجرها بأصابعها المرتعشة ، وسألته بتوتر شبه ملحوظ :

-أفندم؟؟ قصدك ايه ؟

نظر رامي لها بقسوة ، ثم أجابها بنبرة شرسة وهو
يضغط على شفثيه ، ناظراً مباشرة في عينيها بعينيه
المحتقتين بـ :
-هتعر في يا عاليا

ثم ضغط بقوة على دواسة البنزين لتتطلق السيارة بسرعة
قصوى ، و.....!!!

.....

الفصل الرابع عشر:

تسمرت رانيا أمام واجهة البنك الزجاجية منتظرة خروج
أياز من الداخل ..
لم تهتم لتذمرات نشوى الواقفة بجوارها ، فتفكيرها منصب
حالياً على ذلك الوسيم الذي حاز على تفكيرها ..
فمنذ وطأت قدماه مبنى رياض الأطفال ، وهي تسعى للفت
إنتباهه ، ولكنه للأسف لم يعاملها إلا بفضافة ..

ولكنها عقدت العزم على ألا تستسلم .. فمهما فعل معها أو مع غيرها ، فهي من سيظفر به في النهاية ..

شعرت نشوى بالضجر من وقوفها على قدميها لأكثر من نصف ساعة ، فتشددت قائلة :

-يا بنتي إرحمني بقي ، ويالا بينا نروح البيت ، أنا رجلي وجعتني من الوقفة

زمت رانيا شفتيها للجانب ، ورفعت حاجبها للأعلى ، وهتفت على مضض بـ :

-اصبري شوية

ردت عليها رفيقتها بتذمر قائلة وهي تتفخ في ضيق:

-أصبر إيه بس ، ده شكله هيبات جوا

رمقتها رانيا بنظرات حادة ، ثم أردفت بإصرار واضح :

-إن شاء الله يقعد سنة ، أنا مش هامشي غير لما أشوفه

وأتكلم معاه !

لوت نشوى شفيتها في إنزعاج ، ورمقتها بنظرات مغلظة ،
ثم قالت بسخط :

-ده إنتي رزلة

هزت رانيا كتفها في عدم إكترات ، ثم هتفت بنبرة غير
مبالية بعد أن عقدت ساعديها أمام صدرها بـ :
-فيا كل العبر ، بس مش ماشية برضوه !!!!

زفرت نشوى في ضيق ، وتلفتت حولها وردت عليها
بضجر قائلة :

-أوف ، أما أشوف آخرتها إيه

.....

مرت عدة دقائق ، والوضع كما هو عليه .. حركة خفيفة
داخل البنك للعملاء الجالسين على مقربة من الحائط
الزجاجي ..

تسليط آياز لأنظاره على لافتة إلكترونية يظهر عليها
أرقام ترتيب العملاء ..

تحديق رانيا بذلك الوسيم ، والإبتسامة البلهاء مرسومة على
ثغرها ..

زمت نشوى شفيتها في تدمر بعد أن إزداد شعورها بالملل ،
ثم رأت لافتة لأحد محال البقالة ، فهتفت بحماس وهي تلتزم
رانيا في ساعدها :

-روني ، أنا هاروح اجيب حاجة أشربها ، أجيبك معايا ؟

هزت الأخيرة رأسها في إعتراض ، ثم هتفت بجدية :
-لا ، خليك واقفة معايا

أشارت نشوى بيدها وهي تجيبها بالحاح واضح :
-يا بنتي أنا ريقى ناشف ، هاجيب 2 سفن ، ثواني مش
هتأخر عليكى !

حاولت رانيا الإمساك بها من ذراعها ، وهي تصر على
أسنانها في ضيق بـ :
-يا نوشا استني

إنسلت نشوى من قبضة رانيا بخفة ، ثم سارت بخطوات
أقرب إلى الركض وهي تصيح بسعادة بـ :
-أنا جاية على طول

.....

بداخل سيارة رامي ،،،

تشبثت عاليا بمقعدها وهي تنظر بذعر أمامها غير مصدقة
الجنون الذي إرتكبه رامي للتو معها

لم تستطع أن تتبين ملامح الطريق بسبب تلك السرعة
المفرطة التي يقود بها سيارته ..

شعرت أنها على وشك الإغماء من شدة الرعب ، فقد ظنت
أنها قاب قوسين أو أدنى من الموت ..

عادة هي تخشى أن تشارك رفيقاتها الألعاب الخطيرة –
كالقطار السريع ، والمغسلة ، والساقية الدوارة - في
الملاهي ، حتى لا تصيبها نوبات الغثيان المصحوبة بالدوار
.. فتفسد عليهن الأجواء ..

واليوم هي تخوض ذلك الشعور ولكن رغماً عنها..

أدارت عاليا رأسها للجانب في ذعر ، وحدثت في رامي
بمقلتين متسعتين من الخوف ، ثم صرخت عالياً بـ :

-نزلنييييييي .. هاموت

نظر رامي لها بتحدي غير مكترثاً بها ، ورسم على فمه
إبتسامة قاسية ، وأكمل قيادته للسيارة بسرعه الجنونية ...

أغمضت عاليا عينيها ، وضغطت عليهما بقوة ، وأطرقت
رأسها في خوف للأسفل ، وقبضت على مقعدها بيدين
مرتجفتين وأكملت صراخها بـ :

-هاموت .. وقف العربية ، هاموت !!

إلتوى فمه بتلك الإبتسامة المستفزة ، ورمقها بإستخفاف من
زاوية عينه ، وأردف ببرود وهو يدير عجلة القيادة :
-عشان تتعلمي إزاي تحترمي غيرك !

بدأ شعور الغثيان يستحوذ على تفكير عاليا .. وشعرت
بتقلصات معدتها ، وبقرقعات قوية فيها ..

إهتز جسدها بقوة وهو يدير السيارة عكس الإتجاه ، فتملكها
إحساس الغثيان تماماً ..

أرخت عاليا قبضة يدها المجاورة لرامي ، ولكزته في ذراعه
متوسلة إياه بـ :

-وقف العربية ، هاستفرغ (تتقياً) !!!

هز رأسه نافياً ، وأجابها بعناد واضح في صوته وهو يرمقها
بنظراته المتشفية :

-لأ مش هاوقفها

إزداد اضطراب معدتها ، ولم يعد بإمكانها التحمل أكثر من
هذا ، فصاحت بصراخ :

-بأقولك وقفها بسرعة

نظر لها ببرود ، ثم أجابها بإيجاز وهو يوميء برأسه رافضاً
لطلبها :

-إنسي !

قبضت عاليا على ساعد رامي ، وغرست فيه أظافرهما ،
فحدجها بنظرات نارية ، وكان على وشك الصراخ فيها ،
ولكنه رآها تضع يدها الأخرى على فمها محاولة كتمه ..

ثم تفاجيء بها تميل برأسها عليه ، ثم تجشأت بصوت مكتوم ، وباغته بحركة لا إرادية مقرزة حيث أفرغت ما في معدتها على بنطاله :

-بؤؤؤؤؤ .. إاع .. بؤؤؤ

نظر له رامي صدوماً من فعلتها ، وصاح عالياً بإشمزاز :

-يععع

.....

أحضرت نشوى علب العصائر المعدنية ، ووقفت تلتقط أنفاسها بعد أن ركضت عائدة إلى رفيقتها التي كانت تلوي شفيتها في إنزعاج ..

مدت يدها إليها بالعلبة التي إشترتها لها .. ثم أخذت نفساً عميقاً مجدداً ، ، وزفرته على عجالة ، و سألتها بصوت لاهث وهو تحاول فتح العلبة المعدنية الخاصة بها :

-ها ، خرج ؟

مطت رانيا شفيتها وأجابتها بسخط وهي تشرأب برأسها
للأعلى :

-لألسه

وضعت نشوى علبة المشروب المعدني على فمها ،
وإرتشفت منه القليل ، ثم تجشأت وهي تنطق بـ :

-طب اشربي السفن قبل ما يسخن

نظرت لها رانيا بإشمزاز ، وهتفت بضيق :

-ماشي

أمسكت هي بعلبتها المعدنية ، وحاولت فتحها بهدوء ،
ولكنها تفاجئت بمحتوياتها تفور وتتناثر بغزارة على
ملابسها مبللة إياهم ، فشهقت في ذعر قائلة :

-يا لهوي !

نظرت لها نشوى بقلق ، وسألتها بإضطراب :

-أوبا ، في ايه ؟

نفضت رانيا يدها في الهواء محاولة إزاحة المشروب العالق
بأصابعها ، وصاحت بغضب جلي :
-عاجبك كده ، السفن كله إتكب عليا !

هزت نشوى كتفيها في عدم مبالاة ، وردت عليها بفتور :
-وأنا هاعرف منين إن العلبة هاتفور في وشك !؟

إغتاظت رانيا مما حدث ، وتلونت وجنتيها بحمرة غاضبة ،
وقالت مزمجرة :
-إنتي السبب في البهدلة دي !

نظرت لها نشوى بإستغراب ، وسألتهأ بهدوء حذر :
-أنا ؟

صرت رانيا على أسنانها وهي تجيبها بحنق :
-ايوه

ثم إنحنت بجسدها للأمام لتنظف ملابسها التي تلطخت
بالمشروب ، وإزداد حنقها أن يدها باتت لرجة .. فظلت تتمتم
بكلمات غير مفهومة ..

أكملت نشوى تناول مشروبها ، وأردفت مازحة ب :
-دلق السفن خير

نظرت لها رانيا بغل ، وصاحت فيها بنبرة محتدة ب :
-إنتي هتهزري !؟

وضعت نشوى يدها على كتف رفيقتها ، وهتفت بهدوء :
-خلاص بقي يا روني ، متحبكيهاش

فغرت رانيا شفيتها في ضيق قائلة بحنق وهي ترفع حاجبيها
للأعلى :

-يا سلام ، عاوزة المز يطلع يشوفني بالشكل ده !!!؟

ألقت نشوى بالعلبة الفارغة بجوار الرصيف ، ثم أمسكت
بحقيبتها ، ودست فيها يدها ، وقالت بجدية :

-طب اهدي بس عليا ، أنا هساعدك ، ثواني أطلع ال
Wipes (مناديل مبللة) من الشنطة !

في نفس التوقيت خرج آياز من البنك وهو يتهد في
إرهاق ، ثم توقف في مكانه ليضع كارت الفيزا الخاص به
بداخل حافظة نقوده ، ولم ينتبه لوجود تلك الفتاتين ..
حدث نفسه بخفوت بعد أن نفخ في إنزعاج :

Finally- (أخيراً)

ثم أولاهما ظهره ، ودس محفظته في جيب بنطاله الخلفي ،
وتحرك في الإتجاه العكسي بخطوات شبه سريعة
نظر آياز إلى التوقيت في شاشه هاتفه النقال ، وتابع
بتوتر :

-أوبس ، أنا إتأخرت جداً ، يدوب ألحق أروح لرامي !

.....

أوقف رامي سيارته مضطراً على قارعة الطريق ، وترجل منها مسرعاً وهو يشعر بالإشمئزاز والتقزز من حاله ، فقد أفرغت عاليًا ما في معدتها على بنطاله ..

ظل يصيح بإنفعال جلي ، وأطلق سباباً رهيباً وهو محني للأمام محاولاً تنظيف بنطاله بالمناشف الورقية ..

في حين أرجعت عاليًا ظهرها للخلف ، ونظرت له بنظرات متشفية ، وإعتلى ثغرها إبتسامة شيطانية وهي تمسح بمنشفة ورقية شفيتها ، ثم حدثت نفسها بنبرة خافتة تحمل الشماتة في طياتها :

-أحسن ، تستاهل اللي حصلك

حاولت أن تخفي إبتسامتها العابثة حتى لا تثير إنفعاله ، خاصة وأنه كان مهتاجاً بطريقة مقلقة ..

ألقت بالمنشفة على التابلوه ، وسحبت أخرى من العلبه ، وأكملت بخفوت :

-ما كان من الأول !

ركل رامي الأرض بقدمه ، واستشاطت عينيه غضباً وهو يركز على أسنانه محدثاً نفسه بـ :

-أنا غلطان إني ركبتها من الأول معايا ، ما كنت أسيبها تولع
في الشارع ، جبت لنفسى القرف !!!

إلتفت برأسه للخلف ليحدها تبتسم بسعادة ، فضاقت عينيه
وإزداد إحتقانها .. وتابع بغيظ :

-وربنا شكلها قاصد ، طيب يا عالييا !!!!!

عاد مجدداً للسيارة وهو مكفهر الوجه ، ومقتطب الجبين
، ووقف أمام الباب الملاصق لمقعده ، وإنحنى بجذعه
للأمام ، ثم أردف بصوت مهتاج وصارم :

-إنزلي من العربية !

هزت رأسها بالرفض وهي تجيبه بإيجاز :

-لأ-

صر على أسنانه في غل ، ووجدتها بنظرات نارية وهو
ممسك بباب سيارته :

-بأقولك إنزلي !

أسندت عاليا رأسها للخلف ، ووضعت راسها على جبينها
لتضغط عليه ، ثم ردت عليه بخفوت :

-مش قادرة

صاح فيها رامي بانفعال وهو يلوح بيده في وجهها :
-إنتي مش كنتي هاتموتي وتنزلي ، يالا برا عربيتي وآآآ...

لم تستمع عاليا إلى ما يقوله رامي ، فقد باغتها مجدداً ذلك
الشعور المزعج بالغثيان .. فأغمضت عينيها في إستسلام ،
وأردفت بضعف :

-بأقولك بطني قالبة عليا ، وحاسة إني آآ.. ه.. هاستفرغ
تاني !

لوى رامي فمه في إشمئزاز ، ورمقها بنظرات متأففة ، ثم
صاح بفظاظة :

-الله يخربيت قرفك

فتحت عاليا عينيها عقب عبارته الوقحة ، وأنزلت ساعدها
للأسفل ، ونظرت له بإحتقار ، ثم رفعت إصبعها في وجهه
محدرة إياه بحنق ب :

-احترم نفسك لو سمحت !

حدجها بنظراته القاتلة وهو يرد عليها باهتياج قائلاً :

-هو إنتي خلتي فيها إحترام

ثم أشار إلى بنطاله بكف يده وهو يتابع بحنق بـ :

-شايقة منظري عامل إزاي ؟ إنتي كنتي واكله إيه فسيبييخ
!!!

رمقته عاليًا بنظرات إستعلاء وهي تجيبه ساخرة بـ :

-لا .. دي أحماض و عصارة صفراوية

لوى فمه للجانب وهو يرد عليها بسخط :

-والله !! كوميدي بقى وكده ، أصل أنا ناقص عصارة وقرف

أشاحت بعينيها بعيداً عنه ، وزفرت قائلة :

-أووف .. استغفر الله !

إعتدل رامي في وقفته ، وظل يتأمل هيئة بنطاله المزرية ،
وحدث نفسه بامتعاض بـ :

-أل أنا كنت ناقص قرف على آخر الليل ، هاروح الرالي
الوقتي إزاي ، لا حول ولا قوة إلا بالله ! طب هاعمل ايه
الوقتي ؟ أتصرف إزاي يعني !!!

سلط أنظاره على علياء فوجدها مستكينة في مقعدها ، فلوى
ثغره متأففاً ، وقوس أنفه بتقرز وهو يتابع قائلاً :

-أوووف ، هاضطر اخذ العربية المغسلة ينضفوها ، ما أنا
مش هاستنى أسمع تريقة من حد !!!

إزداد شعور عاليًا بالغثيان ، وسيطر مجدداً عليها ، ولكن
تلك المرة مصحوباً بدوار رهيب ..

جاهدت نفسها لتقاومه ، ولكن كم الأدرينالين المتدفق إلى
جسدها أرهاقها حقاً ، وسبب لها تلك الحالة الغير متزنة ..

مال رامي على نافذة باب سيارته المجاور للمقود ، وأمرها
بجدية بـ :

-يالاً يا حاجة !

تنهدت عاليا في إنهاك ، وقالت بصوت ضعيف :
-تعبانة

نظر لها بسخط ، وأردف متهكماً وهو يشير بكلتا يديه في
الهواء بـ :

-آه ، بدأنا ، تعبنا ودايخة ، ونفسي غامة عليا ، وجو
الحوامل ده !

لم تجبه عاليا ، وأغمضت عينيها في ضعف .. فإستشاط
غضباً ، وقال بإصرار :
-مابدهاش بقى !

دار رامي حول السيارة ووجهه متجهم للغاية ، ثم قام بفتح
الباب الملاصق لمقعدها ، وأشار لها بيده وهو يهتف بنبرة
محتدة :

-إنتي هاتسوقي فيها ، أنا جبت أخري معاكي !

نظرت له من طرف عيناها ، وردت عليه بوهن واضح في
نبرة صوتها :

-والله آآ...

قاطعها بصوته الصارم الذي يحمل التهديد وهو يرمقها
بنظرات جادة قائلاً :

-بأقولك إيه أنا مش فاضي للمناهدة ، يالا برا ، ولا تحبي
أجرجرك أنا براها ؟!!!!

نظرت له عاليا شزراً ، ولوت شفيتها في تأفف من وقاحته ،
ثم نظرت إلى حالها ، فلملمت ذيل فستانها المتبعثر ،
وأرجعت طرف حجابها للخلف ، وأمسكت بحقيبتها في يدها
، ونهضت على مهل من المقعد لتترجل من السيارة وهي
تأمرة بحنق :

-وسع !

تنحى هو جانباً ليفسح لها المجال لكي تمر ، وأخذ يراقبها
بنظرات منزعة ..

وما إن وقفت عاليا على قدميها حتى اجتاحتها دوار رهيب ،
فترنح جسدها للخلف ، وشعرت أن الأرض تميد بها ،
فأسندت رأسها بكف يدها ، وأغمضت عينيها بقوة مقاومة
إياه ..

نظر له رامي بتوجس شديد ، وقطب جبينه في قلق ، وسألها
بتوتر :
-مالك ؟

حاولت أن تجيبه بصوتها المنهك قائلة :
-أنا .. آآ..

لم تكمل هي جملتها الأخيرة حيث تراخى جسدها بالكامل
لفقدانها الوعي .. فأسرع رامي بتلقفها بين ذراعيه ، وأسند
رأسها بحذر على ذراعه ، وأحاطها جيداً بذراعه الآخر حتى
يحول دون سقوطها على الأرضية الإسفلتية ..

ثم نظر لها بنظرات مضطربة للغاية ، ومسح براحته على
وجنتها محاولاً إفاقتها ، وهو يقول لها بنبرة خائفة :
-عاليا ، عاليا !

.....

الفصل الخامس عشر:

فقدت عاليًا وعلها ، وحاوول رامي إفاقتها بعد أن أسنداها بذراعه كي لا تسقط ..

إنتابته حالة من القلق الشديد حينما رآها لا تستجيب له ، وتلفت حوله بريبة وهو يحدث نفسه بإضطراب :

-طب .. طب أتصرف إزاي الوقتي ؟

ثم إستدار برأسه نحو عاليًا ، وهتف فيها بصوت مرتبك :

-عاليًا .. عاليًا ! سمعاني؟ عاليًا

وضرب على وجنتها برفق ، فلم تستجب له .. فسحبها بحذر للخلف ، وجاهد كي لا تسقط من يده ..

ثم قام بفتح باب السيارة على مصرعيه ، وأمسك بها جيداً وهو يحاول وضعها بالداخل ، ثم أسنداها على المقعد ،

وأمال رأسها للجانب ، وإنحنى للأسفل ليعيد ضم ساقها معها ، ومن ثم عاود النظر إليها ووجهه يكسوه القلق ..

مظفمه في خوف ، ووضع يده على رأسه وحكها عدة مرات وهو يحدث نفسه قائلاً بحيرة :

-أوديها المستشفى ، ولا .. ولا آآ... أشوف برفان أفوقها بيه ، ولا أعمل ايه !

اعتدل في وقفته ، وتلفت حوله من جديد ، ثم تابع قائلاً بندم :

-ما هو أنا اللي غلطان .. مكانش لازم أسوق فيها أوي معاها

زم فمه للجانب وهو ينظر إليها ، ثم أضاف قائلاً بهمس :

-بس هي مستفزة ، وقالت كلام ينرفز .. وأدي نتيجة العصبية ! أوووف !

حركت عالياً رأسها قليلاً ، وأصدرت أنيناً مكتوماً ، فتهالت أسارير رامي وهو يراها تفيق دون أن يحتاج لأي مساعدة ، فإنحني للأسفل ، وجثي على ركبته ، وأمسك بكف يدها بين راحتيه ، وربت عليه بخفة ، ثم حدق بها ، وهو يقول بصوت رخيم :

-عاليا .. عاليا ! إنتي كويسة ؟

تأوهت هي بصوت خافت وهي ترد عليه هامسة :

-آآه .. دماغي .. آآه

ثم رفعت يدها المتحررة ، ووضعتها على جبينها ، وظلت
مغمضة العينين وهي تتابع قائلة :

-مش قادرة منها ، آآه

نظر لها بإشفاق وهو يهتف بتوتر :

-عاليا ، في ايه ؟ مال دماغك ؟ لسه دايخة ؟ طيب آآ...

فتحت عينيها فجأة ، وأبعدت يدها عن جبينها ، ثم أخفضت
رأسها نحوه ، ونظرت له بحدة ، وهي تقول بغيظ :

-إنت ؟

وقامت بسحب يدها الأخرى من بين راحتيه ، فنظر له
بإستغراب وهو يسألها بـ :

-حاسة بحاجة تانية ؟

كورت عاليا قبضة يدها ، وتراجعت في مقعدها ، وتحسست
بيدها الأخرى فستانها ، وصاحت قائلة بصوت متحشرج
وغازب :

-إنت .. إنت السبب في اللي أنا فيه ؟

ابتسم لها إبتسامة مستفزة وهو يرد عليها ب :
-كده أنا اطمنت إنك كويسة

ثم إعتدل في وقفته ، وأضاف بإرتياح :
-الحمد لله ، مكوناتش هاقدر أنام وأنا حاسس بالذنب

عبست بوجهها ، وقطبت جبينها ، ونظرت له شزراً وهي
تهتف بسخط :
-وسع كده

نظر لها بإندهاش وهو يقول بإيجاز :
-افندم !؟

هتفت بحدة وهي تشير بيدها :
-إنت مش سامع ، حاسب خليني أنزل

احتج قائلاً ، وهز رأسه رافضاً ، وهو يشير بذراعه :
-لألاًلألاً .. أنا مش هاتحمل يجراك حاجة تاني ، أنا هاوصلك
مطرح ما إنتي عاوزة

رفعت حاجبها للأعلى في إستهجان ، وقالت بإستنكار :
-والله ! ده على أساس إن أنا ينفع أروح الفرحة بالمنظر ده ؟

-طيب خلاص ، هاوديكي عند بيتك ، وآآ...

قاطعته بصوت محتد وهي تشير بيدها :

-إنت بتقول إيه ؟ بيت إيه اللي توصلني عنده ، من فضلك
حاسب ، كفاية قلة قيمة

اعتدل في وقفته ، وأردف قائلاً بهدوء حذر :

-يا ستي حقك عليا ، بس والله ما ينفع أسيبك وإنتي بالشكل
ده

قالت معترضة ، وهي تنظر له بضيق :

-وأنا مش هاقبل إن راجل غريب يوصلني

فغر فمه مشدوهاً وهو يقول :

-هاه ، نعم !

ردت عليه بنبرة منزعة ، وهي تتفقد فستانها :
-زي ما سمعت

نفخ في الهواء ، ووضع يديه على رأسه ، وفركها للحظة ،
ثم نظر إليها ، وقال بإصرار :

-ماشي ، وأنا برضوه مش هاينفع أسيبك في الحتة
المقطوعة دي لوحدك وبعد اللي حصل مني !

رمقته بنظراتها الحادة وهي تجيبه بجدية :
-أنا هاتصرف ، كفاية البهدلة اللي بهدلتها لي !

لوى رامي فمه معترضاً ، وفكر مع نفسه للحظة فيما
تقول ، فبديهاً هو من تصرف برعونة معها ، وبالتالي
ستكون تلك ردة فعلها ، ولكنه في نفس الوقت يخشى أن
تتعرض لإغماءة أخرى إن تركها بمفردها ، وخاصة أن
الوقت بات متأخراً ، والطريق شبه خالي من المارة أو
السيارات ، وربما تتعرض لمن يضايقها .. لذا عليه أن يصل
معها إلى حل سريع ومرضي ...

وضع يده على صدره ، وأردف قائلاً بصوت خافت ونظرات
أسفة :

-أنا محقوقك

زفرت في ضيق وهي تجيبه بامتعاض :

-أووف ، بعد اذنك ، اوعى

أشار بيده محاولاً إقناعها ، وقال بهدوء :

-يا عاليًا آآ....

نظرت له بصدمة وهي تنهره بحدة بـ :

-إيه ده ؟ انت خدت عليا أوي ، ايه عاليًا دي كمان !؟

رد عليها مازحاً وهو يبتسم لها قليلاً :

-خلاص .. خلاص ، يا أبلة عاليًا

إزداد اتساع حدقتيها وهي تهتف محتجة بـ :

-أبلة !

كاد أن يضحك على تعبيرات وجهها الظريفة ، فقال متلهفاً :
-يا ست الأستاذة ، كده كويس ؟

رفعت حاجبيها للأعلى ، وصاحت بقوة وثقة :
-لأ .. اسمي المعلمة عاليا

نظر لها ببلاهة وهو يقول ساخراً :
-معلمة !

ضيق عينها لترمقه بتلك النظرات المحتقنة ، وقالت
محذرة :

-بأقولك معلمة ، هاتهزر !؟

تتحنح بصوت خشن ، وهو يجيبها بهدوء :
-احم .. لأ ، خلاص المعلمة عاليا ، تمام كده ؟

هزت رأسها وهي تجيبه بخفوت :
-أها

أخذ نفساً عميقاً ، وزفره في إرتياح .. ثم حك طرف ذقنه ،
ونظر لها مطولاً متأملاً تلك القسمات الغاضبة المسيطرة
على تعبيرات وجهها ..

ولاحظ الإرهاق البادي على عينيها ، وراقبها وهي تعيد
تعديل هيئتها ..

أفاق سريعاً من شروده ، فقد ظل صامتاً لبضعة لحظات
دون أن يصغي لكلمة واحدة مما قالتها ..

فحتى لا يبدو أمامها أنه كان شارداً فيها ، فأردف قائلاً
بجدية :

-أنا عندي إقتراح ، إيه رأيك اوصلك لأقرب مكان لبيتك ، ها
مرضية ؟

ضيقت ما بين عينيها ، ومطت شفثيها للجانب وهي تجيبه :
-مممم ، توصلني ؟

تابع هو بجدية شديدة دون أن تطرف عينيه :

-واعتبريني يا ستي زي سواق أوبر ولا كريم (سيارة أجرة
(، ماشي ؟ أنا عاوز والله مصلحتك ، ومش في نيتي حاجة
!

صمتت عالياً لتفكر فيما قاله ، فربما هو محق في رغبته في إيصالها ، فهي ليست بحالة جيدة ، وتخشى أن يتعرض لها شخص ما في هذا المكان الـ " مقطوع " ، ولكنها تخشى أن يظن بها أي أحد السوء ، لذا عليها أن تكون شديدة الحذر معه ، لذا أخذت نفساً مطولاً ، وزفرته بهدوء ، ثم أجابته قائلة بتريث :

-اوكي

تنهد في إرتياح لقرارها ، ولكن قبل أن ينطق قاطعته بصوت أمر :

-بس حاسب كده

نظر لها بإستغراب وهو يسألها متوجساً :

-ليه تاني ؟

ردت عليه بتهكم وهي تنظر مباشرة في عينيه :

-أنا هاركب ورا ، مش بتقول سواق تاكسي

صر على أسنانه مغتاضاً ، وهو يجيبها بحذر ، ومشيراً بيده :

-ورا ، ماشي ! اتفضلي!

وبالفعل أفسح رامي المجال لعاليا لكي تنهض من المقعد
الأمامي ، ثم فتح لها الباب الخلفي ، فنظرت له بطرف
عينها ، وإتجهت نحو المقعد ، وجلست عليه ..

أغلق الباب بحذر .. وغمغم قائلاً مع نفسه متذمراً :

-على آخر الزمن بقيت سواق ، المفروض يبقى لقبى بعدة
كده الأسطى رامي !!!

رن هاتفه الموضوع على التابلوه ، فالتقطه وهو يعاود
الجلوس خلف عجلة القيادة ، ونظر إلى شاشته ، ثم ضغط
على زر الإيجاب قائلاً بإرهاق :

-أيوه يا آياز

سلط عينيه على المرآة الأمامية ، ثم وضع يده عليها ليعدل
من وضعيتها بحيث يتمكن من رؤية عاليا بوضوح ، وتابع
قائلاً بهدوء :

-لأ مش هاروح ، حصل ظروف ، وشوية وراجع على الفيلا
.. أها .. تمام !

التقطت عينيه عينيها وهي تنظر له في المرآة ، فالتوى فمه
بإبتسامة باهتة ، بينما أشاحت هي بوجهها ، للجانب ،
فأضاف قائلاً بنبرة عادية :

-هه .. لالا متقلقش ، حاجة لا تذكر يعني !

ضيق عينيه قليلاً ، وهو يكمل بـ :

-اوكي .. أها .. متفقين ، يالا سلام !

تابع هو حركة شفيتها المتذمرة وهي تحدث نفسها ،
فأشرقت إبتسامته ، وقال مازحاً :

-ينفع نقف عند أي بنزينة أجيب فواحة لأحسن ريحة
الترجيع ، مش قادر أقولك ، ولا في اعتراض !!؟

ردت عليه بجدية شديدة وهي تنظر نحو النافذة الجانبية :

-ماشي ، بس أوام

أردف قائلاً بصوت مازح :

-حاضر يا أبله

إستدارت برأسها نحوه ، لتتنظر له بنظرات محتقنة ، وكانت
على وشك الحديث ، فهتف مسرعاً :

-خلاص ، المُعلّمة عاليًا !

عبست بوجهها ، وهي ترد عليه بصوت صارم :
-ايوه كده

ابتسم إبتسامة هادئة وهو يسألها بجدية :
-طب على فين يا باشا ؟

أشارت بعينيها للأمام وهي تجيبه بصوت رقيق :
-اطلع على آآآ ((....))

رد عليها بنبرة جادة قائلاً :
-عُلم وينفذ يا ريس

إبتسم رامي لإبتسامتها الخفيفة التي حاولت إخفائها ، وقاد
السيارة نحو الوجهة المطلوبة ...

.....

في منزل عاليا راشد ،،،،،

أغمضت عاليا عينيها وهي تقف أسفل صنوبر الإستحمام
لترك المياه تنهمر كليا على رأسها وجسدها لتخفف من
التوتر المشحون بها ، خاصة بعد هذا الموقف الغريب مع
رامي ..

هي لم تتعمد الإلتقاء به ، ولكن كثرت الصدف معه ..
إبتسمت لنفسها وهي تتذكر كيف تقيأت عليه ، ودفنت
وجهها المبتل بين راحتها ، وحدثت نفسها قائلة بتشفي :
-هو اللي مستفز ، ويستاهل ..

ثم مسحت السائل الرغوي من على فروة رأسها ، وتابعت
بإبتسامة :
-بس حقيقي كان جنتل معايا

تهدت في إرهاق وهي تدلف خارج المغطس الصغير ،
ولفت جسدها بالمنشفة ، وكذلك شعرها ، ونظرت إلى
وجهها المتعب في المرآة ، وجحظت بعينيها ، وهتفت
مفروعة :

-زمانته قال عني عفريته بعد شكل عيني ده ، يالهوي !

أطرقت رأسها للأسفل في خزي ، وأكملت قائلة :

-أهوو موقف وراح لحاله ، خليني أستعد لبكرة ، ده يوم طويل ومهم ، وربنا المعين فيه !

خرجت عاليا من المرحاض ، وفتحت هاتفها المحمول لتتفاجيء بكم الرسائل الإلكترونية على برنامج " الواتساب " ، والإشعارات على الفيس بوك ..

فتفحصتها على عجالة ، ثم زفرت في ضيق وهي تقول متذمرة :

-أوووف ، برضوه هانلبس التيشيرت ده ، بجد حاجة تخنق !

ثم إتجهت إلى خزانة ملابسها ، وفتحت الضلفة الصغيرة ، وظلت تعبت في الرف السفلي قائلة بتبرم :

-بجد مالوش أي لازمة إننا نلبسه ، شكلنا بيبقى بيئة ووحش ، والناس بتمسكنا تريقة ! ربنا يتوب علينا بقي !!!

وبالفعل وجدت ضالتها ، فأمسكت بتأفف " التي شيرت " الخاص بالمدرسة ، ونظرت له بإزدراء .. ثم تابعت قائلة :

-ده شكله زي الـ " خرقه " ، هالبسه إزاي ده بكرة ؟

.....

في فيلا سرحان عليه ،،،،

عقد آياز ساعديه خلف رأسه ، وهو ممدد على الفراش ،
ونظر إلى رامي باهتمام وهو يسأله بهدوء :
-بس ؟

أجابه رامي بخفوت وهو يبذل ملابسه بـ " تي شيرت "
رياضي :

-أها ، ده اللي حصل

سأله آياز مستفهماً وهو ينظر له بغرابة :
-ممم.. يعني العربية عطلت وإنت كنت بتدور على ميكانيكي
يصلحها ، تمام ؟

تتحنح رامي بصوت خشن ، وأولاه ظهره ، وأجابه بإيجاز :

-ايوه

تابعه آياز متفرساً ملامحه المضطربة بشكل فضولي ، ثم
قال بهدوء :

-مش مصدق!

وقف رامي أمام المرأة ، ومشط شعره للخلف ، وهتف
محتجاً :

-إيزووو ، وأنا هاكذب عليك ليه ؟ العربية بتعطل زي أي
حاجة

أرخی آياز ساعديه ، ونهض عن الفراش ، وداعب
أرنبة أنفه وهو يقول بنبرة عميقة :

-مش مرتحالك ، حاسس إنك مخبي حاجة عني

ألقي رامي بجسده المنهك على الفراش ، وعقد ساقيه معاً ،
وشبك أصابع كفيه وظل يحرك إبهاميه بحركة إهتزازية ثابتة
، ثم تحاشى النظر في إتجاهه ، وأردف قائلاً ب :

-ولا حاجة ولا غيره !

-ممممم..!

حاول رامي أن يغير الموضوع كي لا يستمر آياز في
إستجوابه ، فسأله باهتمام زائف :
-المهم قل لي إنت مستعد لبكرة ؟

أوماً الأخير برأسه ، ورد عليه بتهيدة متفائلة :
-أها ، Wish me luck (تمنى لي الحظ السعيد)
-ربنا معاك !

ثم صمت رامي لبرهة قبل أن يحدق في الفراغ ، وتظهر
إبتسامته من خلف أسنانه وهو يحدث نفسه قائلاً :
-ما هو أنا .. أنا ناوي أجي أشوفك بكرة وأطمن عليك يا .. يا
أبلة ..!.....!

.....

الفصل السادس عشر:

في صباح اليوم التالي ،،
في مدرسة الالفانيا الدولية ،،

تزينت بوابة مبنى رياض الأطفال بالبالين البيضاء
والصفراء ، والشعارات الملونة استعداداً لإستقبال
الأطفال في أول يوم دراسي لهم ..
ووضعت بعض النماذج لشخصيات كرتونية شهيرة ليلتقط
الأطفال صوراً تذكارية بجوارها ..

وقبل أن يحين موعد فتح البوابة ، كان الوضع بالداخل
كخلية النحل ، والأعصاب على أشدها من أجل التأكد من
إنهاء كل شيء قبل الميعاد المنتظر ...

إرتدت معظم المتواجدين التي شيرت الخاص بهذا اليوم
المميز ..

ورغم عدم إقتناع أي من المدرسات به إلا أنهن أجبرن على
إرتدائه ..

تجمعت ثلاثة منهن في الردهة لترتب وضع الحلوى ،
وكذلك الملصقات ، على طاولات صغيرة لينتقي منها
الأطفال ما يريدونه ..

نظرت سارة إلى سالي بتفحص ، وهمست لها قائلة :

-شوفتيني وأنا شبه عم عويس الزبال

لوت سالي فمها قائلة بسخط :

-إياكش بعد ده كله تفرد بوزها وتقول كلمة طيبة ، لكن مش
بنسمع منها إلا الكلام اللي ينرفز وبس

تتهدت سارة في ضيق وهي تضيف :

-مش بترتاح ولا بتريح حد معاها

قاطعتها عاليا بنبرة حائرة وهي تضع يدها على كتف
سارة :

-إنتو بتكلموا عن مين ؟

نظرت لها سارة لتجيبها بإنهاك :

-تفتكري هايكون عن مين يعني ؟

هزت عاليا رأسها قائلة بثقة وهي تبتسم :

-من غير ما تقولي عرفتها !

هتفت ميادة بنبرة عالية وهي تلوح بيدها :
-بنات عاوزة حد ينفخ معايا البلالين دول

نفخت سالي من الضيق ، ثم أجابتها متذمرة :
-بجد أنا صدري تعب من كتر النفخ ، ما يجيبوا مناخ للبالين
وأهوو كلنا نرتاح

زمت ميادة فمها وهي تجيبها بحذر :
-يجيبوا منفاخ ؟ هو إنتي عاوزاهم يصرفوا ويكلفوا ، ده
إنتي قلبك أبيض !

.....

على الجانب الآخر ، وقفت ريمان على مقعد خشبي ، بينما
ظلت ليلة واقفة على قدميها ، وتعاونت الإثنتين في تعليق
الأشرطة اللامعة على طول الممر المؤدي لداخل المبنى ..
مسحت ليلة جبينها ، وهتفت قائلة بضجر :
-يا رب الهوا مش يطيرهم !

مدت ريمان ذراعيها للأعلى لتتمكن من تثبيت الأشرطة ،
وأجابتها بتوتر :

-ربنا يستر ، أنا تعبت في تعليقهم !

نظرت ليلة إلى ريمان بتمعن ، فقط كانت تجاهد لترفع
جسدها من أجل الوصول إلى المسمار الخاص بتثبيت
الأشرطة ، فبدى شكلها مضحكاً ، فحاولت أن تسيطر على
نفسها، وأردفت قائلة بنزق :
-ما إنتي اللي قصيرة

نظرت لها ريمان بضيق ، وأجابتها بصوت حانق :
-قصيرة إيه يا بنتي ، مس إعتماذ عاوزاهم كده

إلتوت شفتي ليلة بضيق بائن ، وردت عليها بخفوت :
-أووف .. بجد متعبة ، مافيش حاجة بترضيها

أضافت ريمان قائلة وهي تزيح خصلات شعرها للخلف :
-يا لولو دي لو تطول تجيبنا من الفجر هاتعمل !

تلقت ليلة حولها ، وتابعت قائلة بنبرة ضجرة :
-لسه فاضل ساعتين على فتح الـ Gate (البوابة) واحنا
خلاص هلكننا وجبنا آخرنا !

ردت عليها ريمان بنبرة مرهقة :
-عندك حق ، أنا مش قادرة خلاص !

ثم أشارت بعينيها ، وهي تفرد إلتواء الشريط الملون
مضيفة بنبرة أمره :

- روجي هاتي بس شرايط تانية لأحسن اللي معايا مش
هايكفي
-أوكي

.....

في نفس التوقيت ، صف رامي سيارته أمام بوابة مبنى
الرياض ، وإلتفت برأسه ناحية آياز وتأمله قائلاً بمزاح
:

-يا بني إنت متأكد إن البتاع ده لازم تلبسه

أوماً آياز برأسه قائلاً بإيجاز :

Yes- (نعم)

وضع رامي يده على رأسه وحكها قليلاً ، ثم تابع بعدم
إقتناع :

-أصل بصراحة شكله مش اوي عليك !

نظر آياز إلى نفسه ، وتأمل هيئته بدقة ، فقد بدى
التي شيرت ضيقاً عليه بصورة ملفتة ، ومبرزاً لعضلات
ذراعيه بطريقة مستفزة .. فأصبح كما لو كان يستعرض
جسده ..

تنهد في إحباط وهو يجيبه بفتور :

-مس إعتماذ قالت ده المفروض يتلبس النهاردة

لم يحيد رامي بعينه عنه ، وأكمل قائلاً بسخرية :

-وانت مابتصدق تنفذ الأوامر

رد عليه آياز بجدية :

-لأ .. بس ده System (نظام) هنا !

ثم ترجل من السيارة ، وأردف قائلاً بصوت مرتفع :
-أشوفك بعدين

وقام بفتح الباب الخلفي ليسحب حقيبته ، ومن ثم علقها
على كتفه ..

تابعه رامي بنظراته ورد عليه بهدوء :
-ماشي يا عم الملتزم !

ثم هتف قائلاً بمزاح وهو يغمز له :
-طب مش هاتخذ أخوك معاك جوا ياخذ لفة ، ويشوف النظام

حدجه آياز بنظرات قوية وهو يجيبه بجدية :
-لأ ، باي !

أخذ رامي نفساً عميقاً ، وزفره بحذر وهو يحدث نفسه
قائلاً بهدوء :

-ماشي .. الجايات أكثر من الراحات !

ثم إبتسم لنفسه بغرور وهو يضيف :
-وأنا أعد هنا لحد ما تروح !

.....

مر آياز من البوابة بعد أن لوح للحارس الأمني بيده ، ثم
إتجه نحو الممر فوجد تلك الفتاة – دائمة الصدام معه –
تكافح لتثبيت الأشرطة .. فأطرق رأسه للأسفل ، وظل
يفكر بحيرة مع نفسه ب :
-طب أساعدها ، ولا أكبر دماغي منها !

حك طرف ذقنه ثم حسم أمره قائلاً بهدوء :
I will help her- (سوف أساعدها)

تحرك آياز نحوها ، وتتنح بصوت مرتفع نسبياً ،
فإنتبهت هي للصوت الرجولي الآتي من خلفها ، وأدارت
رأسها بحذر نحوه ، فرأته واقفاً خلفها ، فعبست بلامحها
، وأشاحت بوجهها بعيداً عنه ..
تعجب هو من أسلوبها ، وأردف قائلاً بإستغراب :

-محتاجة مساعدة ؟ أنا مش جاي آآ...

قاطعته بصوت صارم دون أن تلتفت نحوه :
Thanks- (شكراً) ، ولو محتاجة مساعدة Sure (أكيد)
مش هاطلبها منك !

إغتاظ هو من ردها الفج عليه ، وإحمر وجهه قليلاً .. ثم
تابع قائلاً بجدية :
As you like- (كما تريد)

ثم تركها وإنصرف سريعاً وهو يغمغم مع نفسه بإنزعاج
..

إرتسم على وجهها إبتسامة تشفي ، وهتفت قائلة لنفسها
بسعادة:

-مش ينفع معاك إلا كده ، ولا إنت مفكر بس إنك تضايقتني
وأتعامل معاك عادي !

تابعتها رانيا من على بعد ، وإحتقت عينيها بشرارات
غاضبة وهي تراهما يتبادلان الحديث المختصر ..

قبضت على كف يدها ، وصرت على أسنانها قائلة بغل :
-يعني ملاقتش إلا راس القرد وتشمها ، جاي عند الرخمة
دي وتلرق فيها !

ثم دبت على الأرضية الصلبة بقدمها ، وتابعت قائلة بغيط :
-ما أنا قصادك أهوو .. ولا إنت أعمى ومش شايفني !

إكفهرت ملامح وجهها أكثر ، ورفعت حاجبها للأعلى ،
ووضعت يدها في منتصف خصرها ، ونظرت أمامها بحدة
وهي تشيف بتوعد :
-ماشني ، برضوه مش سييباك !

.....

في غرفة المعلمات ،،،

كانت الطاولة التي تتوسط الغرفة مليئة بالكثير من الهدايا
المغلقة ، وإتفت حولها معظم المعلمات واللاتي حرصن عن
إنهاء تغليف البقية في أسرع وقت ...

رست حنان الهدايا بطريقة منظمة في صندوق صغير ،
وناولته إلى جانبتي التي كانت تدون في مفكرة صغيرة العدد
الخاص بكل فصل لتسلمه إلى المعلمة المسئولة عنه ، ثم
تضعه على الأريكة العريضة الموجودة بالغرفة ..

هتفت هناء قائلة بضجر وهي تحاول عقد الأنشطة :
-بجد أوفر ، أنا زهقت ، مش عارفة ألفها كويس

تناولتها منها منة ، ونظرت لها بثقة ، وردت عليها بمزاح :
-هو انتي بتعرفي عملي حاجة أصلاً ، شوفوا رابطها إزاي !

عبست هناء بجبينها ، وهتفت معترضة :
-الله ، أنا تيتشر ، مش بتاعة هدايا !

لوت منة فمها ، ولكزتها في جانبها بكوعها ، وتابعت
بتحدي :
-روحي قوليلها الكلام ده

زمت هناء فمها لتجيبها بنبرة ساخطة :

-أل يعني لو قولتلها هتفرق معاها ، كل اللي هاتعمله هاتكشر
وتقولي آآ..

صمتت للحظة لتقف مشدودة الجسد ، وعابسة الوجه أكثر
، ومتصلبة في تعابيرها وجهها ، ورفعت حاجبيها للأعلى ،
ثم عمدت إلى تغيير نبرة صوتها ، لتقول بنبرة ساخرة وهي
تتعمد تقليد المديرية :

-جرى ايه يا مس سارة وإحنا من امتى بنقول لأ للشغل !
فين روح المثابرة والكفاح !؟

ضحكت الفتيات بصوت مرتفع على أسلوب هناء المازح ،
وتشدقت جانبيت قائلة :

-طب يالا يا بنات ، أنا هوزع عليكم الإشراف !

هتفت منة محتجة بصوت مرتفع :

-أنا مش عاوزة أقف في بيبي كلاس ، العيال بيبقوا زنانين
بصورة بشعة ، وعياط وقرف

ردت عليها جانبيت بهدوء :

-طب وأنا هاجيب مين؟ ماهو لازم نتوزع كلنا على الكلاسز ،
وجزاء هيبقى معايا عشان الـ (فان داي) بتاع الأطفال

نفخت منة قائله بتذمر :

-يا ربي هو احنا مش هنرتاح أبداً

تدخلت نادية قائله بصوت مرح :

-لأ .. شيلوا كلمة راحة من القاموس خالص ، إحنا في زمن
السخرة والعبيد !

دلف آياز إلى داخل الغرفة ، وتفاجيء بعدد المعلمات
المتواجدات بالداخل ، فتجمدت تعابير وجهه ، وهتف قائلاً
بإيجاز وهو يتجه إلى زاوية الغرفة :

-هاي

إلتفتت المعلمات نحوه ، ورحبن به باختصار ، ثم
عاودن إتمام عملهن وهن يتهاوسن بكلمات مبهمه ..

مالت هناء على منة ، وقالت بصوت خافت :

-أوبا ، شايقة شكله عامل ازاي

إختلست منة النظرات نحوه ، وتأملت جسده الذي تبدو
كمحترفي كمال الأجسام ، وردت عليها بهمس :

-حاجة خطيرة على الآخر ، مش زي الوشوش العكرة اللي
بنشوفها على الصبح

تحمست هناء قائلة بخفوت :

-أنا عاوزة من ده يا حزوميل

لوت منة شفيتها وهي تجيبها بسخط :

-ياختي اتيلي ، إنتي أخرك واحد مقشف !

زمت هناء ثغرها للأمام قائلة بتذمر :

-يابابي يا منون ، دايمًا كده كسفاني

هزت الأخيرة كتفيها في عدم إكتراث ، وردت بفتور :

-مش بأقولك الحقيقة ، الأشكال دي ليها ناسها

حاول آياز ألا يركز مع أحدهن ، فيكفيه الموقف
المخرج الذي تعرض له قبل لحظات ..

وقام بفتح حقيبته لينظر إلى محتوياتها ، ولكنه توقف
عما يفعل حينما وقفت قبالة جانيته قائلة بصوت هادي ء :

-سوري يا مستر ، هاعطك شوية

قطب جبينه ، وسألها باهتمام :

-في ايه ؟

إبتسمت له قائلة :

-أنا بأوزع إشراف الفصول النهاردة ، فهايكون مع حضرتك
2 teachers .. هيساعدوك في تنظيم الكلاس ، والترحيب
بالأطفال ، وبعدها توزيع الهدايا عليهم ، وأخر نص ساعة
حضرتك هاتكون لوحدك معاهم عشان يتعرفوا عليك أكثر

هز رأسه موافقاً وهو يجيبها بإيجاز :

-اوكي

إبتسمت له مجاملة ، وردت بإختصار :

-تمام .. ولو في حاجة أنا موجودة هنا !

أوما برأسه ولم يعقب ، وعاود النظر إلى داخل حقيبته ..

.....

في ردهة مبنى الرياض ،،،

وضعت ليلة إصبعها على طرف أنفها لتمنع نفسها من العطس، ثم تنهدت بتعب .. وإتجهت إلى الطاولة المرابط أمامها عاليا ، وسألها باهتمام :

-معدكيش شرايط بتلمع ؟

ضيقت عاليا عينيها ، وسألها باندعاش وهي تحرق بها :
-ايه ؟

أشارت ليلة بيديها وهي توضح لها قائلة :
-شرايط الزينة اللي بتتعلق

هزت عاليا رأسها قليلاً ، وأجابتها بهدوء :
-أها.. لأ كلهم مع ريمان

أردفت ليلة قائلة بنبرة مهتمة وهي تشير بكفيها :
-خلصوا ، واحنا محتاجين تاني

هزت عاليًا كتفيها مجيبة إياها بإيجاز :
-مافيش

سألته ليلة بصوت حائر وهي تحك طرف ذقنها بإصبعيها :
-طب هاتجيب منين ، ده ناقص نص الممر ومش اتعمل !

أشارت عاليًا بعينيها نحو غرفة مكتب المديرية ، وردت
عليها بجدية :
-بلغني أبلتك اعتماد وهي تتصرف

حدجتها ليلة بنظرات معاتبة ، وردت دون تردد :
-أيوو .. ياباي ، ترضيهالي !

ضحكت عاليًا على طريقتها .. ولم تعقب .. في حين أكملت
ليلة حديثها بجدية :

-بصي أنا هاقول لأية وهي تدخل المكتب تبلغها ، مش
ناقصة تقولي كلمة

لكزتها عاليا في كتفها ، وقالت بعدم إكترات :
-يا بنتي قوليلها عادي !

ردت عليها ليلة على مضض ب :
-انتي مش عارفاها ، هاتقولك أنا جايبه الكمية بالعدد

نظرت لها عاليا بنظرات حائرة وسألته بجدية :
-طب وهانعملها ايه ، ماهم خلصوا !؟

مطت ليلة فمها للأمام وردت عليها ب :
-خلاص هاتصرف

أشارت لها عاليا بإبهامها ، وإبتسمت لها قائلة :
-ربنا معاكي

.....

في المرحاض ،،،

ولجت رانيا إلى داخل المرحاض وهي تجذب نشوى من ذراعها ، وأغلقت الباب على كلتاها فتذمرت الأخيرة قائلة :

-في ايه يا روني ، جراني كده ليه للحمام ؟

كزت رانيا على أسنانها قائلة بحنق :

-شوفتي المز ؟

سألته نشوى بإهتمام بـ :

-ماله

ردت عليها بضيق وهي تعقد ساعديها أمام صدرها :

-واقف بيرغي مع ريمان

هزت نشوى كتفيها في عدم مبالاة قائلة بصوت فاطر وهي

ترمقها بنظرات عادية :

-طب وفيها ايه ؟

أشارت بإصبعها وهي تضيق عينيها بشدة ومجيبة إياها
بغضب :

-ماهو كان أخذ منها موقف بعد مقلب العصاير !

أضافت نشوى قائلة بنزق :

-اللي كنتي لبستهولها ده

ردت عليها رانيا بقوة :

-ايوه

.....

كانت هبة بداخل المرحاض معها تعيد ترتيب ثيابها
بداخل المرحاض الداخلي ، ولكن لم تنتبه لها أي منهما ..
فأصغت هي بإنتباه لما تقوله الإثنتين دون أن تصدر أي
صوت ..

ولكنها تسائلت مع نفسها بفضول بـ :

-هما بيتكلموا عن ايه بالظبط ؟

.....

هتفت نشوى قائلة بنبرة مهتمة وهي تتفرس في ملامح
وجهها بـ :

-طب وانتي ايه اللي مضايقتك ؟

أجابتها رانيا بإصرار وهي تتطلع أمامها بنظرات هائمة :
-أنا عاوزة أخذ فرصة معاه ، مش معقول أضيع المزدده
من ايدي ، ولا أنا قرعتي بتقع مع الهبل والأشكال المعفنة !

أسندت نشوى كفها على ذراع رانيا ، وسلطت أنظارها عليها
لتقول بجديّة :

-يا رانيا ، هو احنا لحقتنا ، ده مش بقاله كام يوم

زمت رانيا شفيتها للأمام ، وهتفت بإحتجاج :

-بس الغربان كثير يا نوشة ، وزى ما إنتي شايفة ، احنا
هنا في الكي جي عوانس ، وده الذكر الوحيد اللي وسطنا !

زادت إنعقاد ما بين حاجبي نشوى ، وهتفت قائلة بإستغراب
:

-يالهي على كلامك ، ده اسلوب ! خدي بالك لأحسن مس
إعتماد تسمعك

تتهدت قائلة بتذمر :

-أوف طيب ، هاخذ بالي !

ثم رفعت حاجبها للأعلى وتابعت قائلة بصوت هامس :

-المهم أنا عاوزاكي تراقبيه وتنقليلي أخباره

نظرت لها نشوى بإستغراب ، فتصرفات رانيا وطريقتها قد
تؤدي لتعرضها لمشاكل جمة .. فحاولت أن تثنيها عما
تفعل ، فقالت لها :

-احنا هنبدأ الدراسة ، يعني محدش هايكون فاضي لحد

هزت رانيا رأسها وقالت بإصرار مريب :

-معلش ، أهوو لما تشوفيه هنا ولا هنا ، أو بيكلم حد بلغيني
، وأنا هاظبط أموري معاه !

تتهدت نشوى قائلة بإستسلام :

-ماشى ..!

إرتسم على ثغرها إبتسامة لئيمة وهي تهتف بصوت جاد :

-متفقين ، يالا بينا

.....

إتسعت مقلتي هبة في ذهول ، ورددت قائلة لنفسها
بصدمة :

-ايه ده ، دي عصابة ولا مدرسات كي جي ..!

ثم إستمعت إلى صوت غلق باب المرحاض ، فخرجت من
الداخل، وإتجهت إلى الحوض ، وفتحت الصنبور وهي تتابع
حديث نفسها بفضول بـ :

-بس مقلب عصاير ايه ده اللي بيتكلموا عنه ؟ وايه علاقته
بريمان !

ثم حدقت في المرآة المثبتة على الحائط ، وعدلت من
وضعية حجابها ، وتابعت بنبرة محتارة :

-أنا مش فاهمة حاجة خالص ، بس هسأل البنات وأعرف

!!

الفصل السابع عشر:

في غرفة مكتب المديرية بمبنى الرياض ،،

طلبت ليلة بإختصار من المديرية إعتقاد إحضار بعض
شرائط الزينة من مخزن الأدوات المدرسية والمكتبية
الخاص بأعضاء التدريس ، ولكنها تفاجئت بها تخبرها
بجدية بـ :

-للأسف مش متوافر هناك

رمشت ليلة بعينيها مصدومة ، وتساءلت بتوتر بادي على
تعبيرات وجهها :

-طب وهنتصرف إزاي ؟ ده لسه ناقص نص المدخل !

مطت إعتقاد فمها للأمام ، وتساءلت بنبرة رسمية :

-ممم.. مافيش أي زيادات مع البنات ؟

هزت ليلة رأسها نافية وهي تجيبها بضيق :
-لأ ، أنا سألتهم وقالولي خلصوا !

صمتت المديرية إعتقاد للحظات لتفكر في حل سريع ، ثم
شرعت حديثها قائلة بهدوء نسبي :
-طيب ، في مكتبة قريبة من هنا بتفتح من بدري ، هاعملك
مأمورية وتروحي تجيبي على أد الكمية اللي ناقصة !

تنهدت ليلة في إرتياح عقب سماعها هذا الإقتراح ، ومن ثم
تسائلت بحماس :
-طب ينفع أخذ حد من البنات معايا ؟

أومأت برأسها موافقة وهي تجيبها بصوت جاد وحازم :
-اوكي ، بس بسرعة يا مس ليلة ، احنا مش عندنا وقت
كثير ، خلي مس أية السكرتيرة تعملك المأمورية ، وهاتهالي
أوقعها !

هزت رأسها عدة مرات قائلة :
-على طول يا مس اعتماد

ثم أولتها ظهرها ، وإنصرفت إلى خارج غرفة المكتب ..

.....

في غرفة المعلمات ،،،،

إنتهت حنان من رص جميع الهدايا في الصناديق الكرتونية الخاصة بكل فصل دراسي ، ثم ناولتها إلى جانب التي قامت بوضعها على الطاولة ، ونظرت إلى تلك الورقة المطوية في يدها ، وأردفت قائلة بهدوء وهي تشير بيدها :
-تمام ، كل الهدايا جاهزة ، ودول بتوع البيبي كلاس !

نظرت إليها هناء بنظرات سعيدة ، وردت عليها بحماس :
-اشطا ، أنا هاخذ بتوعي

عبست منة بوجهها ، وصاحت محتجة :
-لأ يا هناء، دول بتوعي أصلاً ، أنا بأحب اللون البيبيك أوي !

هزت هناء كتفيها معترضة وهي تقول :

-يووه يا منة ، أنا بأحبه أكثر منك

في نفس الوقت ، دلفت هبة إلى داخل الغرفة، ولم تلاحظ وجود آياز بسبب إختفائه وراء الصناديق الكرتونية ، فهتفت قائلة بصوت مرتفع :

-بنات !

سلطت هناء أنظارها عليها ، وسألتها بإستغراب :

-خير يا هبة ؟

أردفت هبة قائلة دون إكترات وهي تلوح بيديها :

-سمعتوا عن موضوع مقلب العصير !

إنتبه آياز للحديث الدائر ، ورفع رأسه للأعلى لينظر نحو صاحبة الصوت ، ولكنه لم يتمكن من رؤيتها بوضوح ، فقد كانت الصناديق تحجب الرؤية عنه

ضيقت منة عينيها في إندهاش ، وفغرت شفيتها بـ:

-مقلب !

إستدارت جانيت برأسها نحوها متسائلة بهدوء :
-ده عبارة عن ايه ده ؟

ردت هبة على تساؤلاتهم بحيرة بـ :
-أنا اللي بسألكم ؟

هزت هناء كتفيها ، وزمت شفتيها لتجيبها بفتور :
-لأ مش عارفة الصراحة

هتفت منى قائلة بصوت شبه محتد وهي تشير بكف يدها :
-ما تقولي يا بنتي في ايه ؟

أخذت هبة نفساً عميقاً ، وزفرته على عجالة ، ثم ردت
عليهن قائلة بنبرة غير مبالية :

-وأنا في التويلت سمعت رانيا بتكلم عن مقلب عصير عملته
في المز الأمريكاني ولبسته لريمو

إرتسم على أوجه المعلمات علامات الذهول الممزوجة
بالصدمة ، فقد كان آياز يجلس معهن في الغرفة ،
وحديث هبة غير المكترث عنه يضعهن في موقف حرج
معه ..

بينما أصيب هو بصدمة بعد تلك العبارات القوية عنه ..
وفغر فمه مندهشاً ، ولكنه لم يعقب .. اكتفى بالتحديق
أمامه بذهول

شهقت هناء قائلة وهي تضع يديها على ثغرها ، ونظرت
إلى رفيقتها منة بتوتر :
-أوبا

بينما تابعت هبة حديثها بحماس وهي تلوح بيديها في
الهواء ، وعينيها تلمعان بشدة :
-حتة الباسكويته ده ليهم حق يتشاكلوا عليه ، ده لسه
بسلوفانته !

فغرت حنان ثغرها مشدوهة بكلمات هبة الصريحة ..
وهمست هناء قائلة بإرتباك :
-أوبا ، كده كملت وش

ركضت منة في إتجاه هبة ، ثم أمسكت بها من ذراعها ،
ودفعتنا جبراً للخلف وهي تهتف بجدية واضحة :
-تعالى برا يا هبة !

إستغربت هبة مما تفعله معها زميلتها ، وسألتها مندهشة :
-فى ايه ؟

مالت عليها برأسها ، وأجابتها بخفوت جاد :
-المز اللى بتكلمى عنه موجود هنا معنا !

إتسعت مقلتي هبة فى حرج شديد ، ورفعت حاجبيها
للأعلى ، وصاحت معاتبة :
-مش تقولولى أسكت بدل ما أنا عمالة أكر كل حاجة كده
!!!!

ردت عليها منة بصوت شبه محتد :
-هو حد لحق يوقفك !

حركت هبة فمها للجانبين ، وأردفت قائلة بتوتر واضح في تعابير وجهها وتصرفاتها :

-ربنا يستر-

ثم ابتلعت ريقها وتساءلت بإضطراب :

-هو بي فهم عربي ؟

لوت منة فمها للجانب وأجابتها بثقة وهي ترمقها بنظرات

إستتكار :

-أكيد طبعا !

.....

حك آياز رأسه قليلاً ، وظل يعبث بقلمه الحبر في حيرة بائنة على قسماته .. بينما ساد صمت حرج في الأجواء ..

إختلس هو النظرات نحو المعلمات المتواجدات بالغرفة ، فلاحظ التوتر البادي عليهن ، فضغط على شفثيه ، وحدث نفسه مستفهما :

-عصير ، رانيا ، مز .. مممم.. ريمو ! هما بيتكلموا عن موضوع الـ juice اللي كان على الـ Stuff بتاعي !

أجفل عينيه قليلاً ، وحاول ربط ما حدث في السابق بما قيل
قبل لحظات ، وتهد بعرق وهو يتابع حديث نفسه بـ :
-واضح كده أني ظلمت حد في الموضوع ده !

فرك آياز وجهه بكفيه بعد أن ترك القلم الحبر على سطح
الطاولة ، ثم أرجع رأسه للخلف ، وتساءل بفضول :
-بس ليه هي عملت كده ؟

.....

في ردهة الإستقبال بمبنى الرياض ،،،

سارت ليلة في إتجاه عاليها وهي تحمل ورقة صغيرة
مطوية في يدها ، ثم هتفت بصوت شبه مرتفع :
-تعالى معايا يا عالي !

رمقتها عاليها بنظرات إستغراب ، وسألتهأ بهدوء :
-على فين ؟

أجابتها ليلة وهي تشير بكف يدها :

-أنا خدت مأمورية وهانطلع نجيب شرايط الزينة من برا

إستدارت عاليا برأسها للخلف ، وتابعت قائلة بصوت جاد :

-أوبس ، بس أنا عندي لسه آآ...

قاطعتها ليلة بنبرة إستعطاف وهي تسبل عينيها :

-بليز عاليا ، أنا مش هاعرف أروح لوحدي ، بليز .. بليز !

إبتسمت لها عاليا برقة ، ثم أومأت برسها قائلة :

-اوكي .. يالا !

إحتضنتها ليلة على الفور ، وضمتها بقوة إلى صدرها قائلة

: بإمتنان :

-حبيبي .. حبيبي !

ثم قبلتها من وجنتها ، فتشددت الأخيرة قائلة بنبرة مرحة :

-قلبي يا لولو ، هاجيب بس ال bag بتاعتي

-اوكي

.....

خارج مبنى الرياض ،،،

نفخ رامي من الضيق بعد أن مل من كثرة الإنتظار .. ثم تنهد قائلاً بانزعاج :

-واضح إن ماليش نصيب أشوفها ، تتعوض بقى !

فرك عينيه قليلاً ، ثم وضع نظارته الشمسية على وجهه ، ومن ثم أدار محرك سيارته ، ولف عجلة القيادة ، وكان على وشك الإنصراف حينما استشعر قلبه حضورها ، فالتفت برأسه عفويًا نحو البوابة الرئيسية فرأها تخرج من البوابة وابتسامة مشرقة مرتسمة على ثغرها وهي تحدث رفيقتها ..

فإعتلى ثغره ابتسامة عريضة ، وهتف محدثاً نفسه بحماس :

-ده أنا حظي من السما !

ثم حرك السيارة في إتجاههما ، فسد عليهما الطريق بها ، وسلط أنظاره عليها ، وابتسم لها ببلاهة ..

انتفضت عليا مذعورة في مكانها ، ولم تنتبه إليه ، بل
اكتفت بالنظر شزراً ، وصاحت قائلة بغضب وهي تضرب
بكفها مقدمة السيارة :

-مش تفتح ، ولا احنا هوا قداكم !!!؟

ترجل رامي من السيارة ، وابتسم قائلاً ببرود :
-برضوه لسانك الفلة ده !

اتسعت عينيها مصدومة ، وهتفت قائلة بذهول :
-انت !!!

تسمرت ليلة في مكانها مشدوهة بما يحدث ، ثم أدارت
رأسها في اتجاه عالي ، ورمقتها بنظرات فضولية متسائلة
باستغراب وهي تشير بإصبعها نحوه :
-هو انتي تعرفيه يا عالي ؟

عقدت عاليًا ساعديها أمام صدرها ، وردت عليها بضجر
وهي تلوي شفيتها :
-معرفة القرف !

أغلق رامي باب سيارته ، ودار حولها ليقف قبالة عاليا ،
ثم رفع نظارته الشمسية أعلى جبهته ، وهدق بها بنظرات
مطولة ، وسألها بهدوء :

-عاملة ايه النهاردة ؟ وأخبار الدوخة والترجيع معاكي ايه ؟

إرتسمت علامات التقزز على وجه ليله وهي تتسائل
بإشمزاز :

-دوخة وترجيع ، هو في ايه ؟

نفخت عاليا بغضب ، وأجابتها بصوت محتد وهي ترمقه
بنظرات ساخطة :

-واحد ثقيل ورزل بيطاردني في كل مكان !

رفع رامي كفه في وجهها ، وهتف قائلاً بإحتجاج :

-لأ عندك ، انتي اللي بتيجي في سكتي !

أرخت ساعديها ، وكورت قبضتها ، وأسندتها عند منتصف
خصرها لتصبح بتذمر :

-يا سلام ، طب وحضرتك ايه اللي جايبك عند مدرستي ؟

تتحنح رامي بصوت خافت ، ووضع إصبعه على مقدمة أنفه
ليداعبه قليلاً ، ثم أجفل عينيه ، وأجابها بتلعثم :
-أنا .. آآ.. أنا جاي هنا آآ...

قاطعته بصوت غاضب وهي تشير بيدها :
-طبعاً مش عندك حاجة تقولها

هتف رامي بثقة زائفة بعد أن إنتصب في وقفته :
-لا ، أنا جاي بصفتي ولي أمر

ضيقته ليلة عينيها في عدم إقتناع ، وسألته بإهتمام :
-إنت Parent عندنا ؟

نظر إليها رامي وأجابها بإيجاز :
-أيوه !

سألته ليلة بفضول أكبر وهي تتفرس ملامحه :
-والد مين بالظبط ؟

لوت عاليا فمها بسخط وهي تضيف بإستخفاف :
-ها قول ؟

حاول رامي أن يرسم ملامح الجدية على تعبيرات وجهه
التي تفضحه ، فتشدد قائلاً بصوت آجش ومحتج :
-أكيد يعني مش واقف هنا هزار !

سلطت عاليا أنظارها على السيارة ، وسألته بضيق :
-وفين ابنك ولا بنتك ؟

أشار رامي بعينه للأمام قائلاً بحماس :
-موجود جوا

إلتفتت عاليا برأسها للخلف ، وسألته بإعتراض وهي ترمقه
بنظراتها الحادة :
-جوا إزاي والبوابة أصلاً مش فتحت لحد ؟!!!!

إبتسم لها رامي بإستفزاز ، ثم غمزها وهو يتابع قائلاً :

-هو موجود ، بس إنتي اللي مش واخدة بالك ، ومركزة
معايا !

نفخت عاليًا في وجهه بضيق واضح ، ثم وضعت قبضتها
على ذراع ليلة ، ودفعتها وهي تقول بانزعاج :
-يووووه ، يالا يا بنتي ، ده فاضي ، وهيعطلنا ، واحنا مش
عندنا وقت

تحركت الإثنتين للأمام متجاهلين وجوده ، فلق هو بهما
متسائلًا بفضول
-رايحين فين ؟

توقفت عاليًا عن السير ، وأدارت رأسها في إتجاهه ،
ونظرت له بحدة ، ثم أشارت بإصبعها محذرة وهي تنهره
:

-لو سمحت متعطلناش !

إبتسم لها ببلاهة قائلاً :

-قوليلي بس يا أبله ، وانا أساعدك

نظرت له بإزدراء ، ثم تأبطت ذراع ليلة ، وردت عليه
بغضب واضح في نبرتها :

-المساعد ربنا

تابعهما رامي بنظراته ، وأعاد وضع نظارته على عينيه
وهو يهمس لنفسه بـ :

-وراكي .. هانروح من بعض فين !

.....

عند غرفة المعلمات ،،،

قامت جانبيت بتوزيع صناديق هدايا الأطفال المغلفة على
جميع المعلمات ، وتهامسن فيما بينهن على ما قالت هبة ..
ولم تسلم هي من عتابهن اللاذع نتيجة تصرفها الطائش
وتسرعها في التفوه بأي شيء دون أن تأخذ حذرنا ...

نفضت ريمان يديها من التراب العالق بهما ، وسارت في
إتجاه غرفة المعلمات لتجدهن واقفات بالخارج ، فقطبت
جبينها ، ونظرت لهن مندهشة ، ثم أكملت سيرها نحوهن ،
ومن ثم تسائلت بنبرة عادية وهي توزع أنظارها بينهن :

-في ايه يا بنات واقفين كده ليه برا ؟

أجابتها هناء بتتهيدة إنزعاج :

-أصل هبة عملت كارثة جوا

إزداد إنعقاد ما بين حاجبيها ، وسألتها بإستفهام أكبر :

-كارثة ايه ؟

أضافت جانبيت قائلة بضيق :

-أووف ، دي كانت حاجة رهيبة !

أشارت منة لريمان بكفها ، فاتحنت عليها الأخيرة ،

فهمست لها في أذنها قائلة :

-أصلها قالت قصاد آياز انه المز اللي بيتخانقوا عليه

فغرت ريمان شفيتها مصدومة ، ورمشت بعينيها في عدم

تصديق .. ثم هتفت بحرج :

-انتي بتكلمي جد ؟

مطت منة شفيتها في ضيق وهي تجيبها :

-اه ، وهو كان أعد وسمع ده كله عنه

وضعت ريمان يدها على فمها ، وتابعت قائلة بخجل :

-أووف ، يادي الفضايح !

لوححت منة بكفيها لتضيف قائلة بمزاح :

-هي فضايح بعقل ، كده الراجل خد فكرة لوز اللوز عننا !

إبتسمت جانبيت برقة لتضيف بصوت هاديء وهي مسلطة

أنظارها على ريمان :

-خدي المفاجأة ، إن إنتي إشرافك معاه !

شهقت ريمان بصدمة وهي جاحظة العينين :

-اييييه !!!

ظلت لبرهة في حالة ذهول بعد ما سمعته .. هي وهو في

فصل واحد .. وهي لا تطيق البقاء معه للحظة ، وهو على

نفس الحال ، فيجمعهما الإشراف سوياً ..

أضافت جانبيت قائلة وهي تشير بإصبعها لتتبه هي لها بعد
شرودها :

-ورانيا كمان !

إزدادت حالة الصدمة ليها ، فالوضع بات مأساوياً بالنسبة
لها ، لذا هتفت محتجة وهي عابسة الوجه :
-لا بتهزي !!!

هزت جانبيت رأسها بهدوء وهي تكمل بـ :
-هو التوزيع كده !

زمت ريمان شفيتها وصاحت بإعتراض :
-لأ يا جانبيت ، أنا مش موافقة

ردت عليها جانبيت بهدونها المعتاد :
-طب أجيب مين مكانك ، وكل واحدة ليها دورها !!

نفخت ريمان بضيق وأضافت قائلة بتذمر :
-أوف ، أنا مش عاوزة أكون معاه

إبتسمت لها جانيت ، ووضعت يدها على كتفها ، وربتت
عليها قائلة بصوت رقيق :
-معلش ، هي ساعة بالكثير وخلص

ضربت ريمان الأرض بقدمها بعصبية ، وتابعت بإنفعال :
-يابابي يا جانيت ، كنتي حطي أي حد ثاني

رمشت جانيت بعينيها وهي تضيف ببراعة :
-ما إنتي معاكي رانيا

إغتاظت ريمان من ردها ، وصاحت بضجر :
-أنا أصلاً مش بأطيقها

ثم أولتها ظهرها ، وظلت تنفخ بعصبية ..

تنهدت جانيت بتعب ، وتابعت قائلة بتوسل :
-معلش استحملوا بعض يا ريمو ، هي ساعة وخلص بقى ،
بليز .. أنا عندي لسه شغل أد كده

صرت ريمان على أسنانها لتضيف بحنق :
-بجد اليوم قفل معايا ، إن كانت هي ولا اللي اسمه آياز ده
!

ثم التفتت بجسدها كليةً لتتنظر إلى جانيت ، فتفاجئت بآياز
يقف على عتبة الغرفة ومحددًا بها بنظرات حانقة ..
فابتلعت ريقها بصعوبة .. وتوردت وجنتيها .. وأجفلت
عينيها سريعاً في حرج شديد منه
!!!

.....

الفصل الثامن عشر:

حاولت ريمان أن تتصرف بصورة طبيعية وكأنها لم
تتفوه بأي حماقات أمام آياز الذي لم يكف عن رمقها
بنظرات إستهجان لإسلوبها الفظ معه ..

إبتلعت ريقها بهدوء ، ورفعت رأسها في شموخ ..
ونظرت بكبرياء للجانب ..

أخذ آياز نفساً عميقاً ، وحبسه في صدره ليحافظ على
هدوئه .. ثم أردف قائلاً ببرود جاد :

يا ريت مس جانبيت تبغني ال teachers اللي معايا
يستعدوا ، أنا رايح ال Class !

ثم رمق ريمان بنظرات قوية ، وسار مبتعداً عنها ..
حاولت هي ألا تتبعه بعينيها وهو ينصرف ، فقاطعت
جانبيت نظراتها المختلصة بصوت معاتب :

-مش تاخدي بالك يا ريمان ، هايقول عنك ايه الوقتي ؟

مطت شفيتها لتجيبها بتهيدة مطولة :

-يقول اللي عاوزه ، I don't care (أنا لا أهتم)

.....

في المكتبة القريبة ،،،

توفقت كلاً من عاليا وليلة أمام إحدى المكتبات ، وتبادلت
كلتاها حديثاً خافتاً ، ثم بدأت ليلة حديثها بجدية وبصوت
مرتفع ب :

-لو سمحت عاوزين شرايط زينة !

إلتفت البائع نحوها ، ورمقها بنظرات حادة متسائلاً
بإستغراب :

-اللي هي ازاي ؟

ردت عليه ليلة وهي تشير بيدها :

-اللي بتتعلق في العيد ميلاد وبتلمع !

هز رأسه عدة مرات ، وأجابها بجمود :

-أها ، لأ مش عندي !

زفرت ليلة في ضيق ، ونظرت إلى عاليا وسألتها
بانزعاج :

-أوف ، طب وهانجيبها منين الوقتي ؟

هزت عاليا كتفيها قائلة بحيرة :

-مش عارفة

إستدارت ليلة برأسها ناحية البائع وسألته بجدية وهي ترفع حاجبيها للأعلى :

-طب مافيش مكتبة تانية قريبة من هنا بتبيع الشرايط دول ؟

لوى فمه ليحيبها بجموده المستفز :

-لا مافيش

نفخت هي من الضيق ، فأشارت لها عاليا بعينيها لتتحرك كلتاها بعيداً عنه ، وأضافت قائلة بحنق :

-بياع مستفز ، كأنه يقول شكل للبيع

ضغطت ليلة على شفثيها في ضيق وهي تقول :

-سيبك منه ، احنا هانعمل ايه ؟

-أنا أعرف مكتبة فيها كل اللي انتو عاوزينه !!!

قالها رامي بصوت مرتفع وهو يرسم على وجهه ابتسامة
سخيفة .. فحدقت به كلتاهما بإندهاش واضح ، ثم رمقته
عاليا بنظرات ساخطة ، وتجاهلته تماماً ، وسلطت أنظارها
على ليلة وهتفت قائلة بحنق :
-ياللا يا ليلة ، الجو كتم فجأة !

تحرك نحوهما وهو يتابع بهدوء :
-أنا غرضي أساعد

وضعت ليلة كفها على ذراع رفيقتها ، وضغطت عليه قليلاً
وهمست لها وهي محدقة بها :
-استني يا عاليا ، مش يمكن يعرف آآ...

قاطعتها عاليا بنبرة صارمة وهي ترمقها بنظرات حادة:
-ياللا يا بنتي ، ولو عاوزة تروحي معاه اتفضلي !

أومات ليلة برأسها نافية ، وردت بخفوت :
-لا خلاص !

ثم تحركت كلتاهما بعيداً عنه .. فتهد هو بيأس قائلاً :
-والله أمل تعبت من كتر المناهدة !

ثم ابتسم لنفسه بغرور مضيئاً :
-بس انا مكمل إن شاء الله !

رن هاتفه الموضوع في جيبه ، فدس يده ليخرجه ، ونظر
إلى شاشته ، ثم لوى فمه في إمتعاض ، وأخذ نفساً عميقاً
، وزفره مرة واحدة .. وضغط على زر الإيجاب ، ومن ثم
وضع الهاتف على أذنه ليهدف بحماس زائف :
-باشمهندس !

صاح والده سرحان بصوت جهوري متسائلاً :
-انت فين يا رامي ؟

رد عليه بهدوء حذر وهو مسبل عينيه :
-مع آياز يا بابا

أردف والده قائلاً بصوت شبه حاد :
- وهاتففضل وياه كتير ، مش في شغل وراانا !؟!

أجابه على مضض قائلاً :
-ايوه ، بس أنا آآ....

قاطعته بنبرة صارمة ب:
-عاوزك تيجي المعرض على طول ، في حاجات عاوز أتكلم
فيها معاك ، وإنت مكبر دماغك

هز رأسه بخفه وهو يجيبه بإمتعاض:

-حاضر يا بابا ، أنا جاي !

-ماشى ، مستتيك !

-أوكي ، سلام !

ثم نفخ رامي بضيق بائن وهو يعيد وضع الهاتف في
جيبه محدثاً نفسه بإنز عاج :

-صعب إن الواحد يتفاهم مع عقلية زي البشمهندس سرحان
عليوه !

.....
في ردهة الإستقبال ،،،

كانت ريمان في طريقها إلى قاعة الدراسة الخاصة بـ (بيبي كلاس) وهي تغغم مع نفسها بضيق :

-عادي يا ريمو ، مافيش حاجة حصلت ، اهدي واتصرفي على طبيعتك ، مش نهاية العالم يعني إنه يعرف إنني مش طايقاه ! ماهو ده الطبيعي بعد اسلوبه المستفز معايا !

رأتها هبة على حالتها تلك ، فضيقت ما بين حاجبيها ،
وسألتها بإستغراب :

-ايه يا بنتي ؟ إنتي ماشية تكلمي نفسك ولا ايه ؟

تتحنحت بخفوت ، وإبتسمت لها قائلة :

-ماتخديش في بالك

بادلتها الإبتسام وهي تقول :

-ماشي يا ريمو !

ثم عبست ملامح وجهها قليلاً لتضيف بجدية :
-المهم أنا كنت عاوزة أقولك عن حاجة كده

قطبت جبينها بشدة بعد أن رأت تبدل ملامح هبة ، وتوجست
خيفة من أن يكون هناك أمراً ما طارئاً قد حدث ، فسألتها
بفضول عجيب :
-حاجة ايه ؟

.....

في قاعة الدراسة الخاصة بمرحلة (بيبي كلاس) ،،

وضع آياز يديه في خصره ، وجاب بعينه مساحة القاعة
.. ثم مط فمه قليلاً ، وسلط أنظاره على الطاولات الدائرية
الصغيرة المتراسة على مقربة من بعضها البعض .. وحدث
نفسه قائلاً :

-تمام ، أنا أقدر أستغل المساحة الفاضية اللي في ال-
Corner دي وأعمل فيها Fun Club for the kids ..
ممم.. وممكن كمان أزود آآ...

قاطع تفكيره المتقطع صوت أنثوي متحمس بلكنة عجيبة :
Any help (أي مساعدة)

إستدار آياز برأسه ناحية صاحبه ، ورمقها بنظرات
متفحصة ، ثم أجابها بإيجاز :
No - (لا)

اقتربت منه رانيا ، وتابعت حديثها بصوت أكثر حماسة وهي
ترمش بعينيها بطريقة بلهاء :
-ليه بس كده ؟ ده أنا بأفهم والله ، مايعركش إني شكلي كده
!

ثم أشارت إلى نفسها بإصبعها ، وأضافت بتفاخر :
-أنا أستاذة لغة عربية أد الدنيا ، بس دماغي لاسعة شوية

لم يجبها آياز ، وأشاح بوجهه بعيداً عنها ..
وقفت هي إلى جواره ، ونظرت حولها وهي تقول :

- ماشاء الله ، الكلاس بتاعك واسع ، يعني هاتقدر تاخذ راحتك فيه ، عارف بقية (الكلاسات) ضيقة وآآ..

ضيق آياز عينيه ليرمقها بنظرات إستهجان ، فإبتسمت له إبتسامة عريضة قائلة :

-تلاقيك بتقول كلاسات دي ايه ؟ يعني فصل ، بس أنا بأجمعها جمع مؤنث سالم ههههههه ..!

ثم تنهدت بحرارة وهي مسبلة عينيها عليه .. فقد لعب الحظ لعبته أخيراً معها ، وأصبحت مساعدته لبعض الوقت .. لذا قررت أن تستغل الفرصة التي جاءت على طبق من ذهب ، وتتقرب منه .. لعلها تظفر به في النهاية ...

أغمض آياز عينيه للحظة ، ونفخ في ضيق محدثاً نفسه بضجر :

-واضح إنها Case (حالة) !

وصلت ريمان هي الأخرى إلى القاعة الدراسية ، وحاولت أن تبدو هادئة في تصرفاتها مع آياز كي يمر اليوم بسلام ...

ولكنها إستشاطت غضباً حينما رأت رانيا أمامها .. خاصة
بعدها عرفت من هبة عن " المقلب " المدير لها .. فكزت
على أسنانها بغل ، وإحتقت عينيها بصورة واضحة ،
و.....!!!!!!

الفصل التاسع عشر:

في القاعة الدراسية الخاصة بمرحلة (بيبي كلاس) ،،،

تشنجت تعابير وجه ريمان بصورة واضحة ، وعضت
على شفتيها من الغيظ ، ثم صاحت بصوت شبه محتد :
-رانيا !

إلتفتت هي نحوها ، وكذلك آياز .. ثم ضيقت عينيها في
إستغراب وهي تتسائل بتعجب :
-في حاجة يا ريمان ؟

وقفت ريمان قبالتها ، وهتفت بحق وهي محدقة بها :
-اه في !

استغرب آياز من الحالة العصبية البادية على ملامحها ،
ولكن لم يهتم للأمر ، و أثر عدم التدخل في حوارهما ..
وتراجع في إتجاه مكتبه الموضوع في زاوية القاعة ..

حدثت رانيا ريمان بنظرات متحدية ، ووضعت يدها في
منتصف خاصرتها ، وسألتها وهي تلوي شفيتها :
-خير .. عاوزة ايه ؟

صرت الأخيرة على أسنانها بغل وهي تصيح بضيق :
-ايه اللي عملتية فيا ده ؟

رفع آياز وجهه للأعلى لينظر إلى ريمان بغموض ..
ولعب الفضول دوره معه في إثارته لمعرفة ما يحدث
بينهما ..

سألتها رانيا ببرود :
-عملت ايه ؟

قبضت ريمان على ذراعها ، وكزت على أسنانها قائلة /
-اعلمي نفسك مش عارفة !

أزاحت رانيا يدها من عليها ، وسألته بعدم فهم :
-انتي بتكلمي عن ايه ؟

همست قائلة بعد أن لاحظت متابعة آياز لهما :
-العصير ، وآياز ، ولا عاملة نفسك نسيتي ؟!

قرأ آياز اسمه من على شفتي ريمان ، وبدأ يربط خيوط
المسألة معاً .. وخمن أن يكون خلاهما له علاقة
بموضوع المقلب .. فهو القاسم المشترك بينهما ..

هزت رانيا رأسها بطريقة غير مبالية ، وأجابته بفتور :
-أها .. وأنا مالي بالموضوع ده

إتسعت مقلتيها بشدة وهي تتابع بغيظ :
-هبة قالتلي على كل حاجة

قطبت رانيا جبينها باندھاش مرددة :
-هبة !

أومات ريمان برأسها بقوة ، وهتفت بصوت شبه منفعل :
-ايوه هي سمعتك بتتكلمي عن ده ، إنكري !

ردت عليها رانيا بنبرة حادة ب :
-ايه الهبل اللي بتقوليه ، انا معملتش حاجة !

حدجتها ريمان بنظرات متوعدة وهي تضيف :
-عامة ، أنا مش هاسيب حقي معاكي وآآ...

-خلصتوا إنتو الاتنين !

انتبهت الإثنيتين إلى صوت آياز شبه المنزعج الذي
قاطعهما ، ونظرتا نحوه ، بينما تابع هو بصوته الآجش :
-مشاكلكم الشخصية تحلوها برا ، لكن هنا you have to
stick to the rules (عليكما الإلتزام بالقوانين)

أطرقت رانيا رأسها للأسفل ، وتقوس فمها للجانب.. بينما
حدجته ريمان بنظراتها المحققة ، ولم تتفوه بكلمة ،
وغمغت مع نفسها بغضب :
-مش هاعدي اللي حصل ده !

نظرت رانيا إلى ريمان من طرف عينها ، وحدثت نفسها
بتشفي :

-ماهو المثل بيقول اعرف عدوك وعلم عليه ، وأنا هاعمل
كده معاكي ! أل أسيبك المز أل .. دي فيها رقاب !

أشار آياز بيده قائلاً بجدية :

-عاوزين نتفق على اللي هيتم داخل الكلاس

هتفت رانيا دون تردد وهي ترسم على ثغرها إبتسامة بلهاء
:

-أنا موجودة عشان أساعدك ، شوف إنت عاوز ايه مني

هز رأسه بخفة ليقول بهدوء حذر :

-تمام يا مس آآ...

هتفت بحماس أشد وقد اتسعت إبتسامتها :
-رانيا ، ومافيش داعي للتكليف ، إحنا زملا مع بعض

رمقها هو بنظرات شبه ساخطة ، ولم يعقب .. ثم بهدوء
سلط أنظاره على ريمان ، وسألها بإقتضاب :
-وحضرتك يا مس Ready (مستعدة) ؟

ردت عليه ريمان بإيجاز وهي تبادلته نظرات فاترة :

yes- (نعم)

-اوكي .. !

.....

عند مدخل مبنى الرياض ،،،،

كان الصمت هو سيد الموقف طوال طريق العودة بين عاليا
وليلة .. إلى أن قطعتة الأخيرة قائلة بجدية :

-طب هانقول لمس إعتماذ ايه ؟

ردت عليها عاليا باختصار وهي محدقة أمامها :
-معرفش !

سألته ليلة مجدداً ب :
-يعني الممر هيتساب كده ؟

تتهدت بإنهاك وهي ترد قائلة :
-اسألها

وقفت ليلة في مواجهة رفيقتها ، ونظرت لها بتمعن وهي
تسألها باهتمام :
-في ايه يا عاليا ؟ مالك ؟

أشاحت بوجهها للجانب وهي تجيبها بضجر بائن:
-ماليش ، أنا كويسة

هزت ليلة رأسها معترضة وهي تضيف :
-كويسة إزاي بس ، انتي أحوالك متغيرة من ساعة ما آآ...

قاطعتها عاليا وهي تشير بإصبعها محذرة :
-لو هاتكلمي عن سيرة الشاب إياه يبقى بناقص

زمت ليلة شفتيها لتقول بجدية :
-ماهو مش طبيعي اللي بيحصل بينكم

صاحت بها عاليا بنفاز صبر :
-مافيش بينا حاجة

تسائلت ليلة بإستفهام وهي محدقة بها بتفرس :
-أومال آآ..

قاطعتها عاليا بصرامة وهي ترمقها بنظرات قوية وثابتة :
-شوفي يا ليلة ، من الآخر كده ده واحد حصل بيني وبينه
كام موقف كده صدفة ، وانتهوا ، مش حكاية عشان أعيد
وأزيد فيها

رفعت ليلة كفيها أمامها وابتلعت ريقها وهي تقول بتوجس :

-أوكي .. خلاص ، بلاش بس تقفشي !

تقوس فم عاليًا وهي تتابع بـ :

-لا بأقفش ولا غيره ، أنا عاوزة أركز في الشغل

-تمام .. تمام

ثم أضافت بجدية وهي تشير بعينيها :

-طب يالا نشوف هانعمل ايه في بقية الديكور

إبتسمت ليلة إبتسامة باهتة وهي تضيف :

-نسال سحر ممكن يكون عندها فكرة

-اوكي .. وأنا برضوه هسال فريال هي ساعات بتعين

حاجات تنفع كـ **Dicoration** في وقت الزنقة

-حلو أوي !

.....

في ردهة الإستقبال ،،،

وقفت ناظرة الرياض الأستاذة إعتماذ في وسط الردهة
وهي ممسكة بمفكرة ما في يدها ، وبيدها الأخرى كانت
تشير إلى إحدى الزوايا قائلة بجديّة :
-البانر ده معوج ، محتاج يجي يمين شوية

أومات السكرتيرة أية برأسها وهي تجيبها بخفوت :
-اوكي ، هاخلي الدادة تعدله

ثم تلفتت الناظرة حولها وهي تتسأل بصوت متصلب :
-فين الهدايا بتاعة الأطفال ؟

ردت عليها أية بهدوء تام :
-محطوپين هناك

مطت شفيتها قائلة بصوت جامد :
-اوكي ، يبقى فاضل أشوف الكلاسز وأتأكد إن كل حاجة تمام
-أها

تحركت الإثنتين في إتجاه القاعات الدراسية للتأكد من إنتهاء تجهيزها ..

.....

بعد برهة ، كان كل شيء قد أصبح جاهزاً من أجل إستقبال الأطفال ..

واستعد حارس البوابة الرئيسية لمبنى الرياض " سيد " لفتحها من أجل مرور الصغار للداخل ، والترحيب بهم في أول أيامهم الدراسية ..

دلف الصغار ومعهم أولياء أمورهم لداخل المدرسة ، ومروا عبر الممر الذي تم تزيينه بالبالونات والشرائط الالامعة .. ووقفت بعض المعلمات على الجانبين لتقدم الحلوى والساكر لهم ..

كانت الإبتسامات السعيدة والممزوجة بضحكات أسرة للأطفال تخطف قلوب الجميع ..

وتم إتقاط العديد من الصور التذكارية لهم في أول لحظاتهم الدراسية ..

كذلك تعالت أصوات الموسيقى الحماسية الخاصة بالأطفال بتضفي المزيد من السعادة والبهجة على الجميع ..

.....

أخذ آياز نفساً عميقاً ، وزفره على عجالة ، وبدى متوتراً للغاية وهو يترقب وصول أول الأطفال للقاعة .. ورغم مهارته وخبرته وحرفيته مع الصغار بالخارج ، إلا أنه مازال يرتبك ويتوتر بشدة مع أول يوم دراسي .. فمع مطلع كل عام ، يختبر قدراته مع الصغار ، ويحقق متعته برويتهم يكبرون نصب عينيه ..

راقبته رانيا بنظرات والهة ، وظلت تطلق تهديدات خافتة ، وتمتت مع نفسها قائلة :

-يا لهوي عليك وإنت ثقيل وراسي .. آآخ منك ، يا سلام لو تديني ريق حلو ، هناخد وندي سوا ، ونبقى حاجة !

تابعها ريمان بنظرات متأففة ، ولوت شفيتها وهي تغمم بخفوت :

-أبرد بني آدمة قبلتها في حياتي ، تعمل كوارث وتدعي البراءة ، معندهاش إحساس !

نظرت لها رانيا بغموض متسائلة بإندهاش :

-بتقولي حاجة يا ريمان

أشاحت بوجهها بعيداً عنها بعد أن رمقتها بنظراتها المحتدة
، ثم أجابتها بإيجاز :

No- (لا) !

لمح آياز جموع الأطفال وبصحبتهم ذويهم وهم يقتربون
من قاعته ، فأخذ نفساً عميقاً وحبسه في صدره لوهلة .. ثم
زفره على مهل .. ورسم على ثغره إبتسامة عريضة ..

إنتصبت رانيا في وقفته ، واقتربت من آياز ، و صاحت
بحماس ساخر :

-نستعد بقى للتتار اللي جاي

نظر لها آياز بإستغراب ، وردد عفويّاً :

-تتار !

رفعت حاجبيها للأعلى وهي تجيبه مازحة :

-أقصد الهكسوس يعني ، ده احنا هانشوف أيام عجب !

عبس وجهه وهو يسألها بحيرة :

-نعم؟

مطت شفيتها هامة :

-أصل انت متعرفش ، ده أوحش يوم في السنة كلها

نظر لها بإستغراب قائلاً :

-مش فاهمك

غمزت له وهي تقول بخفوت :

-هاتعرف دلوقتي يا مستر !

نظرت ريمان إلى كليهما بضيق ، وعقدت ساعديها أمام صدرها ، وظلت تهز ساقها بعصبية .. فالحوار الخافت بينهما يزعجها بشدة .. فشيطان نفسها وسوس لها بأنهما يعقدان اتفاقاً ما حولها ..

لذا سلطت أنظارها الحادة عليهما أكثر ، وضغطت على أسنانها وهي تحدث نفسها قائلة :

-يا ويلكم إنتو الاتنين لو عاملين رباطية عليا !

ولج أول الصغار إلى داخل القاعة ومعه والديه ، فهتفت
الأم بعاطفة واضحة وهي تضع يدها على كتف ابنها :
-يالاي بودي ، ده الكلاس بتاعك

أردف آياز قائلاً بإبتسامة خفيفة وهو محدق بالصغير :
-Welcome to school- (أهلاً بك في المدرسة)

نظر له الأب بإستغراب ، ولم يهتم به .. ثم أشار لصغيره
بيده ليجلس على إحدى الطاولات ..

اقتربت ريمان من الصغير وبدأت في مداعبته والترحيب
به بأريحية واضحة .. واستجاب الصغير لها وتعالته ضحكته
البريئة ..

حدق آياز في الأبوين بضيق ، ولكنه عاود النظر إلى باب
القاعة ليستقبل البقية ..

دلفت عائلة أخرى للداخل ، ومعها توأم من الذكور ..
فإنحنى آياز بجسده للأمام ومد يده لمصافحة أحدهما قائلاً
بإبتسامة :
-هاي !

رمقه الصغير بنظرات مذعورة ثم صرخ بحدة وقد إلتصق
بوالدته التي ضمته إلى صدرها ، وقالت بهدوء :
-اهدى يا سو .. متخافش يا قلبي ، عمو بيسلم عليك بس

بكي الصغير بصراخ جلي ، فقبلته والدته من جبينه ،
وظلت تربت على ظهره محاولة تهدئته ...
أشار الأب بيده لآياز قائلاً بجدية وناظراً إليه بجمود :
-معلش ممكن ترجع لورا شوية ، ابني خايف منك

ضيق آياز عينيه الحانقتين بشدة ، ورمق الأب بنظرات
قوية قائلاً :

-Excuse me (معذرة) ، بتكلمني أنا ؟

امتعض وجه الأب قائلاً بتذمر :
-في إيه يا كابتن ، بأقولك ابعده شوية ، انت مش شايف
ياسين مرعوب إزاي منك

قطب آياز ما بين حاجبيه ، وأردف قائلاً بثبات

-بس آآ....

قاطعته رانيا قائلة بصوت حاني :

-هاي سو .. !

نظر لها آياز بغل ، بينما تجاهلته هي دون قصد ، فقد تداركت الأمر سريعاً بحكم درايتها بنوعية الأباء هنا، وخمنت عدم معرفة الوالد بأنه يتحدث مع المعلم الخاص بابنه .. وخشيت من عدم تقبله للأمر لذا جثت على ركبتيها أمام الصغير ، ومدت يدها تصافحه قائلة بصوت طفولي :

-إزيك يا سو ؟ مش ده اسمك برضوه ؟

هز الصغير رأسه إيجابياً .. بينما هتف أخيه التوأم قائلاً :

-وأنا اسمي يوسف

صافحته بقوة وهي تهتف بثقة :

-هاي يوسف ، وأنا مس رانيا !

تابعها آياز بإنزعاج ولم يتفوه بكلمة .. وترقب وصول البقية ..

وبالفعل دخل للقاعة مجموعة من العائلات وبصحبتها الصغار .. وبدأوا في الإنتشار في أرجائها ...

بدى آياز كالتائه وسط ما يحدث ..

فلا أحد يعيره الإنتباه ، وغالبية الموجودين يتعاملون مع ريمان ورانيا فقط .. وهو كالغريب بينهم ..

حك طرف ذقنه بضيق .. ثم إعتدل في وقفته ، وبدأ يتجول بين طاولات الصغار مقدماً نفسه للجميع قائلاً بإبتسامة مصطنعة :

-هاي ، أنا مستر آياز ، How are you (كيف حالك ؟)

استجاب عدد محدود من الأطفال لحديثه ، وتجاهله الأكثرية إلى أن حانت لحظة إنصراف أولياء الأمور ..

فقد ولجت ناظرة الرياض للداخل ، وصاحت بصوت مرتفع ورسمي :

-بعد إذنكم ، الوقت المخصص للجلوس مع أطفالكم انتهى ،
وده ميعاد مستر آياز عشان يتعرف أكثر على الأطفال
ويتعامل معاهم !

بدى الإندهاش واضحاً على أوجه الحاضرين ، وصاح أحدهم بقوة :

-مين ؟

وأضاف آخر بإستغراب :

-إيبيه ؟

زمت إحدى الأمهات فمها بامتعاض قائلة :

-مستر !!

وتابعت أخرى بضجر :

-مدرس راجل ؟

تسائلت أخرى بتذمر :

-طب ازاي ؟

هتفت الأستاذة إعتماذ بثبات وهي ترفع حاجبيها للأعلى :

-اتفضلوا يا حضرات .. !

إعترض أحد الأباء بقوة قائلاً :

-مش ممكن

بينما تسائل آخر بصوت مصدوم :
-انتو إزاي تعملوا كده في أولادنا ؟

هتف والد آخر متسائلاً بحنق
-خذتوا رأينا قبل ما تجيبوا مدرس راجل لعيالنا ؟

لم يتوقع آياز أن يتلقى هذا القدر من الهجوم الشرس على
شخصه وهو لم يبدأ بعد ..

ولكن تلك هي طبيعة الشعب المصري الذي عهد أن تكون
المسئولة عن تلك المرحلة الحرجة والهامة في حياة الطفل
معلمة متخصصة .. وليس رجلاً !

صاحت الأستاذة إعتماذ بإصرار وقد بدى التجهم على
وجهها ب :

-لو سمحتم أي نقاش او اعتراض هنتكلم عنه برا ،
اتفضلوا !

صرخ والد ما بصوت محتج :

-دي مهزلة !

في حين أضافت والدة ما قائلة بسخط :

-أنا مش عارفة نوعية الإدارة اللي بنتعامل معاها ، بجد قلة
ذوق !

إستدارت الأستاذة إعتماذ برأسها للجانب ، وهتفت قائلة
بصوت رسمي :

-مستر آياز تعامل مع أطفالك !

رد عليها بخفوت وهو يبتلع ريقه :

-أوكي مس اعتماذا

وبصعوبة بالغة بدأ أولياء الأمور في الإنصراف واحداً تلو
الأخر خارج القاعة ، وتعلّى مع إنصرافهم صوت صراخ
الأطفال وصياحهم ..

ومنهم من نهض من مقعده الضئيل ليركض خلف والدته ،
فمنعته ريمان من الذهاب .. ومنهم من بكى بصوت مرتفع
يصم الآذان فأسرعت رانيا بتهديته وإهائه ..

أخذ آياز نفساً أكثر عمقاً وتأمل المشهد الفوضوي من
حواله برعب واضح .. فما هو مقبل عليه هو أهم لحظات
حياته المهنية !!!

.....

الفصل العشرون :

ابتلع آياز ريقه ، ورسم على وجهه ابتسامة بلهاء وعقد
العزم على التصرف بحكمة مع هؤلاء الصغار ..
اقترب من أحدهم ، والذي كان يبكي بغزارة ، ومد يده
ليصافحه قائلاً بخفوت :
-هاي ، أنا مستر آياز ، بلاش تعيط !

نظر له الصغير شزراً ، ثم فتح فمه الصغير ليفرغ ما في
معدته أمامه من كثرة البكاء ..
تراجع آياز للخلف مصدوماً ، ورمق الصغير بنظرات
متأففة .. وحدث فيمّل خلفه من فوضى بحنق ..

-آآي .. في ايه ؟

ضيق الصغير عينيه ورمقه بنظرات حادة ، وهتف قائلاً
بصوته الغاضب :

-هات مامي وإلا هاضربك !

فغر آياز فمه مشدوهاً بـ :

-نعم !

صاح الصغير بصوت باكي :

-مامي .. مامي !

خطت صغيرة فوق البقايا الملاقة على الأرضية ، ونظرت
إلى آياز بنظرات بريئة ، وهتفت بصوت شبه مسموع :

-عاوزة أعمل تويلت !

أفرغ الصغير عمر ما في معدته مجدداً ، ولكن تلك المرة
على الطفلة الصغيرة .. والتي بكت بصوت منزعج وهي
تقول :

-مامي ، البوي (ولد) ده رجّع عليا !

رأى آياز المنظر فشعر بالغثيان يجتاحه ، وأنه على حافة
الإنهيار العصبي .. فلم يتخيل أن يكون المشهد بالداخل
هكذا ..

صاحت الصغيرة مرة أخرى :

-عاوزة أعمل Pee

وظلت تتلوى بجسدها أمامه لتشير إلى حاجتها الملحة
للدخول إلى المراض ...

رمقته ريمان بنظرات متشفية ، فقد كان متعالياً بدرجة
كبيرة ، وها قد لقي ما يستحقه على يد هؤلاء الأطفال ، ولم
تحاول التدخل ، وتقوس فمها بإبتسامة مآكرة ، وإكتفت
فقط بتهدئة من معها من صغار بمهارة ..

لوت رانيا شفيتها مشمنزة ، وأدارت ظهرها له ، وتحدثت
مع بعض الصغيرات الجالسات إلى جوارها ...

.....

في ردهة الإستقبال ،،،

تزام أولياء الأمور حول الناظرة ، وتشاحنوا معها بسبب تعيين معلم ذكر لأطفالهم الصغار ..

حافظت الأستاذة إعتماذ على هدونها ، وردت على جميع أسئلتها الغاضبة ببرود تام ..

وفي النهاية صاحت بصرامة :

-أظن إننا كإدارة قادرين على توفير أمهر وأكفأ المعلمين هنا .. ومش هاتعرض مصلحة أطفالنا للخطر !

هتف أب ما قائلاً بحنق :

-بس محدش خد رأينا ، كان لازم على الأقل تخطرونا بده !

ردت عليه الأستاذة إعتماذ بجمود :

-مرحلة البيبي كلاس هي مرحلة تمهيدية للقادم ، ووجود مستر آياز فيها هاضيف للأطفال مش هايقفل

أردفت والدة ما قائلة بإحتجاج :

-لأ .. أنا مش مقتنعة بالكلام ده!!!

إتفتت ناحيتها الناظرة ، وحدقت بها لتتابع بهدوء :

-حضرتك يا فندم لازم تكوني واثقة فينا

هتفت الوالدة بضيق وهي تشير بكف يدها :

-إزاي هو هيتعامل مع بنتي ؟ هو عنده صبر ؟ احنا أكثر

ناس عارفين إن الرجالة مش بتطبق الأطفال ولا عندهم

صبر عشان يتعاملوا معاهم !

أجابتها بنبرة واثقة وهي ترفع حاجبها للأعلى :

-مستر آياز مدرب تماماً على التعامل مع الأطفال

هزت الوالدة كتفيها في عدم مبالة وهي تقول :

-مش مصدقة !

تابعت الناظرة بجدية :

-حضرتك هاتشوفي ده على مدار الأيام الجاية

سألته والدة طفل آخر بحزم :

-ولو جرى حاجة لأولادنا ؟ هاتتصرفوا ازاي ؟

سلطت الأستاذة إعتماذ أنظارها عليها ، وردت بهدوء :
-أنا المسئولة عن كلامي

.....

في الباحة الخلفية لمبنى الرياض ،،،

أشرفت جانبيت على تجهيز تلك المنطقة وإعدادها لتستقبل
الأطفال من أجل إكمال الإحتفال بأول يوم دراسي ..
حيث أسندت سماعات كبيرة وطاولات مختلفة ، وكذلك ألعاب
للصغار في كافة الزوايا ..

ووقف بعض الأشخاص يرتدون ملابساً تنكرية في أحد
الأركان منتظرين دورهم في إسعاد الأطفال والرقص معهم

تطلعت جانبيت إلى الورقة التي بحوزتها ، وتأكدت من وجود
كل شيء ..

ثم رفعت رأسها للأعلى وصاحت بصوت شبه مرتفع :

-استعدوا ، شوية والأطفال هايطلعوا

رد عليها أحد الأشخاص وهو يرفع إبهامه للأعلى :
-احنا جاهزين يا مس

أومات برأسها وهي تجيبه :
-تمام !

ثم أولته ظهرها ، وتحركت عدة خطوات للأمام ، وحدثت
نفسها بـ :

-ناقص المصور ، يا رب يكون جه !

.....

دلفت ليلة خارج المرحاض بعد أن غسلت كفيها ، ثم
سارت في اتجاه غرفة المعلمات ، ولكن أوقفها صوت
رجولي من خلفها قائلاً بجدية :

-لو سمحتي يا مس

استدارت ليلة برأسها للخلف لتجد شاباً طويلاً – ذو ذقن
خفيفة وبشرة سمراء يرتدي قميصاً كحلياً ، وبنظراً من
الجينز الرمادي – يقترب منها ..

توقفت في مكانها ، ورفعت حاجبها للأعلى لتسأله بجمود :

-إنت عاوز مين ؟

-حضرتك أنا المصور اللي جاي عشان حفلة الكي جي

هزت رأسها لتجيبه بهدوء :

-أها

بينما تابع هو حديثه بجدية :

-ممكن تدليني على مكان الأطفال لأن بصراحة أنا تايه هنا

ومش عارف أوصل لحاجة !

هزت رأسها موافقة ، وأشارت بعينيها وهي تقول بخفوت:

-اوكي .. تعالى معايا !

إبتسم لها مجاملاً وهو يرد :

-شكراً ليكي

ردت عليه بإيجاز وهي تتحرك للأمام :

-العفو

ظل هذا الشاب يعبث بـعدسة الكاميرا الخاصة به وهو يسير إلى جوارها ، بينما إختلست ليلة النظرات إليه من طرف عينها ..

ولفت أنظارها ماركة الكاميرا ، فرددت دون وعي :

-واو .. كاتون !

أدار الشاب رأسه في إتجاهها فوجدها محدقة به ، ونظر لها بإستغراب قائلاً :

-نعم !

تتحننت بخفوت ثم أجفلت عينيها قائلة بإحراج :

-احم .. آآ.. مافيش !

شعرت ليلة بالخرج منه ..وتوردت وجنتيها قليلاً خاصة وأنها شعرت بأنظاره عليها ..

ما لفت أنظارها هو نوعية الكاميرا التي يستخدمها .. وخشيت أن يكون قد أساء الظن بها ، واعتقد أنها تنظر إليه ..

ساد الصمت بينهما طوال الطريق ، فقطعه الشاب قائلاً بنبرة شبه متحمسة :

-على فكرة أنا اسمي أيمن رشوان ، وفوتجرافر على أدي
يعني !

هزت رأسها و ردت عليه بإيجاز دون أن تنظر نحوه :
-أها

سلط أنظاره عليها وهو يتابع بفضول :
-أنا أول مرة أشوفك هنا ، أنا على طول باجي حفلات
السكول بس ماشوفتكيش هناك !

تنهدت بخفوت وهي تجيبه :
-أنا شغالة من زمان هنا

مط فمه للأمام قائلاً :
-ممم .. جايز !

ثم إبتسم لها وهو يتابع :
-يمكن عشان دي أول مرة بأصور حفلات الكي جي !

إزداد تورد وجنتيها وهي تقول :

-احتمال

رفع أيمن الكاميرا في إتجاه ليلة ، وبدأ في ضبط عدساتها
نحوها ، وأكمل قائلاً بتحمس :

-على العموم هي فرصة اني شوفت حضرتك يا مس آآ...

نظرت هي نحوه لتتفاجيء به يلتقط لها صورة فوتغرافية ،
فعبست بوجهها قائلة :

-مس ليلة

إبتسم لها قائلاً بنبرة هادئة :

-واو .. Nice name by the way (اسم حلو بالمناسبة
(زي صورتك

ثم أدار الكاميرا في إتجاهها لتتنظر إلى صورتها التي بدت
جميلة للغاية ... فارتسمت إبتسامة رضا على وجهها ،
وهمست له :

-ثانكس !

رسم على ثغره إبتسامة بلهاء ، ورفع يده ليحك رأسه قائلاً
بعبت :

-سوري إن كنت صورتك كده ، أنا بأجرب العدسة والفلش ،
ولو حابة أمسحها عادي بالنسبالي !

ردت عليه ليلة بجمود :

-مافيش مشكلة ، بس بليز أنا مش حابة حد يشوفها

مط فمه بإستغراب ، ورمقها بنظرات متعمقة وهو يردد
لنفسه :

-مم.. غريبة !

أضافت ليلة قائلة بتوتر شبه ملحوظ في نبرتها :

-يعني مافيش داعي إن صورتني تكون مع حضرتك بدون
سبب

أوما برأسه وهو يرد عليها بجدية :

-أوكي .. As you like (كما تحبين) .. أنا هامسحها !

هزت رأسها قائلة بامتنان :
Thanks again- (شكراً مرة ثانية)

دار الإثنيين من رواق جانبي ، ومن ثم إلى ممر طويل .. ولم
تتبس ليلة خلال سيرهما بكلمة إضافية ..

ربما كانت تجيبه تلك المعلمة بردود مقتضبة إلا أنها كانت
شخصية مثيرة للإهتمام من وجهة نظر المصور أيمن ..

فعادة هو يقابل فتيات وشابات أقل تحفظاً معه .. وأكثر
أريحية في الحديث .. ويحاولن دفعه لإلتقاط صور مميزة
لهن ، والتواصل معه .. ولكنها على العكس كانت عابسة
الوجه ، مقتطبة الجبين ..

لم تنكر ليلة أن سيرها مع هذا الشاب الغريب أزعجها إلى
حد ما ووترها دون أن تعرف السبب .. فمن يراها معاً ربما
يظن أنهما على معرفة وثيقة ، خصوصاً أنه يتعمد الحديث
بأريحية شديدة مع غيره .. ويتصرف بطريقة تربكها ..
وتسبب لها الخجل ..

كذلك تورد وجنتيها وشعورها بحرارة تتبعث منهما يزعجها
أكثر .. فهي عادة ما تكون هادئة حينما تتحدث مع الغرباء ..
لكنها على العكس معه .. متوترة ومرتبكة ..

فرك أيمن طرف ذقنه ، وتسائل باهتمام محاولاً كسر
الحاجز الجليدي مع تلك المعلمة – غريبة الأطوار – قائلاً :

-انتي بتحبي التصوير على كده ؟

ردت عليه ليلة بجمود :

-يعني

أردف أيمن قائلاً بحماس :

-على فكرة مش لازم تكوني دارسة تصوير عشان تبقي
فوتجرافر ، أنا خريج تجارة انجليش ، بس التصوير هوايتي
المفضلة !

نظرت له بحذر وهي تضيف :

-بجد ؟

هز رأسه بتفاخر قائلاً :

-Yes .. Sure (طبعاً) .. دي أكثر حاجة بأحب أعملها ،
أكد سمعتي عن ستوديو " كيرياثف " ؟

لوت فمها قائلة بفتور :

-يعني مش أوي !

هز رأسه عدة مرات ليتابع بحماس أقل :

-ممم .. اوكي .. هو بتاعي ، أنا عملته بجهودي الذاتية ،

From scratch (من الصفر) !

-أها ..

دس أيمن يده في جيبه ، ثم أخرج ورقة ما منه ، ومد يده

بها نحوها وهو يقول بإهتمام :

-بصي ده الكارت اللي فيه العنوان بتاعه، ومكتوب لينك

البيدج ، خشي عليه وشوفيه !

تناولته منه بحذر وهي تجيب بإيجاز :

-اوكي

أردف أيمن قائلاً بنبرة واثقة :

-هايعجبك الشغل فيه أوي

طوت هي الكارت في يدها ، وتوقفت عن الحركة ثم أشارت بعينيها للأمام وهي تقول بجمود :

-طيب احنا وصلنا .. فرصة سعيدة يا مستر أيمن !

عقد أيمن ما بين حاجبيه في تعجب منها .. فهي لم تعطيه الفرصة للحديث أكثر معها ، فأجابها بهدوء :

-أنا الأسعد يا مس ليلة !

أولته ظهرها وهي تتابع بجدية أشد :

-عن اذنك

حك رأسه من الخلف وهو يرد عليها :

-اتفضلي ..!

تابعها بنظرات مراقبة إلى أن اختفت عن أنظاره ، فحدث نفسه قائلاً :

-غريبة المس دي ! ماشوفتش زيها ، عادي ممكن تكون نمره بتعملها زي أي واحدة أما تحب تعمل مكسوفة !!

هزت ليلة رأسها وهي تسير عائدة لغرفة المعلمات قائلة
بإمتعاض :

-انسان عجيب ، بيقولي انجازاته وهو مش عارفني أصلاً
!!

.....

الفصل الحادي والعشرون :

قارب اليوم الدراسي الأول على الإنتهاء ، والجميع يبدو
عليه الإرهاق جلياً ..

ولكن أكثرهم سخطاً وضيقتاً كان آياز .. فقد خالف الوضع
توقعاته بالمرّة ، وقابل أسوأ مجموعة من الصغار الذين
لم يكفوا عن البكاء أو الصراخ أو إحداث الفوضى ..

ولم تعاونه أي من ريمان أو رانيا بشكل تام .. فقد أرادت
كلتاها أن يخوض بنفسه التجربة ليدرك حقيقة الأمر ..

ضغط آياز على رأسه بكفيه ، وزفر بقوة وهو يصيح
بصوت مرتفع :

-Shsh كفاية !!

رفعت رانيا حاجبها للأعلى ولوت فمها وهي تضيف بخفوت
:

-بالراحة يا مستر ، الأطفال كده هاتعيط اكر

كز على أسنانه قائلاً بصوت محدد :
-اتخنقت !

زدات عينيها ضيقاً وهي تتابع بإندهاش :
-بالسرعة دي ، ده لسه أول يوم !

ثم حركت شفيتها للجانبين لتضيف بتعجب :
-أومال هاتعمل ايه بعد كده لما تبقى لوحدك معاهم !؟

وزع آياز أنظاره على الصغار ، وهتف بصوت ساخط
مشيراً بيده :
-هما دول اطفال !

وضعت رانيا يدها في منتصف خصرها ، ووقفت بشموخ
قائلة بمزاح :

-لألاً .. متقولش كده دول شياطين في هيئة أطفال !

ابتسم لها إبتسامة خفيفة وهو يقول :

-عندك حق

تنهدت رانيا بحرارة وهي تراه يتطلع لها ، ويبادلها الحديث بأريحية ، فأدارت وجهها في اتجاه ريمان ، وأرسلت لها نظرات متباهية فزادوجه الأخيرة إحتقاناً .. وبدأت على وشك الإنفجار من الغيظ ..

فبعد كل شيء .. هي لم تأخذ حقها بعد منها .. ورانيا تتعمد إستفزازها بصورة مبالغ فيها ..

تحرك طفل صغير بالقرب من آياز ومد يده بيضة مسلوقة وقال ببراءة :

-آمو (عمو) قشرلي دي

رد عليه آياز بنفاز صبر وهو يتفحص الطفل الصغير :

-اسمي مستر آياز يا حبيبي

هز الصغير رأسه ، وقرب البيضة من فمه ليقوا :

-ماسي (ماشي) ، هام يالا

ضيق آياز عينيه في إستغراب واضح ، وتعجب مما يفعله الصغير ، وسأله بفضول :

-انت بتعمل ايه ؟

رد عليه الطفل ببراءة :

-عاوز أكل (E .. egg) بيضة .. !

سألته رانيا بغرابة وهي تدعك فروة الصغير بكفها :

-انت بتسمع اللي حفظته ؟

ابتسم لها الصغير قائلاً بصوت طفولي :

-أنا خدتها برا في الدرس مع مس هالة ، هي بتحفظها لي كده

أرجعت رانيا رأسها للخلف ، وغمغمت بخفوت :

-أها .. قولتلي درس بقى ، انت بدأت من بدري

هز آياز رأسه بحيرة ، وتسائل بنزق :
-أنا مش فاهم بتقول ايه ، يعني انت عاوز تاكل الـ Egg دي ؟

أجابه الصغير بوضوح :
-أه ..

مالت رانيا على آياز ، ووضعت يدها بالقرب من فمها
لتهمس له بجدية :

-بلاش تقشرله البيضة ، صدقتي هاتقلب بزفارة والكلاس
ريحته هتبقى وحشة ، وحاجة تجيب اللي في بطنك

إمتعض وجه آياز ، وبدى على تعبيرات وجهه علامات
الإشمزاز .. فيكفيه ما لاقاه من فوضى في اليوم الأول ..

لذا دون تردد ابتسم للصغير ، وحاول أن يقنعه بالعدول
عن تلك الفكرة قائلاً بهدوء :

-بس ماينفمش ، دي ريحتها مش حلوة ، وهتخلي ايدك
كمان ريحتها مش ظريفة

لوى الصغير فمه بضيق ، وضرب الأرض بقدمه قائلاً
بإصرار وهو عابس الوجه :
-أنا بأحبها ، أقشرهالي بقى !

أدرك آياز أنه لن يتمكن من إقناع الصغير بسهولة ، لذا
حاول البحث عن بديل آخر ، فسأله بتلهف :
-طب معاك ايه تاني ؟

رد الطفل قائلاً ببراعة :
-معايا بطاطس محمرة

التوى فم رانيا لتتمتم بهمس :
-كمان ، يعني زيت وتلزيق وعكة ولبصة !

ضغط آياز على شفثيه .. ولم يعقب ، بينما أكمل الصغير
حديثه قائلاً :

-أها ، بس مس آرف أمسكها بالسوكة (مش عارف
أمسكها بالشوكة) فمسكتها بإيدي دي !

ثم مد الصغير يده ، ومسحها على بنطال آياز الذي تسمر
في مكانه مصدوماً مما فعله ..

وإتسعت مقلتيه بغضب بعد تلك الحركة العفوية من الطفل
الذي أكمل :

-سايف (شايف) ملزقة إزاي !!

إحتقتت مقلتيه بنيران متأججة .. وحدث نفسه بغل بـ :

-الظاهر إن الماستر اللي أخذتها مش هاتنفع هنا أبدا ، آآه
.. كان عندك حق يا رامي !

.....

في غرفة المعلمات ،،،،،

مدت سالي ساقياها للأمام بعد أن ألقت بجسدها المنهك
على الأريكة ، ثم تأوهت بصوت شبه مرتفع قائلة :

-مش قادرة ، ماعدتش لحظة واحدة من ساعة ما العيال
جوم

جلست سارة إلى جوارها ، وقالت بنزق :

-هو في حد هنا بيرتاح !

أومأت سالي برأسها موافقة ، وأضافت قائلة :
-على رأيك .. ماتخليكي جدعة وتعميلي نسكافيه !

ردت عليها سارة وهي تتمتع بذراعيها في الهواء :
-أنا عاوزة اللي يشلني للبيت ، أه يا ضهري !

أكلمت سالي حديثها بجدية :
-تحسي إن احنا عجزنا قبل أوانا

مالت سارة على جانبها لتسند وجهها على مرفقها وهي
تقول :

-أه والله ، بقينا لا نصلح لأي شيء !

زمت سالي فمها لتقول بضيق :
-ما هي المدرسة دي مش بترحم حد

تدخلت نادية في الحوار قائلة بحماس غريب :
-يا آنسات ، احنا هنا زاهدات في العلم والعمل

أشارت لها سالي بيدها لتتهف بإنزعاج :
-أبوس أيدك يا نادية مش وقت خطبك العصماء دي ، احنا
عاوزين نرتاح شوية قبل ما ريا تهجم علينا !

ضيقت نادية عينيها بحدة ، وأردفت قائلة باهتمام :
-قصدك آآ...

هزت سالي رأسها لتقول بضجر :
-اه هي .. وبلاش نرغي كثير لأحسن بتيجي على السيرة

.....

في مكتب السكرتارية ،،،

نفخت ليلة بضيق واضح وهي تنظر إلى أية التي حدثتها
بهدونها المعتاد ب :
-مش ذنبي والله يا ليلة ، مس اعتماد هي اللي عاوزة كده

أردفت ليلة قائلة بتذمر واضح :

-يعني كل الناس هتاخذ بريك وترجع بيتها ، وأنا اللي
المفروض أروح المالتيميديا أشوف الصور ، دي مش
شغلتي

مطت أية فمها قليلاً لتبرر :

-بس هي عارفة إنك بتعملي شغل حلو مع الفوتوشوب

فركت ليلة جبينها برفق وهي تقول :

-ماشى ، بس كهواية في وقت فراغي ، مش احتراف يعني !

رمشت أية بعينيها وهي تضيف بهدوء :

-هي عاوزة تتأكد إن الأطفال كلهم متصويرين قبل ما ننزل
الألبوم على الصفحة ، كمان الصور اللي مش مناسبة
تتحذف ، والتعليقات والوصف يتكتب صح مش يكون فيه
أخطاء

زمت ليلة شفيتها لتهتف بضجر :

-طيب ما تأجلها لبكرة !

هزت أية رأسها نافية مبررة :

-مش هاينفع ، لأن بكرة في تصوير للميني فان داي

ركلت ليلة الأرضية بقدمها وهي تزفر بصوت مرتفع :

-يووه ، برضوه !

دلفت عاليا إلى داخل غرفة المكتب لتجد الاثنتين تتجادلان

، فتسائلت بفضول :

-في ايه يا بنات ؟

تهدت ليلة بإنهاك لتجيبها :

-مس إعتاد عاوزاني أقعد في المالتيميديا أظبط صور

النهاردة مع بتوع ال-IT ، ودي حاجة متخصصينش

إلتوى فم عاليا بصورة واضحة لتردف بصوت ساخط :

-هي الست دي مش بترتاح ، بتدور على أي حاجة تشغلنا

بيها وخلص !!!!

أشارت ليلة إلى أية بيدها وهي تقول بنبرة شبه منفعلة :

-أهوو شوفتي ، عاليا زيي

رفعت أية كفيها للأعلى وهي تكمل بهدوء نسبي :
-أنا ماليش دعوة ، خلاص خشي قوليلها الكلام ده

أردفت ليلة قائلة بضيق :
-هي بتدي فرصة لحد يتكلم معاها

ربتت عاليا على ظهر رفيقتها ، وإبتسمت لها بخفوت قائلة :
-معلش يا لولو ، حاولي تنجزي وأنا هستناكي نروح سوا !

نظرت لها ليلة بنظرات عادية وهي ترد عليها بارهاق :
-لأ يا بنتي ، متعطليش نفسك ، أنا هاروح ، وربنا يعيني بقى

ضغطت عاليا على كف رفيقتها لتردف بحماس زائف :

-أدها وأدود يا لولو

-أها

رفعت عاليا حاجبيها للأعلى ، وتابعت بجدية :

-هاسيبك بقى وأروح أشوف بقية الشلة

ردت عليها ليلة بجمود :

-اوكي

أشارت عاليا بيدها وهي تتجه خارج الغرفة :

-نتكلم واتس بقى

-تمام ، باي !

-سلام

ثم عاودت ليلة النظر إلى أية بعتاب قبل أن تسحب حقيبتها
وتعلقها على كتفها لتتجه هي الأخرى إلى الخارج

.....

مدت نشوى يدها بعلبة عصير إلى رفيقتها المقربة رانيا ،

وسألتها بفضول :

-ها وبعدين ؟

ارتشفت رانيا أكثر من منتصف العلبة مرة واحدة ،
وتجشأت قائلة :

-بس يا نوحا ، كلمة من هنا ، وغمزة من هنا وفرستك
البت ريمان

حركت نشوى حاجبيها في إعجاب مضيضة :
-جبارة ، مالكيش حل !

إنتصب رانيا في جلستها لتكمل بزهو :
-أومال ايه ، ده أنا رانيا !

ثم رفعت كفها للأعلى ، وأشارت إلى أصبعها قائلة :
-وقريب أوي هتلاقي الخاتم بتاعه في ايدي
-يا مسهل يا رب

.....

من ناحية أخرى ، جمع آياز متعلقاته الشخصية ،
ونفض بنطاله من بقايا الصغار عليه ، ثم وضع الهاتف على
أذنه بعد أن اتصل بابن خالته رامي ، وانتظر للحظات قبل أن
يجيبه الأخير ، فهتف بتعب :

-انت فين ؟

رد عليه رامي بنبرة ضجرة :

-أنا في المعرض

فرك آياز رأسه عدة مرات متسائلاً بضيق :

-ايه ده يعني مش هاتعدي عليا ؟!

رد عليه رامي بتهيدة مطولة :

-لأ للأسف مش هاينفع .. عندي شغل أد كده ، والحاج

سرحان مش بيرحم

هز آياز رأسه بخفة مكماً بفتور :

-أها .. ولا يهملك ، أنا هاخذ " أوبر " وهارجع على الفيلا

-معلش يا إيزووو .. المهم انت الشغل تمام معاك ؟

صر آياز على أسنانه قائلاً بحنق :

-مش قادر أقولك على اللي شوفته

أردف رامي ساخراً :

-واضح إنك شوفت العجب ، أما ارجع على الغدى احكي لي

-أوكي .. مش هاعطك ، سلام

-سلام !

أنهى آياز المكالمة ووضع الهاتف في جيبه ، ثم سحب
حقيبته الشخصية خلف ظهره ، وإتجه نحو بوابة مبنى
الرياض وهو يستعيد في ذاكرته أحداث أول تجاربه مع
الأطفال

.....

في غرفة الوسائط المتعددة (المالتيميديا) ،،،،

طرقت ليلة باب الغرفة قبل أن تدلف للداخل ، ثم جابت
بعينها المكان بحثاً عن أي شخص بها ، فوجدت الغرفة
خالية ، فتدلى كتفيها في تعب .. وزفرت بإنزعاج ، وهي
تحدث نفسها متذمرة :

-يعني مش في حد هنا ، طب أعمل ايه ، أمشي ولا أقعد
شوية !؟

نظرت إلى ساعة هاتفها المحمول ، وأكملت بضجر :
-طيب هاستنى 5 دقائق ولو مافيش حد هاكلم مس اعتماد
وأبلغها وهي تتصرف !

أسندت حقيبتها على الطاولة ، وسحبت مقعداً وجلست
بالقرب من الحاسوب الرئيسي بالغرفة .. ووضعت ساقها
فوق الأخرى وظلت تهزها بعصبية .. ثم أمسكت بهاتفها
المحمول وظلت تعبت به ...

بعد لحظات سمعت صوتاً ذكورياً مألوفاً يأتي من الخلف قائلاً
بحماس :

-سوري ، أنا كنت بأجيب الفلاشة من الـ آآآ...

قاطعته ليلة بجدية وهي تضع هاتفها داخل حقيبتها :
-طب بسرعة يا مستر عاوزين نخلص صور الكي جي
عشان مش حابة أتأخر

ثم أدارت رأسها ببطء ناحية صاحبه ، وفغرت شفيتها
مصدومة حينما رأت أن المتحدث هو المصور أيمن الذي
ابتسم لها قائلاً بسعادة :

-واضح إن حظي حلو النهاردة ، وهانشتغل سوا

لم تفق ليلة من حالة الذهول المسيطرة عليها ، وغمغت
بتلعثم :

-هاه ، آآ. إنت!!!!

.....

الفصل الثاني والعشرون :

في غرفة الوسائط المتعددة ،،،

أفاقت ليلة من حالة الصدمة التي إنتابتها سريعاً ،
وإعتدلت في جلستها على المقعد ، وتشنج كتفيها وهي
تتسائل بضيق :

-حضرتك بتعمل ايه هنا ؟

ابتسم لها أيمن وهو يغلق باب الغرفة مجيباً إياها :

-أنا شغال Part-timer (دوام جزئي) هنا

عقدت ما بين حاجبيها ، و هتفت مندهشة :
-مش فهماك بصراحة !

لوح بيده في الهواء وهو يفسر لها بهدوء :
-يعني لما الإدارة هنا بتحتاجني بأجي
-مممم...

ثم إزدادت إبتسامته الواثقة إتساعاً وهو يضيف :
-عامه هي فرصة حلوة إني أشوفك تاني في نفس اليوم

عبست بوجهها أكثر متممة بهمس :
-بالنسبالي لأ !

قطب جبينه وهو يسألها مستفهماً :
-بتقولي حاجة ؟

نظرت له بحدة ، ثم أجابته بنفاذ صبر :

-عاوزه أنجز الصور بتوعنا

حك أيمن جبينه بإصبعيه ، وتحرك نحوها قائلاً :
-بس دول قدامهم وقت

زفرت من الضيق وهي تتسائل بـ :
-أد ايه يعني ؟

فرك طرف ذقنه بكفه ليجيبها بغموض :
-ممم.. يعني نقول ساعة اتنين !

إتسعت مقلتيها في صدمة واضحة ، وهتفت بسخرية :
-اييييه ؟ ليه هاتحمضهم وتطبعهم !

ابتسم لها قائلاً :
-مش كده ، بس هاعمل فلتره للصور وآآ...

قاطعته بصوت شبه منفعل :

-لألاًلألاً .. أنا مش فاضية للحوار ده كله ، انت نزلهم زي ما
هما وخلص

استغرب أيمن من حدثها في التعامل معه ، فحاول أن يكون
هادناً بقدر المستطاع وهو يتابع بجدية :
-مش هاينفع ، كده يبقى آآ....

قاطعته مجدداً بصوت محتد وهي تشير بإصبعها :
-شوف يا كابتن أنا already (تقريباً) متأخرة ، ومش
عاوزه أضيع وقت أكثر من كده

اقترب منها أيمن ، ورمقها بنظرات شبه معاتبة قائلاً :
-كابتن ! لحقتي تنسي اسمي يا مس ليلة ، شوفتي أنا فاك
اسمك ازاي !

توردت وجنتيها قليلاً وهو ينطق بإسمها على شفتيه ،
وحاولت أن تخفي إرتباكها بالصياح بحدة :
-هو احنا جاين نتعرف ؟ ده شغل ، ولولا الحظ مكونتش
شوفتني

أشار لها أيمن بكفيه قائلاً بحذر :

-تمام .. تمام .. مافيش داعي للنرفزة ، انا هاعمل كل حاجة
وتقدري تمشي

هزت رأسها نافية وهي تلوي شفيتها لتجيبه بإصرار :

-لا ، هاستنى لحد ما أشوف الصور

مط فمه في حيرة ، ثم أخذ نفساً عميقاً وزفره على مهل ،
وتابع بصوته الرخيم :

-طيب ، أنا هحاول أخلص بدري

-طب يالا

-أوكي .. ممكن بس آآ..

ثم أشار لها بعينيه ، فقد كانت ليلة تسد عليه المدخل إلى
الحاسوب ، فضيقت عينيها أكثر لتسأله بإستغراب :

-ممكن ايه ؟

ضغط على شفتيه قائلاً بصوت أجش :

-حضرتك ممكن تديني Space (مساحة) أقعد فيها ، لأنني
مش عارف أعدي

إزدادت حمرة وجنتيها ، وتحركت بالمقعد للخلف وهي تقول
بحرج :
-احم .. أها .. اتفضل

نظر لها بامتنان قائلاً بإيجاز :
-شكراً

فتح أيمن جهاز الحاسوب ، وقام بإيصال " ذاكرة
الكاميرا " عن طريق الوصلة الخاصة بها ، ثم نقل الصور
التي التقطها بمهارة وحرفية إلى ملف خاص بالجهاز ..

إستدار هو برأسه ناحيتها ليتأمل وجهها عن كثب ..
فرمقها بنظرات إعجاب لهيئتها المنمقة رغم بساطتها ، ثم
أدرك أنه قد خرج عن سياق مهامه الوظيفية ، وكذلك خشي
أن توبخه بحدة إن رآته ينظر لها بتفحص .. فهتف بجمود :
-حضرتك بصي على الصور ، وقوليلي رأيك في اللي يتحط ،
وأنا هافلترهم براحتي بعد كده

لم تنظر ليلة نحوه ، واجابته بإقتضاب :

-اوكي

تفقدت هي الصور الفوتغرافية على عجالة ، خاصة وأنها كانت تشعر بالحرج الشديد بسبب قرب مقعدها من مقعده وإحتمالية تلامس ذراعيهما إذا ما مال هو عليها- أو حدث العكس - دون قصد ..

جاهدت لتبقى دون أي إرتباك بادي عليها ، ثم تتحننت بخفوت وهي تتشوق ب :
-تمام ، مافيش حاجة وحشة

ابتسم لها بغرور وهو يجيبها بنبرة متفاخرة :
-ده شغلي يا مس ليلة

وظل محققاً بها لعها تنظر إليه ، لكنها لم تلتفت ولو لثانية ، وظلت أنظارها مسلطة على شاشة الحاسوب ..
وفجأة هبت واقفة من مقعدها لتقول بجدية :
-اوكي يا مستر ، أنا مش هاعطك أكثر من كده

نهض أيمن هو الآخر ليردف قائلاً بإستغراب أعجب :
-ولا عطة ولا حاجة ، بالعكس آآ...

لم تمهله هي الفرصة لإتمام جملته ، حيث قاطعته ببرود
:
-سلامو عليكم

هز كتفيه في تعجب من حالها الغريب ، ورد عليها بهدوءه
المعتاد :
-و عليكم السلام !

وتابعها بأنظاره إلى أن أغلقت الباب خلفها ، فوضع يده على
رأسه ، وفركها وهو يحدث نفسه مبتسماً :
-حقيقي نرفوزة وروحها في مناخيرها بس يجي منها !

.....

في فيلا سرحان عليه ،،،

دفع آياز الأجرة للسائق الذي أوقف سيارته أمام
البوابة الخارجية للفيلا ، ثم توجه للداخل بخطوات مرهقة
..

كما كان يبدو على وجهه التعب والإرهاك ..
وما إن رآته وردة وهو مقبل عليها بحالته تلك حتى انتفضت
من مكانها فزعة ، وصاحت بقلق :
-يا حوستي ، سي إزاز ؟ مالك ياخويا ؟

نفخ من الضيق ، ثم أشار بكفه قائلاً :
-بليز فلاور ، Leave me alone (دعيني لشأني)

فغرت فمها في حيرة متسائلة بفضول :
-ليفة !!! هو إنت عاوز تستحمي ؟

زفر بانزعاج بائن قائلاً :
-أووف، لأ أنا مش ناقصك

تتهدت وردة بحرارة ، ثم أسبلت عينيها ، ورمقتها بنظرات
عاشقة ، وهتفت بنزق :
-ماتقولي على اللي تعبك وأنا أريحك

لوى فمه قائلاً بسخط :

No, thanks- (لا .. شكراً)

هتفت بحماس بادي في كل تفصييلة من وجهها :
-طب أنا عندي اللي يهدي بالك ويهديك العاصي

تتهد بإنهاك قائلاً :
-فلاور ، نتكلم بعدين

أسبلت عينيها بغرابة لتقول بتلهف :
-يا سي إزاز ، أصل انت حليوة وألاجة ، وتلاقي حد عينه
الله أكبر تفلق الحجر رشقك عين من إياهم .. !

عقد حاجبيه في عدم فهم وتسائل بنفاز صبر :
- What ?

لوت ثغرها لتجيبه بجدية :
-العالم السّو مش سايبين حد في حاله ، أنا هاقولك على
الوصفة اللي تحميك من عينهم السوداء

سألها آياز بنبرة مستفهمة وهو محقق بها :
-وصفة ؟ ده حاجة تبع الأكل ؟

لوحث بيدها أمام وجهه موضحة بإهتمام :
-أكل ايه بس يا سي إزاز ، ده حجاب بيعمله الشيخ مبروك ،
حاجة تكفيك شر المستخبي ، وتصد عنك آذاهم

بدى على وجهه الإندهاش ، فسألها بفضول :
-آدى ! مين دول ؟

أمسكت بياقة عباؤها البسيطة وهزتها في الهواء وهي
تهتف بخوف :

-حابس حابس يجعل كلامنا خفيف عليهم !

ثم مالت بجسدها للأمام قليلاً ، وهمست بحذر :
-دول أسيادنا اللي تحت الأرض ، حوش يا اللي بتحوش !

رد عليه ببرود وهو يرفع حاجبه للأعلى :
-عفاريت يعني

ضربت على فمها بكف يدها وهي تتوسله بذعر :
-ششششش .. لأحسن يؤذوك

إمتعض وجهه أكثر ، وزاد عبوساً ، ثم صاح بضيق :
-فلاور .. وسعي ، أنا مش ناقص stupidity (غباء) على
آخر اليوم

حاولت هي أن تتلفظ ما قاله ، فقالت بتلعثم :
-س..آآ.. هاه

أشار لها بيده وهو يتحرك مبتعداً :
-روحي لحالك

تهتدت بعمق وهي محدقة بنظرات عاشقة ، ثم غمغمت مع
نفسها قائلة :

-حالي هو إنت يا سي إزاز ، ياخواتي ليه حجاب الشيخ
مبروك مجبش نتيجة معاك ، لأحسن يكون ضحك عليا
واستغلني ولطش المعلوم ! نهاره طين !!!!

.....

قابل آياز خالته السيدة سوزان أثناء صعوده على الدرج ، فسألته الأخيرة بإهتمام واضح :
-إيه الأخبار معاك يا حبيبي ؟

رد عليها بتعب وهو يحاول الإبتسام :
good-

حدقت هي فيه بنظرات متفرسة ، ثم أردفت قائلة بإهتمام :
-مش باين عليك

أخذ آياز نفساً عميقاً ، وأجابها بحزن :
-بصراحة مكوناتش أتوقع الوضع في مصر بالشكل ده

ردت عليه خالته بصوت هاديء وهي تربت على ذراعه :
-كان لازم تجرب عشان تصدقنا يا آياز !
-اها

أكملت حديثها قائلة بجدية :

-لو مش عاوز تكمل ، سيب الشغل فوراً ، واشتغل مع عمك
سرحان، هو هيفرح بده أوي

هز رأسه نافياً وهو يرمش بعينيه :

-لأ ، أنا مش من النوع اللي بأستسلم بسهولة
-ربنا معاك

Thanks-

ابتسمت له سوزان قائلة :

-طب إرتاح إنت ، وهابعتك وردة بالغدي

هتف آياز بتوسل وهو يكمل صعوده على الدرج :

-لأ ، بليز بلاش فلاور ، أنا هرتاح من غير حاجة

إزدادت ابتسامتها المشرقة وضوحاً مضيئة :

-دي بنت لذيذة

رد عليها بجدية :

-هي حلوة وكويت و nice بس أنا مش آآ...

في نفس التوقيت كانت وردة في طريقها للمطبخ حينما
استمعت مصادفة إلى حديثه الأخير عنها ، فرقص قلبها
طرباً لكلماته ، وتسارعت دقاته فرحة ، وتهللت أساريرها
وهي تحدث نفسها بسعادة :

-هـاه ، سي إزاز بيقول عني حلوة ، بركاتك يا شيخ
مبروووك ، ده أني لازم أروحله أتشكرله بنفسي ، الحجاب
اشتغل يا ناس

ثم أسرع بالركض في إتجاه المطبخ .. بينما تابعت سوزان
حديثها بنبرة هادئة :

-أوكي يا حبيبي ، أنا موجودة لو عوزت حاجة
-تمام

أخرجت وردة الحجاب من أحد الأدراج ، ثم قبلته بعمق ،
وضمته بكفيها إلى صدرها ، وأغمضت عينيها ، وتهتت
بحرارة لتتمتم مع نفسها ب :

-هاح .. ميتا (إمتى) تيجي البلد وتطلبني من أهلي يا
سي إزاز ، ونتجوز ونجيب أورطة عيال من عينتك دي يا
قمر !

.....

في المساء ،،،،

اشتعل موقع " الواتساب " برسائل المعلمات حول ما
دار اليوم والضغط الشديدة في أول أيام الدراسة ، وتشعب
الحوار الرئيسي إلى حوارات خاصة ثنائية عن بعض
المواقف الشخصية

عقدت عاليا ساقها معاً ، وتتهدت بتعب وهي تعيد وضع
الوسادة خلف رأسها، ثم طبعت على لوحة المفاتيح
الخاصة بهاتفها المحمول بعض الكلمات الخاصة بحوارها
التالي ..

-عاليا : ((لا بجد أوفر))

-ريمان : ((أنا كنت هاتفرس ، ده زي ما يكونوا قاصدين
يغيظوني))

-عاليا : ((متكبريش الموضوع ، هما مش يستهلوا منك
تضيعي وقتك في التفكير))

- ريمان : ((مضايقة يا عاليا ، انتي مش شوفتي شكلهم
سوا))
-عاليا : ((ما إنتي عارفة رانيا ، هاتجيبه من برا ، هو ده
طبعها ، بتريل على أي واحد))
-ريمان : ((حلوة الكلمة دي))
-عاليا : ((فكك إنتي منها ، وركزي في شغلك ، بكرة يومك
))
-ريمان : ((أيوه ، أنا متفائلة خير))
-عاليا : ((إنتي جايلك حبة اطفال سكر أصلاً ، كلهم
ممتازين وشاطرين))
-ريمان : ((طبعاً ، دول معروفين من السنة اللي فاتت))

.....

- على الجانب الآخر ، سردت ليلية لسارة موقفها الغريب
مع المصور أيمن ، فكتبت لها الأخيرة ،،،،،
-سارة : ((ماتحطيش في بالك ، كله عادي))
-لييلة : ((أنا خايفة بس يفكرني بنت من إياهم ، من اللي
بيتمحكوا في أي واحد والسلام))

-سارة : ((ليه إن شاء الله ؟ موقف وعدى ، انسيه ،
وبعدين هاتشوفيه تاني فين ؟ هو خلاص يوم في الكي جي
وانتهى))
-ليلة : ((على رأيك !))

.....

في إحدى المناطق الصحراوية المخصصة لسباقات
السيارات ،،،

جلس رامي على مقدمة سيارته ، ورفع العلبة المعدنية
للمشروب البارد على فمه ليرتشف منها القليل قبل أن يكمل
حديثه الجاد مع آياز ب :
-ما أنا من الأول قايلك ، شغل الحضانات ده أخره تنضيف
ودادة

لوى آياز فمه ، وعقد ساعديه أمام صدره وهو مستند
على مقدمة السيارة إلى جواره ، وظل محققاً في الفراغ
أمامه مجيباً إياه بفتور :
-افتكرت إنك بتشتغلني !

لكزه رامي في كتفه بخفة ، وبرر قائلاً
-أنا حذرتك ، وإنت مصدقتيش

تتهد بإحباط ليضيف بعد أن أرخى مرفقيه ، ودس كفيه في
جيبى بنطاله :

-حاسس إن المحصلة في النهاية زيرو !
-معلش

أخرج آياز كفيه من جيبه ، ثم فرك وجهه بتعب ، وهتف
قائلاً بتقرز :

-إنت .. إنت لو تشوف شكل الولد وهو بيمسح فيا إيده
الملزقة ولا الحاجات الخضرا الغريبة اللي نازلة من مناخيره

نهره رامي قائلاً بإشمزاز :

-كفاية يا عم ، مش عاوز أشوف ولا أتخيل !

نفخ آياز ، وتابع قائلاً بتأفف :

-ده مشهد تعذيبي نفسي بحت من تنفيذ حنت أطفال مش
واصلين لركبتك !

أضاف رامي قائلاً بمزاح :

-ماهو الطفل عبارة عن كائن طفيلي لزج يعيش ويتعايش
على الآخرين

-ده الوصف السليم ليه

ربت رامي على كتف آياز قائلاً :

-الله يعينك ، هما المدرسات بيتهبلوا من قليل

استدار آياز برأسه لينظر إلى ابن خالته قائلاً بسخط :

-أنا محتاج أتعمم كل يوم قبل وبعد السكول

ابتسم له رامي وهو يرد عليه مازحاً :

-خلي في جيبك ديتول .. أو أقولك هات فينيك بيحيب نتيجة
حلوة !

احتقتت عينيه بغيظ وهو يوبخه :

-استتى يا ايزو .. هاسكت والله !

زفر آياز مجدداً ، وجاب بعينيه المكان ليتأمل ساحة
السباق ..

في حين عض رامي على شفثيه ، وتردد في الإستفسار منه
عن عاليا التي تشغل تفكيره مؤخراً ، فهو لا يحب أن يفصح
عما يخصه ..

ولكنه حسم أمره بالسؤال عنها ، لذا أخذ نفساً عميقاً ،
وأخرجه على عجالة ، وتتحنح قائلاً بخفوت :

-احم .. آآ.. أنا كنت عاوز أسألك عن حاجة كده

إلتفت آياز نحوه ، وسلط نظراته الغامضة عليه متسائلاً بـ
:

-حاجة ايه ؟

ابتسم رامي ببلاهة ليردف قائلاً :

-الأبلوات معاك اخبارهم ايه ؟

-مش فاهمك

أوضح رامي أكثر سؤاله الغامض بـ :

-الميس ، المدرسة يعني !

هز آياز كتفيه في عدم مبالاة ، واجابه بفتور :
-عادي

سأله رامي بفضول أكثر وهو يرمقه بنظرات مترقبة :
-طب اتعرفت على حد فيهم ؟
-مش أوي ، هما أصلاً مش الاستايل بتاعي
-تمام

أدرك رامي أنه لن يتمكن من معرفة ما يريد ما لم يسأله
مباشرة ، لذا سأله بنزق :
-طب ..آآ.. طب شوفت مدرسة هناك اسمها عاليًا !؟

أجابه آياز باستغراب بائن على وجهه :
-عاليًا !
-اها

ثم عاود سؤاله بفضول :

-بتسأل ليه ؟

تحاشي رامي النظر إليه حتى لا يفتضح أمره ، ثم رد عليه
مدعياً عدم المبالاة :

-عادي يعني ، أصلها معرفة لحد عندي في المعرض

غمز له آياز بنظرات ذات مغزى قائلاً :

-ممم .. عليا !؟

رسم رامي على وجهه علامات عدم الإكتراث ، ودافع بنبرة
شبه فاترة :

-لا عليا ولا عليك ، ده السؤال لله يعني ، مش حاجة ،
فمتخدش في بالك !

أجابه آياز بهدوء رغم عدم إقتناعه بما قاله الأخير :

-بص هو اللي اعرفه ان في واحدة اسمها رانيا ، بس راغية
بشكل رهيب !

هتف رامي بتهلف وقد لمعت عينيه :

-لأ هي اسمها عاليا مش رانيا

هز آياز كتفيه في حيرة قائلاً :

-مش عارف بصراحة ، ممكن أكون شوقتها بس معرفش
اسمها

أراد رامي أن ينهي الحوار سريعاً حتى لا يشك ابن خالته فيه
، لذا اتجه نحو سيارته ، وقال ببرود :
-بأقولك ايه ، كبر دماغك !

ثم وقف إلى جوار باب السيارة ، وتساءل بحماس :
-هاتركب معايا في الـ Race (السباق) اللي جاي

أجابه آياز بجدية :

-No (لأ) ، ماليش مزاج ، أنا مش في المود

-اوكي ، براحتك ادعيلي

-معاك ربنا !

ثم ركب هو داخل سيارته ، وربط حزام الأمان ، وأمسك
بقبضتيه بالمقود ، وتنفس بعمق محدثاً نفسه بـ :

-يا مسهل ، يا ريت كل حاجة تكون زي سباق العربيات ،
كان الواحد وصل للي عاوزه بسرعة ، بدل ما هو دايس
فرامل على طول .. !

.....

في منزل ما ،،،

جلس غالبية العائلة على الأريكة الواسعة في غرفة المعيشة
، وأمسك الجد بالمصحف الشريف ليقراً فيه ، وتفقد الزوج
الرسائل الإلكترونية على هاتفه ، في حين أشارت الأستاذة
حنان بيدها لابنها الأصغر قائلة بهدوء :

-خلص الهوم ورك بسرعة

رد عليها الصغير ببراءة :

-او كي يا مامي

ثم ابتسمت لإبنتها الكبرى وهي تربت على ظهرها :

-برافو عليكى ، كده صح ، كملى ده كمان

-حاضر

إلتفتت حنان إلى والدها الرجل الوقور ، وتابعت قائلة :
-ها ، ايه رأيك يا بابا ؟

أجابها والدها بنبرة متريثة :
-والله أخوكي المفروض اللي يقول رأييه في الموضوع ده

هزت رأسها موافقة إياه وهي تضيف :
-عندك حق يا بابا ، بس أنا بأخذ رأي حضرتك الأول

تابع هو قائلاً بجدية :
-ممم .. والله لو البنت مناسبة ، مافيش مانع عندي !

هتفت حنان بحماس :
-هي محترمة وأخلاق وبنت ناس ومن أصل طيب !

أشار لها بإصبعه مكماً بصوته الآجش :
-الرك في النهاية على أخوكي

-ده صحيح ، وأما يرجع بكرة من السفر إن شاء الله هافتحه ، واللي فيه الخير يقدمه ربنا ،

سألها والدها بإهتمام :

-إن شاء الله ، هي اسمها ايه البنت دي ؟

ردت عليه بهدوء وهي تبتسم له :

-سارة يا بابا ، اسمها سارة!!!

.....

.....

الفصل الثالث والعشرون :

انتظرت المعلمة حنان حضور أخيها لتبلغه بشأن عثورها على عروس مناسبة له ، ولكن تعذر عليه الحضور ، فقررت أن توجل مفاتحته لحين عودته سالماً ، وخلال هذا

الوقت ستتستغل الفرصة في التقرب أكثر إلى سارة ،
وتوطيد العلاقات الطيبة معها ، ومن ثمَّ سؤاها عما يخصها
حتى تعطي صورة واضحة وشبه مكتملة لأخيها عنها ...

.....

ولجت وردة من إحدى البنيات القديمة وعلى ثغرها
ابتسامة عريضة ، ثم دست في حافظة نقودها السوداء
شيئاً ما ، وقبضت عليها بشدة ، وغمغت مع نفسها بثقة بـ
:

-الشيخ مبروك قالي ده هايحيب نتيجة أكثر معاه ، هاحطله
منه في الأكل والمياه ، وبعد سبوعين بالكثير هاشوف
البشاير .. !

تتهدت بحرارة لتكمل قائلة :

-الحب بهدلة يا سي إزاز ..

ثم تحركت في إتجاه الطريق الرئيسي ، وصاحت بنزق وهي
تشير بيدها لأحد سائقي (التوك توك):

-فاضي يا اسطى ولا أشوف غيرك !

رد عليها السائق بصوت متحشرج بعد أن رمقها بنظرات
شبه متفحصة :

-ايوه .. اركبي يا ست !

ثم ألقى ببقايا سيجارته على الأرضية الإسفلتية ، بينما
تابعت هي بصوت جاد :

-اطلع يا اسطى على ((.....))

.....

انشغل رامي بالترويج الدعائي للتوكيل الجديد الخاص
بمشاركة إحدى السيارات بمعرضه ، وانبهر والده بما حققه
من إنجاز مقبول في وقت قصير .. وأبدى سعادته به ..

ورغم هذا ، واطب هو على متابعة جديد سباقات السيارات ،
وشارك في إثنين منهما .. وفاز بالمركز الثاني في الأخير ..
فزادت ثقته بنفسه ..

كما لم يغب عن باله مقتطفات من لقاءاته المتكررة مع
عاليا .. وحاول جاهداً أن يصرفها عن ذهنه .. لكنه صدم
حينما رآها في أحد أحلامه تجلس معه في غرفته ، وتتمدد
إلى جواره على الفراش مرتدية إحدى قمصان النوم
الحريرية الطويلة ، وتبتسم له إبتسامة ساحرة جعلت قلبه

يخفق بشدة .. ثم رآها تمد يدها نحوه ذقنه ، وتتحسسها
برقة وهي تهمس له بنعومة :

-وحشتني !

إنفص مذعوراً من نومته ، وتلاحقت أنفاسه ، وظل
يرمش بعينه ليتأكد أنه عاد للواقع ، ثم إلتفت بحذر لجانب
الفراش ، وتأكد من خلوه من وجودها .. فأخذ نفساً عميقاً ،
وزفره على مهل .. وحدث نفسه بذهول وهو يفرك وجهه
غير مصداقاً ما رآه :

-حتى أحلامي مش سيباني فيها !

تمدد على فراشه مجدداً ، وعقد ساعديه خلف رأسه ،
وحدق بالسقف ، وأغمض عينيه وهو يفكر في ذلك اللحم
الغريب ..

.....

مر الأسبوع الأول والثاني من العام الدراسي وهما
مليان بالكثير من الجهد والإرهاق على الجميع من أجل
تعويد الصغار على النظام المتبع في مدرسة اللافانيا الدولية

..

وكان جميع العاملين في مبنى الرياض يبذلون أقصى ما في وسعهم لإحتضان هؤلاء الصغار وطمانتهم .. واستجاب الغالبية منهم ، وإعتادوا رويداً رويداً على المكان ..

عاني آياز كثيراً في البداية ، ولكنه نوعاً ما إعتاد على تصرفات الأطفال المفاجئة والصادمة له دون أن يبدي تقززه أو حتى إشمئزازه .. وإجتهد لحثهم على اتباع تعليماته بشأن قواعد تناول الطعام والتحرك داخل قاعة الدراسة .. كذلك أرهق بدنياً بسبب وسائل المواصلات ، فكان يضطر للجوء إلى رامي لإيصاله يوماً بعد يوم .. وفكر في شراء سيارة ما مناسبة له حتى يريح الأخير من عناء إيصاله خاصة أثناء أوقات الذروة ..

.....

كما انشغل كل فرد بما يخص أمور فصله وتلاميذه الصغار حتى طلبت الناظرة عقد إجتماع لفريق العمل بعد إنتهاء اليوم الدراسي ، فبدى التذمر جلياً على معظمهم .. تشكلت مجموعات من المعلمات في ردهة الإستقبال ، وتبادلن الحوار الجاد ..

نفخت سالي من الضيق ، وعلقت حقيبة يدها على كتفها ،
وهتفت بتذمر :

-أل هي ناقصة اجتماعات واحنا طالع عينا طول اليوم

ردت عليها سارة بتهيدة مرهقة :

-معلش يا سالوكة

تدخلت ميادة في الحوار قائلة بجدية وهي تشير بيدها :

-المشكلة بس إنها بتطلب حاجات غريبة في أوقات أغرب

أضافت هبة وهي تتنأب :

-المهم احنا عاوزين نخلص في الإنجاز ، مش لازم فتي

ورغي على الفاضي

اقتربت فريال منهن ، وابتسمت قائلة :

-ايه الأخبار معاكو ؟

ردت سارة بإنهاك :

-زي ما إنتي شايفة ، طالع عين أبونا من الصبح !

ربتت على ظهرها ، وردت بنعومة :
-ربنا يعينكم

سألته هبة باهتمام يحمل المزاح وهي تلوح بيديها في
الهواء :

-ايه أخبار الـ Art ؟ والتفنن بتاع العباقرة اللي عندنا !

تتحنحت بخفوت ، وأطرقت رأسها للأسفل قليلاً لتجيبها
بحذر :

-ماهو أنا جاية أقولكم على حاجة ، مش عارفة بقي إن كانت
هتزعلكم ولا لا

سألته سالي بنبرة جادة وهي مقطبة الجبين :
-حاجة ايه دي ؟

انضمت إليهن عاليا ، وأسندت ذراعيها على كتفي كلاً من
سارة وسالي ، وابتسمت قائلة بمرح :
-متجمعين في الخير دائماً

تنهدت سالي بإنهاك وهي ترمقها بنظرات متعبة :
-شيلك ايدك يا عالي ، مش قادرة من كتفي خالص

غمزت لها عاليًا قائلة بحماس :
-يا سالوكتي أنا بأحب أهزر معاكي ، ده انتي الحتة الطرية

ردت عليها سالي بضجر :
-بعدين ابقى هزري ، بس نخلص بس من اللي ورانا

ضغطت عاليًا على كتفها قليلاً ، ومالت برأسها عليها
لتهمس لها برقة :
-اها ، عشان خاطر ك بس !

ابتسمت لها سالي بإمتنان وهي تقول :
-تسلمي يا حبيبتي !

سألت هبة بفضول فريال الواقفة إلى جوارها بـ :
-مقولتيش يا فيرو ، ايه الخبر اللي هيزعلنا !؟

أخذت فريال نفساً عميقاً ، وزفرته على مهل لتجيبها
بصوت شبه حزين :
-انا .. أنا هاقدم استقالتى وأمشي !

شهق الجميع بصدمة ب :
-اييييييييييه !!

.....

في الحديقة الخارجية ،،،

هز آياز رأسه وهو يسير في إتجاه غرفة المعلمات
متحدثاً بهدوء في هاتفه المحمول :
-خليها عليا المرادي ، بس ماتتأخرش

تعالت منه ضحكة متحمسة وهو يضيف :

-قريب هاجيب واحدة ، ما هو مش معقول أفضل مبهداك
معايا كده كثير

مط فمه للأمام ، ومرر أصابعه في فروة رأسه بعد أن
وضع يده عليها ليقول بإستغراب :

-ادبعلها حاجة؟! ايه التخاريف دي ؟ انت هاتعملي زي
فلاور؟!!!

ثم وضع إصبعيه عند مقدمة أنفه ، وضغط عليه قليلاً ،
وأكمل بصوت شبه مرهق :

-نتكلم في ده بعدين ، أنا هاخلص ال- Meeting على 2:30
Maximum (على أقصى تقدير) .. هاتكون إنت وصلت ؟

إتوى فمه قليلاً وهو يتابع بـ:

-تمام .. منتظرك يا رامي !

ثم أبعده الهاتف عن أذنه ، وضغط على زر إنهاء المكالمة ،
وأكمل سيره في اتجاه غرفة المعلمات ..

.....

في غرفة المعلمات ،،،،

نزعت ليلة إسدال الصلاة عنها ، ووقفت تعدل من حجاب رأسها ، ثم جلست على الأريكة لترتدي حذاءها ..
إلتفتت برأسها ناحية رفيقتها ريمان التي كانت مندمجة في تحضير دروس الغد على جهاز الحاسوب .. ولكن الأخيرة رمقتها بنظرات حانية وهي تتشقق بهدوء :
-تقبل الله يا لولو !

ردت عليها ليلة بابتسامة :

-منا ومنك يا ريمو .. هاتصلي ؟ أسيبك السجادة والإسدال ؟

هزت رأسها نافية وهي تجيبها بإيجاز :

-لأ .. أنا Off (أجازة)

انحنت ليلة لتزيح (المصلية) عن الأرضية اللامعة ،

وطوتها وهي تقول بصوت جاد :

-طب يالا عشان نلحق الاجتماع

هتفت ريمان بصوت هاديء وهي محدقة في شاشة

الحاسوب :

-على طول ، أنا بس هاخلص ده ، وأجي وراكي

-اوكي .. وأنا هاظبط بس الطرحة لأحسن معوجة
-تمام

ظلت ريمان مشغولة بكتابة الدرس التفاعلي بطريقة
مبتكرة في وقت فراغها المتاح ، ولم تنتبه إلى دخول
آياز إلى الغرفة ..

وما إن رآها حتى تنهد بخفوت ، وتقوس فمه مبدياً ضيقه
من وجودها بالغرفة .. فقد اعتقد أنها خاوية ، فهو لم يرد
أن يتبادل أي حديث معها أو مع غيرها ..

لذا اكتفى بالدخول في صمت .. وجلس على أحد المقاعد
الشاغرة حول الطاولة ، وبدأ في تفقد محتويات حقيبته ..
غرست ريمان أصابع يديها في شعرها ، وصاحت فجأة
بصدمة :

-لألاً .. مش بعد ده كله !

انتبه هو إلى صوتها الغاضب ، ونظر نحوها بفضول ..
بينما تابعت هي بضجر :

-حرام والله ، ده أنا من الصبح شغالة فيه ، **It's unfair**)
هذا غير عادل (

إحتقن وجهها بشدة ، وإصطبغت وجنتيها باللون الأحمر ،
وبدى صوتها مختنقاً وهي تكمل ب :

-مش معقول هاعيد ده كله تاني ، I am so stupid (أنا
غبية جدا)

تردد آياز في مساعدة ريمان ، خاصة أنه يعرف طريقة
استعادة البيانات الضائعة في حالة فقدانها ..

وقرر أن يتجاهلها .. ولكن شيئاً ما داخله دفعه للعدول عن
هذا القرار..

صر على أسنانه بقوة ، وقاوم تلك الفكرة محدثاً نفسه ب
:

-ملكش دعوة ، it's not your business (أمر لا
يخصك)

إستندت ريمان برأسها على كفيها ، وأغمضت عينيها وهي
تقول بحزن :

-يا ريتني جبت اللاب توب بتاعي ، كان هيبقى عندي
copy (نسخة) من الـ Data (البيانات) اللي راحت دي !

أشفق آياز على حالها .. فقد بدت على وشك البكاء ،
فنفخ من الضيق ، وتشدق قائلاً بصوت مرتفع :

-أنا أقدر أساعدك يا مس

رفعت ريمان رأسها فجأة ، واتسعت عينيها بصدمة كبيرة حينما سمعت صوته يأتي من خلفها ..

أدارت رأسها للخلف وهي فاعرة شفيتها .. وظلت على وضعيته المذهولة لعدة ثوانٍ .. فهي لم تتوقع وجود أي أحد بالغرفة معها ..

وعاتبته نفسها أنها لم تنتبه إلى حضوره ..

نهض آياز من على المقعد ، ودار حول الطاولة ليتحرك نحوها .. ثم سلط أنظاره عليها ، وتابع قائلاً بجدية :

-أنا أعرف إزاي أرجع الـ Data (البيانات)

كانت على وشك الرد عليه بإعتراض ، ولكنه وقف قبالتها ، فرفعت رأسها عفويًا للأعلى لتحقق به .. فابتسم لها ابتسامة باهتة وهو يقول بثقة محدجاً إياها بنظرات مغترة :

) Trust me , I can do it as a piece of cake -

ثقي بي ، فأنا أستطيع فعل هذا بسهولة)

ثم انحنى بجسده نحوها لتشبهق هي مصدومة ، وتراجع للخلف في مقعدها .. ومد ذراعه ليمسك بالفأرة ، وأدار رأسه لها لينظر إليها عن قرب وهو يقول بخفوت :
-أنا شاطر في استخدام البرنامج ده !

إزداد توترها ، وشعرت بسخونة ما تبعث من وجهها ، وكذلك تلونت وجنتيها أكثر بحمرة خجلة .. وابتلعت ريقها بصعوبة .. فقد باغتها هو بتصرفه هذا والذي لم تعد عليه مع أي رجل من قبل

حقد بها آياز بنظرات متأملة لملامحها ..

هو لم يرها عن قرب من قبل ، فلم يتبين لون عينيها الخضراوتين ومدى عمق نظراتها ، فتقوس فمه قليلاً مبدئياً إعجابه بهما .. ولم ينكر أنها كانت جميلة الملامح رغم فظاظتها معه ..

كما كانت تلك هي المرة الأولى لها والتي تراه فيها عن كثب .. فحدقت هي الأخرى في عينيها الزرقاوتين ، وشردت فيهما للحظات .. فقد كان لونهما مميزاً وأسراً بدرجة عجيبة ..

في نفس التوقيت دلفت رانيا إلى الغرفة بعد أن ظلت تبحث عن آياز بالخارج ... وتسمرت في مكانها مذهولة ،

وجحظت عينيها بغل حينما رأتهما على تلك الوضعية ..
عبست أكثر ، وإكفهرت تعابير وجهها ، وحل الغضب عليها
، وحدجتهما بنظرات محتقنة ... ثم شهقت بصوت مرتفع
وهي تضع يديها في منتصف خصرها ، وصاحت بسخط جلي
:

-الله الله .. وده نسميه إيه إن شاء الله
!!!

.....

الفصل الرابع والعشرون :

تراجع آياز للخلف ، وإعتدل في وقفته ، في حين زاد
إرتباك ريمان وخرجها الواضح بعد أن رأتها رانيا في تلك
الوضعية ..

تجهم وجه رانيا بشدة ، واقتربت منهما وأكملت قائلة
بغضب :

-انتو بتعملوا ايه هنا ؟

نظر لها آياز ببرود ، ووضع يده في جيب بنطاله ، وسألها
بجمود :

-ايه مشكلك ؟

ردت عليه بحدة وهي ترمق ريمان بنظرات مشتعلة :

-مشكلتي انك واقف مع دي !

صاحت بها ريمان بضيق بادي في وجهها وهي تشير
بإصبعها محذرة :

-اتكلمي كويس عني ، وإياكي تغطي فيا !!!

لوت فمها لتجيبها بسخط :

-الغلط ليه ناسه ! واللي زيك آآ....

صاح آياز مقاطعاً بغلظة وهو يشير بذراعيه في الهواء :

-اسكتوا انتو الاتنين

نفخت رانيا بغل ، وعقدت ساعديها أمام صدرها ، وظلت

تهز ساقها اليمنى بعصبية ..

لوح آياز بإصبعة في وجه رانياً قائلاً بتهديد :
-يا ريت قبل ما تتكلمي تفهمي في ايه الأول

ردت عليه رانيا بصوت محتقن وهي تهز حاجبيها :
-أفهم ايه بس ، ده أنا شوفت بعيني محدش قالي .. واحد
مايل على واحدة ، ولازق فيها أوي ، وهما الاتنين أعدين
لوحدهم ومتتحين لبعض ، والشيطان ثالثهما !

هتف آياز بنبرة ساخطة وهو يرمقها بنظرات منزعجة :
-انتي تفكيرك عقيم

أرخت ساعديها ، ولوحت بذراعها أمام وجهه قائلة بحدة :
-نعم ! انت شايف كده ؟

هز رأسه ليضيف بقوة :
-اه طبعاً ، زميلة ومحتاجة مساعدة ، وده اللي عملته ، كون
إنك شايفاه بشكل تاني تبقى مشكلتك مش مشكلتنا

أشارت بيدها للخلف وهي تجادله بعناد :

-ده عندك في بلاد برا ، لكن هنا بيتسمى مسخرة وقلة أدب

لامست رانيا بحديثها اللاذع وترأ حساساً لدى ريمان ، فما فعلته كان خطأً حتى وإن كانت نواياه بريئة ، ولكنها فتحت الباب عليها ((للقييل والقال)) .. لذا ابتلعت غصة مريرة ، وأخذت نفساً عميقاً لتصيح بصوت شبه مختنق وهي تحاول كبح عبراتها :

-هي بتتكلم صح ، كان لازم اخذ بالي أكثر !

ثم سحبت حقيبة يدها ، وركضت مسرعة للخارج وهي مطأطأة الرأس و دون أن تضيف كلمة أخرى ..

صُدم آياز من ردة فعلها ، وحاول اللحاق بها صائحاً :
-مس ريمان ، Wait (انتظري)

إبتسمت رانيا بسعادة ، وأضافت قائلة بسخط جلي :
-إياكش تحس على دمها ، وماتكونش دموع تماسيح

احتقنت عيني آياز ، وإرتفعت الدماء الساخنة في عروقه ، وصاح بها بغل وهو مكور قبضة يده :

-انتي ايه بالظبط ؟

ردت عليه بثقة مفرطة وهي تتعجج بجسدها :

-أنا رانيا ، معلمة اللغة العربية !

كز على أسنانه ليقول بحنق وهو يرمقها بنظرات شرسة :

-بجد مش لاقى كلام أقوله ليكي

ابتسمت له ببرود لتستفزه أكثر ، وأضافت :

-مش هتلاقي عشان أنا بأتكلم في الأصول

حدجها بنظرات منزعة ، واتجه نحو الطاولة ليجمع

متعلقاته ، وغمغم بعصبية :

-أنا ماشي

ثم اتجه إلى الخارج ووجهه يعطوه الضيق .. بينما تنهدت

بإرتياح ، واعتلى ثغرها ابتسامة إنتصار ، وحدثت

نفسها قائلة :

-كده أحسن ، خليها تتلم ، وتعرف حدودها .. المز بتاعي

وبس !

.....
في غرفة مكتب الناظرة ،،،

تراحمت المعلمات بداخل الغرفة وجلسن ملتصقات على
الآرائك من أجل حضور ذلك الإجتماع المفاجيء ..

دلقت ريمان إلى الداخل وعينيها حمراتان بشدة ،
ووجهها محتقن للغاية ..

نظر لها الجميع بإندهاش ، وبادرت سارة بسؤالها
باهتمام قائلة :

-مالك يا ريمو ، وشك جاي ألوان كده ليه

ردت عليها ريمان بإيجاز دون أن تنظر نحوها :
-مافيش

أردفت سالي قائلة بمزاح :

-تلاقي هتلر سمعتها كلمتين بايخين

همست سارة وهي تغمز لسالي ب :
-قصدك آآ...

قاطعتها محذرة متابعة بخفوت :
-ششش .. الحيطان ليها ودان ، واحنا هنا في عرين الأسد

ابتسمت سارة قائلة :
-على رأيك ، ممكن نلاقيها فجأة فوق دماغنا !

لم تعقب ريمان بأي كلمة ، فلم تكن في حالة مزاجية
تسمح معتدلة .. فيكفيها ما تعرضت له من الإحراج والإهانة
على يد رانيا ، وظن السوء بها .. وما قد يحدث لاحقاً من
إطلاق شائعات مغلوطة بحقها ..

ضربت منة فريال على فخذاها وهي تسألها باهتمام :
-حقة الكلام اللي سمعته ده ؟

هزت رأسها موافقة وهي تجيبها :
-أها

عبست منة بوجهها متسائلة :

-طب ليه يا بنتي ؟ ما انتي مبسوطه معنا هنا !

تتهدت بصوت شبه مختق بـ :

-والله أنا صعبان عليا المكان عشان الناس اللي فيه ، حقيقي
مش هلاقي جروب زيكم ، بس الظروف !!!

سألته هناع بجدية وهي محدقة بها :

-هو مصمم برضوه ؟

هزت رأسها بخفوت لتجيبها :

-ايوه ، جوزي مآخر السفر عشاني ، ومعدتش ينفع أكثر
من كده تأجيل ، الشقة خلصت ، والعفش اتنقل ، وهو
المفروض يستلم من أول الشهر الجاي في البحر الأحمر

مطت هناع ثغرها لتضيف بهمس :

-ربنا معاكي

سألته منة مجدداً بجدية :

-على كده انتي ناوية تشتغلي ؟

ردت عليها فريال وهي تشير بكفها :

-والله على حسب .. لو لاقيت المناسب هاشتغل

أكملت منة بصوتها الجاد :

-متقديش في البيت ، واكيد في مدارس هناك ، مش معقول

يعني هتبقي ساكنة في صحراء

-على رأيك

فُتح الباب ليدلف آياز إلى الغرفة ، وأردف قائلاً بخفوت :

Hi, ladies- (مرحباً سيداتي)

ابتسمت له جانبيت ، وأشارت بيدها نحو المقعد الشاعر :

-اتفضل يا مستر آياز

بادلها ابتسامة باهتة وهو يرد :

-ثانكس

ثم بادلتها المعلمات التحية ، وتابعن حديثهن النسائي عن مشكلات الأطفال معهن .. ولم يشارك هو في الحديث ، ومع هذا حاول أن يختلس النظرات إلى ريمان الجالسة في مواجهته ، وشعر بضيق في صدره بعد أن رأى علامات التجهم والعبوس واضحة عليها ..

زفر في ضيق ، وحدث نفسه بضجر :

-لولا الغيبة دي مكانش حصل أي حاجة ! أنا دايمًا موعود بالأشكال دي !

حضرت رانيا هي الأخرى إلى الغرفة وهي تتأبط في ذراع رفيقتها نشوى ، ولوت فمها في إستهزاء وهي ترمق ريمان بنظرات ذات مغزى فهمتها الأخيرة على التو ، وأجفلت عينيها في ضيق وحزن ..

لم يكن هناك أي مقاعد أخرى شاغرة سوى مقعد الناظرة ، فابتسمت رانيا بسعادة ، فهناك مسند الأريكة المقارب لمقعد آياز ، وهي ستجلس عليه لتكون إلى جواره ..
لذا مالت على نشوى برأسها ، وهمست لها وهي تضع يدها أمام فمها :

-اتحشري انتي مع أي حد ، وأنا هاروح هناك

غمزت لها نشوى قائلة بمزاح خافت :
-بيضالك في القفص يا حلوة

ردت عليها رانيا بإيجاز :
-طبعاً

ثم تمتت مع نفسها بفرحة غامرة :
-عقبال ما نقعد سوا في الكوشة يا مز !

أسرعت بالذهاب إلى هناك ، وألقت بجسدها على المسند ،
وإنتصبت بكتفيها في زهو وإنتصار ..
نفخ آيـاز بصوت مسموع لعل الجالسة بجواره تفهم ،
ولكنها على العكس كانت تبتسم له ببرود أكثر ..
فأشاح بوجهه بعيداً عنها ..

وبعد لحظات انضمت الناظرة إعتاد إلى الجميع ، ورسمت
على ثغرها ابتسامة سخيقة :

-مش هاعطلكم كثير .. احنا هنتكلم في كام جزئية كده على
عجالة تخص الفنان داي للأطفال ، ومس الـ Art (الرسم)
الجديدة لأن اكيد سمعتوا ان مس فريال هاتسيبنا وتمشي

ساد حزن واضح على وجه المعلمات اللاتي قضين عدة سنوات معها ، وصدرت همهمات خافتة بينهن .. رفعت الناظرة إعتماذ نبرة صوتها قليلاً لتقول :
-طبعاً يعز علينا إن مس مجتهدة زي مس فريال تسيبنا ، بس دي طبيعة الحياة ، واحنا بنتمنالها التوفيق في أي مكان ، وهاتفضل دايماً ليها مكانتها عندنا وفي قلوبنا

لمعت عيني فريال بشدة ، وقالت بإمتنان :
-شكراً مس إعتماذ على كلامك ده ، فعلا انتو أكثر من عيلتي !

أكملت الناظرة بهدوء جاد :
-كمان حابة أشكركم على تعبكم في الأسبوعين اللي فاتوا في الدراسة ، كنتم على قدر المسئولية و..آآ...

لم يهتم آياز بالإصاغ إلى حديثها ، فشاغله الأكبر حالياً هو ريمان ..
ورغم أنه عاهد نفسه على ألا يعير أي معلمة الإنتباه من أي نوع ، ولكنه حنث بوعده فقط من أجلها ..

فقد آلمه أن يظن بها أي أحد السوء ، وهو من تصرف معها بعفوية .. ولم يكن ذنبها ..

ظل يفكر ملياً في طريقة ما يتحدث بها إليها ، ويزيل أي سوء فهم قد حدث .. ولكن قطع تفكيره صوت الناظرة وهي تقول :

-وعاوزه أخص كمان بالذكر مستر آياز اللي احتضن الأطفال وتفاعل معاهم بحرفية

ابتسم لها مجاملاً ، وعقب بإيجاز :

-It's my job- (دي وظيفتي)

ردت عليه بجدية وهي محدقة به :

-كلنا عارفين انها مهمتك ، بس إنت كنت على أد ثقة الإدارة فيك ، واتمى تستمر على هذا المنوال

تابع بفتور :

-I hope so- (أرجو هذا)

تحنحت الناظرة بصوت خافت ، وهتفت قائلة بنبرة متحمسة :

-دلوقتي نتكلم عن خطة الفان داي اللي مس جانيت اقترحتها
السنادي ، وأنا حابة أخذ رأيكم فيها سريعاً ، وبرضوه
هديكوا فرصة نفكروا في أي إضافات وتكتبوها على الصفحة
بتاعتنا

.....

انفض الإجتماع بعد ربع ساعة من المناقشة المثمرة ،
وذهب الكل إلى طريقه ..

تلوت عاليا بجسدها قليلاً ، وهتفت قائلة بضجر :

-مش قادرة ، هاخش التويلت وأحصلكم

أردفت سارة قائلة بجدية وهي تنظر إلى ساعة هاتفها
المحمول :

-أنا مش هاينفع أستنى حد ، يدوب ألحق أخذ أي مواصلة
وأروح البيت

بينما أضافت سالي :

-استني يا سارة أنا هاركب معاكي

هزت عاليا رأسها وهي تقول بإقتضاب :
-اوكي يا بنات ، أشوفكم بقى بكرة

ابتسمت لها سارة ، واحتضنتها لتقبلها وهي تقول :
-ماشي يا عاليا ، سلام يا حبيبي

ردت عليها بإبتسامة عادية :
-باي يا قمر

رفعت ميادة يدها للأعلى ، وهتفت بحماس :
-حد عاوز يجي معايا أوصله ، أنا فاضية !

قبضت منة على ذراعها ، وقالت بسعادة :
-أنا يا ميادة

مطت هناء شفيتها لتقول برقة مصطنعة :
-دودو حبيبي خديني في سكتك !

وتسائلت نادية هي الأخرى بنبرة هادئة ورزينة :

-وأنا يا أخت ميادة ، في مساحة لي ؟

هزت ميادة رأسها لتقول مجاملة :
-طبعاً يا نادية .. ده العربية كلها ليكي

ابتسمت لها نادية هاتفة بإمتنان :
-شكراً على ذوقك

ثم أضافت ميادة بجدية وهي تتجه صوب الممر :
-تمام ، أنا هاسخن العربية ، وحصلوني

قابلتها هبة في طريقها ، وقالت بمزاح وهي تضع يدها على
كتفها :

-ما تحتضيني أنا كمان يا ميدو !

نظرت لها ميادة من طرف عينها قائلة بهدوء :
-تعالى يا هبة ، العربية بتشيل من الحبايب ألف !

-حبيبتي .. حبيبتي !

.....

أسرع آياز خلف ريمان ، وصاح بصوت مرتفع ليلفت
إنتباهها :

-مس ريمان ، بليز

لم تستجب له ، بل تابعت سيرها وهي مكفهرة للغاية ..
أسرع هو في خطاه ، وتجاوزها ليقف أمامها ويسد عليها
الطريق .. ثم رفع كفه أمام وجهها ، وهتف بصوت لاهث :
-سوري يا مس ، أنا مش هاعطك كثير ، بس كنت عاوز
أقولك

رمقته بنظرات قوية غاضبة ، وردت عليه بحسم :
-بليز مستر آياز ، كفاية اللي حصل ، مش حابة ان حد يتكلم
تاني عن وحش
-ده سوء تفاهم ، وآآ...

قاطعته بجمود شرس :

It's over- (الموضوع انتهى) ، عن اذنك !

ثم تحركت للجانب ، وأسرعت أكثر في خطاها .. فزفر
بغضب ، ومرر أصابع يده في رأسه ، وغمغم بضجر وهو
يتلفت حوله بحيرة :
-أعمل ايه معاها !؟

.....

راقبته رانيا بنظرات مشتعلة ، وكزت على أسنانها قائلة
بصوت محتد :
-شايفة بيجري وراها ازاي ؟

ردت عليها نشوى بعدم اكترات :
-اهدي يا رووني ، عادي يعني بيلطف الجو معاها
-لا يلطف ولا يشطف ، أنا عاوزة أقطع عرق وأسيح دمه
معاها
-ناوية على ايه يعني ؟

حدقت أمامها في الفراغ ، وأجابتها بمكر :
-هامخ على رواقه وأقولك

دفعتها نشوى للأمام قائلة بجدية :

-طيب ، يالا بقى عشان اتأخرنا ، لأحسن مش هنلاقي
مواصلات هنا بالساهل !!!

.....

وصل رامي عند البوابة الرئيسية لمبنى الرياض ، وانتظر
أمام مقدمة السيارة ، وظل يتحدث في الهاتف مع والده
لينجز بعد الأعمال العالقة ..

تابع بعدم اهتمام خروج المعلمات من مبنى الرياض ،
وحاول أن يلتقط بنظراته الثاقبة معلمته المنشودة ، ولكنها
لم تكن بين المتواجديات ، فظن أنها لم تحضر اليوم ..

في نفس التوقيت ، اقترب من البوابة بعض الكلاب الضالة
، وظلت تحوم حول المنطقة محدثة أصواتاً مزعجة .. فقام
العم سيد حارس البوابة بإبعادهم بحذر ، ونبه على المعلمات
قائلاً :

-امشوا جنب الرصيف يا ميسات ، أنا واقفلكم

ردت عليه ميادة بهدوء :

-ماشي يا عم سيد

هتفت هناء بنبرة قلقة :

-المفروض نبلغ البلدية نتخلص منهم

ردت عليها منة بنبرة حاسمة :

-بكرة نبلغ الإدارة وهما يتصرفوا

أضافت هبة قائلة بانزعاج :

-بالظبط ، مش معقول هانفضل في القلق ده واحنا خارجين

كل يوم من الكي جي

هزت هناء رأسها قائلة بخوف :

-ايوه ، وممكن واحد من الكلاب دي يعضنا ونتبهدل

ابتلعت هبة ريقها وهي تقول :

-ربنا يستر

أشارت لهن ميادة بيدها قائلة بصوت جاد :

-طب يالا أوام اركبوا العربية !!

وما إن تأكد العم سيد من إنصراف المعلمات حتى عاد للداخل ، وكان على وشك إغلاق البوابة ، ولكن صاح به آياز بصوت مرتفع :

-استنى يا عم سيد

لوح له الحارس بيده قائلاً :

-اتفضل يا مستر

-شكراً

-مع السلامة

ثم قام بإغلاقها ، وتوجه ناحية غرفته الأمنية

.....

انتهت عاليا من قضاء حاجتها ، وتوضأت ، ثم أكملت إرتداء حاجبها ، وتأملت هيئتها في المرآة ، وحدثت نفسها بقلق وهي ترى التوقيت في هاتفها :

-أووف ، ده أنا محستش بالوقت خالص ، يا ربي !

سحبت حقيبتها ، وعلقتها على كتفها ، وركضت بخطوات
مسرعة في اتجاه البوابة ، ولكنها تسمرت في مكانها
مصدومة حينما وجدت البوابة مغلقة ..

نفخت من الضيق ، وقالت بتذمر :

-كده مضطرية ألف من الباب الوراني ، وأنا مش بأحب
المنطقة دي !

.....

جلس آياز في المقعد الأمامي في السيارة ، وظل صامتاً ،
فنظر له رامي بإستغراب ، وسأله :
-مالك ؟

أجابه بإيجاز وهو يسند رأسه للخلف :
-مافيش

-أوبا ، شكل اليوم قافش معاك

إستدار آياز برأسه للجانب ، ورد عليه بضيق بادي في
نبرته :

-رامي ، أنا على أخري ومش عاوز أتكلم

-أوكي براحتك ، أنا كنت بأظمن عليك
-شكراً ، بس أنا مرهق ، واليوم مش ظابط معايا
-أها

أدار رامي المقود ، وانطلق بالسيارة في الطريق الجانبي ، ورأى من المرأة تجمع الكلاب الضالة عنده .. فلوى فمه قليلاً ، ولكن إتسعت عينيه مصدوماً حينما لمح عالياً تخرج من البوابة الصغيرة – والجانبية – لمبنى الرياض .. فخفق قلبه برعب حقيقي عليها ، و

.....

.....

الفصل الخامس والعشرون :

ضغط رامي فجأة على مكابح السيارة ليووقفها ، فإندھش آياز مما فعله ، وقطب جبينه وهو يسأله مستفهماً :

-وقفت العربية ليه ؟

-لحظة بس

قالها رامي وهو يترجل من السيارة ليتحرك نحو غطائها الخلفي ، ويسحب منه آلة حادة .. ثم ركض في إتجاه عاليا ..

تعجب آياز من تصرفه الغير مفهوم ، وهتف :
-يا رامي استنى ، انت رايح فين طيب فهمني ، وأخذ معاك دي ليه ؟؟؟!!

وما إن رأت عاليا الكلاب الضالة أمامها حتى صرخت
بفزع :

-عآآآآ .. الحقوني !

كشرت الكلاب عن أنيابها ، وبدت غاضبة للغاية وهي تقترب منها ..

ركضت عاليا كالمجنونة في إتجاه بوابة مبنى الرياض لتحتمي به ، فصاح بها رامي بصوت جهوري وهو يشير بيده :

-ماتجريش يا عاليا ، هيعضوكي

تمكن أحدهم من اللحاق بها ، وانقض على ساقها ، وغرز أسنانه الحادة فيها ليعضها بشراسة ، فصرخت بصورة هستيرية ، وحاولت إبعاده عنها بضربه على رأسه بحقيبتها ..

ترجل آياز هو الآخر من السيارة بعد أن رأى ذلك المنظر المروع .. وحاول التدخل لإنقاذها ...

ركض حارس البوابة (العم سيد) في إتجاه مصدر الصراخ وهو يحمل في يده عصا غليظة .. وصاح بحدة :
-خلي بالك يا مس عاليا

ركلت عاليا الكلب بساقها بقوة شديدة رغم خوفها .. وأسرع رامي نحوه ليبعده عنها صارخاً ب :
-سيبها يا كلب يا ابن الـ ***

سمع الكلب أصوات أقدام تقترب منه ، ورأى بعينه الثاقبتين تلك العصا التي وجهها الرجل نحوه ، فحرر ساق عاليا ، وظل ينبح بصورة قوية فيه ...

هدده العم سيد بضربه بالعصا ، وظل يلوح بها في الهواء
وعلى مقربة منه ، فترجع للخلف ولم يكف عن النباح ..
بينما قذفه آياز ببضع حصوات التقطها من الأرضية ..
ليتلفت الكلب برأسه نحوه ، ثم يركض مبتعداً عن الجميع ..

لوت عاليا ساقها ، وبكت بصوت متشنج قائلة :

-أنا اتعضيت ، رجلي مش قادرة منها ، آآآه

جثي رامي على ركبته أمامها ، وحاول أن يتفحص ساقها ،
وتشدد قائلاً :

-اهدي .. ان شاء الله خير !

هتف الحارس عم سيد وهو يشير بيده :

-هاطلبك الاسعاف يا مس عاليا ، لأحسن دي عضة كلب ،
يعني آآ...

قاطعته عاليا بصراخ متشنج :

-عا .. دي آخرتها ، يعضني كلب ، كنت فين قبلها يا عم
سيد ؟

رد عليها بصوت أسف :

-والله بلغنا البلدية ، بس محدش عبرنا

أردفت عاليا قائلة بسخرية وهي تبكي :

-دلوقتي هايجوا ربح بعد اللي جرافي ، إهيء ..

أضاف رامي قائلاً بمزاح :

-وده وقت تنكيت يا عاليا

نظرت له شزراً من عينيها الباكيتين ، وصاحت فيه بصوت
منتحب :

-انت ! جاي ليه ؟ طبعاً تلاقيك اللي بعته ليا !

فغر فمه مدهوشاً من إتهامها الباطل ، ودافع عن نفسه
قائلاً بنبرة شبه منفعة :

-أنا ! يا شيخة حرام عليكى ، ده أنا كنت هاجيبه من ديله
وآآ...

قاطعه آياز متسائلاً بجدية وهو ينفض يديه :
-مس عاليا ؟ حاسة بايه الوقتي ؟

أجابته بصوت مختنق :
-مش قادرة من رجلي

هتف رامي قائلاً بتوسل :
-طب عشان خطري متعيطيش ، اهدي وهانتصرف

أخذت عالياً أنفاساً عميقة متواصلة حتى تسيطر على نوبة
البكاء ..

بينما حك آياز رأسه ونظر حوله بفضول ، ثم تحرك
عائداً إلى السيارة دون أن ينبس بكلمة إضافية ..

أشار رامي بيده للحارس سيد هاتفاً بضيق بعد أن وجده
يقف في مكانه دون تقديم أي مساعدة مجددة :
-هات كرسي يا عم الحاج ، مش هاتفضل الأبله كده ممددة
على الأرض

تتحنح بحرج ، ورسم ابتسامة صفراء على وجهه وهو يجيبه :

-أيوه صح .. ثواني

ثم تحرك في إتجاه بوابة مبنى الرياض ليختفي داخله ..

نظرت عاليا بحنق لرامي فهو دوماً يردد على مسامعها تلك الكلمة المستفزة (أبله) .. وحاولت الإعتدال في جلستها ، ولكنها صرخت متأوهة من الألم وهي تحرك ساقتها ..

دقق الأخير النظر في القطع البادي في بنطالها ليتأمل هيئة الجرح الأولية ، فإتزعجت هي من نظراته ، وسألته بحدة :
-انت بتعمل ايه ؟

رد عليها بهدوء حذر :
-بأشوف العضة

عبس وجهها بشدة ، وهتفت بنزق :

-نعم !!

تابع قائلاً باهتمام ظاهر على تعابير وجهه :

-مش يمكن تكون حاجة خطيرة

اتسعت مقلتيها اللامعتين بشدة ، وأجابته بنبرة فزعة :

-هو .. هو أنا هايجيلي داء الكلب من العضة دي ؟

هز رأسه إيجاباً ليقول :

-جايز.. ويمكن تاخدي 21 حقنة !

حركت رأسها مستكرة ، وهتفت محتجة بصراخ :

-لألاً ، مش عاوزة حقن ، مش عاوزة

أشفق رامي على حالتها البائسة ، وحاول أن يهون عليها قليلاً من خطورة الأمر ، فأردف قائلاً بإبتسامة عادية وهو يشير لها بيده :

-اهدي ، الكلام ده قديم ، مش بيحصل دلوقتي

حدقت هي فيه بنفس النظرات الخائفة ، وزاد نحيبها ..
فخفق قلبه أكثر على حالها ، وتابع قائلاً باهتمام :
-بس لازم نروح على مستشفى الكلب عشان يكشفوا عليك
ونظمن

هزت رأسها موافقة ولم تعقب .. فحديثه صائب .. وليست
بحاجة للجدال معه في تلك المسألة الخطيرة ..
ورغم أنها كانت لا تحبذ رؤيته إلا أنها حمدت الله في نفسها
أنه كان متواجداً من أجلها ، وأنقذها من أياب الكلب
المسعور ..
وراقبت بحذر نظراته المهمة بها ، وإنشغاله بسلامتها ..

أردف هو قائلاً بحذر :

-متحركيش رجلك كثير عشان الوجع .. خليها ثابتة على أد
ما تقدر

لم تشعر عاليا بنفسها وهي تطالع رامي بنظرات غريبة
عما مضى ، فرغم عدائها الدائم معه ، وصداماتهما
المتكررة ، إلا أنه دائماً يقدم لها يد العون ، ويكن متواجداً
في الوقت المناسب .. ولم تنتبه لحديثه لها ..

التقطتها عينيه وهي تنظر إليه بغرابة .. فتعجب منها وسألها
مازحاً :

-شكلي حلو من قريب ، فوتوجونيك صح ؟

توردت وجنتيها بشدة ، وأطرقت رأسها محرجة منه ..

ابتسم رامي لخلجها ، وغمغم مع نفسه بسعادة :

-حقي أشكر الكلب اللي قرب المسافات بينا !

قاد آياز السيارة ، ثم تحرك بها للخلف ليوقفها على
مقربة من عاليا ، وأخرج رأسه من السيارة ليهتف بقوة :

-تعالى يا مس ، هانوصلك للمستشفى

أشار له رامي بإصبعه محيياً إياه ، وأضاف بحماس :

-عندك حق يا إيزو .. هو ده الكلام ! احنا هنوصلها ونظمن

عليها بنفسنا .. الأقربون أولى !

ارتبكت عاليا ، وهزت رأسها معترضة :

-لأ .. عم .. عم سيد هايطلب الإسعاف وآآآ...

قاطعها بصوت شبه مازح وهو مسلط أنظاره عليها :
-هو في اسعاف في مصر بيجي في ميعاده ! ده مش بعيد
يوصل على الترم الثاني
-هاه

تابع قائلاً بمرح في محاولة منه للتخفيف من صعوبة
الموقف :

-هو إنتي مش عايشة في مصر وعارفة ؟ الحسنة الوحيدة
اللي بناخدها من الإسعاف لما نكون وراه ويفتحلنا سكة
وسط الإشارة ! ساعتها بنحس بقيمته أوي

لوت شفتيها ، وتهدت متألّمة .. وتمتمت بحزن :
-يا منظري وسط الناس لما تعرف إن عضني كلب

تابع هو قائلاً بسخرية :

-اها .. هينزل بوست اكيد على مواقع التواصل ، ومش بعيد
تلاقي عم الحاج اللي تلاشى جواد ده هو اللي عامل شير
للخبر

وضعت يدها على فمها ، وهتفت بحرج :

-يادي الفضايح ، هاورى وشى ازاي للناس

رفع حاجبه للأعلى قائلاً بجدية :

-ما اللي يعرف يعرف ، هو انتي اللي اتعضيتي ولا هما ،
المهم في الآخر سلامتك

شعر آياز بالضجر لتجاهله ، فصاح بنبرة مرتفعة وهو
يضغط على بوق السيارة :

-يالايارامي ، مش هانفضل كثير كده ، الدقيقة ممكن
تفرق معاها

تسائلت عاليا بهلع بعد عبارته الأخيرة :

-هي العضة مسمومة ؟

هز كتفيه في حيرة وهو يجيبها :

-مش عارف ، بس ده مش بيتبول (نوع كلب) يعني ، ده
كلب متشرد بياكل من الزبالة ، وبيرمرم وآآ...

قاطعته بنبرة متأففة وهي تغض عينيها قسراً :

-بس .. بس .. مش عاوزة أسمع

أشار لها رامي بكفه قائلاً وإبتسامة سعيدة تملو ثغره :
-طب يالا ، هاتي ايدك ، أنا هساعدك تقفي

ضيقته هي عينيها بشدة لتتظر له بحدة ، وكزت على
أسنانها محدثة نفسها بإنزعاج :
-جياك على الطبطاب !

ظلت ابتسامة رامي ظاهرة على وجهه ، وعينيها
ترقصان طرباً من الفرحة لوجوده بقربها .. ولكن عبوس
وجهها وتجهمه أصابه بالإستغراب ..

ضغطت عاليا على شفثيها بقوة لتتابع حديث نفسها بعناد :
- بس أنا مش هنولهاك

رفعت رأسها للأعلى في كبرياء زائف ، وردت معترضة :
-لأ شكراً ، أنا هاقوم لوحدي

أصر على أسنانه قائلاً :

-مش هاتعرفي تقفي

ردت بنبرة معاندة وهي تستند بمرفيها للخلف:

-لا هأعرف .. امسك بس شنطتي !

تناولها منها وهو ينفخ من الضيق :

-هاتي

لم يرد رامى أن يتجادل معها ، وتركها تحاول لتعرف أنه
على صواب ..

وبالفعل ما إن حركت ساقها حتى صرخت :

-آآآآآآآآآآآه

رمقها بنظرات محتدة ، وعاتبها ب :

-مش قولتلك !

ثم مد يده بحقيبتها قائلاً بصوت شبه مازح :

-خدي شنطتك ، وأنا هاتصرف ، هي أول مرة يعني !

إنعقد ما بين حاجبيها بشدة بعد جملته الأخيرة ، وهتفت
بنزق :

-نعم ؟ قصدك ايه ؟

لف رامي ذراعه بحذر حول ظهرها ليسندها ، ووضع
الأخر أسفل ركبتيها ، ثم استجمع قوته ليحملها ، ومن ثم
نهض بحذر عن الأرضية

شهقت مصدومة من فعله ، ولم يكن بإمكانها الاعتراض
.. ولكن وجهه كان كافياً للتعبير عن خجلها الشديد من فعلته
..

فهي محمولة أمام مرآى العامة ، وعند مقر عملها ..
ترجل آياز من السيارة ، وقام بفتح باب المقعد الخلفي ،
وأفسح المجال لرامي ليتمكن من وضع عاليها عليه ،
وعاونها حتى تفرد ساقها المصابة .. ثم تراجع بجسده
للخلف ، وسألها :

-مرتاحة كده ؟

ردت عليه بصوت متحشرج وهي تتحاشى النظر إليه :
-أها ..

وضع رامي يده على كتف آياز ، وسأله بهدوء :

-يالآ يا آياز ، هاتسوق ولا أنا أسوق ؟

رد عليه الأخير بجدية :

-اركب انت الناحية الثانية ، أنا هاسوق

-اوكي

شعرت عاليا بحرارة وجنتيها .. وبالتعرق الشديد يصيب
جسدها من فرط التوتر

ركب رامي في المقعد الأمامي ، وإستدار برأسه ليتأملها ،
ثم ابتسم لها قائلاً بخفوت وهو يغمز لها :

-أظن العربية دي شاهدة على آآآ... انتي فاهمة بقي !

احتقتت عينيها من تلميحه المزعج عن موقفها السابق
داخل سيارته .. وضغطت على شفتيها بشدة ..

تحرك آياز بسلاسة بالسيارة في إتجاه المشفى ..
واستمر رامي في الإبتسام ببلاهة لعاليا ، ليغيظها ب :

-وحياتك نضفت العربية بجركن ديتول ! الريحه كانت ايه !
مقولكيش

نفخت في وجهه بغضب .. ورمقته بنظرات ناريه .. وكزت
على أسنانها لتقول بغل :
-مش انت السبب ولا أنا اللي آآ....

تابعهما آياز بفضول .. ورمق الاثنين بنظرات غريبه ..
فقد كان معظم حديثهما غامضاً بالنسبة له .. فتسائل
بإستغراب :
-هو ايه اللي حصل ؟

اعتدل رامي في مقعده ، وأجابه بمكر :
-مافيش .. دي حكاية وراحت لحالها !

أوماً آياز برأسه قائلاً بهدوء :
-ممم .. اوكي ..

.....

بعد لحظات ، خرج الحارس سيد من البوابة وهو يحمل
مقعداً خشبياً ، وتلفت حوله متسائلاً بإستغراب :

-الله ! هي مس عاليا راحت فين ؟

هز كتفيه في عدم اكتر اث ، واضاف ببرود :

-وأنا مالي ، طالما الحادثة برا المدرسة يبقى انا في السليم

!!!

.....

الفصل السادس والعشرون :

صف آياز السيارة عند أقرب مشفى ، بينما ترجل رامي منها ، وإستدار ناحية باب المقعد الخلفي ليفتح الباب لعاليا التي تحركت بحذر للخارج ...

كان رامي على وشك الانحاء وحمل عاليا مجدداً ولكنها أوقفته برفع كفها في وجهه ، وهتفت بجدية :

-مش عاوزة مساعدة ، أنا أقدر أمشي لوحدي

نفخ رامي بضيق وهو يجيبها متسائلاً :

-أنا بأسهل عليكي الموضوع ، ليه بتعقدي الدنيا ؟

رفعت حاجبها للأعلى ، ونظرت له بإستخفاف وهي ترد
بجمود :

-أنا حرة !

ثم رمقته بنظرات أكثر حدة لتضيف بإستتكار :

-ولا تكونش إنت مسئول عني وأنا مش واخدة بالي ، ده انت
لا قريبي ولا زميلي ولا خطيبي ولا حتى ابن خالتي !

أثارت كلماتها الأخيرة حنقه ، وزفر بصوت مسوع ليرد
عليها ساخراً :

-انتي عارفة المثل اللي بيقول أخرجت المعروف الضرب
بالكفوف ، أهو ده ينطبق عليكي

لوت شفيتها ، وإعتدلت في وقفتها ، وعلقت حقيبتها على
كتفها ، وأمرته بصوت جاد يحمل المزاح :

-وسع شوية خليني أعرج لجوا !

أشار بيده للأمام وهو يتحرك للجانب ، وأردف ساخراً :

-اتفضلي يا أبله اعرجي براحتك !

راقبهما آياز من داخل السيارة ، وتسائل مع نفسه
بإستغراب :

-لأ واضح من طريقة الكلام بينهم إن الموضوع كبير !

أراح ساعديه على مقود السيارة ، وتابع بتوعد :
-اوكي يا رامي ، هاعرف منك كل حاجة على رواقه !

.....

دلفت عاليا إلى داخل المشفى ، وتم إسعافها من أثر العضة
بحرفية ..

خشيت أن تكون المسألة خطيرة ، ولكن طمأنتها الطبيبة
قائلة :

-مافيش قلق إن شاء الله ، هما بس 3 حقن ، كل يومين
هتاخذوها ، وبعد كده هنعمل فحص تاني !

سألها رامي بجدية زائفة وهو يفرك طرف ذقنه :

-يعني مش هاجيلها سعار ولا شحار ؟

فغرت عاليا فمها مصدومة ، ورمقته بنظرات نارية ، ثم
هتفت بغيظ :

-افندم ؟!!!

سألته الطيبة باستغراب وهي قاطبة جبينها :
-مين حضرتك ؟

أشار رامي بيده لعاليا ، وأجابها مازحاً :
-أنا جاي مع العضة ، قصدي معاها

رمقته بنظرات محتدة ، وصاحت فيه وهي تصر على
أسنانها بغضب :
-انت جاي تهزر هنا ؟

أضافت الطيبة قائلة بهدوء :
-يا أستاذ خذ بالك من المدام وآآآ...

قاطعتها بحدة وهي تصح لها :

-آنسة من فضلك ، هو أنا مش باين عليا ولا ايه ؟!

حاول رامي إخفاء ابتسامته ، وهمس بحذر :

-باين كده ، مستقليتك !

.....

انتشر خبر إصابة عاليا على صفحة معلمي المدرسة الرسمية ، فتسابقت صديقاتها المقربات في الإتصال بها للإطمئنان عليها ، ومعرفة تفاصيل الحادث .. ولكن تعذر عليهن الوصول إليها بسبب إنتهاء شحن هاتفها المحمول ، ولم ترغب إحداهن في إثارة قلق والدتها دون داعي ...

لاحقاً عادت عاليا إلى منزلها بعد أن أوصلها آياز ورامي ، ولم تسلم هي من تعليقات الأخير الساخرة منها .. تراجلت من السيارة ، وسارت بحذر نحو بهو البناية التي تقطن بها ..

ظل رامي متابعاً إياها بنظراته حتى اختفت بالداخل .. فأدار رأسه في اتجاه آياز ، وأردف قائلاً :

-ياللا بينا يا ايزوو

علق آياز على أسلوب ابن خالته قائلاً بجدية :
-ايه حكايتك معاها ؟

رد عليه بفتور وهو يحك رأسه :
-ولا حكاية ولا رواية

أضاف آياز قائلاً بنبرة رزينة :
-ماتقنعيش ان مافيش حاجة بينكم ، انت مش شايف نفسك
يا بني معاها !؟

تتحنح بصوت خشن ليجيبه :
-احم .. متحطش في بالك

مط آياز فمه ، وأكمل بإستسلام
-ممم.. ماشي .. براحتك !

ثم مال برأسه عليه ليقول بجدية :

-بس أنا مش مصدقك ، وهاعرف بطريقتي

نفخ رامي بنفاد صبر وهو يتابع قائلاً :
-لو في حاجة هاقول أكيد

سأله آياز بخبث وهو محقق به :
-انت ولا هي ؟

رد عليه رامي متسائلاً بغموض :
-قصدك ايه ؟

لوى ثغره ليضيف بإبتسامة مأكرة :
-يعني أنا ممكن أسألها عنك

اتسعت حدقتي رامي بصدمة ، وهتف بتلهف :
-بجد !! انت هاتعمل كده ؟

قهقه آياز عالياً ، فقد استطاع خداعه بسهولة ، وأكمل
بعث :

-مش بأقولك في حاجة بينكم

نظر له رامي بإعجاب من طريقته ، وهتف بحماس :

-مش سهل يضحك عليك !

رد عليه بنظرات متسلية وقد أشعل محرك السيارة :

-طبعاً

.....

في المساء ،،،

في منزل عالي ،،،

اجتمعت بعض المعلمات حول فراش عالي في منزلها ،
وتوسطهم الناظرة إعتاد والتي أكملت حديثها بهدوء :
-ألف سلامة عليكي مس عالي ، إن شاء الله ترجعيلنا تاني

ابتسمت لها عالي ابتسامة مجاملة ، وردت بإمتنان :

-الله يسلمك يا مس إعتاد

أكلت الناظرة بجدية وهي ترفع حاجبيها للأعلى :
-احنا أخطرنا مديرية الطب البيطري ، والمحافظة وإن شاء
الله يتعاملوا مع الكلاب دول !

هتفت سالي قائلة بجدية واضحة :
-يا ريت ، بدل ما كلب منهم يعض طفل من عندنا

أومات الناظرة برأسها ايجاباً ، ورددت بهدوء حذر :
-بالظبط ، وقبلهم سلامتكم عندي !

ثم هبت واقفة لتكمل بجدية :
-هستأذن أنا

قطبت عاليا جبينها ، وهتفت معترضة :
-لسه بدري يا مس إعتما

إبتسمت لها إبتسامة باهتة وهي تبرر قائلة :
-معلش يا مس عشان تاخدي راحتك ، وأشوفك قريب
على خير

رمشت عاليا بعينيها ، وهمست :
-الله يخليكي يا مس اعتماد .. !

ثم غمزت لهناء الواقعة إلى جوار فراشها ، وضغطت على
شفتيها لتقول بخفوت :
-روحي وصلبها يا هناء

رفعت هناء إبهامها للأعلى لتقول بإيجاز :
-اوكي

وبالفعل اصطحبت هناء الناظرة إعتماإ إلى الخارج ...

جلست سارة على الفراش ، وعقدت ساقبها معاً ، ثم ضمت
كفيها على حجرها وهتفت بحماس :
-ياللا يا لولو ، متطوليش علينا بقب

ربتت عالبا على فخذ رفيقتها قائلة :
-إن شاء الله ، ربنا يهون بالأيام الجاية

أضافت سالي قائلة بمزاح وهي ترتشف العصير :
-هي حابة تدلع علينا وتشوف غلاوتها

تسائلت منة بجدية وهي عابسة الوجه :
-على كده مين هايشيل حصك ؟

ردت عليها عاليا وهي تهز كتفيها :
-اسألني أية يا منون ؟

تابعت منة قائلة بانزعاج وهي تشير بكفها :
-أنا جدولي مليون خلقة مش ناقص

ابتسمت لها أية ميبة إياها بنبرة رقيقة :
-مس اعتماد هتظبط معايا الجدول بكرة

هتفت سارة بلووم وهي تعمز لأية :
-أنا رأيي تشيلي البت رانيا الجدول كله

قهقهت عاليا بصوت مرتفع ، وهتفت قائلة :
-مش قادة منك ، ده كده هاتتنفخ !

ردت أية بنبرتها الهادئة وهي تهز رأسها :
-هو في الغالب فعلا يا رانيا يا نشوى هيشيلوا مكانك

ابتسمت سالي قائلة بنبرة ثابتة :
-أحسن ، خلي عضهم ينشف شوية !

تسائلت عاليا بنبرة جادة :
-أومال فين ريمان وليلة ؟

أجابتها سارة وهي تتهد بعرق :
-ريمان قافلة موبايلها من الصبح والفيس والواتس وكل
حاجة ، واحنا مش عارفين نكلمها

عبست عاليا بوجهها وهي تسألها باستغراب :
-طب ليه ؟

هزت سارة كتفيها بعدم مبالاة لتجيبها :
-مش عارفة ..

ردت سالي بهدوء :

-هي لما بتضايق مش بتكلم حد

مطت عاليًا شفيتها ، ثم تسألت بإقتضاب :
-وليلة ؟

أجابتها سارة دون تأخير :

-عندها فرح ومعرفتش تخلع ، بس بعثالك السلام !

هزت رأسها قليلاً وهي تضيف :

-أها .. الله يسلمها

نهضت سالي من على المقعد ، وأشارت بيدها قائلة :

-يالاً بينا يا بنات عشان لولو ترتاح

ردت عليها عاليًا بتذمر :

-خليكوا أعيدين معايا شوية !

هتفت منة قائلة بضجر :

-يا بنتي انتي هتنامي ، لكن احنا وانا شغل متلتل بكرة

هزت رأسها متفهمة ، ثم تشدقت قائلة :

-ربنا معاكو ويعينكم !

هتفت هناء بنبرة مرتفعة وهي تقف على عتبة الباب :

-مس اعتماد مشت

أشارت لها سالي بيدها وهي تقول :

-احنا هنحصلها الوقتي

أومات هناء برأسها ، وأضافت بنبرة ناعمة :

-اوكي ، باقي البنات هايعدوا عليكي بكرة بعد المدرسة

ابتسمت لها عاليا وهي تجيبها :

-تشرفوا في أي وقت ده بيتكم يا حبايبي !

وقفت المعلمات خلف بعضهن لتقبلن عالياً وتحضننها ،
فشكرتهن بامتنان حقيقي ، وانصرفن جميعاً تاركين إياها
تفكر فيما حدث لها ، وخاصة مع رامي ...

.....

في صباح اليوم التالي ،،،
في مبنى رياض الأطفال ،،،

بدى على وجه رانيا الحنق ، وتلونت وجنتيها بحمرة
غاضبة بعد أن أوكلت إليها الناظرة بغالبية حصص عالياً ...
ظلت تسب بخفوت ، وتلعن الدراسة والجدول الدراسي
المزدحم .. وغمغمت بضجر:
-ناس تتعض وتاخذ أجازة ، وناس تلبس في جدول ابن
تبييت !

دلفت إلى داخل قاعة الدراسة ، ونظرت إلى الأطفال بضيق
، ولوت فمها وهي تصيح بصوت محتد :
-الكل (يجلس) في مكانه ، محدش يقف

ردد طفل ما باستغراب :

-يجلس !

نظرت له من طرف عينها ، وبررت قائلة :

-ايوه .. يعني يقعد بالفصحي

-ماشي يا مس

أخذت رانيا نفساً مطولاً ، وزفرته بصوت مسموع ، ثم

تشدقت قائلة :

-عاوزة كلمة تبدأ بحرف العين !

رفعت الأطفال الصغار أذرعهم عالياً ، فإختارت أحدهم

ليجيبها بثقة :

-عيب يا مس

فغرت فمها مدهوشة لتقول :

-نعم ! عيب

أضاف طفل آخر قائلاً بحماس :
-عشان خاطري بتبدأ بالعين يا مس

لوت فمها بإندهاش أكبر مرودة :
-نعم ، عشان خاطري !

نهض طفل ثالث من مقعده ، وصاح بصوت مرتفع :
-مس .. مس .. عمليات خاصة بتبدأ بالعين

كزت رانيا على أسنانها بشدة ، ووضعت يديها على رأسها ،
وهتفت بصوت محتد :
-صبرني يارب !

وقف قبالتها أحد الصغار ، وعبس بوجهه الطفولي البريء ،
وصاح بجدية :

-مس صبرني بتبدأ بحرف الـ (صاد) مش العين ، كده
Wrong (خطأ)

دفت رانيا وجهها في راحتها ، وضغت على شفيتها
لتقول في نفسها بنبرة مغتظة :

-يالهي ، و لسه ياما هاشوف ، هو الضغط بيجيلي
من قليل!!

.....

الفصل السابع والعشرون :

في مبنى الرياض ،،،

اضطرت غالبية المعلمات إلى تولي جدول حصص عالي
المثقل بالكثير لتعويض غيابها والتأكد من عدم تأثر الأطفال
بهذا ..

كما إنعكس غيابها على آياز حيث تم ضغط جدولته هو
الأخر بسبب الإستعانة بمعلمات الأنشطة .. فأرهقته ثرثرة
الأطفال اللامتناهية ..

بذل هو مجهوداً مضمناً لتعويد الصغار على التحدث بطلاقة
باللغة الإنجليزية ، ولكنهم أجبروه على النطق بالعربية ..
فأصابته تلك المسألة بالضجر والإحباط ..

اقتربت منه إحدى الصغيرات ، وجذبتة من بنطاله لتقول
ببراءة :

-مستر .. مستر

نظر ناحيتها ورد بإيجاز :

-ييس !

أشارت بإصبعها وهي تدير رأسها للخلف لتجيبه بحزن :

-عمورة بيدلعي ، وبيقولي يا توتا

فغر فمه قائلاً بإندهاش ، وتعبيرات الصدمة تكسو وجهه :

-نعم !

أضافت الصغيرة قائلة ببراءة :

-أنا قولتله لأ يا عمورة ، مش تدليني ، انت ناديني بإسمي
على طول !

ضغط آياز على شفتيه ليهمس بغيظ :

-كمان ! ومن السن ده !!

إعتدل في وقفته ، وهتف بصرامة :

-عمر ! Come here (تعالى هنا) !

نهض الصغير من على مقعده ، واتجه نحوه ، ونظر له
بنظرات بريئة وهو يرمش بعينيه ، فرق قلب آياز له ،
وسأله بهدوء :

-انت بتدلع صاحبتك ؟

أوما الصغير برأسه ليحيبه بصوت طفولي :

-اه .. بأحبها أوي

لوى آياز فمه ليردد بتهكم :

-بتحبها ؟

ارتسم على ثغر الصغير عمر إبتسامة سعيدة وهو يهتف بحماس ، ومشيراً بكفيه :

-ايوه ، وبكرة هاتروح النادي سوا ، وهنركب مع بعض المرجيحة

مط آياز فمه ، وحك طرف ذقنه قائلاً بإيجاز :
-واو !

تابع الصغير قائلاً بفرحة :

-عارف يا مستر أنا هاجيبها Pencil Case (مقلمة)
عليها كيتي

سأله آياز بفضول :

-دي هدية ؟

أشار الصغير على فمه وهو يهمس محذراً :

-اه .. بس ماتقولهاش

ربت آياز على كتف الصغير ، وتشدق قائلاً :
-حاضر ، روح يا بني اقعدي مكانك !

.....

في غرفة المعلمات ،،،،

-آه ياني يا نافوخي ! هاتنفجر !

قالتها رانيا وهي تدلف إلى داخل الغرفة ، ثم ألقت بكتبها
على الطاولة ، وسحبت مقعداً لتجلس عليه ، ثم أضافت
بسخط :

-دول مش عيال ، دول شوية قرود !

أدارت رأسها للجانب لتجد ريمان جالسة في صمت ،
وتدون شيئاً ما في مفكرتها متجاهلة إياها بشدة ..
إزدردت ريقها في عدم اكتراث ، وقررت أن تستفزها قليلاً ،
لذا تراجع بمقعدها وهي جالسة عليه للخلف لتأرجحه ..
ودندنت مع نفسها بتلميحات مستفزة :

-أكذب عليك ، أها ، أكذب عليك ♪ ♪ !

رمقتها ريمان بنظرات حادة ، وكزت على أسنانها بضيق

..

ولجت ميادة إلى داخل الغرفة وهي تحمل في يدها كوباً من مشروب (الينسون) الساخن ، وأردفت قائلة بإبتسامة باهتة :

-صباح الخير

ردت عليها رانيا بحماس :

-صباحك فل يا ميادة

بينما تمتت ريمان بإيجاز :

-هاي ميدو

سألتهما ميادة بفضول وهي تجلس على الأريكة :

-انتو فاضيين ولا ايه ؟

ردت عليها ريمان بضجر وهي ترمق رانيا بنظرات حادة :

-لأ ، أنا عندي Session (حصة) كمان عشر دقائق !!!

تقوس فم رانيا وهي تجيبها بامتعاض :
-أنا لابسة في جدول عاليا طول اليوم

أضافت ميادة بجدية :
-كلنا يا بنتي لابسين ، كمان غياب هبة النهاردة عامل أزمة
!

هتفت رانيا قائلة بتذمر :
-أنا معرفش ليه مش بيحبوا حد زيادة يشيل معانا

ضغطت ميادة على شفيتها وهي تقول بنزق :
-يجيبوا ليه واحنا موجودين ؟

وقفت السكرتيرة أية على باب الغرفة ، وتسائلت برقة :
-بنات محدش شاف فيكم هناء ؟

ردت ميادة متسائلة بهدوء وهي تدير رأسها في إتجاهها :
-لا .. بتسالي ليه ؟

أجابتها أية بنعومة :

-عندها اشرف ساعة التسليم مكان هبة

مطت ميادة ثغرها لتقول بتهيدة منهكة :

-يا عيني عليها ، دي طول اليوم مطلعتش برا الكلاس
بتاعها

ضحكت رانيا وهي تضيف بمزاح :

-بيتهياي لو بلغناها هتهب في وشنا !

عبست أية قليلاً بوجهها ، وأشارت إلى نفسها بكفها وهي
تبرر موقفها ب :

-هاعمل ايه بس ، انتو بتكلموني ليه ؟ أنا ماليش دعوة

هتفت رانيا بجدية وهي تهز حاجبها :

-مش إنتي الإدارة !؟

إحتجت أية بنبرة رقيقة :

-لأ.. أنا يدوب سكرتيرة ، لكن اللي عنده اعتراض يتكلم مع
مس إعتاد !

نفخت ميادة بضجر وهي تقول :

-أووف ، ربنا يعينا

رسمت أية ابتسامة باهتة على وجهها وهي تتابع :

-بليز لو شوفتها قولولها

ردت رانيا بإيجاز :

-ماشي !

أردفت ريمان قائلة بجدية وهي تجمع أشياءها من على
الطاولة :

-أنا رايحة ناحية الكلاس بتاعها ، لو لاقيتها هناك هابلغها

رفعت لها أية إبهامها ، وهتفت ممتة :

-تمام !

تسائلت ميادة بإستغراب وهي محدقة في ريمان :

-انتي يا بنتي مش لسه عندك وقت ؟

سلطت ريمان أنظارها على رانيا ، وتقوست شفتيها مجيبة
إياها بحنق :

-الجو هنا كئيب وخانقة ، وأنا مش ناقصة طاقة سلبية !

إلتوى فم رانيا بصورة واضحة وهي تردد بهمس :

-طاقة سلبية ، قصدها ايه دي ؟

أرجحت رانيا المقعد للخلف دون أن تنتبه لعدم إتزانها ،
فسقط بها فوراً على الأرضية .. وبدت مضحكة للغاية وهي
منكبة على وجهها ..

تعالت ضحكات ريمان الساخرة منها ، ورمقتها بنظرات
متشفية منها ، وكأنها نالت بتلك السقطة ما تسحتقه ..

-قومي يا رانيا ! مايوقع إلا الشاطر !

قالتها ميادة بصعوبة وهي تحاول السيطرة على قهقهاتها ..

إحتقن وجه رانيا بشدة ، وكزت على أسنانها بغيظ وهي تنهض من على الأرضية ..

نفضت يديها ، وعدلت من حجابها وغمغت بتذمر :

-ماشي .. ماشي ، بكرة نشوف مين هاتضحك في الآخر ..

.....

في قاعة الدراسة الخاصة بالمعلمة حنان ،،،

انتهت حنان من توزيع كتب الأطفال والواجبات المنزلية عليهم جميعاً ، ثم هاتفت أخيها قائلة بحماس :

-زي ما اتفقنا يا أحمد ، هاتيحي على التسليم تشوفها

أتاها رده من الجانب الآخر :

-حاضر ، أنا تقريباً 5 دقائق وهاكون عند البوابة ، وهاستنى جمبها ، هو فاضل كتير على التسليم ؟

أجابته بهدوء :

-ربع ساعة

تابع قائلاً بهدوء حذر :

-تمام .. هاكون موجود قبلها

-إن شاء الله

قالتها حنان وهي تشير للصغار بيدها ليعاودوا الجلوس في أماكنهم .. ثم أنهت المكالمة معه وبدأت تعيد ترتيب هنادم الأطفال قبل إرسالهم إلى ذويهم ...

.....

في منزل عاليًا ،،،

تملمت عاليًا في فراشها ، وإستدارت لتنام على جانبها ، ثم وضعت الوسادة على رأسها لتكمل نومها .. ولكنها سمعت صوت دقات خافتة على باب غرفتها ، فرفعت الوسادة ، وإلتفتت برأسها نحوه لتتهافت بصوت ناعس :

-ايوه

دلفت والدتها إلى الداخل ، ورسمت على ثغرها إبتسامة حنونة ، وأجابتها بنعومة:

-لولو .. الورد والبدوب ده عشانك

حدقت عاليًا بإندهاش في باقة الورد الحمراء ، وذلك (البدوب) ذو الحجم الكبير ، وتلك العلبه الصغيره المغلفه معها .. وتساءلت بنزق :

-من مين دول ؟

أسندت والدتها الهدايا على طرف الفراش ، وأجابتها بهدوء :

-مش عارفة ، بس هما لسه جاينين من شويه

فحصت عاليًا الهدايا بدقه ، وضافت عينيها بغموض وهي تحاول تخمين من أرسلهم إليها

قطعت والدتها تفكيرها المتحير وهي تردد برقة :

-مممكن يكونوا أصحابك

ردت عليها عاليًا بسخرية وهي تهز كتفيها :

-هو أنا لحقت أوحشهم عشان يجيبوا ده ، دول آخرهم معايا عزومه على أي مطعم تيك أواي

أشارت لها والدتها بكفها وهي تتجه نحو باب الغرفة :
-طيب هاروح أنا أحضر الغدا ، وانتي لازم تشكري اللي
بعنتك الحاجة

حكّت عاليا جبينها ، وغمغت مع نفسها :
-مين بس اللي باعتهم ، ده مافيش ولا كارت ولا اسم ولا أي
حاجة !!

فتحت بيدها الأخرى العلبة الصغيرة ، وشهقت مصدومة
حينما وجدتها مليئة بأفخم أنواع الشيكولاته ..

.....

في سيارة رامي ،،،

هز رامي رأسه ممتناً وهو يبتسم بسعادة بعد أن أشار
له العامل - والذي استأجره لإرسال الهدايا إلى عاليا -
بإبهامه معلناً إنتهائه من مهمته العاجلة ..
ثم رفع هو بصره للأعلى ، وهمس بصوت متحمس :

-ياما كان نفسي أشوف ردة فعلك وانتي بتفتحي الهدايا ! يا رب بس تعجبك !

طرق بأطراف أصابعه على المقود وتابع بتوجس :
-أنا عارف إن البنات الطبيعية بتموت في الشيكولاته ،
والورد وجو الدباديب والحركات دي ، يا ترى انتي زيهم ولا
هلاقيهم محدوفين من البلكونة !!؟

.....

في الإستقبال الملحق بمبنى الرياض ،،،

زفرت هناء بضيق لأكثر من مرة وهي تهتف بصوت
شبه منفعل في وجه منة :

-بجد ده ظلم ، إزاي كل ده يبقى عليا لوحدي

رتت منة على كتفها ، وأردفت قائلة بحذر :

-اهدي بس

لوحث بذراعها وهي تهتف بغل :
-اهدى ليه ومحدث حاسس بيا !

اقرحت منة بجدية :
-اتكلمي مع مس اعتماد

لوت هناء فمها لتضيف بسخط وهي ترمش بعينيها :
-هي بتسمع حد أصلاً

أخفضت منة نبرة صوتها وهي تقول :
-بيني وبينك هي مابتصدق تلاقى حد يشتغل وما يعترضش
وتشيله

تتهدت هناء بانهاك مرددة بغيظ :
-حرام والله ، أنا خلاص هاطق ، وبعدين أنا معرفش حد في
كلاس هبة عشان أسلمه !!

قطبت منة جبينها ، وتشدقت قائلة بجدية :

-بصي ماتديش أي طفل لأهله إلا بکارت التسليم ، ويبقى
انتي كده في السليم

نفخت هناء مجدداً وهي تعقد ذراعيها أمام صدرها :
-اووف

تابعت منة قائلة باحتراز :
-ماشي ، صدقيني كده أريحك ! وبعد كده نتكلم معاها
-اوکي

احتضنتها بحنو ، وربتت على ظهرها ، وأضافت قائلة بحنو
:

-روقي بقي يا هنووءة

ردت عليها باقتضاب :
-ربنا يسهل

.....

وما هي إلا لحظات حتى عجز الإستقبال بأولياء أمور
الأطفال الصغار ..

كانت الأمور تسير بسلاسة حتى حضر أحدهم لإستلام طفل
ما .. ولكن لم يكن بحوزته بطاقة التسليم .. فرفضت هناء
إعطائه إياه دون التحقق من هويته ، فصاح بها بغلظة :
-بأقولك أنا خاله

ردت عليه بضيق وهي ترمقه بنظرات حادة :
-وأنا هاعرف منين إنك خاله ! في كارت معاك ؟

أجابها بصوت محتد وهو يرمقها بنظرات قوية :
-لأ .. هي أمه قالتلي خده من المدرسة

انزعجت هناء من أسلوبه اللفظي الحديث ، وهتفت بإصرار
:

-ماليش دعوة ، الأم تكلمني بنفسها وآآ..

قاطعتها بصوت هادر متعمداً إهانتها :

-انتي مابتفهميش !

احتقنت عينيها بشدة ، ولمعت بعبرات رقيقة ، وهتفت
بصوت شبه مختنق :

-اتكلم كويس معايا ، أنا مش بأشتغل عندك

صاح بها بصوت جهوري محدجاً إياها بنظرات مهينة :
-انتي اللي مش عارفة شغلك ولا آآآ....

قاطعته الناظرة إعتماذ بصوت صارم بعدما جاءت على إثر
صوته المرتفع :

-في ايه يا استاذ ، تعالي نتكلم على جنب !

تحرك الشخص الفظ مع الناظرة بعيداً عن الحضور ، وتابع
قائلاً بإحتقار وهو يشير بإصبعه على هناء :

-الأخت مش عاوزة تديني ابن اختي

رفعت الناظرة حاجبيها ، وردت عليه بصوت صارم وهي
عابسة الوجه :

-أولاً هي مش أخت ، هي مس محترمة هنا في المدرسة ،
ثانياً ، مع احترامي ليك ده مش اسلوب تتكلم بيه معانا ،

وثالثاً وده الأهم .. ابن أختك أو أي طفل هنا ملزوم منا لحد ما يستلمه أهله اللي احنا عارفينهم ، أي حد غريب بيجي يستلمه غير أهله لازم نكون متبلغين بده ، وإلا هانرفض نسلمه !

تجهم وجهه من أسلوبها الجاد معه ، وهتف بنزق :
-بس أنا مش غريب وآآ...

قاطعته بصوت أكثر جدية وهي تشير بكف يدها في وجهه :
-حضرتك احنا منعرفش سيادتك ولا آآ..

قاطعها بغرور وهو معتد بنفسه :
-أنا الراءد محمد من قوات الصاعقة ، وجاي أخذ آآ..

قاطعته تلك المرة بنبرة غير مكترثة :
-وإن يكن ، برضوه ده مش يديك الحق تتكلم مع أي حد هنا ، وخصوصا لو هي التيتشر بتاعة طفلك !..

.....

في قاعة الدراسة الخاصة بالمعلمة حنان ،،،

رتبت سارة بعض الأوراق المطبوعة في حافظة ما وهي
تولي ظهرها لحنان ، ورددت بصوت خافت :
-أنا هاحطهولك يا مس حنان في الرف اللي تحت

في نفس التوقيت ، دلف أحمد للقاعة بعد أن استأذن من
الإدارة للدخول لأخته لإحضار شيء ما منها ..

لم تنتبه سارة لحضوره ، وظلت جاثية على ركبتها وهي
ترص الحافظات المختلفة في المكتبة الصغيرة ..

همست حنان لأخيها بحماس :

-بص كده وقولي ايه رأيك

رد عليها متهكماً :

-هو أنا شايف منها حاجة غير قفاها

حذرتة بخفوت وهي توميء بعينيها :

-ششش .. طب اصبر !

نهضت سارة من على الأرضية ، وإستدارت في اتجاه حنان ، فتفاجئت بذلك الرجل المحقق بها ، فتلونت وجنتيها بحمرة باهتة ، وتحنحت بحرج :

-احم .. انت مين ؟

هتفت حنان بحماس بادي في نبرتها وتعابير وجهها :

-ماقليش يا سارة ، ده أحمد أخويا

ابتسمت ابتسامة باهتة وهي تقول :

-أها .. اهلا !

أردف أحمد قائلاً بهدوء :

-ازيك يا مس ؟

ردت عليه بإقتضاب :

-الحمد لله

أضافت حنان قائلة بجدية وهي تربت على كتف أخيها :
-هو كان جاي ياخذ مني آآ..

قاطعتها سارة بصوت جاد :
-أنا مسألتيش يا مس حنان ، خدوا راحتكم ، وأنا هاجي في وقت تاني ، عن اذنكم

تابعها الاثنتين وهي تنصرف من القاعة حتى توارت عن
أنظارهما ، فتسائلت حنان بتلهف :
-ايه رأيك فيها ؟

رد عليها أحمد بفتور :
-مش بطالة !

أضافت قائلة بعتاب :
-دي زي القمر يا حمادة

هتف أحمد بعدم مبالاة وهو يدس يديه في جيبه بنطاله
الجينز :

-أنا مقولتش وحشة ، بس بردك أنا معرفهاش

سألته بمكر وهي تبتسم له :

-المهم شكلها عجبك ؟

لوى فمه مجيباً إياها بإيجاز :

-يعني !

أكملت حنان حديثها بتهيدة سعيدة :

-ربنا يعملك اللي فيه الخير يا حمادة !

.....

عند سيارة ريمان ،،،

أسندت ريمان متعلقاتها الشخصية على مقدمة سيارتها ،
ومدت يدها نحو المقبض لتفتح الباب ، ولكنه سمعت صوتاً
رجولياً مألوفاً يأتي من خلفها مردداً :

-مس ريمان بليز

التفتت برأسها نحو صاحبه ، وتبدلت تعابير وجهها للضجر
حينما رأت آياز أمامها ..

تتهدت بإحباط وهي عابسة الوجه ، بينما تابع متسائلاً
بهذوء حذر :

-ممكّن أخذ من وقتك 5 دقائق ؟

سألته بإقتضاب وهي تعقد ساعديها أمام صدرها :

-ليه ؟

-أنا مش عاوز يكون في بينا سوء تفاهم أو آآ...

قاطعته بصوت شبه محتد وهو مقتطبة الجبين :

-مستر آياز من فضلك ، أنا مش حابة أحكي في أي حاجة
حصلت قبل كده

أصر آياز على الحديث معها ، وتابع بنبرة هادئة :

-أنا شايف انه مش هاينفع نتكلم هنا ، وبأقترح نتقابل برا
بعيد عن جو الضغط و..آآ...

قاطعته برفض تام :

-مافيش داعي

أردف آياز قائلاً بنبرة مُصرّة :

-لأ .. بس أنا أفضل نسوي أي خلافات بينا ، مهما كان إحنا
زمايل ، وماينفّش نكون مضايقين من بعض

ردت عليه ريمان بامتعاض :

-مافيش خلاف ، ده سوء فهم وآآ...

-الله ! الله ! الله ! هو أنا كل ما أغيب شوية أرجع الأيكم مع
بعض !

قالتها رانيا بصوت محتقن وهي تشير بإصبعها ، ورافعة
لحاجبها للأعلى مستنكرة رؤيتهما معاً ...

رمقتها ريمان بنظرات مشتعلة قبل أن تهتف بحدة :

-من فضلك حاسب ، أنا مش ناقصة حرقه دم مع الأشكال دي

تقوس فم رانيا باستنكار جلي ، وهتفت بتهكم :
-أشكال ، لألاً .. انتي كده بتغلطي فيا ! وأنا ماسمحش ،
ده كله إلا كده

حدجها آياز بنظرات إحتقارية ، وغمغم بخفوت :
-لوكال !

هتفت ريمان بإنفعال :
-حقيقي اللي جابك المدرسة هنا غلط

ردت عليها رانيا بثقة مغترة :
-أنا جيت بمجهودي الذاتي ، يعني لا كوسة ولا واسطة ولا
بعوجة بؤ ..!

إغتاظت ريمان من أسلوبها المستفز في الحوار ، ولم تمهل
نفسها فرصة للتفكير ، حيث إلتفتت إلى آياز ، وتساءلت
بنبرة جادة :

-قولتلي هنتقابل الساعة كام ؟
ثم عاودت النظر إلى رانيا ورمقتها بنظرات متحدية ..

اندهش آياز من التغيير المفاجيء الذي أصابها ، وأجابها
بلا تردد :

-المكان اللي تحدديه ، أنا معاكي

أشارت بأصابع يدها وهي تتعمد التحدث بنبرة ناعمة :
-طب هات رقمك ، وانا هاكلمك يا مستر ؟

مد يده بهاتفه المحمول إليها وهو يجيبها بإبتسامة خفيفة :
-اوكي

شهقت رانيا مصدومة وهي جاحظة العينين :
-ايه ده .. عيني عينك كده !

رمقتها ريمان بنظرات أكثر تحدياً ، وردت عليها بقوة :
-ايوه ، وإن كان عاجبك !!

احتدت عيني رانيا ، وتلون وجهها بحمرة غاضبة ، وكزت
على أسنانها لتقول بشراسة :

-يا جبروتك

فتحت ريمان باب سيارتها بعد أن أعادت الهاتف لآياز ،
وتابعت بنعومة غريبة :

-اوكي يا مستر ، على تليفون

بادلها آياز ابتسامة عذبة وهو يرد عليها :
-sure (طبعاً)

لوحت له بأصابعها وهي تصفق الباب :
-باي

أشار لها بكفه ، وإستدار مبتعداً .. بينما هزت رانيا جسدها
بعصبية واضحة وهي تضيف بحنق :

-إلهي كاوتش العربية يفرقع وماتلحقيش تقابليه
!!

.....

الفصل الثامن والعشرون :

في فيلا سرحان عليه ،،،،

استندت ورده برأسها على كف يدها ، وتنهدت لأكثر من مرة بحرارة وهي تطالع بعينيها صورة آياز التي سرقتها خلسة من غرفته..

تمت مع نفسها بضيق :

-لا حجاب نافع معاك ، ولا عمل جايب نتيجة ، طب هاتحس بيا امتي !

عبست بوجهها وهي تضيف بحنق :

-منك لله يا شيخ مبروك ، ضحكت عليا ولهفت القرشونات !

استمعت هي إلى صوت السيدة سوزان وهي تناديها بنبرة مرتفعة :

-ورده ، تعالي بسرعة !

ردت عليها بامتعاض :

-جاية يا ست سوزان !

ثم نهضت بتثاقل من مكانها ، ودست الصورة الفوتغرافية
في صدرها ، وعدلت من عباءتها ، وخرجت لمقابلتها ..

-ايوه يا ستي !

ردت عليها سوزان بجدية :

-عاوزاكي تسمعيني كويس يا وردة ، البيه سرحان هيسافر
البلد كام يوم على الأسبوع الجاي ، واحتمال أروح معاه
وانتي كمان

عبست وردة بوجهها أكثر ، وهتفت بضيق واضح :

-ايبيه ؟ طب ليه يا ستي ؟

ردت عليها بتهيدة مطولة :

-شوية مشاكل هناك ، ومش هاینفع نسيبه لوحده

لوت وردت فمها ، وتسائلت بتلهف :

-طب وسي إزاز ، قصدي رامي بيه وآآ...

قاطعتها بجدية وهي تشير بيدها :
-هما شباب يتصرفوا مع أنفسهم ، لكن إنتي محتجاكي معايا

حركت فمها للجانبين ، وغمغت بصوت خفيض :
-يادي الهم ، أل جت الحزينة تفرح مالقتلهاش مطرح !

تابعت سوزان قائلة بنبرة جادة :
-أنا بأقولك يا وردة عشان تعملي حسابك ، فجهزي نفسك ،
تمام !؟

ردت عليها بحزن :
-حاضر يا ستي !

.....

في منزل عاليا ،،،

قطمت سارة قطعة من ثمرة التفاح ، وظلت تلوكلها في
فمها بإستمتاع ، فرمقتها عاليا بنظرات حادة وهي تسألها
بغيط :

-يا بنتي سيبك من الأكل وردي عليا ، مين فيكم اللي بعت
الحاجات دي ؟

ابتلعت سارة قطعة التفاح ، وردت عليها بهدوء :
-هو احنا لاقين ناكل أما هانجيب بوكس شيكولاته ودباديب

فركت طرف ذقتها بكفها ، وتساءلت بحيرة :
-أومال مين بس ؟

غمزت لها سارة وهي تقول بمكر :
-تلاقي معجب سري !

قطبت عاليا جبينها ، ورددت بإندهاش :
-هاه ، معجب

أثارت تلك الكلمات المختصرة حفيظتها ، وأضاء عقلها بصورة رامي .. فشردت تفكر فيه وفي مواقفه معها ..
لاحظت سارة صمتها المريب ، فسألتها بفضول :
-قوليلي بقي مين ، ها مين ؟

زفرت عاليا بضيق زائف ، وردت قائلة :
-بس يا سارة أنا مش فيقالك

أدركت سارة أن رفيقتها لا ترغب في الحديث، لذا حركت رأسها بإيماءة خفيفة وهي تقول :
-ماشى يا لولو ، قوليلي ، أخبار الأجازة الإجباري معاكى ايه ؟ أكيد مرتاحة

ردت عليها بتذمر من وضعها :
-والله زهقت ، عاوزة أنزل

نظرت لها سارة بإندهاش ، وتابعت بإمتعاض واضح :
-ده انتي في راحة ، احنا منفوخين على الآخر

أضافت عاليا بجدية وهي ترفع حاجبيها للأعلى :
-على فكرة أنا مش بأتعب من الشغل ، بس بأضايق من
الاسلوب الوحش في التعامل

هزت سارة رأسها عدة مرات ، وردت عليها بصوت خفيض
:
-أها ، على رأيك !

تمطعت عاليا بذراعيها ، وأكملت بعتاب زائف :
-والبنات الأندال دول محدش فيهم جالي تاني
-اعذريهم ، الكل طالع عينه
-ربنا معاهم

أضافت سارة قائلة بجدية :
-اسكتي ، مش البت هناء حصل معاها موقف زبالة النهاردة

عقدت عاليا ما بين حاجبيها بشدة ، وتسائلت باهتمام :
-موقف ايه ده ؟

أجابتها الأخيرة قائلة :

-في كلاس هبة ، مع حد من الـ Parents (أولياء الأمور)

حركت عاليا ساقها بحذر وهي تقول :

-طب استتي أما أتعدك واحكي لي

-او كي !

.....

في أحد المقاهي الحديثة ،،،

جلس آياز على أحد الطاولات القريبة من الحوائط

الزجاجية ، وظل يطالع الطريق بنظرات مترقبة ..

حدق في ساعة هاتفه المحمول لأكثر من مرة ، وتمتم مع

نفسه بصوت خافت :

-دي ممكن ماتجيش !

ولكن سريعاً تلاشت مخاوفه حينما رأى ريمان مقبلة عليه ..

إرتسمت إبتسامة ودودة على وجهه ، ونهض من مقعده

ليستقبلها ..

تتحنت هي بخرج قبل أن تستطرد حديثها قائلة بإبتسامة :
-هاي ، إتأخرت عليك ؟

رد عليها بإيجاز:

-لا !

ثم تحرك ناحيتها ، وأزاح المقعد قليلاً لتتمكن هي من
الجلوس عليه ، وتابع قائلاً بهدوء :
-اتفضلي

رمقته بنظرات خجلة وهي ترد بإمتنان :
-ميرسي

سألها آياز بإهتمام وهو محقق بها :
-تحبي تشربي ايه ؟

ردت عليه بخرج وهي تهز كتفها :
-أي حاجة

أصر آياز قائلاً :

-لأ قولي ، أنا عازمك ، اوعي تكوني مفكراني بخيل

ابتسمت له وهي ترد بحياء :

-لأ .. بس أنا مش في بالي حاجة معينة !

زادت إبتسامته إشراقاً وهو يضيف :

-خلاص هاجيبك حاجة على ذوقك

.....

في معرض السيارات ،،،،،

عقد رامي ساعديه خلف رأسه وظل يهز المقعد الجالس عليه بحركة شبه دائرية ثابتة ، وحدث في الفراغ بنظرات شاردة ..

لم ينتبه هو إلى قدوم والده المهندس سرحان .. وظل في عالمه الخاص ..

جلس أبيه على المقعد ، وأمسك بالكتالوجات الخاصة بأحدث
الكماليات للسيارات ، وأردف قائلاً بصوت رخيم :
-في حاجات حلوة هنا ، وشغلها عالي !

لاحظ أبيه صمته وعدم تركيزه معه ، فرفع من نبرة صوته
متسائلاً بجدية :
-رامي ، انت معايا ؟

تتحنح بصوت خشن ، وتوقف عن إدارة مقعده ، وأجابه :
-ايوه يا بابا

سأله والده بإستغراب وهو يتفرس ملامحه :
-ايه يا بني ، مخك راح فين ، عمال اكلمك من الصبح ، وإنت
ولا هنا !

فرك رأسه بكفه ، ورد عليه بحذر :
-دماغي مشغولة شوية

ضاقت عيني والده وهو يسأله بهدوء :

-في ايه ؟

إرتبك رامي قليلاً وتردد في إخباره ، وتملكه شعوراً بالخجل
من نفسه .. فهو يفكر في فتاة أحلامه في حضرة أبيه ..

تتحنح مجدداً، وتلعثم وهو يجيبه :

-آآ... يعني حاجات كده !

حذق فيه والده بنظرات مطولة ، وهتف بهدوء :

-خليك صريح معايا يا رامي ، أنا أبوك ، ويهمني مصلحتك

فرك رامي أصابع يده بتوتر ، ثم استطرد حديثه قائلاً :

-بصراحة يا بابا ، أنا بأفكر في الإرتباط وكده

رد عليه سرحان وهو يهز رأسه :

-وماله يا بني ، مش عيب ، الجواز سنة الحياة !

قطب رامي جبينه ، وهتف محتداً :

-يا بابا بأقولك بأفكر ، قلبت الموضوع لجواز !؟

رد عليه أبيه متسائلاً باستغراب :
- طالما الموضوع في دماغك ايه المانع !؟

ابتلع ريقه ، وأضاف بإقتضاب :
- ربنا يسهل

تسائل والده مجدداً بفضول وهو يغمز له :
- طب قولي ، البنت كويسة ؟ حد نعرفه

هز رأسه نافياً :
- لا !

همس له سرحان متسائلاً بإقتضاب :
- حلوة ؟

رد عليه بفتور :
- شغالة

أردف والده قائلاً بعتاب :

-هي عربية يا بني ! دي إنسانة !

تابع رامي بابتسامه باهته وهو ينتصب في جلسته :

-أقصد يعني روحها حلوة ، وعجباني

مط سرحان فمه للأمام ، وتساءل بجديه :

-مممم .. تمام ، اتكلمت معاها ؟

هز رأسه نافياً :

-لأ لسه

-طب هاتفتها امتي ؟

تعجب رامي من طريقة والده في الحوار ، والتي تحولت إلى

تحقيق .. فهتف محتجاً :

-ايه يا بابا كميه الأسئلة دي كلها ، ده أنا بأقولك بأفكر

فقلبتنا سين وجيم !

تنهد سرحان بصوت مسموع ، وأكمل بجديه :

-ربنا يعملك اللي فيه الخير ، المهم كام يوم ، و هسافر أنا
وأمك يومين البلد وبعدين نرجع !

سأله بفضول وهو عاقد حاجبيه :
-خير ؟

أجابه بغموض :
-موضوع كده عاوز اخلصه هناك

سأله رامي باهتمام :
-موضوع ايه ده ؟

أخذ أبيه نفساً مطولاً ، وزفره على مهل وهو يرد :
-بعدين هاتعرف

أوما رامي برأسه قائلاً :
-طيب ربنا معاكو

تابع سرحان قائلاً وهو يشير بيده :

-أنا هاخذ وردة معايا

ابتسم رامي ابتسامة عريضة وهو يقول وملوحاً بذراعه :
-خير ما عملت ، يا ريت تسيبها هناك

تعجب والده من رده اللفظ ، وهتف معترضاً :
-يا بني دي غلبانة !

غمغم رامي مع نفسه بصوت خفيض :
-وربنا انت اللي غلبان يا حاج سرحان ، دي بت حقنة !

سأله والده بجدية وهو عابس الوجه
-بتقول ايه مش سامعك ؟

رسم على وجهه ابتسامة مصطنعة ، وردد قائلاً :
-مافيش يا بابا

أمسك والده بالكتالوجات ، وناولها إياه وهو يقول بجدية :
-طيب خذ بص في الكتالوجات دي وقولي رأيك

رد عليه رامي بايجاز وهو يضعها على سطح مكتبه :
-ماشي

.....

على الجانب الآخر ،،،

إشتعل موقع (الواتس آب) بالحوارات الساخنة حول ما دار
اليوم ، وكان أبرزها مشاجرة هناء

-ليلة : ((دي زمانت مس إعتما روقت عليه))

-ميادة : ((بالظبط))

-هبة : ((زمانته اتنفخ))

-منة : ((الناس دي مابتقدرش تعابنا أبداً ، مافيش شكراً
خالص منهم ، والواحد بيستنى يسمع الكلمة الحلوة))

-هناء : ((ده معندوش ذوق ولا أخلاق ، بيتكلم معايا بقلة
أدب ، فاكرني شغالة عنده))

-منة : ((فوكك منه ، مس إعتما في الحاجات دي هاتعرف
تتعامل))

-أية : ((عرفتي يا هنا إنه ظابط في الجيش))

-هناء : ((يا شيخة !))

- أية : ((مس إعتماذ قالت كده))
- ميادة : ((وهو يعني عشانه في الجيش يبررله أسلوبه الجلياط مع الناس ؟))
- هناء : ((عندك حق ، الحمد لله إنه مش في كلاسي))
- هبة : ((سوري يا هنوء ، جت فيكي يا قمر ، أنا الكلاس بتاعي معروف عنه إنه حمم بركانية))
- هناء : ((حصل خير يا بوب))
- أية : ((بكرة يا بنات هاتيحي مس الأرت الجديدة))
- ميادة : ((الله يعينها ، ده احنا داخلين على مشاريع وشغل أد كده))
- منة : ((والله مس فريال كانت ممتازة ، محدش زيها))
- هبة : ((ايدها تتلف في حرير ، بتخلص كل حاجة بنطلبها منها بسرعة))
- هناء : ((أما نشوفها هاتعمل ايه))
- ميادة : ((شوفتوا البوست المكتوب على صفحة المدرسة ؟))
- منة : ((بوست ايه ده ؟))
- ميادة : ((كاتبين إنهم عاوزين مشرفين لرحلة الانترنتناشونال لتركيا))

-منة : ((بجد ، طب أنا هاشوفه ، أصل نفسي أطلع أوي
رحلة أغير جو))

-هناء : ((لأ مش هاينفع معايا رحلات ، أنا مفلسة على
الأخر))

-هبة : ((أنا داخلة في كام جمعية ، فأنا out - مش معاكو
- اوكي))

-ميادة : ((يا جماعة ده اشراف ، مش فسحة))

-سالي : ((انتو بترغوا في ايه يا بنات من الصبح ، مش
ملاحقة على الواتس))

-منة : ((ياه يا سالي ، إنتي لسه عايشة ؟))

-سالي : ((بلاش إنتي يا سنوفة ، أنا جهزالك))

-منة : ((انا مش أدك يا كابيرة))

.....

في المقهى الحديث ،،،

ارتشفت ريمان بحذر القليل من مشروبها الساخن ،
وضغطت على شفيتها بتوتر وهي تتابع بقلق :

-أنا مش عاوزاك تفتكر آآ...

قاطعها بهدوء جاد وهو يطالعها بنظرات متفحصة :
-ماتقوليش حاجة يا ريمان ، انا فاهم ، المقابلة دي عشان
نصفي النفوس بينا ، صح كده ؟

كانت تلك هي المرة الأولى التي يذكر فيها إسمها دون لقب
قبلها ، فتوردت وجنتيها إلى حد ما ، وردت عليه بحرج :
-تمام .. !

ثم أضافت بنبرة جادة ، وهي ترمش بعينيها :
-يا ريت يكون كده وبس

أردف هو قائلاً بامتعاض :
-على فكرة إنتو هنا في مصر بتكبروا المواضيع أوي ،
العلاقات أبسط من كده برا

حركت رأسها بإيماءة خفيفة وهي تقول :
-I know (أنا عارفة) ، بس احنا في مجتمع شرقي ،
والأفكار هنا غير ، ومحدثش بيسيب حد في حاله ، وأكد إنت
شوفت بنفسك
-أها .. عندك حق

نهضت ريمان فجأة من مقعدها، وهتفت بجديّة :
-طيب هستاذن أنا وآآ...

تعجب من تصرفها المفاجيء ، وقاطعها بضيق :
-انتي لحقتي

رسمت ابتسامة مصطنعة على ثغرها وهي تجيبه :
-معلش ، مرهقة من شغل السكول

ابتسم لها بود ، ورد قائلاً :

-حاسس بيكي ، ما أنا The same (زيك)

زادت ابتسامتها إشراقاً وهي تردد بخفوت :

- See you مستر آياز

حك طرف ذقنه بإصبعه ، وهمس لنفسه :

-مستر آياز ! ممم .. اوكي !

ثم أردف متسائلاً باهتمام :

-طب مش هاوصلك ؟

ردت عليه بهدوء :

-لأ معايا الـ car (السيارة) بتاعتي !

-أوكي ، خلي بالك من نفسك

-حاضر ، باي !

-باي !

.....

في منزل رانيا ،،،،،

دارت رانيا في غرفة نومها ذهاباً وإياباً وهي تضع هاتفها المحمول على أذنها ، وكزت على أسنانها بغلظة وهي تردد
بغیظ :

-هاطق يا نوشة ، زمانتهم الوقتي بيحبوا في بعض

هاتفها نشوى قائلة بنبرة شبه باردة :

-يا بنتي اهدي ، أعصابك

كورت رانيا قبضتها ، وتابعت بحنق :
-مش قادرة ، خلاص ، ده أنا هاموت عليه

أضافت نشوى قائلة بعدم اكتر اث :
-أنا مش عارفة إنتي عاجبك ايه فيه ؟ ده بارد وغلس ،
ودمه واقف !

احتجت رانيا بنبرة عالية :
-لالالا .. متقوليش بارد ، ده مز السنين !

هتفت نشوى بجدية :
-يا روني ، العالم دي مش استايلنا ، احنا اللي ياكل معانا
حاجة تانية خالص ، حاجة شرقي ، من مستوانا !

صاحت رانيا بغل وقد تحولت عينيها للحنق الشديدين :
-انتي بتغيظيني ؟ بأقولك عاوزاه ! وانتي تقوليلي شرقي
وغربي ؟!

نفخت نشوى بصوت شبه مسموع ، وردت عليها بفتور :

-ده انتي التفاهم معاكي مستحيل ، هسيبك تهدي واكلمك
وقت تاني

ردت عليها بصوت شبه محتد :

-يكون احسن برضوه !

ثم أنهت معها المكالمة وجلست على طرف الفراش، وظلت
تهز ساقيها بعصبية وهي تتمتم مع نفسها :
-طب اوقعه ازاي وهو مش طايقني أصلاً ؟

.....

مرت عدة أيام ، والوضع على أشده في مبنى الرياضة
، فالجميع في قمة إنشغالهم بالإنهاء من المقررات الدراسية
قبل أجازة نصف العام ..

انضمت المعلمة دينا – والتي تدرس مادة الرسم – لفريق
العمل في المدرسة ، ورحب الزملاء والزميلات بها ..
وانتقلت لمبنى الرياضة لتتولى مهامها هناك ..

استقبلتها المعلمات بسعادة ، واجتهدت هي في إثبات
مهاراتها الفنية خاصة في الأعمال اليدوية ..

كذلك تحسنت العلاقات كثيراً بين ريمان وآياز .. وصار بينهما حوارات جانبية تعدت الحديث عن الدراسة .. ولكنها لم تتجاوز اللقاء خارج مبنى الرياض .. وبالطبع لم يسلم كليهما من تعليقات رانيا السخيفة .. بينما سئمت نشوى من محاولاتها الفاشلة في إقناع رفيقتها بالعدول عن التفكير في آياز كعريس ..

كما اجتمعت كلاً من هناء وميادة مع الناظرة اعتماد في إجتماع صغير للتخطيط لعدة أنشطة نهائية للترفيه عن الأطفال ، وأعجبت الأخيرة بأفكارهما .. وتم وضع الخطة الأسبوعية الخاصة بجميع مراحل الرياض ..

عاونت سارة رفيقتها سالي في تجهيز اللوحات الخاصة بالمعرض الخيري التابع لمشروع أطفالها ، وساعدتهما معلمة الرسم دينا .. وصممت لهما الغلاف الإعلاني .. والذي كان ملفتاً للأنظار وحاز على إعجاب كل من شاهده ..

ذهبت ليلة إلى غرفة الوسائط لتنتهي أعمالها هناك وهي في حالة سعيدة ، ولكنها تفاجئت بحصول أيمن على أجازة لعدة أيام ووجود معلمة أخرى كبديل مؤقت عنه ، فتملكها

الضييق ، وتلاشت إبتسامتها .. واضطرت أن تنهي كل شيء
بنفسها دون اللجوء لمساعدتها ..

عادت عاليا إلى العمل بعد أن تماثلت للشفاء ، وتلطف
الجميع للترحيب بها فور رؤيتهم إياها ، واستعادت بحماس
روح التحدي والمثابرة ، واستقبلها الأطفال بفرحة بريئة
على وجوههم ..

كذلك تقدمت منة بطلب للإدارة للإشتراك في الإشراف على
الرحلة الترفيهية المتجهة إلى تركيا خلال أجازة نصف العام
، وتم الموافقة على طلبها ، فتملكتها السعادة الغامرة ،
وقررت أن تستعد لها بروح حماسية مرتفعة

خطت المعلمة حنان لترتيب لقاء آخر مدير لأخيها مع
سارة حتى تقرب بينهما ، ووافق هو على إقتراحها ،
وحدد اليوم المناسب لفعل هذا دون أن يثير أي منهما
الشكوك

تغيبت المعلمة جانيت عن المدرسة ليومين ، فتسائل
الجميع بقلق عن سبب غيابها ، ولكن تفاجئوا بزوجها

يبلغهم بخبر مؤسف أحدث جلبة وحرناً كبيراً ، ألا وهو ((
وفاتها))

.....

الفصل التاسع والعشرون :

في مبنى الرياض ،،،

أجهشت المعلمات بالبكاء الشديد بعد تلقيهم خبر وفاة
رفيقتهم جانيت ..

لم يستوعبن الأمر في البداية ، فقد كانت الصدمة كبيرة
عليهن .. فهي كانت معهن حتى أمس القريب ، يتشاركن
في كل شيء .. ويخططن للأعمال القادمة ، وفجأة
تتركهن وترحل للأبد عن هذا العالم ..

صرخات وشهقات مكتومة صدرت عنهن ، وعبوس جلي
كان السمة المشتركة على أوجه الجميع ..

خيم الحزن على ذلك المكان الذي كان ينبض بالضحكات
والمزاح ..

وإجتهدت الإدارة في تصريف الأمور بحكمة وروية
للتعامل مع تلك الفاجعة ..

كما تعطلت الدراسة في هذا اليوم ، وتم صرف جميع
الأطفال مبكراً ..

.....

في معرض السيارات ،،،

حاول رامي الإتصال بابن خالته منذ وقت مبكر ليبلغه
بسفر والديه ، ولكن لم يجب الأخير على اتصالاته المتكررة
، فامتعض وجهه ، وحدث نفسه بضيق :
-مش بيرد ده ليه ؟

زفر بصوت مسموع ، ثم أضاف :

-طب هاعرف إن كان في المدرسة ولا مشى ، ماهو مافيش
غدى في البيت النهاردة ولا عشا ، ولا أي حاجة !

مرر أصابعه في فروة رأسه ، وأكمل بمكر :

-خلاص هاعدي عليه بنفسى ، وبالمره أشوف عاليا

تنهد بحرارة وهو يردد إسمها بين شفتيه ..

ثم التقط سلسلة مفاتيحه ، وهاتفه المحمول ، وتحرك إلى خارج مكتبه ..

.....
في مبنى الرياض بمدرسة اللافانيا الدولية ،،،

اجتمع فريق العمل في غرفة المعلمات ، وظل الجميع يواسي بعضه البعض ..

أردف آياز قائلاً بنبرة حزينة :

-للأسف أنا تعاملي معها كان قليل ، بس حقيقي كانت انسانية محترمة

هتفت ريمان بحزن وهي تمسح عبراتها :

-أنا لحد دلوقتي مش قادرة أستوعب إنها ماتت !؟

بكت عاليا بحرقة وهي تردد :

-يا حبيبتي يا جيبي ، كنتي أكثر من اختي ، ازاي مش هاشوفك بعد كده

أضافت منة قائلة بصوت آسف :

-ازاي تموت ؟ طب .. طب هي كانت كويسة ومش بتشتكي
من حاجة

ردت سارة قائلة بنشيج :

-أنا كلمتها امبارح وصوتها كان تعبان ، بس مكوئتش أتخيل
إنها آخر مكالمة بينا !

أكملت سالي قائلة بحزن :

-هما الكويسين كده ، بيتاخدوا منا

تسائلت ميادة بصوت خفيض :

-طب احنا المفروض نعمل ايه ؟ المفروض نكون مع جوزها
نعزيه ولا آآ...

قاطعتها هناء بنبرة حزينة :

-أنا كلمته ، هو موجود في البيت ومنتظر اهلها يجوا من
اسكندرية

هتفت ليلة بصوت مختق وهي تشير بإصبعها :
-اه يا عيني ، كانت أعدة معاه هنا، ومالهاش قرايب

إنتحبت عاليا وهي تقول :
-أنا مش مصدقة إن احنا مش هانشوفها تاني ، آآه ، قلبي
موجوع عليها أوي

ردت عليها سارة بنبرة آسفة :
-صعب تتعوض أو نلاقي حد زيها

استطردت هبة حديثها بجدية :
-كانت انسانة محترمة وأخلاق ومش بتتأخر عن أي حد

أضافت منة بنبرة بكاء عالية :
-هانعمل ايه من بعدك يا جيجي ، كانت بتساعدني دايمًا ،
وعمرها ما إتأخرت عني ، أنا هفتقدها أوي !

ردت عليها سالي بتهيدة حزينة :
-اللي زيها قليل في الزمان ده

أضافت ميادة وهي تهز رأسها :
-عندها طاقة وعطاء مالوش حدود

ضغط آياز على شفتيه ، وتأثر بكلماتهن المعبرة عن
إحساسهن نحو رفيقتهن وزميلتهن في العمل ، فهتف بحذر
:

-الواحد ملحقش يعرفها أوي ، بس وجودها فرق معايا

ثم انضمت إليهم الناظرة إعتماذ ووجهها به إنكساره
عجيبه ..

انتحبت بصوت خفيف وهي تردد :

-أنا كلمت زوجها ، وهو منتظرنا في بيته ، ننتهي بس من
اليوم الدراسي ونتحرك

أردف آياز قائلاً بهدوء :

-أنا معايا العربية ، مين يحب يركب معايا ؟

أضافت ميادة بإستياء :

-للأسف مش معايا بتاعتي ، بتتصلح !

ردت عليهما الناظرة إعتماذ بحزن :

-قسموا نفسكم على العربيات الموجودة ، وأنا عندي
عربيتي فاضية للي حابب يجي معايا ، ونتقابل كلنا هناك ،
ومتقلقوش الإدارة في المواقف اللي زي دي بتتصرف
وبسخاء !

وجلت معلمة الرسم دينا إلى الداخل ، وهتفت بصوت أسف :

-البقاء لله يا جماعة ، أنا مش عارفة أقول ايه ، ملحققتش
أتعامل معاها ، لكن من كلامكم عليها حبيتها ..!

هتفت الناظرة إعتماذ بهدوء حذر :

-شكراً مس دينا على شعورك الطيب ، وربنا يصبرنا على
فراقها

.....

في الحديقة الملحقة بالمبنى ،،،

جلست كلاً من رانيا ونشوى على المقاعد الخشبية
الموضوعة بالحديقة ، ومسحت نشوى على ظهر رفيقتها
بحنو وهي تواسيها قائلة بخفوت :

-خلاص يا بنتي ، ماتعيطيش ، احنا كلنا زعلانين عليها

كفكفت رانيا عبراتها بالمنشفة الورقية ، ثم ردت عليها
بحرقة :

-أنا مقهورة يا نشوى ، كانت بتظبطني في كل حاجة

مطت نشوى شفيتها ، وأكملت بإستغراب :

-وأنا والله مضايقة للي حصل ، بس مش بالشكل ده

أشارت لها بكفها وهي تقول بضيق :

-اسكتي ، ده أنا نحس ، حتى الحفلة اللي كنت هاقولها
تخليني فيها اشراف مع المز مش هاتتعمل

عاتبتها نشوى قائلة بسخط وهي عاقدة ما بين حاجبيها:

-وده وقته ، احنا في ايه وانتي بتتكلمي عن ايه

بكت بصوت مسموع وهي تقول بتحسر :

-ما هو نحس من كله ، إهيء !

تتهدت نشوى بإستياء ، فهي متيقنة من فشل تلك العلاقة

بينهما ، لذا تشدقت قائلة بضجر :

-لا حول ولا قوة إلا بالله ، يا بنتي إنتي مالكيش نصيب معاه

، افهمي ده بقى !

أجهشت رانيا ببكاء أشد وهي تضيف بتذمر :

-بأحبه يا نوشة ، بأحبه

ثم على صوت نحيبها وهي تدفن وجهها بين راحتيها

ردت عليها نشوى بنبرة متريثة وقد تهدل كتفيها :

-ده مش حب ، ده اسمه تعلق ، انتي عشان حطاه في دماغك

وبتفكري فيه عمال على بطل فمفكرة إنه حب ، لكن هو لا

بيعبرك ولا حتى بييصلك ، ومالكوش كلام مع بعض ، يبقى

منين ده حب !؟

رمقتها رانيا بنظرات حادة وهي تصيح بتهكم :

-عا ، انتي بتبكتيني ، ده بدل ما تقفي جمبي !؟

ردت عليها نشوى بهدوء وهي ترفع حاجبها للأعلى :

-أنا بانصحك لأنني شايفة الوضع عامل ازاي

ضاقت عيني رانيا ، وظهر منهما لمعان غريب ، وهمست
بصوت متحشرج :

-انا بس لو خدت فرصة معاه هـ آآ...

قاطعتها نشوى ببرود :

-صدقني برضوه مش هاتجيب نتيجة

-كمان

بررت نشوى حديثها بـ :

-بصراحة كده هو .. هو حاطط عينيه على اللي شبيهه

اتسعت مقلتي رانيا في صدمة ، وهتفت بنزق :

-قصدك آآ...

هزت نشوى رأسها بإيماءة مجيبة إياها :
-ايوه هي ! ففرصتك معدومة قصادها

لمعت عيني رانيا بشراسة ، وضغطت على شفثيها بقسوة
وهي تردد بصوت شبه حائق :
-يا بنت المحظوظة يا ريمان ، جياك على الطبطاب في كل
حاجة

نهرتها نشوى بسخط :

-يا بنتي ارحمي نفسك ، والله انتي الخسرانة في الآخر ،
ومحدث هايعبرك ولا حتى بواب في مدرسة

لكزتها رانيا في كتفها بعنف وهي تصيح بنبرة شبه غاضبة
:

-قومي يا نشوى من جمبي ، سبيني أهري وأنكت في نفسي
لوحدى !

.....

خارج مبنى الرياض ،،،

صف رامي سيارته بجوار الرصيف ، ثم ترجل منها ،
وتحرك صوب بوابة المدرسة الخلفية ..
إشراب بعنقه ليبحث عن فرد الأمن ، فلم يجده ، ولكنه لاحظ
وجود شيء مريب ..
فهناك تجمعات كثيرة للمعلمين ، ووجوه عابسة ..
هز كتفيه في عدم إكتراث ، ثم تحرك للداخل دون أن يوقفه
أحد ..

استمع هو إلى صوت نحيب خافت ، فأدار رأسه ناحيته
فوجد عاليا وهي مستندة برأسها على كتف ليلة ..
انقبض قلبه ، وركض ناحيتها ، ثم وقف خلفها ، وسألها
بتلهف :
-مالك يا عاليا ؟ حصل حاجة ؟

رفعت رأسها لتتظر نحوه بإندهاش ، ثم مسحت عبراتها
بكفها ، وردت عليه بصوت مختق :
-انت بتعمل هنا ايه ؟

راقبتهما ليلة بنظرات متمعنة ، ولم تقاطع حديثهما ..

رد عليها رامي بصوت لاهت :

-أنا جاي لابن خالتي ، بس شوفتك بتعيطي فاتخضيت وآآ...

قاطعته عاليا بيبكاء :

-مس جانيت ماتت

سألها بعدم فهم وهو قاطب جبينه :

-مين دي ؟

أجابته بحزن واضح في نبرتها ، وقد بدأت تتفرق العبرات

مجدداً في عينيها :

-مس الميوزيك

سألها باهتمام وهو يتابعها بنظرات قلقة :

-هي كانت تعبانة ؟

هزت رأسها نافية وهي تجيبه :

-لا

-مس ليلة !

قالها أيمن بصوت شبه مرتفع وهو يتجه نحوهم

تتحننت هي بخفوت وهي تقول :

-احم ، ثواني بس يا عاليًا هاشوف مستر أيمن !

قاوم رامي ظهور شبح إبتسامة سعيدة على ثغره لحصوله
على فرصة للحديث مع عاليًا على أفراد ، فهتف بنزق :

-خدي راحتك ، أنا موجود معاها

رمقته عاليًا بنظرات حادة .. بينما تحركت ليلة نحو أيمن
الذي استطرد حديثه قائلاً :

-البقاء لله يا مس ليلة ، أنا عرفت الخبر من شوية ، وجيت
بنفسي أعزي

ردت عليه بحزن وهي ترمش بعينيها :

-شكراً يا مستر

سألها باهتمام واضح في نبرته ونظراته :

-انتي عاملة ايه ؟ وبقية الناس هنا ؟

تنهدت بعمق وهي تجيبه :

-والله حالتنا النفسية وحشة أوي

تابع قائلاً بهدوء :

-أنا اسمع انها كانت انسانة محبوبة بين الكل

أضافت ليلة قائلة بأسى :

-دي اتربي على ايدها أجيال من المدرسة

هز رأسه بإيماءة خفيفة ، وأكمل بهدوء :

-أها .. ربنا يصبركم ويصبر أهلها

-يا رب

سألها بجدية وهو محقق بها :

-طيب هاتعملوا ايه ؟

ضغطت على شفيتها قليلاً ، وأجابته بنبرة رقيقة :

-احنا المفروض هانروحلها الوقتي

استطرد حديثه متابعاً :

-طب تحبي أوصلك ، قصدي أوصلكم يعني ؟

هزت رأسها نافية وهي تجيبه :

-لأ مافيش داعي ، إحنا هنتصرف

أردف أيمن قائلاً بإصرار :

-أنا موجود وفاضي ، أرجوكي ماترفضيش

هزت كتفيها في حيرة قائلة :

-مش عارفة

تابع أيمن بجدية وهو يشير بيده :

-بصي في الظروف دي لازم كلنا نقف جنب بعض ، وبعدين

دي زميلتنا ، يعني واجب علينا نكون معاكو

ابتسمت له إبتسامة باهتة وهي تقول :

-ميرسي على ذوقك

فرك أيمن فروة رأسه بأصابعه قائلاً :

-متقوليش كده

.....

تابع رامي متسائلاً بهدوء :

-ازي رجلك الوقتي ؟

عبست عاليا بوجهها ، ورفعت حاجبيها مستنكرة ، وردت
بنبرة حادة :

-وده وقته ؟ بأقولك صاحبتني ماتت وانتي تقولي رجلك

أشار لها بكفيها ، وبرر قائلاً :

-مقصدش والله ، أنا بس بأظمن عليك ، ده غرضي !

تتهدت بإرهاق ، واعتذرت بهدوء حذر :

-معلش سامحني ، أنا روعي في مناخيري ، ومش عاوزة
أتكلم مع حد

إبتسم لها قليلاً وهو يقول :

-أكيد مسامحك ، وعاذرك

هتف آياز بصوت مسموع من على مسافة قريبة :

-رامي ، إنت بتعمل ايه هنا ؟

إستدار رامي برأسه للخلف ، ولوح له بذراعه وهو يجيبه :

-أنا كنت جايلك ، بأطلبك من بدري مش بترد وآآ...

قاطعها آياز بجدية :

-أها ، حصل ظروف هنا وآآ..

قاطعها رامي تلك المرة بهدوء :

-ما أنا عرفت خلاص ، ومقدر الوضع

إلتفت آياز برأسه نحو عالي ، وسألها بنبرة جادة :

-طب هاتعملوا ايه يا مس عالي ؟

مط شفتيها وهي ترد عليه :

-هاشوف بقية البنات

أشار بإصبعه للخلف مكماً بهدوء :

-عموما أنا منتظر برا ، ومعاكو في أي حاجة

أومات عاليا برأسها وردت عليه :

-اوكي ، وأنا هابلغهم

تدخل رامي في الحوار قائلاً بحماس :

-أنا موجود برضوه لو عوزتوني

رمقته بنظرات حادة ، وهتفت بإقتضاب :

-شكراً

ثم تحرك رامي مع آياز نحو البوابة ، وتبادل الاثنان حديثاً خافتاً بينهما حول سفر أبويه للبلدة الريفية ..

.....

لاحقاً أوقف آياز سيارته أمام بوابة المدرسة ، وانتظر
قدوم المعلمات لإيصالهن إلى منزل زميلتهن الراحلة جانباً ..

أصر رامي هو الآخر على البقاء معه ، ومساعدته في
هذا الواجب .. فتعجب ابن خالته من تصرفه الغريب هذا ،
وتأكد أن وراءه غرض آخر .. ولكنه لم يجادله أو يطلب
منه أي تفسير ، فالظرف غير مناسب للمناقشة ..

أحضر كذلك أيمن سيارته عند البوابة ، ثم ترجل منها ،
وذهب لمصافحة آياز وتعزيته ..

تبادل الإثنين حديثاً مقتضباً ، ثم إستأذن أيمن بالإنصراف
ليستعد أمام سيارته ..

خرجت المعلمات من البوابة على هيئة مجموعات ، واحترن
في اختيار من يوصلهن ..

أسرعت منة وهناء في خطواتهما نحو سيارة ريمان للركوب
معها ، ولحقت بهما سالي ..

تعطلت سيارة ريمان ، فلم تتمكن من استخدامها ، وزمت
شفتيها قائلة بسخط وهي تضرب المقود :

-أوووف ، ده وقتك !

تسائلت منة بضيق :

-في ايه يا ريمو ؟

ردت عليها ريمان بتبرم :

-العربية مش شغالة

هتفت منة بانزعاج :

-أوبا

تسائلت هناع بحيرة وهي تتلفت حولها:

-طب هانعمل ايه ؟

تهدل كتفي ريمان للأسفل ، وأجابتها بضجر :

-مش عارفة

صاحت سالي بصوت جاد وهي تعلق حقيبة يدها على

ذراعها :

-خلاص يا بنات ، تعالوا نشوف هانركب مع مين الوقتي

عضت ريمان على شفتها السفلى ، وهتفت معتذرة :
-بجد I'm so sorry (أسفة جداً) ، مش بإيدي !

هزت هناء رأسها متفهمة ، وردت عليها بفتور :
-احنا عارفين

لوححت منة بذراعها في الهواء ، وهتفت قائلة :
-ياللا يا جماعة

اقترب آياز من سيارة ريمان ، وتساءل باهتمام وأنظاره
معلقة بها :
-ايه المشكلة يا مس ريمان ؟

ردت عليه بتنهيده منزعجة وهي تغلق باب سيارتها :
-العربية فيها حاجة ، مش راضية تشتغل

أشار للجميع بكف يده وهو يقول بنبرة مرتفعة :
-أها ، طب تعالوا معايا أوصلكم

إعترضت ريمان قائلة وهي عابسة الوجه :
-بس عربيتك مش هاتقضي

رد عليها آياز بهدوء :
-أنا معايا ابن خالتي ، هيوصلكم هو كمان

هتفت منة بإمتنان :
-بجد احنا مش عارفين نقولك ايه

بينما أضافت هناء برقة :
-انت انسان ذوق ومحترم

رد عليهما آياز بهدوء :
-احنا كلنا زمايل وعيلة واحدة

هتفت منة بإختصار وهي تغلق حقيبة يدها :
-أكيد

تسائلت سالي بجدية وهي تتلفت حولها :
-بنات حد هايركب مع مس اعتماد ؟

ردت عليها هناء وهي توميء بعينيها :
-اه ، هبة وحنان ونادية

زمت سالي فمها وهي تتمتم بإيجاز :
-تمام

هتف آياز بنبرة شبه أمرة وهو يتحرك صوب سيارته :
-طب يالا يا جماعة

.....

وبالفعل قسمت المعلمات أنفسهن على السيارات المتاحة ،
فركبت ريمان مع آياز ، وانضم لهما سالي ، ومنة وهناء

بينما ركبت عاليا سيارة رامي بعد إلحاح شديد منه ، ولحق
بهما نشوى ورائيا وسارة

بينما ركبت ليلة مع أيمن ومعهما ميادة وديننا وأية ..

.....

في سيارة آياز ،،،

حدقت ريمان في الطريق أمامها ، وتحاشت النظر تماماً
نحو آياز ، خاصة بعد أن جلست على المقعد المجاور له ..
بينما اختلس هو النظرات نحوها ، ورسم ابتسامة هادئة
على ثغره ..

فبرغم مآساة اليوم المؤلمة ، إلا أنه ظفر بشيء بسيط
أسعده وهو اصطحاب ريمان في سيارته ..

قطعت سالي الصمت السائد قائلة بجدية :

-مش عاوزين نطول هناك ، هنعمل الواجب ونتوكل على الله

ردت عليها منة بصوت شبه محتد :

-ما احنا أكيد مش هنبات ، بس ماينفعلش نجى ونمشي في
ساعتها ، المفروض نقعد شوية

أضافت هناء قائلة وهي تشير بيدها :

-هي تقصد يا منون نسيبهم على راحتهم ، مانبقاش كابسين على عيلتها

تسائلت منة باهتمام :

-هما على كده هاي عملوا ليها قداس هنا ولا في اسكندرية ؟

ردت عليها سالي بإقتضاب وهي تنفخ في ضيق :

-معرفش لسه

مال آياز بجسده ناحية ريمان ، وسألها بهمس :

-انتي مش بتشتركي في الحوار ليه معاهم ؟

أجابته بخفوت حرج :

-يعني ، مش حابة أتكلم

هز رأسه متفهماً :

-أها .. تمام

.....

في سيارة الناظرة إعتماذ ،،،،

سلطت الناظرة إعتماذ أنظارها على الطريق ، وراقبت
الإشارات المرورية بحرص ، ثم تسائلت بجديفة :
-الطريق كده صح ؟

ردت عليها حنان بصوت خافت :
-ايوه يا مس اعتماذ ، احنا ماشيين صح

أردفت أيفة قائلة بنبرة رقيقة :
-أنا بأتكلم مع البنات ، وهما قالولي إن بيتها مش بعيد

هزت رأسها بحركة خفيفة وهي تقول :
-اوكي !

أخرجت حنان هاتفها المحمول من حقيبتها ، ثم عبثت به
لتهاتف أخيها .. ووضعته على أذنها ، وهمست بحذر :

-ايوه يا أحمد ، احنا توكلنا على الله ورايحين عند بيت مس
جانيت ، تعاللي على هناك ، هستناك !

صمتت للحظة قبل أن تكمل بصوت خفيض :

-هي ساكنة جمب ((...)) عارفه ؟ الطريق مايتوهش !

ساد صمت حذر لثوانٍ ، ثم تابعت :

-اوكي يا أحمد ، في رعاية الله ، مع السلامة !

ثم أنهت المكالمة معه ، ووضعت هاتفها بداخل حقيبتها ..

تسائلت ميادة بهمس وهي تميل برأسها على أية :

-انتي هاتعملي ايه بعد كده ؟

ردت عليها أية بصوت خفيض :

-أكيد هاروح البيت ، أنا مش قادرة أعمل حاجة

أكملت ميادة بصوتها الهامس :

-تمام ، أصلاً محدش فينا ليه مزاج لحاجة

-بالظبط

.....

في سيارة رامي ،،،

لاح شبح إبتسامة راضية على ثغر رامي بعد أن وافقت
عاليا على أن تستقل سيارته ..

ما أزعجها هو ركوب رانيا ونشوى معها ، فهي لا تحبذ
التواجد معهما في أي مكان .. وخاصة رانيا بسبب مواقفها
وردودها الوقحة ..

تحركت سارة في المقعد الخلفي ، وهتفت بتذمر :

-حاسبي شوية يا رانيا ، أخدة المكان كله !

لوت رانيا فمها ، ورمقتها بنظرات حادة ، ثم هتفت بسخط :

-يعني أروح فين ؟ ما هو المكان ضيق

صاحت نشوى بنبرة شبه مرتفعة :

-ضمي عليا شوية يا روني !

إستدارت عاليًا برأسها للخلف ، ورمقتهن بنظرات حادة ،
وصرت على أسنانها قائلة :

-عيب يا بنات ، دي مش عربيتنا عشان نتخانق هنا قصاد
الغرب

عاتبها رامي قائلاً بحزن مصطنع :

-هو أنا غريب يا أبله عاليًا ؟

ضيقت رانيا عينيها ، ووجدت عاليًا بنظرات غامضة ، ثم
إستندت بإصبعيها على طرف ذقنها ، وغمغت بخفوت مع
نفسها :

-هو الحكاية فيها أبله كمان ؟ ده الموضوع باينه كبير ، وأنا
مش واخدة بالي !

ضغطت عاليًا على شفتيها ، وحذرتة بجدية :

-مستر رامي ، خلي بالك من الطريق أحسن !

هز رأسه بحركة خفيفة وهو يقول بإيجاز :

-حاضر !

ثم تمتت عاليا مع نفسها بضجر :

-إنت لازم تتسحب من لسانك وتكلم قصاد دي ، هو أنا
ناقصة لسانها !

نفخت سارة بضيق ، ثم حدقت في النافذة الملاصقة لها ،
وهمست :

-ربنا يهون بالأعدة دي ، بنت ماتطقاش ، يتفاتها بلاد !

.....

في سيارة أيمن ،،،،

مد أيمن يده ليعدل من وضعية المرآة الأمامية ، ثم حدق
في إنعكاس صورة دينا ، وتساءل بإهتمام :

-هو حضرتك مدرسة جديدة ؟

أجابتها بنبرة خجولة :

-ايوه ، أنا مس دينا ، مس الأرت ، ومبقاليش يومين هنا

رد عليها مجاملاً :

-أها ، حضرتك نورتي المدرسة ، وإن شاء الله تتبسطي
معانا

ابتسمت له إبتسامة ممتة وهي تقول بإيجاز :
-ميرسي

سألها مجدداً بفضول :

-وعلى كده حضرتك إشتغلتني في مدارس قبل اللافانيا ؟

أجابته بصوت رقيق :

-ايوه ، بس مش هنا

سألها بإهتمام أكبر :

-حاجة برا القاهرة ؟

ردت عليه بنبرة متريئة :

-ايوه ، في دولة الإمارات

أوماً برأسه بحركة خفيفة وهو يقول :
-أها .. ده النظام أكيد مختلف عن هنا تماما

تابعت دينا موضحة :
-يعني مش أوي ، كل مدرسة وليها السيستم بتاعها
-عندك حق

شعرت ليلة بضيق قليل لم تستطع تبريره ، ولكن أزعجها
حديثه المسترسل مع غيرها .. فعبست بوجهها ، وظلت
تفرك كفي يديها بعصبية ..

التفت أيمن برأسه نحوها ، ورمقها بنظرات متعجبة ،
وسألها باهتمام :
-انتي كويسة ؟

ردت عليه بحق موجز :
-ايوه
-أنا مقدر الوضع ، المدرسة كلها بتتكلم عن مس جانيت
وآآ..

قاطعته بنبرة غليظة :

-والله فراقها هياثر معانا إحنا مش معاك إنت !

قطب أيمن جبينه متعجباً من أسلوبها الفظ معه .. وعاتبها
بهدوء :

-لأ هايفرق يا مس ، أنا كنت متعود أسلم عليها وأقابلها
واحنا داخلين المدرسة ، أو واحنا خارجين ، فعلى الأقل
هافتقد إبتسامتها الرقيقة ، وأسلوبها اللطيف في التعامل

أطرقت رأسها ، وضغطت على شفيتها قليلاً ، وأخذت نفساً
عميقاً لتضبط به إنفعالاتها ..

.....

أدى الجميع واجب العزاء في منزل المعلمة جانيت ،
وحاولوا التهوين على زوجها الذي كان متأثراً للغاية
لرحيلها المفاجيء ، وتحدثوا عن روحها المرحة وحماسها
الدائم للعمل ، كذلك أشادوا بتفانيها وإخلاصها في كل ما له
علاقة بالأطفال ..

ساعدت تلك الكلمات الصادقة زوجها في الشعور بمدى أهمية زوجته ، وتعلق الجميع بها .. فشكر بامتنان حقيقي المتواجدين .. وأثنى على وقوفهم إلى جواره ..

بعد برهة إستأذنت الناظرة إعتقاداً بالإتصاف ، ولحق بها فريق العمل ..

.....

تشكلت مجموعات صغيرة من المعلمات أسفل البناية التي تقطن بها الراحلة جانباً ، وتحدثن بينهن عن مصير الأنشطة بدونها ..

راقبت المعلمة حنان الطريق بتمعن ، فقد كانت في إنتظار وصول أخيها .. وإرتسم على ثغرها إبتسامة مأكرة وهي تراه يقترب من على بعد ..

خطت بخطوات سريعة نحوه ، وهتفت بصوت لاهث :

-كويس إنك جيت ، احنا كنا ماشين دلوقتي

سألها أحمد بنبرة جافة وهو يشرأب بعنقه للأعلى :

-هي واقفة فين ؟

أدارت رأسها للجانب قليلاً ، وأجابته :
-هناك

سألها مجدداً بجدية :
-طيب ، أنا المفروض أعمل ايه ؟

ردت عليه بنبرة متريئة :

-بص أنا هاكلمها على جنب ، وانت تجي علينا ، وتعرض
توصلها ، وأهي فرصة تدرش معاها شوية ، تمام ؟

هز راسه إيجاباً وهو يردد باختصار :
-ماشي

تحرك حنان عائدة إلى المجموعة المتواجدة بها سارة ، ثم
وضعت يدها على كتفها ، فإنتبهت الأخيرة لها ، وضغطت
عليه قليلاً وهي تقول :

-معلش يا مس سارة ممكن أقولك حاجة

التفتت سارة بجسدها كلياً نحوها ، ورددت بهدوء :
-اتفضلي يا مس حنان

رمشت لها بعينيها وهي تهمس بجدية :
-لا لوحدنا

تحركت سارة معها قائلة بنبرة ناعمة :
-أوكي يا مس حنان ، تعالي نقف هنا !

.....

أصر رامي على الحديث مع عاليا للحظات بعيداً عن رفيقاتها فقد خشي أن تضيع الفرصة عليه دون أن يفتحها في مسألة الارتباط بها .. ولكنها رفضت طلبه ، وتعلت قائلة :

-مستر رامي مافيش بينا كلام

زفر رامي قائلاً بضجر :

-يا أبله عاليا أنا مش هاعطك ، ده بس كلام على السريع

عقدت ساعديها أمام صدرها ، وسألته باختصار وهي ترفع
حاجبها للأعلى :

-خير

إرتبك للحظة ، وبدى متوتراً وهو يرد عليها بتلعثم :
-هو مش ينفع أقوله هنا

ضاقت نظراته وهي تسأله :
-ليه ؟

ألح رامي قائلاً بتوسل :
-معلش ، خديني على أد عقلي

نفخت بنفاد صبر وهي ترد عليه بامتعاض :
-أووف ، طيب ، اتفضل

ابتسم لها قائلاً :
-ماشى

وقفت عاليا إلى جوار سيارته ، وإستند بكفها على بابها ،
وسألته على مضض

-ايه الموضوع المهم اللي عاوزني فيه ؟

تنح بصوت خشن ، وحرك ساقه بعصبية ، وركل الأرض
قليلاً ، ورد عليها بتوتر :

-هو .. هو أنا كنت بأفكر في الآآ..

قاطعته بنبرة شبه حادة وهي تشير بيدها :

-قول يا مستر رامي ، أنا مش قدامي اليوم كله ، واظن إنت
شايف الجو عامل ازاي ، واحنا كلنا في حالة صعب

رد عليها بحذر :

-أنا فاهم ده كله ، بس بأحاول أشوف هافتح معاكي
الموضوع إزاي

رمقته بنظرات مطولة محاولة سبر أغوار عقله ، وسألته
بإندهاش :

-لدرجادي هو صعب ؟

تتحنح مرة أخرى ، وأجابها بتلثم :

-لأ .. بس .. بس أنا متوتر شوية

زفرت عاليا بإرهاق ، وهتفت بتبرم :

-مستر رامي ، بليز

لم يجد رامي بدأً من الدخول مباشرة في صلب الموضوع معها ، فقد إستشعر ضيقها ، لذا هتف بنزق :

-أبله عاليا ، أنا .. أنا بأفكر أرتبط بيكي

فغرت عاليا شفيتها مصدومة من عبارته الأخيرة ، ورمشت بعينيها عدة مرات ، ورددت بلا وعي :

-نعم !؟

إزدرد ريقه ، وتابع بحذر :

-أنا مقصدش حاجة وحشة ، أنا غرضي شريف ، يعني .. عاوز أتعرف عليك أكثر ، ونقرب من بعض وآآآ..

قاطعته بلهجة حادة وهي ترمقه بنظرات قوية :
-ده لا وقته ولا الظروف تسمح بالكلام اللي بتقوله ده

رد عليها بإبتسامة باهتة :

-أنا فاهم ، بس محتاج أعرف رأيك على الأقل

زاد عبوس وجهها ، وأجابته بصوت حاد :

-وأنا معنديش حاجة أقولها الوقتي

سألها وهو محقق مباشرة في عينيها :

-يعني موافقة نرتبط ولا لا ؟

كزت على أسنانها قائلة بحنق :

-أقول ايه بس ؟

توسلها بإصرار وهو يرمقها بنظرات متعشمة :

-ريحيني ، أنا مش عاوز أكثر من كده

هتفت بإقتضاب :

- هارد عليك بعدين

دنا رامي منها قليلاً ، وتابع برجاء وقد لمعت عينيه :
- أرجوكي ، مش هاقدر اصبر ، هي كلمة بس ، متبخليش
عليها بيها

شعرت عاليا بالخرج من اقترابه منها ، وخشيت أن يظن بها
أي أحد السوء ، فهتفت على عجلة :
- ماشي

انفرج فمه غير مصداقاً ما قالتة توأ ، وسألها بتلهف :
- يعني إنتي موافقة نرتبط ؟

أشارت بإصبعها محذرة وهي تنهره بخفوت :
- ششش .. وطى صوتك

بدت السعادة واضحة على محياه ، وإعتذر قائلاً بحماس
جلي :

- سوري ، مخدمتش بالي ، بس الفرحة مش سيعاني

ابتلعت ريقها فقد استشعر قلبها صدق نواياه ، ولكن أربكها
نظرات المارة بالطريق
عبثت هي بطرف حجابها ، وأضافت قائلة بجدية مصطنعة :
-طب خلاص ، نتكلم بعدين يا مستر

عبس بوجهه عبوس زائف ، وأردف قائلاً بمزاح وهو يشير
بيديه :

-ما بلاها كلمة مستر دي ، إنتي شيفاني ماسك تباشيرة
وبشاوره

رمقته بنظرات غريبة ، وردت عليه بضيق :
-إيه الجو القديم اللي انت فيه ده ، اسمه ماركر !

ابتسم لها قائلاً وهو يحرك رأسه للجانب :
-ماشى اللي انتي شايغاه ، ماركر .. ماركر ، بس قوليلي
رامي من غير تحابيش !

غمزت له بعينيها وهي تعترض :

-لأ .. وعن اذنك خليني أشوف أصحابي

دس رامي يديه في جيبي بنطاله ، وتابعها بنظراته وهي
تبتعد عنه ، وهمس لنفسه :

-طيب ، اللي يريحك يا أبله !

راقبت رانيا بنظرات متربصة ما يحدث من على بعد ،
وأثارها الفضول لمعرفة ما الذي يدور بينهما ..
لكزت هي كتف رفيقتها نشوى ، وكزت على أسنانها بقوة
وهي تقول :

-خدتي بالك يا نوشة من اللي حاصل هناك !!

تلقت نشوى حولها بنظرات حائرة ، وتساءلت قائلة :
-هو في ايه ؟

أردفت قائلة بحنق :
-انتي مش مركزة

هزت رأسها نافية ، وتمتمت بعدم إكتراث:

-لأ ، هو في ايه ؟

أجابتها بنبرة لئيمة وهي تهز حاجبها الأيمن :

-عاليا والراجل اللي معاها

-مالهم ؟

أضافت قائلة بخبث :

-عمالين يتودودا من الصبح ، وفي الآخر قالها هنرتبط

شهقت نشوى مصدومة ، وهتفت بعدم تصديق :

-هاه ، هنا ؟ والوقتي ؟!

مطت رانيا شفيتها ، وضيق عينيها لترمق عاليا بنظرات
مغلولة ، ثم نفخت بصوت مسموع ، وضغطت على أسنانها
، وأكملت قائلة بغیظ :

-أرزاق ، كل واحدة عمالة تظبط في التاني ، وأنا واقفة

محلک سر .. ماهو ناس ليها جوازات ، وناس آخرها

تمشي في جنازات !!

الفصل الثلاثون :

في سيارة المعلمة حنان ،،،،

أصرت حنان على إيصال سارة في طريق عودتها
للمنزل بعد أن انتهى الجميع من واجب العزاء في منزل
الراحلة جانبيت ...

شعرت سارة بالحرج من وجود ذلك الشاب الذي إلتقته من
قبل في السيارة معها ، وحدقت في النافذة الملاصقة لها ،
وبدى على وجهها القليل من الضيق ، فهي قد اضطرت
أسفة أن تستقل معهما السيارة لعدم توفر أي وسائل
مواصلات خاصة بعد إنصراف الجميع وبقائها بمفردها أسفل
البناية ..

قاد أحمد السيارة بسرعة هادئة ، وحدق في المرأة
الأمامية ليتمعن أكثر في تفاصيل وجهها ..

تتحنح هو بصوت خشن ، وأردف قائلاً بجدية :
-أخبار الدراسة معاكى ايه يا مس آآ...

ثم توقف لثانية عن الحديث قبل أن يتابع بمكر :
-مس سارة صح ؟

ردت عليه بإقتضاب :
-تمام

أضافت حنان قائلة بحماس :
-مس سارة من الناس المجتهدين جداً عندنا في الكي جي ،
وبالعكس أي حاجة تكلفها بيها بتجزها على طول

مط فمه في إعجاب وهو يقول :
-ماشاء الله

ثم تسائل بفضول :
-وعلى كده يا مس سارة بتحبي الكي جي ، ولا كنتي
تفضلي تدي لمراحل أعلى ؟

ردت عليه بنبرة شبه جافة :
-أنا بأحب التعامل مع الأطفال

تدخلت حنان في الحوار قائلة :
-عارف يا أحمد ، مس سارة رقيقة جدا مع الأطفال وبتحبهم
أوي ، وهما متعلقين بيها جداً

غمغت سارة مع نفسها بضيق :
-هو الحكاية بالظبط ؟ الاتنين عمالين يغنوا ويردوا على
بعض ، وأنا في النص ما بينهم ، الموضوع ده شكله مش
طبيعي ، في حاجة غلط فيه !!

بعد برهة وصل أحمد عند البناية التي تقطن بها سارة ،
فترجلت هي على الفور من السيارة ، لحقت بها حنان ،
وودعتها بحرارة .. وترجل أحمد هو الآخر، وتابع قائلاً
بإبتسامة هادئة :

-أتمنى أشوفك تاني يا مس سارة

ردت عليه بإبتسامة باهتة :

-إن شاء الله

تابعت حنان قائلة بنبرة رزينة :

-مس سارة لو عوزتي أي حاجة أنا موجودة ، كلمني في أي وقت ، احنا مش بس زميل ، لأ انا بأعتبرك اختي الصغيرة وآآ...

قاطعتها سارة بإيجاز :

-حاضر ربنا يسهل ، عن اذنكو

ثم قبلتها من وجنتيها ، وودعتها مرة أخرى ..

راقبها الاثنين وهي تلج إلى مدخل البناية ، فأكمل أحمد قائلاً :

-شكلها بنت محترمة ، نتوكل على الله معاها

ردت عليه بحماس كبير :

-جدا يا أحمد ، ربنا يجعلها من نصيبك

.....
تبادلت المعلمات على موقع الواتس آب حديثاً ساخناً حول
رحيل زميلتهن وما حدث طوال اليوم ...

-ميادة : ((ربنا يعين جوزها ، شكله مصدوم يا عيني))

-منة : ((مش مصدوم ، ده مقهور))

-سالي : ((يا بنتي كان بيحبها أوي))

-هناء : ((والله واحنا كمان))

-منة : ((أنا مش عارفة هادخل المبنى ازاي تاني من غير
ما أعدي عليها وأشوفها))

-هبة : ((ربنا يصبرنا ، الأيام الجاية هاتكون صعبة علينا
كلنا))

-ميادة : ((تفكروا هايجيبيوا حد جديد ، ولا هيكملوا بقية
الترم عادي ؟))

-سالي : ((معتقدتش هايسيبوا الميوزيك من غير أي
مدرس ، دي كانت بتدي الكي جي كله))

-منة : ((هو في حد هايكون أصلاً في مهارتها ، كله اللي
هايجي قلبه مش هايكون على الشغل ولا العيال ولا أي نيلة
))

-هناء : ((يا بنتي الجداد كلهم كده))

-ليلة : ((الكل بيدور على الفلوس وبس ، معدتش حد عنده
ضمير في شغله))

-عاليا : ((مساء الخير يا بنات ، معلىش أنا مش قادرة أعلق
مخنوقة من اللي حاصل))

-سالي : ((كلنا زيك يا عاليا))

-ميادة : ((ومين ليه نفس يعمل حاجة))

-ريمان : ((هاي يا بنات ، أنا بس عاوزة أقول حاجة ،
مس جانب مش هاتتعوض ، بس أكيد الإدارة هاتجيب بديل
، مش هاتسيب مكانها فاضي ، المشكلة بقى إن اللي جاي
هايكون كفاءة وقادر على الشغل ولا هايطلع أي كلام))

-عاليا : ((هيبان))

-هبة : ((عاوزين نعمل حاجة تكريم لذكراها))

-ميادة : ((أنا لسه برضوه كنت بأفكر في حاجة زي كده))

-ريمان : ((خلاص نتفق يا جماعة ونجيب حاجة مميزة))

-سالي : ((تمام ، وأنا معاكو في الموضوع ده))

-منة : ((كلنا أكيد مشتركين فيه))

-ليلة : ((شوفوا هاتعملوا ايه وقولولي))

-سالي : ((أوكي ، ونبغ الباقي ونشوف هايعملوا ايه))

.....

وبالفعل اتفقت المعلمات سوياً على تصميم ألبوم صور باهظ
الثن يضم مقتطفات مختلفة ومميزة للراحة جانبية ...
وتولت ليلة جمع الصور وطبعها ..

فكرت هي في أن تستعين بستوديو (Creative) التابع
لزميلهم أيمن رشوان لتنفيذ الفكرة ...

.....

بعد مرور يومين ،،،
في بلدة ما ريفية ،،،

أسندت الصواني المليئة بأشهى وأطيب الأطعمة على موائد
خشبية عريضة موضوعة على الأرضية المفروشة بالحصر
والسجاد اليدوي ، وجلس المهندس سرحان القرفصاء ،
ثم ربت على فخذ الشيخ الجالس إلى جواره ، واستطرد
حديثه قائلاً بحماس :

-تسلم ايدك يا شيخ عبدالله ، مكنش ليه لازمة التعب ده كله

قطب الشيخ عبدالله جبينه ، ورد عليه معاتباً :

-واه يا بشمهندس ، هو احنا عملنا حاجة ، ده فضلت خيرك
حاجة على ما قُسم !

نظر له قائلاً بامتنان :

-يدوم العز يا رب

تسائل الشيخ عبدالله باهتمام :

-المهم يا بشمهندس ، قولتلي رأيك ايه في الموضوع اللي
كلمتك فيه ؟

رد عليه سرحان بهدوء :

-أنا معنديش مانع ، المهم رأي العروسة

تابع الشيخ عبد الله قائلاً بجدية :

-برضك إنت ولي أمرها ، وفي مقام أبوها

ابتسم له سرحان وهو يرد :

-الله يكرمك يا رب ، وردة دي زي بنتي ، ومعزهاش عليك

أضاف الشيخ عبدالله قائلاً بنبرة فرحة :
-يباركلك يا بشمهندس ، خلاص ناخذ برأيها ، ونشوف
هاتقول ايه

هز المهندس سرحان رأسه بإيماءة خفيفة وهو يقول :
-صح كده ، واللي فيه الخير يقدمه ربنا

.....

في غرفة أخرى بالمبنى الريفي ،،،

اتسعت خدقتي وردة في صدمة كبيرة ، وإرتفع حاجبها
للأعلى بعد أن أخبرتها السيدة سوزان بمسألة تقدم أحد
الشباب لخطبتها ..

شهقت بذهول وهي تلطم على صدرها :

-أني أتجوز ؟ ليه ؟

رمقتها سوزان بنظرات دافئة ، وردت قائلة بحنو :

-دي سنة الحياة يا وردة

احتجت وردة قائلة بعد أن زاد عبوس وجهها :
-يا ست سوزان أني مبسوطة معاكو ، وآآ...

قاطعتها سوزان بهدوء :
-كل بنت آخرها الجواز ، والشيخ عبدالله طلبك لابنه

تجهت ملامح وجهها أكثر ، وغمغت بصدمة :
-يوه ، لابنه !

تابعت سوزان قائلة بنبرة رقيقة :
-هو انسان كويس ومجتهد ، وعاوز يكمل نص دينه

اعترضت وردة قائلة بإصرار :
-بس أني مش عاوزة أتجوز ابنه ، أني معرفوش

ردت عليها بنبرة هادئة محاولة إقناعها :
-ما هو في فترة خطوبة ، وإنتي هاتعرفيه !

تمتت وردة مع نفسها بتحسر وقد حل الضيق على تعابيرها
ونظراتها :

-يا سنة سوخة يا ولاد ، هاتجوز حد تاني غير سي إزاز ، اه
يا حوستي يامه

-ها قولتي ايه يا وردة ؟

لوت فمها قائلة بإزدراء :

-بندب حظي يا ستي

وضعت سوزان يدها على وجنتها ، ومسحت عليها برفق ،
وتابعت بهدوء :

-بصي يا وردة محدش هايغصبك على حاجة ، بس اعرفي
إنه شاب كويس ومن أصل طيب ، والأهم إنه قادر يفتح بيت
ويصرف عليك ، وده صعب في الوقتي اللي احنا فيه

أدركت وردة أنه لا مفر من تلك الخطبة ، وأن أحلامها
بالزواج من فارس أحلامها قد ذهبت أدراج الريح ، وربما
لن يعود لها وجود أبداً .. لذا تسائلت بقلق :

-طب .. طب أي لو وافقت ، هايحصل ايه بعد كده ؟

ردت عليها بإبتسامة ناعمة وهي ترمقها بنظرات مطمئنة :
-مافيش هنرتب أمور الخطوبة ، وماتشليش هم ، عمك
سرحان متكفل بكل حاجة تخصك

نفخت وردة بحزن وهي تتمتم بخفوت :
-بقي دي آخرتها ، يا خسارتي في الجواز ، مين بعدك يا سي
إزاز هايقولي فلاور، آآه يامه !

.....

في منزل عاليا ،،،

رغم حالة الحزن السائدة على الجميع ، إلا أن عقل عاليا
لم يتوقف للحظة عن التفكير فيما قاله رامي لها ، وإبدائه
لرغبته في الإرتباط بها في أقرب وقت ..
تقلبت على جانبها على الفراش ، وحدقت أمامها في الفراغ
، وتشكل على ثغرها إبتسامة صافية .. وتنهدت بعمق وهي
تتذكر مواقفهما سوياً .. منذ أول لقاء جمعهما عند بوابة
المدرسة ، وإصراره على دفع أجرة السائق ، ثم رؤيته عند
المطعم ، ودفعه للقاتورة ، وما تلاها من رؤيته مصادفة على
الطريق ، وغيرها من المواقف المختلفة ..

تتهدت مجدداً ، وغمغت مع نفسها قائلة :

-يعني هو بيحبني ؟

مطت شفيتها ، وأمسكت بخصلات شعرها لتعبث بهم ،
وتابعت بنبرة حائرة :

-ممم.. طب حصل امتي وازاي ؟ واحنا كل اللي كان بينا
مجرد مواقف !

قطبت جبينها ، وضيقت نظراتها ، وتسائلت بقلة حيلة :

-لأ .. جايز اعجاب لكن حب معتقدش ، يوووه ، أنا محتارة ،
طب أقول للبنات ولا أخبي عليهم !؟

زفرت بصوت منزعج ، وأكملت بإستياء :

-أوووف ، محتارة أوي ، مش عارفة أعمل ايه !

نهضت عن فراشها ، ولفت ذراعيها خلف ظهرها ،
وإستأنفت قائلة :

-طب هاقول لماما ولا أستنى شوية لحد ما أعرف التفاصيل ،
طب أنا أصلاً معرفش هاشوفه امتي تاني !؟

.....

في مطعم ما ،،،،

انتهى النادل من وضع صحون الطعام على الطاولة ، ثم بدأ رامي في تناول قطع اللحم المشوية الخاصة به بشرافة ، وظل آياز محدقاً به في ذهول خاصة بعد أن أخبره ابن خالته بنيته للإرتباط من عاليا ..

فسأله بعدم تصديق :

-إنت بتكلم جد يا رامي ؟

أوما برأسه إيجاباً وهو يرد عليه :

-جد الجد طبعاً

سأله آياز مرة أخرى بإهتمام :

-طب امتي ده حصل ؟

هز رامي كتفيه في عدم إكتراث ، وأجابه وهو يبتلع قطعة أخرى من اللحم :

-مش عارف ، بس أنا دماغي مش بتبطل تفكير فيها ، عاملة زي العفريت ، بتطلعي في كل حنة

رفع آياز حاجبه في إعجاب ، وسأله بفضول :
-أها ، وايه كمان ؟

مد رامي يده ليمسك بكوب الماء ، وإرتشف منه القليل ،
ثم تجشأ قائلاً :
-بصراحة كده أنا متعلق بيها أوي

ضيق آياز نظراته ، وسأله بجدية وهو يحك طرف ذقنه
-وناوي على ايه ؟

رد عليه بإبتسامة عريضة :
-هاقرى فاتحة ومنتخبط ونقرب من بعض أكثر

هز آياز رأسه متعجباً ، وتابع قائلاً بجدية :
-طب افرض طلعتوا مش بتحبوا بعض ، أقصد هي مش
بتحبك وآآ....

قاطعه رامي قائلاً بصوت شبه حاد :

-بعد الشر

بادلله آياز ابتسامه هادئة وهو يقول :

-عموما مبروك مقدماً

تنهد رامي بحرارة وهو يرد عليه :

-الله يبارك فيك

غمز له آياز بمكر :

-عارف أنا كنت متوقع ده

سأله رامي بفضول :

-وايه اللي خلاك تقول كده ؟

أجابه بإبتسامه عادية :

-اصلك مكونتش شايف نفسك وانت بتتعامل معاها

حك رامي طرف أنفه بإصبعه ، وتابع بحرج :

-هو أنا مكشوف أوي كده

ثم ضيق نظراته ، وسأل ابن خالته بفضول :
-طب انت معندكش حاجة كده ولا كده ؟

إرتسمت علامات الجدية على وجه آياز وهو يرد عليه
بتساؤل :
-قصدك ايه ؟

أجابه بإبتسامة عابثة :
-يعني مزة شاغلة بالك ، واحدة بتفكر فيها
-مم..

حرك رامي رأسه قائلاً بتسلية :
-باين فيه وأنا مش واخد بالي منك !

أخذ آياز نفساً عميقاً ، وزفره ببطء ، ثم أجابه بتريث :
-بص ، مخبيش عليك هو مش إعجاب زيك ، بس في توافق
فكري بينا

غمز له رامي مرة أخرى ، وتابع بحماس :
-هي بتبدأ بكده في الأول ، وبعد كده ربنا بيسهلها

أشار له بكفه قائلاً بهدوء حذر :
-ماتستعجلش الأمور ، أما يحصل حاجة هاقولك

.....

عند ستوديو (Creative) للتصوير الفوتوغرافي ،،،،

ترددت ليلة في الدخول وهي تطالع بعينين متوترتين لافتة
المكان .. ولكنها حسمت أمرها بالولوج ، فهي من تولت
مسألة تجهيز الألبوم ، وهي من عليها إنهائه ..
ابتلعت ريقها بتوتر ، ثم دفعت الباب بيدها ، وجابت بأنظارها
المكان ..

كان الوضع هادئاً بالداخل .. نهض أحد الأشخاص من مقعده
، وسألها بنبرة رسمية وهو يتجه نحوها :
-أي خدمة ؟

إرتبكت ، وتوردت وجنتيها وهي تجيبه بتلعثم :

-من فضلك .. أنا .. أنا كنت عاوز أقابل مستر أيمن

سألها بهدوء وهو يضيق نظراته :

-جلسة تصوير ولا آآ...

قاطعته بنبرة متوترة :

-لأ ، هو الموضوع مش كده ، أنا عاوزة اتفق معاه على
ألبوم معين

هز رأسه متفهماً ، وتابع بجدية :

-طب لحظة ، هناديك عليه من جوا

.....

في محل ما للثياب الجاهزة ،،،،،

وضعت ريمان الهاتف على أذنها ، وعبث بيدها الأخرى

بقطع من الثياب النسائية الفاخرة ، واستطردت حديثها

بخفوت :

-مش عارفة ، بس هو بيتعامل معايا كويس جدا

ردت عليها سالي قائلة :

-يا بنتي يمكن يكون معجب؟!!

ضغطت على شفيتها وهي تجيبها بصوت خفيض :

-لا هو مقالش حاجة

تابعت سالي بصوت جاد :

-عامه خلي بالك ، النوعية دي من الشخصيات لو حد

بيعجبها هاتقول على طول ، مش هتلف وتدور

-أها..

سألته سالي مجدداً باهتمام :

-بس إنتي مرتاحة معاه؟

أجابته ريمان بثقة :

-ايوه ، طلع عكس ما كنت مفكراه

-أها..

ثم تابعت قائلة بحماس :

-عارفة يا سالي في الأول قولت عليه ده تنك ، وشايف نفسه ، ومرسوم على الفاضي ، لكن طلعت ظلماه ، هو بيحب شغله ومجتهد فيه .. !

ردت عليها سالي قائلة بنبرة محذرة :

-ربنا يكرمك يا ريمو ، بس متحاوليش تحكي كثير في الموضوع ده قصاد أي حد طالما مافيش حاجة حصلت !

هزت رأسها متفهمة وهي تقول :

-اه ما أنا عارفة ، أنا بس بأفضض معاكي في الكلام

-اوكي

.....

في ستوديو (Creative) للتصوير الفوتوغرافي ،،،

خرج أيمن مسرعاً من الداخل ، وعلى ثغره إبتسامة
سعيدة، وهتف بحماس وهو يشير بيده :
-مس ليلة ، أهلا وسهلاً ، اتفضلي ، شرفتي الاستديو
المتواضع بتاعي

ابتسمت له بخجل وهي ترد عليه :
-ميرسي ، سوري إن كنت هاعطك وآآ...

قاطعها بعتاب زائف :
-لالالا ، متقوليش كده !

ثم أشار بيده وهو يتابع بحماس :
-اتفضلي نتكلم جوا

تحنحت بخفوت وهي تقول :
-هنا كويس

لم تتلاشى إبتسامته العريضة وهو يردد :
-اوكي اللي يريحك

إتجهت ليلة للجلوس على أقرب مقعد ، وجلس هو على المقعد المجاور لها ، ثم فركت أصابع كفها بتوتر ، وأكملت قائلة بتلعثم قليل وهي تتحاشى النظر إليه :
-بص أنا .. انا وصحابي في الكي جي قررنا نعمل ألبوم لمس جانبيت

هز رأسه بحركة خفيفة وهو يتمتم بجدية :
-تمام

إستأنفت حديثها بهدوء حذر :
-فطبعاً اخترت شوية صور ، بس محتاجة أنفذها بطريقة مختلفة ومميزة عشان نديها إهداء لجوزها

أردف هو قائلاً بحماس :
-أوكي ، وأنا معاكي في الحوار ده

تابعت هي قائلة بجدية بالغة وقد إستدارت برأسها نحوه :
-احنا هنتحمل التكاليف كلها

أشار لها بكفه معترضاً ، ورد عليها بإصرار :
-لالالا ، مش هانتكلم في فلوس دلوقتي ، إنتي بس قوليلي
دماغك فيها ايه ، وأنا معاكي !

تشكلت إبتسامة رقيقة على وجهها وهي تقول بصوت
خفيض :
-اوكي

أخذ أيمن نفساً مطولاً ، وزفره على مهل ، وأكمل بنبرة
متحمسة وهو يرمقها بنظرات ناعمة :
-عارفة يا مس ليلة ، أنا فرحان أوي إنك يوم ما فكرتي
تعملي حاجة جيّتي عندي

توردت وجنتيها أكثر ، وبدى الإرتباك واضحاً على محياها ،
وردت عليه بخجل :
-ميرسي

نهض عن المقعد ، وأشار بيده متابعاً :
-تعالى معايا أوريكي شوية ألبومات تنقي منهم المناسب

هزت رأسها موافقة ، وعلقت حقيبة يدها على كتفها ،
وهمست :
-اوكي

سيطرت سعادة خفية على المصور أيمن لأن ليلة أثرت
التعامل معه في ذلك الموضوع الهام ، وبالتالي ستتوطد
العلاقات بينهما كثيراً ، لأنهما سيتواصلان بصورة مباشرة
دون حرج أو تكليف ..

.....

على مدار الأيام التالية ،،،

تلقي رامي خبر خطبة وردة بسعادة غامرة ، فقد كان
يريد التخلص منها في أقرب وقت ، وها قد حصل ما تمناه ..
وظلت الأخيرة في بلدتها الريفية لتستعد لترتيبات الخطبة ..
وتدمرت آمالها تماماً في الزواج من آياز ..

لم يتأثر آياز بغيابها ، فلم يشكل وجودها فارقاً معه .. ولكن على الجانب الآخر تعمقت الصلات مع ريمان ، ونما بينهما حديثاً من نوع آخر .. حديثاً يكتشف جوانبهما الخاصة ...

عاد كل شيء إلى طبيعته في مبنى رياض الأطفال ، ومع هذا ظل هناك شيئاً ناقصاً ..

كذلك أهدت المعلمات زوج الراحلة جانيت الألبوم الذي تفنن المصور أيمن في إخراجه بصورة مميزة مما جعله يبكي فرحاً وتأثراً بما فعلوه من أجلها ، وشكر الجميع ممتناً ..

أرسلت إدارة مدارس اللافانيا في طلب معلمة موسيقى جديدة تكون على قدر من الكفاءة والخبرة بالإضافة لوجود الروح الإبتكارية وحب العمل الجماعي ، وبالفعل تم العثور على واحدة تنطبق عليها الشروط الموضوعية .. ووقعت العقد مع مديرة المدارس ..

حركت ريمان قلمها الحبر بحركة ثابتة بإصبعيها وهي تحديق في آياز بعد أن جلس الإثنين سوياً في غرفة المعلمات ، ثم سألته باستغراب :
-بتصلي كده ليه ؟

ضيق نظراته ليطالعه بعينين شغوفتين ، ورد عليها متسائلاً
:
-ازاي يعني؟

ردت عليه بخجل وهي ترسم إبتسامة رقيقة على شفيتها :
-مش عارفة ، بس عينك شكلها غريب

أجابها بخفوت أسر :
-يمكن بتقول عن اللي جوايا

سألته هامسة :
-وانت جواك ايه؟

أخذ آياز نفساً عميقاً ، وزفره على مهل ، ثم أجابها :
-حاجات كثير

زمت ريمان شفيتها فقد إستشعرت مشاعره نحوها ، والتي
عبرت عنها نظراته ، وكذلك تصرفاته معها مؤخراً ..

أعادت خصلة من شعرها للوراء ، وسألته بفضول وقد
لمعت عينيها هي الأخرى :
-ممم.. زي ايه ؟

رد عليها هامساً وقد رفع حاجبه للأعلى :
-بصي هو مكانها مش هنا ، بس عاوزك تعرفي آآ....

قاطع حديثهما صوت رانيا المتذمر وهي تلج للغرفة :
-استغفر الله العظيم

إعتدت ريمان في جلستها ، وبدأت في جمع أشياءها الخاصة
وهي تتمتم بسخط :
-أووف ، الغلسة جت

رمقتها رانيا بنظرات حادة ومتفحصة لهما ، وهتفت
بتبرم :
-أهلاً ، إزيكم ؟

ردت عليها ريمان بإقتضاب وهي عابسة الوجه :

-هاي يا رانيا

بينما أجاها آياز بنبرة جافة :

-هالو مس رانيا

إلتفتت ريمان برأسها نحو آياز وسألته بجدية وهي توميء بعينيها :

-انت فاضي الوقتي ؟

رد عليها بنبرة رخيمة وهو ينظر في ساعة هاتفه المحمول :

-أه ، لسه معايا وقت

نهضت عن مقعدها ، وتابعت قائلة بهدوء :

-طب تعالى نروح الكانتين نشترى أكل

ابتسم لها قائلاً :

-اوكي

حدثت رانيا ريمان بنظرات متجهمة ، وقالت بسخط :
-هو إذا حضرت الملائكة؟!

ردت عليها ريمان ببرود مستفز وهي تشير بإصبعها :
-خدي راحتك يا مس رانيا ، انجوي بالـ Staff (غرفة
المعلمات) كله !

راقبتهم رانيا وهما ينصرفان عن الغرفة ، ثم كورت قبضة
يدها في غيظ ، وأكملت بنبرة مغلولة :
-آآآه ياني ، ياما فرساتي ومش قادرة عليكي !

.....

انشغلت معظم المعلمات في الترتيب للنشاط الترفيهي الأخير
للأطفال ..

وتولت هناء بنفسها تنظيم كل شيء ..

كان النشاط عبارة عن إحضار الأباء لمشاركة صغارهم
في صنع طائرة ورقية ، ثم إطلاقها في الهواء لتحلق عالياً ..

تحمس الأباء كثيراً لذلك النشاط ، وحضر أغلبهم للإستمتاع
مع أطفالهم .. ومن لم يتمكن من الحضور منهم بسبب سفره

أو عدم حصوله على إجازة من العمل أرسل من ينوب عنه

...

تابعت هناك الجميع بنظرات مترقبة ، فقد كان شاغلها الأكبر هو التأكد من وجود الإشراف في أماكنه المحددة ، وكذلك سلامة الصغار وعدم تعرضهم للخطر -لو سمحتي !

قالها أحد الأشخاص من خلفها بصوت رجولي خشن ، فاستدارت ببطء لتراه ..

فغرت شفيتها مصدومة ، وحدثت فيه بنظرات مدهوشة ، فقد كان هو نفس الشخص الذي تشاجر معها من قبل بأسلوب وقح ، وعاملها بفظاظة ..

أفاقت سريعاً من صدمتها ، وحل العبوس على وجهها ، وردت عليه بجمود وهي تشير بإصبعها :

-افندم ؟ حضرتك لو جاي تتخاقق تاني ، في إدارة تقدر تروح تشتكي هناك فيها ، لكن متكلمش معايا شخصياً بـ آآ...

قاطعها الرائد محمد قائلاً بإبتسامة ودودة :

-أنا مش جاي أتخاقق على فكرة

نفخت قائلة بنفاد صبر :

-أومال جاي ليه ؟

رفع الراءد محمد كفه الذي يحمل وردة حمراء جميلة أمام
وجهها ، ورد عليها بهدوء دون أن تختفي إبتسامته :

-جاي أعتذرلك عن سوء التفاهم اللي حصل بينا ، ويا ريت
تقبلي دي مني !

رمشت بعينيها غير مصدقة ما حدث توأ ، وشعرت بالخرج
الشديد من تصرفه الجريء هذا ، وتوردت وجنتيها بحمرة
خجلة ، و.....

.....

الفصل الحادي والثلاثون :

قدم الراءد محمد وردة حمراء إلى المعلمة هناء كتعبير
رمزي عن إعتذاره لتصرفه الفظ معها ، فإبتلعت هي ريقها

بتوتر من حركته الجريئة والتي أصابتها بالحرص ، ثم رمقته
بنظرات مرتبكة ، وردت عليه بنبرة شبه خجلة :
-أسفة مش باخد ورد

ابتسم لها قائلاً بإصرار :
-بس أنا مصر يا مس

هزت رأسها معترضة وهي تقول بجدية :
-لا مش هاينفع حضرتك

قطب جبينه مندهشاً منها ، وسألها متوجساً :
-ليه ؟ هو إنتي مش قابلة إعتذاري !؟

ردت عليه بإبتسامة باهتة :
-لا خلاص ، حصل خير ، بس مالوش لازمة الكلام ده

تابعت رانيا ما يحدث من على بعد بنظرات ثاقبة كالصقر ،
والتوى ثغرها بسخط جلي ، ولكزت نشوى الواقفة إلى

جوارها في ساعدها ، وأردفت قائلة وهي تجز على أسنانها
بغیظ :

-شایفة اللي أنا شيفاه يا نوشة ؟!

تلقت نشوى حولها بحيرة ، وسألته على مضض :
-ايه تاني يا رانيا ؟

أومات بعينها وهي تجيبها بنبرة مغلولة :
-هنا والراجل اللي هناك

سلطت نشوى أنظارها عليهما ، وتسائلت بإيجاز :
-مالهم ؟

ردت عليها بحنق وقد تحولت نظراتها للحقد :
-بيديها وردة

فغرت نشوى شفيتها مصدومة ، ورفعت حاجبها للأعلى ،
وهتفت بعدم تصديق :
-يا شخة

غمغت رانيا بتحسر وهي عابسة الوجه :
-جتنا نيلة في حظنا الهباب ، مش بناخد غير الفقر وبس !

أدارت نشوى رأسها في اتجاه رانيا ، ورمقتها بنظرات
مطولة ، ثم أشارت لها بكف يدها وهي تتابع بهدوء :
-عارفة يا روني إنتي لو تصفي نيتك من جوا ربنا هيكرمك
إن شاء الله

تقوس فم الأخيرة أكثر لتجيبها بإزدراء :
-ياختي مصفياها ، بس المنحوس منحوس

دنت سالي من هناء وذلك الشاب ، وحدجته بنظرات قوية
، وتساءلت بجدية :
-في مشكلة حضرتك ؟

إلتفت محمد ناحيتها ، ورمقها بنظرات جافة وهو يجيبها
بفتور :

-بأتكلم مع المس ، إنتي في حاجة ؟

ردت عليه سالي بنبرة حادة ومحدرة وهي تشير بإصبعها
:

-لأ حضرتك اتكلم معانا كويس معانا ، إحنا هنا آآ...

قاطعها محمد قائلاً بتهيدة مسموعة :

-بصي يا مس عشان محدش يفهمني غلط ، أنا جاي أعتذر
للمس دي

هزت رأسها مرددة بإستفهام :

-أها ، مس هناء ؟

أضاف محمد قائلاً ببرود :

-وبأقدم لها الوردة دي بس هي مش راضية تاخذها

شعرت هناء بالخجل الشديد ، واصطبغ وجهها بحمرة
شديدة ، وهتفت بتلعثم واضح :

-عن اذنكم

ثم تحركت بخطى سريعة مبتعدة عنهما ، فصاح بها محمد
بنبرة شبه مرتفعة :

-استني بس

سدت سالي عليه الطريق ، وهتفت محتجة وهي ترفع كفها
في وجهه :

-لو سمحت يا أستاذ ، حتى لو في خلاف ، وحضرتك
اعتذرت ، اوكي احنا هنقبله ، لكن تخرج مس هناء بالشكل
ده قصاد زمايلها بيبقى الوضع مش لطيف خالص

تتحنح بخشونة ، ودس يده في جيب بنطاله ، ورد عليها
بحرج :

-تمام ، في دي عندك حق

ابتسمت له مجاملة وهي تقول بإيجاز :

-شكراً لتفهمك

ثم تركته هي الأخرى وانصرفت في اتجاه الأطفال ...

.....

في نهاية اليوم ، كانت الناظرة إعتماذ تقوم بجولة سريعة داخل مبنى رياض الأطفال مع المعلمة الجديدة لمادة الموسيقى – ليندا – وهي من أصول كندية ..

تحمست ليندا كثيراً لبدء العمل والتعرف على فريق العمل ، وأبدت الناظرة سعادتها بإستعدادها للتحديات المقبلة .. وخاصة أنها تمتاز بالروح المرحة ، وبالشخصية المثيرة للإعجاب ..

تناقشت الاثنتين على عجالة في خطة العمل القادمة خلال الأيام المقبلة .. ووضعت كلتاها خطوطاً عريضة للبدء منذ الصباح الباكر

وبالفعل اجتمع الجميع في غرفة المعلمات للترحيب بها .. استطرذت الناظرة إعتماذ حديثها قائلة بهدوء جدي :
- النهاردة معانا مس ليندا مكان مس جانيت ، وهي هاتكمل معانا بقية السنة !

ثم استدارت برأسها نحوها ، وتابعت قائلة بإبتسامة صغيرة :

Welcome on board Miss Linda- (مرحباً بك معنا
مس ليندا)

رسمت ليندا ابتسامة مرحة على ثغرها وهي تقول :

Thanks-

تركته الناظرة لتتعرف بنفسها على الآخرين ، وعادت
لتمارس أعمالها الأخرى ..

أردفت ميادة قائلة بنبرة عادية :

-هالو ، how are you (كيف حالك ؟)

ردت عليها ليندا بإبتسامة ظريفة :

-أنا كندية بس بابا أصلاً مصري

هتفت هناء مصدومة وهي تردد بإندهاش :

-واو ، مصري ، وبتكلمي عربي

-أكيد

قالتها ليندا وهي تحرك كتفها بدلال

أردفت سالي قائلة بإبتسامة متسلية :

-بصي انتي هانتبسطي معانا ، احنا هنا بنشوف العجب ،
ومش عاوزين نجيبك احباط من الأول ، بس هتتفاجئي كل
يوم بحاجة ممكن تشك !

ردت عليها لينداً بمزاح :

-مممم ، لأ واضح إنني هاتجلط مش هاتفاجيء

هتفت منه بنبرة متحمسة :

-اوه ، هاتجلطي ، ده انتي مصرية وش يا ليندا !

هزت رأسها بحركة خفيفة وهي ترد قائلة :

-طبعاً ، ويا ريت تنادوني لولو ، بلاش ليندا !

ردت عليها منه مبتسمة :

-أوكي ، زي ما تحبي

ولجت سارة إلى داخل غرفة المعلمات وهتفت بحماس
وهي تشير بذراعها :
- احنا عندنا أجانب !

ردت عليها سالي بإبتسامة واسعة :
- لأ طلعت أوت المرادي ، هي مصرية

رفعت سارة حاجبها مندهشة ، وهتفت بمرح :
- بجد ، طب اشطا

تسائلت منة بإهتمام وهي توجه حديثها لليندا :
- هاتبقي ناشونال ولا إنترناشونال ؟

ردت عليها سارة بثقة وهي تلف ذراعها حول كتف منة :
- أكيد انترناشونال ، جنسية بقى وحركات

هزت ليندا كتفيها في حيرة ، وأجابت بهدوء :
- مش عارفة لسه ، بس أنا هادي لكه في الكي جي
- أكيد

أضافت سالي قائلة بجدية :

-يا ريت تبقي ناشونال لأحسن بعيد عنك اللي بيلبس في
الانتر بتجيلوه اللعنة

قطبت ليندا جبينها عقب العبارة الأخيرة ،وردت بإستغراب
:

-لعنة !!!؟

لوت منة شفتيها قليلاً ، ثم دنت من ليندا ، وهمست لها :
-ايوه ، لعنة الانتر دي معروفة !

ضيقّت ليندا عينيها أكثر ، وتمتمت بتعجب :
-مش فاهمة حاجة

تابعت سالي قائلة بهدوء جاد وهي تشير بكف يدها :
-بصي يا لولو في حفلة السنة اللي فاتت الستارة وقعت على
الأطفال ، والسنة اللي قبلها النور قطع في نص الحفلة ،
ولما رجع حصل ماس كهربى

شهقت ليندا مصدومة :

-اوف

إرتسم على ثغر سالي ابتسامة متسلية وهي تستأنف حديثها :

-لأ ده في خبايا كثير ، بس هانقولك عليها بالتفصيل

بادلتها ليندا ابتسامة غامضة وهي تقول بخفوت :

-الظاهر إني هاحب المكان ده أوي !

ردت عليها سالي بثقة :

-طبعاً ، ده الكي جي !

.....

في غرفة الوسائط المتعددة ،،،،

دقت ليلة باب الغرفة بخفة قبل أن تلج للداخل ، وبحثت بعينها عن أيمن فوجدته منكباً على حاسوبه الشخصي ..

تتحنحت بخفوت ، ثم همست متسائلة :
-ممكن ادخل ؟

أشار لها بكفه وهو يجيبها بجدية :
-أه طبعاً

ابتلعت ريقها بحرج ، وتسائلت بحياء :
-مشغول ، لو هاعطك أجي وقت تاني ؟
-لا ، أنا قربت أخلص
-أوكي

تابع قائلاً بجدية وهو يشير على مقعد شاغر :
-اتفضلي

ابتسمت له مجاملة ، وردت قائلة وهي تجلس عليه :
-ثانكس

عضت على شفثها السفلى بتوتر ، ومدت يدها لتخرج من
حقيبتها كاميرا صغيرة ، وأكملت بخفوت :

-أنا مش هاخذ من وقتك كثير

ابتسم لها وهو يطالعها بنظرات متأملة طويلة ، ثم أجابها
بصوت آجش :

-براحتك

تلمست هي عدسة الكاميرا ، وأردفت قائلة بنبرة شبه
مرتبكة :

-هو الكاميرا كان فيها مشكلة وآآ...

وضع أيمن يده على كفها ، فارتجفت من لمستته ، وتوردت
وجنتيها إلى حد ما ، وقاطعها قائلاً بجدية واضحة في نبرته
، وتعابير وجهها :

-ليلة ، ينفع أكلمك في حاجة كده بعيدة عن الشغل

سحبت يدها من أسفل كفه ، ورمشت بقلق وهي تسأله
بخجل :

-خير

برزت أسنانه من خلف إبتسامته وهو يجيبها بنبرة مطمئنة :

-إن شاء الله خير ، متقلقيش !

أخفقت عينيها ، وفرك أصابع كفها بحركة شبه عصبية ،
بينما أخذ هو نفساً عميقاً ، وأخرجه من صدره على مهل ،
وأكمل بهدوء :

-شوفي يا ستي ، أنا مش بأعرف ألف ولا أدور لما أكون
عاوز حاجة بأعملها على طول

سألته بتوتر وهي تتحاشى النظر نحوه :
-أها وبعدين

إستأنف حديثه بصوت جاد ورزين :
-من غير مقدمات كده ، أنا مرتاح معاكي

بدت متوترة للغاية من كلماته ، وتلون وجهها بالكامل
بحمرة ظاهرة ..

تلعثمت وهي تحاول الرد عليه :
-هاآ.. آآ.. انت آآ....

قاطعها بنبرة أكثر جدية :

-مش عاوزك تفهميني غلط ، بس أنا بأفكر جدياً في الارتباط بيكي ، فإيه رأيك ؟

إرتبكت كثيراً ، وسيطر عليها حالة من الحرج ، فعلقت حقيبتها على كتفها ، ونهضت فجأة من على مقعدها ، ثم هتفت بصوت متقطع :

-أنا ... آآ.. عن اذنك

أسرع في خطواته ليقف قبالتها ، ثم سد عليها الطريق ، وسألها بتلهف :

-استني بس ، رايحة فين ؟

ردت عليه بحرج وقد تحول لون بشرتها لثمرة الطماطم :
-ماهو اصل آآ...

استشعر خجلها منه ، فلم يضغط عليها ، وقاطعها للمرة الأخيرة بهدوء :

-بصي خدي وقتك في التفكير ، وردي عليا ، لكن عاوز تتأكدي إني جاد في كلامي

هزت رأسها موافقة وهي تتحنح بصوت شبه متحرج :
-احم آآ.. أوكي ، عن اذنك !

سألها بتسلية وهو يغمز لها :
-طب والكاميرا ؟

ردت عليه بإرتباك :
-هه .. آآ.. بعدين !

تابعها أيمن بنظراته وهي تتصرف بخطوات أقرب للركض ،
ثم حك فروة رأسه بأصابعه ، وتتهد بعمق وهو يقول :
-ربنا يكرم !

.....

انشغل عقل ليلة بالتفكير في الإرتباط بأيمن وخاصة بعد
مصارحة الأخير لها برغبته الجادة في هذا ..

لاحظت رفيقاتها شرودها أثناء عودتهن إلى منازلهن في
سيارة ريمان ، وتسائلت هي بفضول وهي تدير عجلة
المقود :

-الجميل سرحان في ايه ؟

انتبهت إلى صوتها ، وأسبلت عينيها نحوها ، وردت بخفوت
:
-هه

لكزتها سارة في كتفها بخفة ، وهمست لها بمكر :
-ده انتي مش معانا من الصبح يا بنتي

سألته عاليا بجدية وقد أدارت رأسها ناحيتها :
-في حاجة مضيقاكي ؟

هزت رأسها نافية وهي تجيبهن :
-لأ بس .. آآ

هتفت سارة قائلة بمزاح وهي تسحب حجابها للخلف قليلاً
:

-شكلك متغير ، اوعي تكوني بتحبي

ردت عليها سالي مستكرة :

-هو احنا أصلاً بتوع حب وغرام ، يا بنتي احنا خلقنا للعمل
والعبادة

ضحكت الفتيات على دعابة سالي الأخيرة ، وتشجعت ليلة
لقول :

-هو الموضوع قريب من اللي بتقوله سارة

ساد صمت مريب داخل السيارة لعدة ثوانٍ ، وتسائلت
بعدها ريمان بذهول واضح على تعابير وجهها :

-ايه ده بجد ؟

هزت رأسها بإيماءة خفيفة ، وأجابتها بإبتسامة خجلة :

-ايوه

سألها سارة بنفاد صبر :

-قولي يا بنتي في ايه ؟

عضت على شفتها السفلى ، وأطرقت رأسها للأسفل ، ثم
أجابتها بخفوت :

-أيمن بي فكر يرتبط بيا

سألها عاليا بجدية وهي قاطبة جبينها :
-أيمن مين ؟

هتفت سالي بنزق :
-اوعي يكون المصور اياه

ردت عليهن بهدوء :
-اه ، هو

شهقت سالي بإعجاب :
-واو يا ولد !

ابتسمت لها عاليا ، وتابعت قائلة بنبرة فرحة :
-ربنا يسعدك يا لولا ، انتي تستاهلي كل خير

بادلتها ابتسامة رقيقة وهي تقول :
يا رب

هتفت سارة بحماس وهي تطالع ليلة بنظرات سعيدة :
-لالالا .. متاخذيناش في دوكة احنا عاوزين نعرف التفاصيل

أضافت عاليا قائلة بصوت شبه مرتفع :
-طب قبل ما تحققوا مع ليلة ، أنا عندي ليكو خبر

سألتها ريمان باهتمام :
-ايه ؟

وأضافت سالي بهدوء :
-في ايه يا مزة ؟

ردت قائلة بتنهيذة مطولة :
-أنا هيتقري فاتحتي الجمعة الجاية

شهقت ريمان مصدومة وقد تشكل على وجهها علامات
الفرحة :

-بجد يا عاليًا !

هتفت سارة بنبرة متحمسة وهي تشير بكف يدها :

-ايه المفاجأة الجامدة دي !

عبست سالي قليلاً بوجهها ، ورددت متسائلة بحزن مصطنع

:

-انتي بتخبي عليا ؟

ردت عليها عاليًا مبررة :

-لا والله ، بس الموضوع حصل بسرعة

أضافت سارة بنبرة مزحة وهي تلوح بذراعها في الهواء

:

-احنا محتاجين نبخر شلتنا لأن الخطوبات عندنا هاتكون

بالجملة

وافقتها عاليا الرأي وهي تقول بمرح :

-اه والله ، وأنا هاجيب البخور

تتحنت سارة بصوت مرتفع ، وتشدقت قائلة :

-طب هاقولك أنا كمان على موقف حصل معايا ، وأنا شاكة

ان فيه إن ! وأنتو عارفيني لما بأشك في حاجة

سألتها سالي بإهتمام :

-ايه هو يا شارلوك هولمز ؟

ردت وهي تجوب بنظراتها أوجه رفيقاتها :

-عارفين مس حنان

هتفت عاليا باختصار :

-ايوه

بينما تسألنت ريمان بجدية وهي تضغط على بوق السيارة :

-مالها ؟

أخفقت نبرة صوتها ، وثبتت نظراتها وهي تجيبهن :
-شكها كده بيدبر إنها تخطبني لأخوها

شهقت عاليا وهي تسألها بعدم تصديق:
-بتهزري ، مس حنان !؟

أجابتها سارة بثقة :
-لأ والله بأتكلم جد

تابعت سالي قائلة وهي تغمز بعينها :
-معدتش ناقص إلا ريمان

هتفت ريمان بابتسامة مهذبة :
-أنا ؟

أومأت سالي برأسها بهدوء ، وهي تجيبها :
-ايوه

وضعت عاليًا يدها على كتف ريمان ، ورفعت حاجبها للأعلى ،
ورمقتها بنظرات ذات مغزى ، ثم سألتها بمكر :
-ها يا عم ، الأخبار معاك ايه مع إن احنا فاهمين كل حاجة
!!?

ردت عليها بنبرة متريئة :
-إن شاء الله خير

صاحت سارة بصوت مرتفع وهي ترفع كفيها للأعلى :
-ربنا يكرمنا كلنا ويفرح قلوبنا

ردت عليها بقيتهن :
-يا رب

.....

في اليوم التالي ،،
في مسرح مدارس الالفانيا ،،،

استخدمت رانيا عدة أوراق مطوية لتحركها بحركة ثابتة لترطب على وجهها الذي تتبعث منه حرارة شديدة بقليل من الهواء المصطنع ..

نفخت من الضيق وهي تتابع إحدى التدريبات المملة لأحد العروض الخاصة بالمراحل العليا..

غمغت مع نفسها بإنزعاج :

-طب أنا ماليش لازمة في الليلة دي كلها ، مقعدني هنا ليه كل المدة دي

تلفتت حولها ، وراقبت الجالسين بنظرات دقيقة ، ثم عاودت النظر إلى خشبة المسرح ..

-مس رانيا ، تعالي من فضلك

قالتها إحدى الملمات بصوت مرتفع وهي تلوح بذراعها

ردت عليها الأخيرة قائلة :

-جاية أهوو

نهضت عن مقعدها ، وتحركت للأمام ولكنها لم تنتبه
للمطفأة المسنودة بجوار درجات المسرح ، فتعثرت بها ،
وإنزلت على وجهها كالخرقاء ..
ضحك عليها الجميع ، فشعرت بالضيق الممزوج بالغضب ،
وإستندت على مرفقيها لترفع جسدها عن الأرضية ..

اقترب منها أحد الأشخاص ، وأردف متسائلاً بهدوء :
-انتي كويسة يا مس ؟

ردت عليه بنبرة محتقنة :
-لا طبعاً

سألها بإهتمام :
-رجلك كويسة ؟ عاوزة مساعدة مني طيب ؟

ردت عليه بتبرم وهي عابسة الوجه :
-ده العادي بتاعي ، أتكفى على وشي زي تملي

تتحنح بخفوت وهو يتابع بنبرته الرخيمة :

-ألف سلامة يا مس !

رفعت بصرها للأعلى لتتنظر نحوه ، فوجدته شاباً ذو بشرة
سمراء ، ذقنه حليقه ، وإبتسامته بشوشة ..
تتهدت بضيق ، وتمتمت مع نفسها بتذمر :
-يا ربي ، ويوم ما يجي حد يساعدي يكون أفريقي !!!

صاحت دينا بنبرة مرتفعة :

-مستر عبد الرحمن ، ممكن تساعدي في تعليق اللوحة دي
على الستارة

أجابها بإبتسامة مشرقة :

-حاضر

فركت رانيا طرف ذقنها بإصبعيها بعد أن اعتدلت في وقفها
، وحدثت نفسها بفضول :

-حتى بتاعة الأرت طلعت عارفك يا أفريقي !

لاحقاً انضمت إليهم المعلمة ليندا ، وهتفت بمرح وهي تصعد درجات المسرح :

-هاي ، إيه الأخبار ؟

رحبت بها ديناً ، وقبلتها من وجنتيها ، وردت عليها مبتسمة :

-تمام ، انتي جاية هنا ليه ؟ عندك بروفة ؟!

أجابتها بإبتسامة لطيفة وهي تطالع المسرح بعينين مشرقتين :

-ايوه ، المفروض في choir (كورال موسيقي) هادربه

-أها ، ربنا معاكي

في نفس التوقيت ، انتهى الأستاذ عبد الرحمن من تثبيت إحدى اللوحات البلاستيكية على الخلفية السوداء الخاصة بالستارة ، فهبط مرة واحدة من على السلم الخشبي ولكنه لم ينتبه لتأرجحه ، فمال بشدة ، وسقط كلياً على الأرضية ، وارتطم طرفه بمقعد موضوع بجواره فتحول الأخير إلى قذيفة أصابت المعلمة ليندا في ساقها ، فصرخت بفرع ، ووقعت مصدومة ..

أسرع الجميع نحوها ليطمئنوا عليها ، ولكنها أصيبت في ركبته ، فتأوهت بنبرة شبه متشنجة وهي ترد :
-مش قادرة ، آآه ، دي أكيد مقصودة

جثى عبد الرحمن على ركبته أمامها ، وتأسف قائلاً بتوجس :
-أنا أسف يا مس ، والله ما خدت بالي إن السلم مش متثبت
كويس

همست ليندا لنفسها بخوف وهي تتلمس ركبته :
-دي لعنة الانتر

سألها بقلق وهو يحاول فحص إصابتها بعينيه :
-بتقولي ايه ؟

سألته ديننا بتلف وهي تمسح على ظهرها برفق :
-مس لولو انتي كويسة ؟
صرخت ليندا بصوت متآلم وهي تحاول تحريك ركبته :
-آآه ، ساعدوني

أردف عبد الرحمن قائلاً بجدية :

-متحركيهاش يا مس ، اسندي عليا ، وأنا موجود
أومات برأسها بإيماءة خفيفة ، وضغطت على شفيتها
متوجعة ، ثم مرر هو ذراعه أسفل ركبتيها ، وطوق
بالآخر خصرها ، ثم حملها بحذر عن الأرضية الخشبية ،
وتوجه بها نحو الكواليس ...

جحظت رانيا بعينيها وهي تتابع بذهول عجيب ما حدث
أمامها ، وإنفرجت شفيتها للأسفل في صدمة واضحة حتى
على تعابير وجهها ، وهتفت بتذمر وهي تركز بساقها
الأرض :

-لأ كده كتير ، يعني أنا إتأمرت على الأفريقي واتبطرت عليه
، قام شال الكندية ومشى ، يا ميلا بختك يا رانيا ،
هتشال امتي يا ناس ؟

وضعت هي يدها على رأسها ، وضغطت عليها قليلاً ،
وتابعت بخيبة أمل :

-مش هانولها باين غير وأنا متشالة على الخشبة
!!!

الفصل الثاني والثلاثون (الأخير) :

قرر عدد من أولياء أمور مرحلة البيبي كلاس التوجه إلى ناظرة الرياض لتقديم رسالة شكر و عرفان بالجميل إلى المعلم آياز الذي خيب كل ظنونهم السيئة عنه ، وفاق توقعاتهم ، وأحدث فارقاً واضحاً مع صغارهم

لم تتفاجيء الناظرة إعتقاد من ردة فعلهم ، فقد توقعت أن يبذل هو قصاري جهده لفعل المستحيل لإثبات مبدأه وتحقق هدف رسالته ، وبالفعل نجح في هذا ..

استطرد أحد الأباء حديثه قائلاً بإمتنان :

-إحنا ك Parents (أولياء أمور) ، حابين نشكر الإدارة ومستر آياز على تعبته مع الأولاد

أضافت سيدة ما قائلة بحماسة :
-أنا مكونتش مصدقة ان بنتي هاتتعلق بيه أوي

بينما أكمل آخر قائلاً بإبتسامة ودودة :
-بصراحة طلع ممتاز

أشار أحد أولياء الأمور للبقية بكف يده ليسود الصمت
بينهم ، وتابع هو الحديث بنبرة أكثر جدية :
-احنا عاوزين نعتذره عن آآ...

قاطعتهم الناظرة إعتماذ وهي ترسم على ثغرها إبتسامة
هادئة وبنبرة رسمية :
-مافيش داعي ، هو قام بواجبه مع الأطفال

هتفت سيدة أخرى قائلة برجاء :
-أرجوكي يا مس اعتماذ بلغيه شكرنا ، وثقتنا فيه

أومات الأخيرة برأسها إيجاباً ، وردت عليها بهدوء :

-اوكي

انتبهت ريمان للحوار الدائر في الإستقبال ، وشعرت بالفخر من حديثهم عن آياز .. وظهرت علامات الفرحة واضحة على قسماات وجهها ..

لقد تمكن من تحقيق هدفه ، وأثبت مقدرته على تعليم الصغار دون فرق بينه وبين أي معلمة ..

قادتها ساقياها إلى قاعته الدراسية ، وتحركت بخطوات أقرب للركض وهي تتجه نحوه ، ثم هتفت بتلهف وهي تحاول إلتقاط أنفاسها :

-آياز ، مش هاتصدق اللي بيحصل برا

سألها باهتمام وهو مسلط أنظاره عليها :
-في ايه ؟

أجابته بحماسة وهي تشير بكلا كفيها :

-ال- Parents (أولياء الأمور) بيشكروا فيك جامد

رفع حاجبه للأعلى ، وتسائل بعدم تصديق :

-Really (بجد) ؟

هزت رأسها عدة مرات وهي تجيبه :

-ييس

أخذت ريمان نفساً عميقاً ، وزفرته على مهل ، ثم تابعت
بسعادة :

-أنا فرحانة أوي عشانك

مط شفتيه قليلاً ، وضيق عينيه وهو ينظر نحوها ، ثم وضع
يديه في جيب بنطاله ، وسألها بمكر :

-بجد ؟ طب ليه ؟

إرتبكت هي من نظراته العميقة ، وظهرت حمرة خفيفة على
وجنتيها ، وتلعثمت وهي تحاول الرد عليه :

-احم .. آآ.. يعني احنا زمايل ، وأكيد نجاحك هايكون مشرف
للـ Staff (فريق العمل) كله

اقترب منها خطوتين ، وغمز لها متسائلاً :

-بس كده ؟

زاد خجلها واضطرابها .. وردت عليه بخفوت وهي تعيد
وضع خصلات شعرها خلف أذنها :
-آآ.. ماتحرجنيش بليز

أخرج يده من جيبه ، وأشار بإصبعه نحو قلبها ، وتابع
بنبرة رخيمة :
-اوكي ، بس أنا متأكد من اللي هنا

أسبلت عينيها ، وإبتسمت له إبتسامة خجلة .. بينما ظل هو
محدقاً بها بنظرات مختلفة .. ولكنها كانت مرآة لما في
صدره وفؤاده نحوها ...

.....

في المكتبة الملحقة بمبنى الرياض ،،،

أمسكت رانيا بقصة مصورة للأطفال – ذات حجم كبير –
وفتحتها على آخرها ، وبدأت تسرد ما بها من أحداث ..
وما إن إنتهت حتى سألت الصغار بجديّة :
-ها استفدنا ايه يا حلوين من القصة ؟

أجابها أحدهم – ويدعى آدم – ببراءة :
-مانكولش sweets

لوت رانيا ثغرها مستكرة ، وهتفت مصححة :
-اسمها حلوى !

اعترض الصغير آدم قائلاً بإصرار :
-لأ يا مس ، انتي بتقوليهها غلط

بررت له قائلة بحذر :

-يا حبيبي ، دي بالانجليش ، لكن باللغة العربية حلوى

نهض أحد الصغار عن مقعده ، ووقف قبالتها ، وأردف قائلاً
ببراءة :

-عارفة يا مس احنا شوفنا ديناصور هنا

رمقته بنظرات متعجبة ، ثم ردت عليه بهدوء :

-ديناصور !! ده انقرض يا سيف من زمان

هز الصغير آدم رأسه نافياً ، وأكمل قائلاً بهدوء :
-لأ هو مش ديناصور يا سيف ، ده Crocodile (تمساح)

ابتسمت لهما رانيا بسخرية ، وردت عليهما بثقة :
-تمساح ، لأ إنت غلطان مافيش تماسيح في الكي جي !

صاح الصغير سيف قائلاً بعبوس :
-والله شوفته يا مس رانيا !

ثم إستدار برأسه للخلف ، وتابع ببراعة :
-وكان ماشي من هنا وبيhez ديله

عقدت رانيا مابين حاجبيها في إندهاش ، ورددت بعدم فهم
:

-بيhez ديله ???!

أشار لها بذراعه وهو يكمل بثقة :
-اه ، وطلع على الحيطه

جحظت بعينيها مصدومة ، ورددت بتلعثم وقد بدى الشحوب
على وجهها :

-حيطة .. ده مش .. مش تمساح ده آآ...

صاح الصغير سيف بحماس وهو يقفز في مكانه :
-بس أنا عرفته ، هو Iguana (سحلية) ، أهوو هناك يا
مس

اتسعت مقلتي رانيا أكثر في رعب ، وركضت كالمجنونة
خارج المكتبة وهي تصرخ بهلع :

-يا مامي ، ده .. ده طلع برص ! عااااا ، إلحقوني !!
تعالت ضحكات الصغار على تصرفها الأخرق .. وتدخلت
إحدى العاملات للتصرف فوراً ، وإبعاد الأطفال ، والتخلص
من ذلك الكائن الدخيل ...

.....

لاحقاً عرف الجميع بما فعلته رانيا خلال حصتها ، فضحكوا
على حماقتها ..

أرادت سارة أن تنشر ما حدث في منشور على الفيس بوك ، ولكن حذرتها سالي قائلة :

-اوعي تعملي كده

سألتها سارة بجدية :

-ليه يعني ؟

أجابتها سالي بمزاح :

-يا بنتي البوست بعد شوية هيتاخذ سكرين شوت ، ويتبع لجهات سيادية عليا ، وشوية وهنلاقيه اختفى في ظروف غامضة !

وضعت كفها على طرف ذقنها ، وهتفت بصدمة :

-يا لهوي

أكملت سالي قائلة بإبتسامة متسلية :

-وانتي هتتحطي في الـ Black List (القائمة السوداء)

ردت عليها سارة موافقة :

-أوف ، وأنا مش ناقصة

-بالظبط ، بلاش تكوني من المغضوب عليهم

-على رأيك

.....

بعد برهة ، ولجت السكرتيرة أية إلى داخل غرفة المعلمات ، وأردفت قائلة بصوت رقيق :

-بنات ، مس إعتاد عاوزة حد للإشراف في حفلة الناشونال بالليل

ردت عليها هبة بفتور :

-لا ، أنا مش فاضية عندي مشاوير كتير

واعترضت ميادة هي الأخرى بجدية :

-ولا أنا

أشارت لهما أية بكفها وهي تتابع بنبرتها الرقيقة :

-بصوا ، اختاروا أي اتنين

تسائلت سارة بإهتمام :

-هو مس لولو معاهم ؟

أجابتها أية قائلة :

-اه

أضافت سالي بهدوء :

-دي يا عيني من ساعة اللي حصلها وهي متعقدة

ضحكت سارة وهي تقول بمرح :

-ايوه لعنة الإنترنت ! عشان تصدق

هتفت هبة قائلة بجدية بالغة :

-بصي أنا مش هاجي المدرسة بالليل لو دفعولي مليون جنية

سألته سارة بفضول :

-ليه يا بوب ؟

أجابتها هبة بصوت جاد وهي ترفع حاجبها للأعلى :

-ايه يا بنتي هو انتي ماسمعتيش عن العفاريت اللي هنا

رمشت سارة بعينيها وهي تردد بقلق :

-عفاريت

ثم إزدردت ريقها وتساءلت بتوتر :

-بتكلمي جد ولا .. ولا ده هزار ؟

ردت عليها سالي تلك المرة وهي تتنهد بصوت مسموع :

-ايوه ، ده معروف من سنين ، المدرسة مسكونة بالليل !

هزت سارة رأسها مستكرة :

-استحالة ، ده مش حقيقي

تابعت هبة قائلة بنبرة شبه خافتة :

-فاكرة يا سالي لما ناني ناصرة جت المبني الصبح ، ولاقت

المكاتب كلها عليها أثار رجلين كبيرة ، حتى جوا مكتب مس

إعتماد اللي محدش معاه مفتاحه إلا هي !

بينما أضافت سالي بهدوء حذر :

-أيوه ، والأبواب اللي بتتفتح وتتقفل لوحدها من غير ما حد يقرب منها

ردت عليها هبة بنبرة شبه منزعجة :

-ولا أوكرة الباب اللي بتتكسر كل شوية

وأكملت سالي بنبرة غامضة :

-ده غير الصوت اياه

ضمت سارة قبضتي يدها إلى صدرها ، وهتفت بخوف :

-أووف ، ده باينه حقيقي

إستأنفت هبة حديثها وهي تشير بيدها :

-اسالي حتى بتوع الأمن وهما يقولوك ، طول الليل مشغلين
قرآن

حركت سارة رأسها معترضة ، وصاحت محتجة :

-لألاً .. مش عاوزة أسأل حد

سألت أبة مجدداً بإرهاق :

-طب مين هايروح ؟

ردت سارة بإبتسامة عابثة :

-أقولك أنا ، حطي البت رانيا ومعاها نشوى

نظرت لها سالي بنظرات ذات مغزى ، وهتفت لها:

-ده انتي بتموتي فيهم !

ضحكت سارة وهي تضيف بتسلية :

-خلي قلبهم يجمد شوية

وبالفعل تم تكليف رانيا ونشوى بحضور الحفل المسائي

والإشراف عليه ، وإنضمت إليهما عاليا بعدما اعتذرت

معلمة أخرى في قسم اللغات ...

.....

كما تم الإرسال في طلب المعلمة منة للحضور إلى مكتب
السكرتارية حتى يتم التنسيق معها لكونها عضواً في
الإشراف على رحلة المدارس إلى تركيا ..

استلمت هي الأوراق الرسمية ، وكذلك خطاب التكليف ،
وبدى على محياها ابتسامة جلية ، وتمت مع نفسها
بسعادة :

-أخيراً ، ها غير جو وأسافر ، ياه ، أد أيه أنا محتاجة
التغيير ده !

دست الأوراق في حقيبة يدها ، وتابعت قائلة بجدية :
-محتاجة أشوف اللي ناقصني وأجهز حاجتي قبل ما أسافر !

.....

في المساء ،،،

ابتلعت رانيا ريقها بتوتر واضح وهي تصعد على الدرجات
المؤدية للطابق الأخير في مبنى المدارس الرئيسي ..
كان الجو هادئاً للغاية .. والإضاءة خافتة ..
تلفتت حولها بنظرات مذعورة ، وهمست لنفسها بخوف :

-استر يا رب ، ده أنا هاموت في جلدي ، عقلي كان فين
عشان اطلع هنا لوحدني

تحركت بحذر في الرواق .. وتابع حديث نفسها بإرتعاد :

-ده أنا لو اتقتلت هنا محدش هايحس بيا

ثم هبت في مكانها مذعورة حينما استمعت إلى صوت
صفق باب ما بقوة ، وكتمت صرختها بصعوبة ..

ازدردت ريقها مرة أخرى ، وشعرت بإرتجافة شديدة تجتاح
أطرافها ..

هزت رأسها مستنكرة ، وأردفت قائلة بإصرار :

-أنا ايه اللي خلاني أوافق اجي هنا لوحدني ، ما كنت نزلت
الحمام اللي في الأرضي وخلص

صرخت تلك المرة بهلع حينما شعرت بقبضة يد توضع
على كتفها ، فصاحت بها عاليا بإندهاش :

-اهدي يا رانيا ، في ايه ؟

هدرت رانيا بفرع وهي تهب في مكانها :

-عفريت !

نهرتها عاليا قائلة بحدة :

-ده أنا يا مجنونة

تنفست رانيا الصعداء ، ووضعت يدها على قلبها وهي تقول
بصوت لاهث :

-يا لهوي ، قطعتي خلفي !

رمقتها عاليا بنظرات سخط ، وتساءلت بتهكم :

-ايه جو الرعب اللي انتي عملاه !؟

ردت عليها بنبرة مرتبكة :

-ما.. ما أنا متوقعتش إنك تكوني هنا

بررت لها عاليا قائلة :

-أنا جيت وراكي أشوفك رايحة فين

أجابتها رانيا بصوت متحشرج :

-كنت بأدور على الحمام اللي هنا

-تعالى ، ده هو هناك

-طيب

ثم سارت الاثنتين سوياً في إتجاه المرحاض ، وأصرت رانيا على بقاء عاليا معها حتى تنتهي مما تفعله ، وبعدها تحركت كلتاها عائدتين إلى المسرح ...

.....

في فيلا سرحان عليه ،،،

فاتح رامى والديه في مسألة خطبته من عاليا - زميلة آياز في العمل - ولم يبدُ أحدهما إعتراضه على رغبته ، فقد كان واضحاً عليه مدى تعلقه بها ، بالإضافة إلى حماسة والدته السيدة سوزان في تزويجه قريباً ..

استأنف المهندس سرحان حديثه قائلاً بهدوء :

-أهم حاجة تكون البنت كويسة ، ومن أصل طيب !

رد عليه رامى بإبتسامة واثقة :

-اطمن يا بابا ، محترمة وأخلاق وحاجة تتشرف بيها

ربت والده على ظهره ، وتابع بهدوء :
-على بركة الله

أضافت والدته قائلة :

-ربنا يكرمك يا رامي ، وتكون بنت الحلال اللي تستاهلك

احتضن رامي والدته ، وانحنى ليقبل كف يدها وهو يقول
بنبرة ممتنة :

-حبيبي يا ماما

ثم اعتدل في وقفته ، وتابع بجدية :

-أنا هحاول أظبط ميعاد نتعرف على أهلها ، وبعدها إن شاء
الله نقرى الفاتحة

أوماً والده برأسه موافقاً :

-إن شاء الله ، ربنا يسهلك أمورك

ردت عليه والدته بسعادة :

-تمام يا حبيبي !

تنهد رامي بارتياح ، واتجه مسرعاً إلى غرفته ليبلغ آياز
بقرار والديه المبهج وقلبه يرقص طرباً من السعادة

.....

في اليوم التالي ،،
في مبنى الرياض ،،

اجتمعت المعلمات حول دفتر توقيع الحضور والإنصراف
، وتبادلن المزاح سوياً ..

ولج آياز إلى داخل الإستقبال ، وبحث بعينه سريعاً عن
عاليا ليخبرها بطلب رامي منه ..

وبالفعل وجدها بصحبة سارة وسالي ، فدنا منهن ،
وتحنح بخفوت وهو يقول :

-صباح الخير

إلتفتت المعلمات إليه ، ورددن التحية برقة ، فتابع قائلاً
بهدوء :

-ممكن أتكلم معاكي على جنب يا مس عاليا

-اه اتفضل

قالتها وهي تتحرك معه للخلف ..

حك هو طرف ذقنه بإصبعه ، وإستأنف حديثه بنبرة جادة :
-هو الموضوع يخصك إنتي وآآ.. ورامي ابن خالتي

توردت وجنتيها قليلاً ، ونظرت إليه وهي ترسم على ثغرها
إبتسامة رقيقة .. وسألته بهمس :
-هو .. هو آآ..

قاطعها قائلاً بثبات :

-شوفي يا مس عالي هو عاوز رقم تليفونك عشان يظبط
معاكي معاد للخطوبة

إندهشت من عبارته الأخيرة ، وهمست متوترة وقد اكتسى
وجهها بحمرة كبيرة :
-آآ.. خطوبة

ابتسم لها وهو يسألها بخفوت:

-ايوه ، في مانع عندك أخده منك وأديهوله !؟

تتحنحت قائلة بخجل :

-احم.. لأ !

هز رأسه بحركة خفيفة وهو يقول :

-ومبروك مقدماً

بدت مرتبكة ومتحمسة في آن واحد .. واعتلى ثغرها

ابتسامة عريضة وهي تقول بخرج :

-ميرسي .. آآ.. قصدي الله يبارك فيك

اقتربت منهما ريمان ، وتساءلت باهتمام :

-خير يا جماعة في حاجة ؟

رد عليها آياز بابتسامة الدبلوماسية :

-خير إن شاء الله

رفعت حاجبها للأعلى ، ورمقته بنظرات مطولة وهي تردد :

-واضح كده إن الموضوع فيه آآ...

قاطعتها عاليا بقلق جاد :

-أوف مس اعتماد جت ، يالا بينا على الكلاسز بتاعتنا

غمزت لها ريمان وهي تقول بعتاب زائف :

-اوكي بتهربي مني ، هاعرف برضوه

ثم تحركت مع آياز نحو قاعتها الدراسية ، وسألته :

-هو في ايه ؟

رد عليها بهدوء :

-صاحبك هاتتخطب قريب

سألته بفضول أكبر وهي تطالعه بنظراتها :

-بجد ، وانت عرفت منين ؟

أجابها بنبرة شبه مغترة :

-من ابن خالتي ! إنتي ناسية ولا ايه ؟

عضت على شفتها السفلى ، وحكت فروة رأسها بكفها
لتنفذ خصلات شعرها ، وتابت :

-أها ، صح ، مخدمش بالي ، مبروك ليهم

رد عليها آياز مبتسماً :

-الله يبارك فيكي ، وآآ... وعقبالك !

أسبلت عينيها وهي توليه ظهرها :

-إن شاء الله ، هاروح أشوف الكلاس بتاعي

حرك رأسه موافقاً إياها ، وتابع بهدوء :

-أوكي ، وهنتكلم تاني

-شور

-باي !

.....

في معرض السيارات ،،،

حصل رامي على رقم عاليًا من آياز ، وترقبت هي بشغف كبير مكالمته لها .. ولم يختلف حاله عنها كثيراً .. ظل ينتظر اللحظة المناسبة والتي تتوافق مع وقت فراغها حتى يهاتفها ..

وبالفعل أتاها إتصاله المنتظر ..

أجابت عليه بنبرة ناعمة بـ :
-ألو-

رد عليها بحماس وهو يعتدل في جلسته على المقعد :
-أحلى ألو سمعتها في حياتي

همست له بخجل :
-ميرسي

سألها مازحاً وهو يطرق بأصابعه على سطح مكتبه :
-ازيك يا أبله ؟

عاتبته قائلة بجدية :

-برضوه أبله

رد عليها بحماسة واضحة في نبرته :
-طبعاً ، أجمل وأحلى أبله في الدنيا

سألته بهدوء مصطنع :
-إنت كنت عاوزني في ايه ؟

أجابها بمزاح وعلى ثغره ابتسامة واسعة :
-أعاكسك

ردت عليه بجدية مفرطة :
-والله ! إنت هتهزر

استشعر رامي التغيير المفاجيء في نبرتها ، فهتف بتلهف
وهو يحاول إسترضائها :
-لالالا .. أنا غرضي شريف والله

سألته مجدداً بهدوء :

-ها ، عاوز ايه ؟

انتظر قليلاً قبل أن يجيبها بتهيدة عميقة :
-نتجوز

ردت عليه بإندهاش :
-كده خبط لزق مافيش أي مقدمات

التوى ثغره بإبتسامة متحمسة وهو يرد عليها :
-ما أنا اختصرت ده كله

همست له بحياء :
-عادي كده

سألها رامي بإهتمام :
-ايوه ، ها رأيك ايه ؟

ردت عليه بنبرة شبه مرتبكة :
-ما .. ما انت عارف رأيي

أردف قائلاً بإصرار :
-عاوز أسمعها بوداني

أجابته بإيجاز :
-اوكي

تعجب من ردها المختصر ، وهتف مستكراً :
-اوكي ! بس كده

تحدثه قائلة بمكر :
-بالظبط زي ما قولتلي

مط فمه ليقول بجدية :
-اها ، واضح إننا هانقف لبعض على الواحدة

حذرتة قائلة :
-المشوار لسه في أوله !

أخذ هو نفساً عميقاً ، وزفره ببطء ، ثم تابع بصوت هاديء :

-طيب يا ست البنات ، عاوزك تحددى ميعاد مع الحاج والحاجة عشان نجي نزوركم ونقرى فاتحة ونلبس الدبل

ردت عليه بنزق :

-مش لما نتعرف الأول عليكم ، ونشوف إن كنت هو افق بيك ولا لا

تابع قائلاً بعدم اكتر اثار :

-كل دي شكليات ، أهم حاجة القبول ، وده حصل الحمد لله ، وأنا متأكد منه !

ردت عليه بنعومة :

-طيب ، هارتب أموري في البيت ، وأكلمك

تنهد قائلاً بحرارة :

-هستنى مكالمتك على نار

ثم أنهى معها المكالمة ، ولوح بقبضته بسعادة في الهواء وهو يدير مقعده بحركة دائرية ، فقد أوشك على الحصول على مراده ، وأصبح على بعد عدة خطوات من تحقيق حلمه ..

.....

في غرفة المعلمات بمبنى الرياض ،،،

اجتمعت الناظرة إعتماذ بجميع أعضاء فريق العمل للترتيب لحفلة نهاية الفصل الدراسي الأول ..

وقامت بتوزيع الأدوار على الجميع على حسب طبيعة عرض كل فرد ..

وتولت ليندا الإشراف العام على خشبة المسرح أثناء بدء العرض ، وكذلك في الكواليس ..

مررت السكرتيرة أية ورقة خاصة بالتوقعات ، فوقع عليها الجميع بالعلم .. ثم أعطتها للناظرة .. وانصرفت كلتاها ..

اقتربت ريمان من عاليا ، وسألها بهمس :

-ها ايه الجديد ؟ كلمك ؟!

ردت عليها بخفوت :

-هو مافيش حاجة بتستخبي عليكي

غمزت لها ريمان وهي تضيف بمكر :

-لأ .. ما انتي عارفة أنا ليا لي مصادري

ابتسمت لها عاليا :

-انت هتقوليلي !

.....

في أحد المقاهي الحديثة ،،،،

أسند النادل المشروبات على الطاولة ، فشكرته ريمان ، ثم
إلتفتت سالي برأسها نحو رفيقتها عاليا ، ورمقتها بنظرات
غامضة قبل أن تسألها بهدوء :

-ها ايه جديدك ؟

أجابتها عاليا بإبتسامة سعيدة :
-هاتخطب لرامي قريب

هتفت سارة بسعادة جلية :
-مبروك !!

بينما رددت سالي بنبرة فرحة :
-الله الله ، إيه الأخبار الحلوة دي

ردت عليهما عاليا بإبتسامة مجاملة :
-تسلمولي يا بنات

أضافت ليلة قائلة :
-ربنا يكلمك على خير ، عاوزين نفرح بقى

بينما تساءلت ريمان بإهتمام :
-هاتعملي الخطوبة فين ؟

أجابتها عاليا بتهيدة وهي تضغط على شفتيها :

-هي قراية فاتحة ، وهاتكون على الضيق

ردت عليها ريمان متسائلة بجدية :

-طب ايه رأيك لو عملناها في مكان مفتوح ؟

هتفت سارة بحماس :

-واو ، فكرة حلوة ، ايه رأيك يا عالييا ؟

هزت عالييا كتفيها وهي تقول بحيرة :

-مش عارفة

أوضحت ريمان وجهة نظرها بهدوء :

-بصي الكل الوقتي بيحب يعمل الأفراح والخطوبات في الـ

Open Area ، بتبقى شيك ، وهادية وحلوة

وافقتها سارة في رأيها وهي تقول :

-أها .. أكيد

عبست عاليا بوجهها ، وإستندت بطرف ذقنها على مرفقها ،
وهمست بعبوس :

-أنا مشكلتي الوقتي هالبس ايه ؟

وضعت ليلة كفها على كتف عاليا ، وردت بتفاخر واضح :

-لأ ماتشليش هم يا قلبي ، دي لعبتي

أضافت سالي بمرح :

-طبعاً ده ليلة خبيرة الشلة .. دي فاشونيستا

فقهت الفتيات على دعاية سالي الأخيرة ، واتفقن سوياً
على مساعدة عاليا في كل شيء تحتاجه خلال الفترة القادمة
حتى تصبح أحلى العرائس وأكثرها رقة وجمالاً ..

.....

بعد يومين ،،،

في مسرح مدارس اللافانيا ،،،،

تولت ميادة تقديم الجزء الأول من فقرات حفل نصف العام
الدراسي .. وتم تنظيم المراحل الخاصة بالرياض وفق جدول
معين لتقدم كل مرحلة عرضها على حدا ..

كذلك تولت هناء تقديم الجزء الثاني من الحفل ..
بينما عمدت سالي إلى تنسيق الفواصل الغنائية خلال
العروض ..
تفاعل أولياء الأمور مع أطفالهم الذين كانوا يتحدثون
بطلاقة وبثقة واضحة ..
وأشادوا بالجهد المبذول خلال تلك الفترة لإيصالهم إلى هذا
المستوى الأكاديمي المتقدم ..
انتهت منة من فقرتها ، والتي حازت على الحاضرين ،
وإنهالوا عليها بالتصفيق المتواصل ، وولجت إلى داخل
الكواليس وعلى ثغرها إبتسامة عريضة ..
تهدت بإرتياح لتمكنها من طرح فكرتها بطريقة تتلاءم مع
الأطفال ، فأحرزت النجاح المطلوب ..
أسرعت هناء خلفها لتهنئها ، ولكنها نسيت إغلاق
الميكروفون ، فبدى صوتها واضحاً وهي تقول :
-بت يا منة ، عرضك كان حلو

هتفت منة بسعادة :

-بجد

ردت عليها هناء بثقة :

-أه ، أوي ، طلعا كويسين وشرفوكي

صاحت ميادة بنبرة مرتفعة وهي تلوح للصغار بيدها :
-بس يا ولاد ، اهدوا ، احنا اللي علينا الدور ، وآآ...

ضحك الجالسين في المسرح على ما يُقال في الكواليس ،
فأسرعت سالي بتشغيل أغنية ما للتغطية على الأصوات
الداخلية ..

وركضت ريمان نحوهن ، وهتفت بصوت شبه لاهث :
-المايك مفتوح ، اقلوه

وضعت هناء يدها على صدغها ، وهتفت مصدومة :
-اووف ، كل حاجة بانت

حركت منة شفيتها للجانبين ، وأضافت بإستكار :
-يادي الفضايح

تسائلت هناء بخوف وهي تبتلع ريقها :
-هو في حد خد باله ؟

ردت عليها ريمان بامتعاض :
-كل اللي تحت

هتفت منة بنزق :
-يالهوري ، هانتفخ في الحكاية دي !!!

همست هناء بقلق وهي تشير بكفيها :
-استر يا رب

.....

على الجانب الآخر ، إستعد آياز بأطفاله لتقديم فقرته
الأخيرة في عرض اليوم .. وتأكد من هيئة الصغار ،
وحمسهم قائلاً :

-او عوا تخافوا ، وافرحوا باللي بتعملوه ، انتو أحسن كلاس
، وأشطر أطفال

هتف بعض الصغار بنبرة طفولية بريئة :
-بنحك يا مستر

رد عليهم بإبتسامة عريضة :
-وأنا كمان بأحبكم

أشارت ليندا بيدها له وهي تقول :
-يالاً يا مستر آياز ، الدور عليك

أوما برأسه مجيباً إياها بهدوء :
-أوكي

ثم إستدار برأسه في إتجاه الأطفال ، وسألهم بحماس :
-Ready (جاهزين) ؟

رد عليه الصغار بحماسة مفرطة :
-Yes (نعم)

لوح لهم بذراعه وهو يقول بنبرة مشجعة :
-يالاً ، Let's go

وبالفعل تحرك الأطفال بصحبة معلمهم ، ووقفوا على خشبة المسرح بثقة كبيرة ، وتسابقوا – والإبتسامات البريئة على وجوههم – في تأدية أدوارهم بحماسة رهيبية أشعلت الأجواء بالتصفيقات والتشجيعات الممزوجة بالضحكات العالية ..

لم يصدق آياز أذنيه ، فقد ظفر اليوم بنجاحه الذي سعى إلى تحقيقه ، وجاء من أقاصي الأرض لتنفيذه على أرض الواقع ...

أدمعت عينيه متأثراً ، لكنه تمالك نفسه ، والتف حوله الصغار وأحاطوه ، فطوقهم بذراعه ، وهتف فيهم بفرحة عارمة :
-You're my sunshine- (انتم ضوء الشمس بالنسبة إليّ)

أسدلت الستائر عليه وعلى الأطفال والتصفيقات مازالت مستمرة ..

تجمع حوله المعلمات ، وحضرت الناظرة إعتماذ ، وشكرته قائلة :

-النهاردة بس أقدر أقول مبروك يا مستر آياز ، إحنا كلنا فخورين إنك واحد مننا

لمعت عينيه ، وبدى متأثراً وهو يجيبها :

-أنا مش عارف أقول ايه !

هتفت هبة بحماس :

-مبروك

بينما أضافت ميادة بجدية :

-تستاهلها يا مستر

رددت ليندا بإبتسامة مشجعة :

-برافو آياز

وهتفت هناء :

-ألف ألف مبروك ، اتبسطنا كلنا بالعرض

وأضافت منة مشجعة :

-برافو يا مستر آياز

أردفت ريمان قائلة بحماس وعينيها تتحدثان عن إحساسها

:

-من أحسن العروض اللي اتعملت

أكملت الناظرة إعتماذ قائلة بنبرة جادة رغم هدوئها :
-إنتو كلكم هنا أسرة واحدة ، وقدرتم تعملوا مع بعض اللي
محدث بيقدر يعمله ، ربنا يوفقكم دايمًا

رد عليها الجميع بسعادة :
-يا رب

هتفت ميادة بنبرة رسمية :
-ياللا عشان نسلم الأطفال لأولياء أمورهم ، وبعدها نحتفل
كلنا

قاطعتهم عاليًا قائلة بحماسة مفرطة :
-طيب بالمناسبة دي أحب أعزكم كلكم على خطوبتي الجمعة
الجاية في نادي ((....))

احتضنتها المعلمات ، وتسابقن في تهنئتها ، فهتفت سارة
بفرح :
-ألف مبروك يا عاليًا

ردت عليها عاليا بابتسامة سعيدة :
-الله يبارك فيكي يا سوو

صاحت هبة وهي تغمز لها :
-ربنا يهنكي يا رب

بينما هنأتها الناظرة إعتاد بابتسامة هادئة على ثغرها :
-مبروك يا مس عاليا

ردت عليها بامتنان :
-الله يبارك فيكي يا مس إعتاد

أردف آياز قائلاً بتهيدة :
-مبروك

ردت عليه عاليا بثقة :
-إنت مش محتاج عزومة

أشار لها بإبهامه وهو يقول :
-عارف !

أضافت ليلة قائلة بجدية :
-أنا عندي المصور ، مش هتحتاجوا لحد غريب

ردت عليها عاليا بضحكة رقيقة :
-أكيد أيمن

تابعت ليلة قائلة وهي تعض على شفتيها :
-صح ، هو هيظبطك

هزت رأسها موافقة وهي تهمس بـ :
-تمام

صاحت هبة بنبرة عالية وهي تصفق بيدها :
-وأخيرا عندنا عروسة !!!

.....

في اليوم المنشود ،،،

تم تزيين الحديقة الخلفية بأحد النوادي الشهيرة بديكورات بسيطة لتعطي مظهراً يتناسب مع حفل الخطبة المُقام بها بعد وقت الظهيرة ..

ووزعت الطاولات بشكل دائري حتى يتمكن الجالسين من رؤية العروسين بصورة واضحة ..

كذلك تم وضع أعمدة جرانيت قصيرة تزدان قممها بورود بيضاء رقيقة عند المدخل .. وصممت بوابة رقيقة من البلاين ليلج العروسين من خلالها ..

إلتقط أيمن صوراً متنوعة للمكان ولباقات الورد الأنيقة قبل أن يصل العروسين للحديقة .. ثم اختطف هو بعدسة كاميرته لقطات مميزة لهما وهو يتأبطان ذراع بعضهما البعض ، وتعتمد التركيز على ابتسامة عاليا الناعمة ، ونظرات رامي العاشقة لها ..

سريعاً إمتلأ المكان بالحضور ، وتسابقت المعلمات في إلتقاط الصور مع العروسين وتسجيل تلك اللحظات الجميلة ونشرها على مواقع التواصل الإجتماعية ..

إرتدت عاليا فستان خطبتها من اللون النبيذي ، خصره ضيق ، وله ذيل قصير .. ثم ينسدل للأسفل بتموجات رقيقة ، كما

أن أكتافه مبطنة بقماش الشيفون ، والذي تم تطريزه بورد صغير من نفس اللون ..

جلست هي على الأريكة المخصصة للعرائس ، وإلتفت حولها رفيقاتها .. وتبادلن الكلمات المهنئة لها ..

بينما وقف خلف رامي آياز ، وربت على كتفه مشجعاً إياه .. ثم مال على رأسه ، وهمس له بسعادة :

-مبروك يا رامي

وضع رامي يده على كفه ، ورد عليه ممتناً :

-الله يبارك فيك يا إيزوو ، وعقبالك

استدار برأسه نحو ريمان ، ورد عليه قائلاً بثقة :

-أكيد ها يحصل !

ثم أمسك رامي بيدها ، وألبسها خاتم الخطبة ، فتعالت الزغاريد المصحوبة بالتهليلات والتصفيقات ..

قامت والدة عاليا بتوزيع الحلوى والشيكولاته على المتواجدين ، واقتربت من رانيا التي كانت عابسة الوجه ، وناولتها قطعتين من الشيكولاته وهي تردد بصوت حاني :

-بكرة ربنا هيعدهالك يا بنتي ، اضحكي انتي بس

رسمت ابتسامه سخيفه على ثغرها ، وردت عليها قائلة :
-حاضر يا طنط !

ثم غمغت مع نفسها بامتعاض :
-افرجها من عندك يا رب !

قبلت منة عاليا من وجنتيها ، وهتفت بنبرة مرحة :
-أنا قولت أسلم عليكى قبل ما أتوكل على الله وأسافر

سألتها عاليا بعبوس زائف :
-هو خلاص النهاردة ؟

أومأت برأسها وهي تقول بجديه :
-ايوه ، يدوب الحق الطيارة ، ده أنا كمان متأخرة

صافحتها عاليا بقوة ، و دعت لها قائلة :
-ربنا معاكى ، واجازة عليكى إن شاء الله

تتهدت وهي تردد :

-يا رب !

ثم لوحت بذراعها للجميع وهي تهتف بنبرة مرتفعة :

-باي يا بنات

ردت عليها هناء :

-باي يا منون

وأضافت ميادة بمرح :

-انجوي يا بيبي

بينما هتفت هبة بمزاح وهي تشير لها :

-ترجعي بالسلامة ، وماتتسيناش

ردت عليهن منة بإبتسامة لطيفة :

-حاضر ، باي

.....

لاحقاً ، إستقلت رانيا سيارة الأجرة لتعود إلى منزلها ، فقد سئمت الجلوس بمفردها ، وتأمل الحاضرين دون أن يعيرها أي أحد الإنتباه ..

أعطت للسائق أجرته ، وترجلت من السيارة ، ولكنها تسمرت في مكانها .. فقد كان يقف أمام مدخل البناية كلباً متشرداً .. فخشيت أن يحدث معها مثلما حدث من قبل مع عالياً ..

فكرت في الركض ولكنها تراجعت سريعاً عن تلك الفكرة بسبب إرتدائها لفستانٍ طويل ، وبالتالي سيعيق حركتها ، وربما يؤدي إلى تعثرها ، فتصبح فريسة سهلة له ..
ضغطت على شفيتها ، وتساءلت مع نفسها بحيرة :
-طب أعمل ايه الوقتي ؟

ظلت واقفة في مكانها لبرهة تراقب الطريق بنظرات حذرة حتى آلمتها قدميها ، فغمغت بإنزعاج وهي تزفر بصوت مسموع :

-هو مش هايمشي في يومه ، وأنا مش معايا رصيد أكلم بابا ينزل يهشه !

توقف إلى جوار الرصيف سيارة ما فارهة ، وأنزل قائدها
النافذة الملاصقة له ، وأطل برأسه نحو رانيا ، وسألها
بهدوء جدي :
-في مشكلة حضرتك ؟

فغرت رانيا شفيتها مصدومة ، ورمشت بعينيها غير مصدقة
ما حدث توأ .. فقد كان الشاب وسيماً ، ويعرض عليها
مساعدته ..
ظنت أنها تتوهم ما تسمعه ، فسألته بإندهاش يعلو قسما
وجهها :

-إنت .. إنت بتكلمني أنا ؟

أوما برأسه إيجاباً وهو يرد عليها :
-أيوه !

ثم ترجل من السيارة ، وحقق بها بنظرات ثابتة ، وسألها
بهدوء :

-انتي مش عارفة تدخلني من الكلب ؟

هزت رأسها عدة مرات وهي تجيبه بتلهف :

-آآ.. أيوه

تقوس فمه بإبتسامة ودودة ، وتشدق قائلاً :
-لحظة ، أنا هاساعدك

وبالفعل تحرك الشاب للأمام ، فتأملته رانيا بنظرات
متفحصة ودقيقة ، فبدى أنيقاً للغاية ، ومهنماً بصورة لافتة
، وكذلك كان وجهه حسن الطلعة ..

ازدردت ريقها ، وتتهدت بحرارة وهي تهمس لنفسها
بسعادة :

-بينها مكتوبالي !

أشار لها بيده وهو يقف بجسده أمام الكلب - الذي كان
مسالماً للغاية - ليمنعه من الاقتراب منها ، وهتف بنبرة
مرتفعة :

-اتفضلي يا أنسة

همست لنفسها بسعادة :

-وحياتك أنسة ونص وتلاتربع !

تابع قائلاً بصوت جاد :
-ياللا ، متخافيش ، أنا هادخلك
-م.. ماشي

تحركت هي خلفه ، ونظرات الإعجاب المصحوبة بالسعادة
تعبّر عنها ..

أبعد الشاب الكلب عن المدخل ، وإستدار ليوأجهاها وهو
يقول بإبتسامة خطيرة :
-ده كلب عادي ، مش مؤذي

تلعثمت وهي ترد عليه بإمتنان :
-ش.. شكراً ، انت .. انت انسان ذوق وأنا عاجزة عن شكرك

زادت إبتسامته سحراً وهو يقول بصوت رخم :
-ولا يهملك ، أنا معملتش حاجة ، اتفضلي

همست له بإمتنان أكثر :
-ميرسي

أضاف قائلاً بهدوء :

-وأنا موجود لو في أي حاجة ، أنا محلي في آخر الشارع

حركت رأسها قليلاً وهي تتمتم بخفوت :

-اوكي

لوح لها بكفه وهو يتحرك مبتعداً :

-مع السلامة يا آنسة

ردت عليه بإبتسامة بلهاء :

-باي ، وفرصة سعيدة

تبعته بنظراتها حتى ركب سيارته ، وتحرك بها لأخر

الطريق ، فتنهدت بحرارة وهي تهز رأسها للجانبين ،

وهتفت بتمني :

-اوعدنا يا رب بالحلويات دي !

.....

في حفل الخطبة ،،،،

تواصلت فقرات الحفل ما بين الغناء ، ورقص الشباب ،
وفقرة أخرى خاصة بالتنورة ، وكذلك العروض الشعبية ..
وتفاعل الجميع معها ..

تعمدت سارة أن تتواري عن الأنظار حتى لا تلتقي
بالمعلمة حنان أو أخيها ، فقد ضايقها ملاحظته لها في كل
مكان ، خاصة وأنها قد رآته في العرض المدرسي .. وفرض
عليها نفسه بصورة مزعجة مما سبب لها الحرج .. وحبست
نفسها طوال الوقت في الكواليس ..

تنفست الصعداء لرؤيتهما يتركان الحفل ، وهمست لنفسها
بسعادة :

-أوف ، واحد لا يُطاق ، مفكر نفسه ظريف ، وهو غلس ،
الحمد لله إنه مشى !

رأتها سالي فتعجبت من تصرفها الغريب ، واقتربت منها
وسألتها بنبرة مرتفعة وهي قاطبة لجبينها :
-إيه يا بنتي مستخبية هنا ليه ؟

ردت عليها بإقتضاب :

-مافيش

لكزتها سالي في كتفها بخفة وهي تقول :

-طب يالا عشان نتصور مع عاليا

-ماشي يا سالوكة

لم يكف أيمن عن رمق ليلة بنظرات الإعجاب ، وتحمس كثيراً لرؤيتها تتجاوب معه وتبادلته بنظرات رومانسية وناعمة .. وترقب بشغف ردها على طلبه بالارتباط بها .. ولكنه كان مطمئناً بدرجة كبيرة من مشاعرهما نحو ..

وقف الاثنيين سوياً وتبادلا حديثاً ناعماً بينهما ..
مسح أيمن عدسة الكاميرا بمنشفة ورقية ، وتشدق قائلاً :
-عقبالنا

ردت عليه بحياء :

-إن شاء الله

تابع قائلاً بنبرة هادئة :

-أنا مش مستعجل ، خدي راحتك في التفكير والرد ، احنا مع بعض

أخضت عينيها للأسفل ، وردت عليه باختصار :

-اوكي

.....

بحث آياز بعينه عن ريمان ، وبالفعل وجدها تقف
بجوار إحدى الشجيرات لتلتقط صوراً لنفسها ، فابتسم لها ،
وتحرك نحوها بخطوات ثابتة ..

استطرد حديثه قائلاً بإبتسامة متحمسة :

-ممكن أخذ من وقتك دقائق

ردت عليه بإبتسامة رقيقة :

-أكيد

تحنح بصوت خشن ، وتابع بتلثم :

-ريمان ، أنا .. أنا آآ...

سألته باهتمام وهي مسبلة عينيها :

-إنت ايه ؟

أجابها بارتباك قليل وهو محقق في عينيها :
-هو أنا مش عارف مالي ، بس .. بس جوايا آآ.. يعني أقصد
آآ

شجعته ريمان قائلة بمرح وهي ترمقه بنظرات حنونة :
-خذ نفسك ، واتكلم بالراحة أنا سمعك !

رد عليها آياز ضاحكاً :
-مش عارف الموضوع صعب أوي

وضعت اصبعها على طرف أنفها ، وأخفضت رأسها وهي
تقول بخفوت :
-خذ وقتك

أخذ آياز نفساً عميقاً ، وحبسه في صدره للحظات ، ثم
أطلقه دفعة واحدة ، وتابع حديثه قائلاً :
-شوفي ، أنا حاسس ناحيتك بمشاعر مش قادر أفسرها ،
بس بأكون في حالة مختلفة وأنا معاك

أومأت برأسها وهي تصغي له باهتمام ، فأكمل بنفس
الثبات الإنفعالي :

-أنا مش حابب أستعجل في أي خطوة بدون ما أكون متأكد
من اللي أنا عاوزه ، بس حابب إنك تعرفي إن وجودك معايا
الفترة الجاية هايفرق كثير !

تأمل هو تعابير وجهها ، فوجدها مرتخية إلى حد ما ..
بينما ردت هي عليه بإيجاز :
-اوكي

برر آياز موقفه قائلاً :

-أنا هدفي من البداية كان أحقق رسالتي وعملت ده ،
ونجحت كمان فيه ، وفي نفس الوقت مكانتش بأفكر في
الإرتباط ، وماتوقعتش إن في مشاعر جوايا هتظهر ناحية
أي واحدة هنا
-أنا آآ...

قاطعها مكماً بجدية :

-أنا مش عارف أخبي مشاعري ، وعاوزك تعرفيها ، أنا
صاديق في إحساسي ناحيتك ، وهاطلب منك طلب

سألته باهتمام بعد أن ارتسمت علامات القلق على تعابير
وجهها :
-ايه هو ؟

رد عليها بهدوء حذر :

-نستنى شوية لحد ما أرتب أموري كلها ، وساعتها هاعمل
كل حاجة انتي نفسك فيها ، ها رأيك ايه ؟

ضغطت على شفيتها بقوة ، وأجابته بتهيدة حائرة :
-مش عارفة ، بس آآ..

مد يده ليمسك بكفها ، وضغط عليه بأصابعه قليلاً ليطمئننها
، وهمس لها بصدق :

-ريمان ! طالما احنا مع بعض كل اللي بنتمناه هيحصل

التوى ثغرها بإبتسامة ناعمة ، وردت عليه بخفوت وهي
ترمقه بنظرات رومانسية :

-اكيد ، وأنا معاك ، وهاستناك !

على متن الطائرة ،،،

تحركت منة في الممر الذي يتوسط المقاعد بخطوات شبه بطيئة لتحقق بنظرات دقيقة في أرقام المقاعد .. ولكنها لم تتمكن من الوصول إلى مقعدها .. فعاونتها المضيفة في الوصول إليه ..

نزعت عن ظهرها حقيبتها ، وضيق ما بين حاجبيها وهي تراقب الجالس في المقعد الملاصق لها ..

عبس وجهها نوعاً ما ، فقد أرادت الجلوس بجوار النافذة .. التفت الشاب نحوها ، وسألها بنبرة جادة :

-في مشكلة ؟

ردت عليه بإقتضاب :

-لا

ابتسم لها قائلاً بهدوء :

-حضرتك عاوزة تقعدني جنب الشباك ؟

ردت عليه بتلعم :
- آآ.. لأ عادي يعني ، ده .. ده مكانك

نهض عن مقعده ، وأشار لها بيده وهو يتابع بهدوء :
- تعالي اتفضلي ، مافيش مشكلة

ثم تنحى جانباً لتتمكن هي من الدخول ..
بادلته منة إبتسامة مهذبة وهي تقول :
-ميرسي لذوقك

التوى ثغره قليلاً وهو يرد عليها :
-العفو ، دي حاجة عادية

استقرت منة في مقعدها ، ورتبت أشياءها بحذر ، ثم أمسكت
بهااتفها وظلت تعبت به ..

تابعها ذلك الشاب بإهتمام ، ولفت أنظاره أنها تحمل ورقة
مشابهة لما معه ، فأثاره الفضول لسؤالها عنها ، وبالفعل لم
يضع وقته ، وسألها بجدية :

- هو حضرتك طالعة تبع رحلة معينة ؟

ردت عليه بهدوء :

-ايوه ، أنا مشرفة في رحلة مدارس اللافانيا

تابع هو قائلاً بإبتسامة مغترة :

-تمام ، تعرفي إن أنا المنظم للرحلة دي

رفعت حاجبيها للأعلى ، وقالت بعدم تصديق :

-والله !؟

رد عليها موضحاً :

-أيوه ، أنا وكيل سفريات ، والرحلة دي تبني ، يعني أنا اللي

حاطط البرنامج

فغرت شفتيها لتقول بذهول :

-مش معقول

أكمل قائلاً بإبتسامة سعيدة :

-صدفة غريبة صح ؟

مطت ثغرها وهي تردد :
-جداً

أردف قائلاً بهدوء :
-أتمنى إن برنامج الرحلة يعجبك
-إن شاء الله

ثم تابع بابتسامة مشرقة :
-بالمناسبة أنا اسمي خالد

ردت عليه بخفوت :
-وأنا مس منة

سألها خالد بنبرة مهتمة :
-مس .. واو .. مدرسة ايه بقى ؟

أجابته بإيجاز :
-انجليش

أكمل خالد قائلاً بجدية :

-عارفة يا مس إن الأتراك مش بيتكلموا إلا تركي وبس !؟

ردت عليه بثقة وهي تشير بيدها :

-أيوه ، بس أنا بأتابع كام مسلسل تركي فحافضة كام كلمة
كده على أدي

هز رأسه بإعجاب ، وتابع قائلاً :

-كويس ، أنا بأتكلم تركي كويس ، وأكيد هساعدك لو وقفتي
في حاجة

-اوكي ..

-رحلة سعيدة عليكي يا مس منة

-وعليك إنت كمان يا مستر خالد !

.....
في حفل الخطبة ،،،

استمر الحفل لعدة ساعات ، وتناول الجميع المشروبات
والجاتوه ، ثم حانت لحظة إنتهائه ، فصاح أيمن بصوت
جهوري وهو يلوح بيده للمتواجدين :
-يا لا يا جماعة ، صورة أخيرة تذكارية قبل ما العروسين
يمشوا

وبالفعل تحركت المعلمات نحو كوشة العروسين ، وأحاطت
بهما .. وكذلك انضم إليهم ذويهم ..

مال المهندس سرحان على ابنه ، وبارك له قائلاً :
-مبروك يا رامي

رد عليه رامي بسعادة :
-الله يبارك فيك يا بابا

أضافت والدته قائلة بجدية :
-عروستك زي القمر ، حظها في عينيك

رد عليها بمزاح :

-دي لسه خطوبة يا ماما

أكملت قائمة بإبتسامة صافية :

-أديني بوصيك من دلوقتي

هز رأسه موافقاً وهو يردد بإختصار :

-حاضر

صاح أيمن بنبرة مرتفعة وهو يسلط عدسة كاميرته على
الواقفين :

-ياللا يا جماعة ، جاهزين

أشار له الجميع بإستعدادهم لإلتقاط الصورة التذكارية ..

فتابع هو قائلاً :

-تمام ... 1 ، 2 ، 3

بدت السعادة على أوجه جميع المحيطين بالعروسين ،
وزادت إبتسامتهم إشراقاً وهم يحدقون في عدسة الكاميرا

...

تنوعت نظراتهم ما بين العشق ، والشغف ، والرومانسية ،
والإعجاب ، والترقب ، والفرحة والانتظار ..

نعم ، فقد تحققت أحلام بعضهم على أرض الواقع ..

وخطى البعض الآخر خطواته الأولى نحو تحديد مستقبله
بصورة جدية وناجحة ..

وبقيت قلة قليلة تترقب بتلهف معرفة السبيل الصحيح إلى
أهدافها ..

كما ظلت بعض الأحلام في قائمة الأمنيات حتى يحين موعد
تنفيذها ..

ولكن الأكيد في نهاية المطاف أنه تم التوفيق بين (**راسين**
في الحلال)

تمت بحمد الله

الأعمال السابقة :

- دعني أحطم غرورك
- رهان ربحه الأسد
- الفريسة والصيد - الجزء الأول
- خطأ لا يمكن إصلاحه (رفقا بالقوارير)
- فريسة غلبت الصيد - الجزء الثاني
- فراشة أعلى الفرقاطة
- دميمة لعنها الحب (نوفيلا قصيرة)
- كتاب الحب (نوفيلا قصيرة)
- سيدرا (نوفيلا)
- وجه لا يصدأ أبداً (نوفيلا قصيرة)
- اليوميات الرمضانية (نعمل إيه في أماني ، حتى مطلع الفجر ، في بيتنا بطة ، خير يعودلك شر يرجعلك)
- أربعة شكلوا حياتها (رواية شرقية)
- شهد الأفاعي (نوفيلا - قيد الكتابة)

- كبرياء رجل شرقي (نوفيلا قصيرة)
- ذئاب لا تعرف الحب (الجزء الأول)
- ذئاب لا تغفر (الجزء الثاني)
- وانخت لأجلها الذئاب (الجزء الثالث)
- وبقي منها حطام أنثى (قيد الكتابة)